

Ўзбекистон Республикаси Олий ва ўрта махсус таълим вазирлиги

ШУХРАТ ЭРГАШЕВ

**ЖАҲОН ТАРИХИ
(Янги давр. 1-қисм. XVI–XVIII асрлар)**

*Олий ўқув юртлари 5110600 «Тарих ўқитиши методикаси»
таълим йўналиши учун ўқув қўлланма*

ТОШКЕНТ
«O'ZBEKISTON»
2013

УО‘К:
КВК

Ўзбекистон Республикаси Олий ва ўрта махсус таълим вазирлиги томонидан олий ўқув юртлари 5110600 «Тарих ўқитиши методикаси» таълим йўналиши талабалари учун ўқув қўлланма сифатида тавсия этилган

Масъул мухаррир: тарих фанлари доктори,
профессор Раҳмон Фармонов

Тақризчилар: тарих фанлари номзоди Тўлқин Бобоматов
тарих фанлари номзоди доцент Равшан Сиддиқов

Ҳозирги замон цивилизациясининг шаклланиш жараёнига Буюк географик кашифётлар, «нарх-наво инқилоби» ва улар оқибатида умумжахон бозори ва мустамлака тизимининг шаклланиши катта туртки бўлди. Натижада дунёвий фан ва маданият ривожланди, инсоннинг шаъни, кадр-қиммати тушунчалари кенг омма орасида қарор топди, шахснинг ташаббускорлиги ва тадбиркорлиги сингари хусусиятларига кенг йўл очилди, кишиларнинг дунёқарashi ва ҳаётида кескин ўзгаришлар юз берди. Бу давр жаҳон цивилизациясининг тезкор тараққиёт даври бўлиб, кейинчалик индустрисал цивилизация номини олди.

Ўқув қўлланмада жаҳон тарихининг янги даврини ҳозирги замон цивилизациясининг шаклланиш тарихи сифатида ёритишга харакат қилинган.

ISBN

© «O‘ZBEKISTON» NMIU, 2013

КИРИШ

Тарихга марксча қарап инқирозга учрагандан сўнг ўтган вақт ичида тарих ва фалсафадан пайдо бўлган адабиётларнинг аксариятида инсоният тарихини циклик динамика ва социогенетика назарияси асосида, нисбатан қисқа цикллардан то кўп асрлик цивилизацион цикллар ва минг йиллик катта цикллар асосида куришга харакат қилинади¹. Бу эса инсониятнинг ўтмиши, бугуни ва келажагини ибтидоий жамоа тузуми деб аталувчи узоқ мавхумлиқдан бошланган ва «коммунизм» деб аталувчи бошқа бир ададсиз мавхумлик билан якунланган бешта ижтимоий-иктисодий формацияларга анъ-анавий ажратишдан воз кечиш, янги, муқобил усусларни жорий қилиш имконини берди.

ХХ асрнинг биринчى ярмида тарихга цивилизацияли ёндошув фанда кенг тарқалди. Бунда тарих неолитдан бошланган локал цивилизацияларнинг тобора катта тезлик билан даврий алмашиниб туриши сифатида тасавур қилинади. Моддий ва маънавий маданиятнинг характеристига қараб фарқланадиган ҳамда ўз тараққиётида маълум босқичлардан ўтадиган локал цивилизациялар ва унинг яратувчиси – инсон ўрганишнинг асосий обьекти сифатида қаралади. Бу қарап XVIII асрда шаклланган бўлсада (асосчиси италиялик олим Д. Вико ҳисобланади), тарихга локал цивилизацияларнинг алманиш жараёни сифатида қарап XX асрда Гарб цивилизацияси мамлакатларида кенг тарқалди ва янада такомиллашди. Бу назарияни ишлаб чиқиши ва такомиллаштиришга Н. Данилевский, О. Шпенгер, П. Сорокин, К. Ясперс, А. Тойнби, Л.Н. Гумилев, О. Тоффлер, М. Вебер, Ф. Бродель, С. Хантингтон, М. Хайдеггер, каби олимлар катта ҳисса қўшдилар.

Афсуски гоявий утилитар доктриналар ҳукмрон бўлган совет мустабид тузуми даврида бу назарияни тан олиш ҳамда жаҳон ва Ватан тарихини ўқитишида қўллаш имконияти йўқ эди. Чунки ижтимоий фанлар коммунистик мафкура манфаатларига хизмат қиласади.

¹ Аслида бу ёндошув фанда янгилик эмас. Масалан, минг йиллик катта цикллар ҳакидаги назария буюк ватандошимиз АбуРайхон Берунийга тегишли.

Бу тузум ва унда ҳукмронлик қилган дормалар қулаши билан тарихий жараёнларнинг янги парадигмаларини ўзлаштириш учун кенг имкониятлар очилди, мустақиллик туфайли ҳақиқатни англаш омилини шакллантириш ва унинг муқим амал қилишига шароит яратиш имкони пайдо бўлди. Ватанимиз ва жаҳон тарихини ўрганишнинг янги, илмий холисликка асосланган принциплари ишлаб чиқилмоқда.

Франция, Англия, Германия ва Европанинг бир қатор бошқа мамлакатларида янги тарихнинг бошланиш нуқтаси қилиб Буюк географик кашфиётлар, Гуманизм ва Реформация қабул қилинган. Айнан географик кашфиётлар дунёнинг факат географик эмас, балки иқтисодий, ижтимоий ва сиёсий кўринишини ҳам тубдан ўзгартириб юборди. Географик кашфиётлар натижасида Фарбий Европа мамлакатларида «нарх-наво инқилоби»¹ юз бериб, бу воқеа ушбу мамлакатларда капиталистик муносабатларнинг ривожланиши учун катта туртки бўлди ва кейинчалик бир қатор Европа мамлакатларини метрополияга айлантирган мустамлакачилик тизимининг шаклланиш жараёнини бошлаб берди.

Шарқда айнан шу ҳодисанинг ўзи қарама-қарши жараёнларни келтириб чиқарди. Бу ерда турғунлик, иқтисодий ва маданий соҳаларда Ғарбдан орқада қолиши ҳоллари юз бериб, охир-оқибатда қачонлардир юксак тараққиётга эга бўлган Шарқ мамлакатларининг кўпчилиги мустамлака ва ярим мустамлакаларга айлантирилди. Шу тариқа мустамлака тизими ва умумжаҳон бозори вужудга келди. Инсоният тарихида биринчи марта жаҳон ҳалқлари тарихи бир бутунлик касб эта бошлади.

Осиё ва Африка ҳалқларининг янги даври анъанавий равища ушбу мамлакатларнинг мустамлакаларга айлантирилиш жараёнини қамраб олади. Жаҳон тарихининг маълум даври сифатидаги Янги тарихнинг ҳарактерли томонлари Европа учун ҳам, Осиё ва Африка мамлакатлари учун ҳам умумийдир. Аммо бу тарихий даврнинг мазмуни Ер шарининг ушбу турли минтақалари учун мутлақо турлича: Ғарбнинг илфор мамлакатларида капитализм ривожланиб, ҳукмрон муносабатларга айлангаётган эди; Осиё ва Африка мамлакатлари ак-

¹ Буюк географик кашфиётлар оқибатида мустамлака империялари шаклланиб, у ердан оқиб кела бошлаган катта бойликлар Европа мамлакатларида нарх-навонинг, биринчи навбатда қишлоқ хўжалик маҳсулотлари нархининг кескин кўтарилишига олиб келди. Бу ҳодиса олимлар томонидан «нарх-наво инқилоби» деб аталиб, Европада капиталистик муносабатларнинг шаклланишига катта таъсир кўрсатди.

синча, узок муддатли инқиroz даврига кирдилар ва кейин капиталистик давлатларнинг экспансия манбаига айландилар.

Осиёва Африка мамлакатлари тарихшунослиги шарқмарказчилик ёндошувиға асосланган бўлиб, минтақавий хронологик чегараларни белгиламайди. Кўпинча улар ўз мамлакатларидағи аник тарихий жараёнларни давр чегараси қилиб белгилайдилар. Масалан, кўпчилик Хитой тарихчилари Янги тарихнинг бошланиши деб биринчи «афюн уруши»ни (1840–1842), якуни деб эса Хитой Xалқ Республикасининг ташкил топишини (1949) оладилар. Биз на шарқмарказчилик, на европамарказчилик ёндошувларини бир томонлама ёқламаган ҳолда, юкорида кўрсатилган воқеаларнинг (Англия буржуа инқилоби билан Француз буржуа инқилоби ҳам) бирортаси бутун жаҳон микёсида тараққиёт векторининг кескин бурилишига олиб келган воқеалардан бўлмаганлигини таъкидламоқчимиз. Фақат Христофор Колумб (1492) ва Васко да Гама (1498) лардан бошланган Буюк географик кашфиётларгина дунё ҳаритасининг реал ўзгаришига олиб келган жараёнларга муқаддима бўлди ва бутун дунё ҳалқларининг ҳаётида кескин бурилиш ясади. Буюк географик кашфиётлардан кейин том маънода Янги давр бошланди.

«Янги тарих» термини дастлаб гуманист-тарихчилар томонидан истеъмолга киритилди. Улар Европа Уйғониши даврида дунёвий фан ва маданиятнинг ривожланиши, инсоннинг шаъни, кадр-қиммати тушунчаларининг кенг омма орасида қарор топиши, шахснинг ташаббускорлиги ва тадбиркорлиги сингари хусусиятларига кенг йўл очилиши ва булар натижасида кишиларнинг дунёқараши ва ҳаётида кескин ўзгаришлар юз берганлигини янги давр бошланиши учун асос қилиб олдилар. Янги давр, гуманистларнинг фикрича, кишиларнинг табиий тенглиги ғоясини, шахснинг эркинлиги ва шаъни каби демократик тушунчаларни ўзида мужассамлаштирган янгича дунёқарашнинг шаклланиши ва хукмон дунёқарашга айланиши билан ўрта асрлардан фарқ қиласди. Янги даврнинг энг характерли томонларидан бири, дунёни янгича тушуниш асосида шахснинг ташаббускорлиги, тадбиркорлиги учун кенг имкониятлар очишида ва шунинг натижасида иқтисодий ҳаётнинг гуркираб ўсишида намоён бўлади.

XVI асрдан XVII асрнинг биринчи ярмигача дастлаб Гарбий Европа мамлакатларида аста-секин янгича ҳаёт тарзи вужудга кела бошлади. Янги даврнинг шаклланиши мураккаб жараён бўлиб,

борган сари кўплаб халқлар ва мамлакатларни қамраб олди. Жаҳон халқлари тарихи ягона жараён сифатида шаклдана борди.

Европаликларнинг ҳаётида кўплаб янгиликлар пайдо бўлиб, уларнинг бир қисми Шарқдан кириб келди. Жамият тараққиётида янги белгилар пайдо бўлди:

- ўрта асрларнинг буюк ихтиrolари – компас, порох, китоб чоп этиш ва бошқалар ҳаётга янада кенгроқ татбиқ қилина бошланди;

- энергияни одатдаги манбалардан (сув, шамол) олиш ва уларни механизмлар билан узатишга ёрдам берадиган кўплаб янги кашфиётлар қилинди;

- мануфактура ишлаб чиқариши ривожланиб, аста-секин цехларни сиқиб чиқара бошлади;

- металларга ва ўточар қуролларга ишлов бериш жараёни такомиллаши;

- савдо ривожланди ва пул-товар хўжалиги мустаҳкамланди;

- савдо марказлари бўлган шаҳарлар жамият ҳаётида тобора каттароқ роль ўйнай бошлади;

- аҳолининг таркиби ўзгарди – шаҳарларда буржуазиянинг саломғи ошди, ёлланма ишчилар тез кўпая борди, зиёлилар сони ўси;

- буржуазия сонининг ошиши, унинг бойлик тўплаши, инсоний қадр-қиммат туйғусининг ривожланиши бу қатламни ўз озодлиги ва мулки учун, жамиятда ҳукмронликни қўлга олиш учун курашга бошлади;

- дехқонларнинг шахсий озодликка эришиши қишлоқ хўжалигида ҳам ёлланма меҳнат ва тадбиркорликнинг ривожланишига олиб келди. Кўплаб зодагонлар ҳам энди тадбиркорлик фаолиятига тортилди.

Бундан ташқари янги давр ривожланган шаҳар маданияти, антик давр тарихига бўлган улкан қизиқиши, уни идеаллаштириш, бадиий санъатнинг тез ҳаётийлашуви кабилар билан ҳам характерланади. Аслида, кўпчилик ҳолларда фожиали оқибатларга олиб келган урушлар, қўзғолонлар ва инқилоблар эмас, кишиларнинг яратувчанлик фаолияти, доимий изланиш ва интилиш маънавият ва маданиятда, ижтимоий ҳаётда ва иқтисодий ўсишда катта ижобий ўзгаришларга олиб келди.

Шу маънода гуманистик гоялар ҳам бирданига ўз-ўзидан пайдо бўлган эмас. У кишилар асрий интилишларининг, тинимсиз яратувчилик фаолиятларининг қонуний маҳсули эди. Ана шу гоявий

оқим – гуманизм доирасида XV асрдан бошлаб гуманистик тарих-шунослик ҳам шаклланди. Бу янги даврда тарихий фикр ривожи-нинг биринчи боскичи бўлди. Гуманистлар тарих фанини диний тасаввур ва афсоналардан холос қилиб, тарихни кишилар фаолия-тининг маҳсули деб қарадилар, тарихий воқеаларни рационалистик нуқтаи назардан тушунтиридилар ва шу асосда инсоният тарихини янгича даврлаштиришни ишлаб чиқдилар.

Гуманистларгача Европада тарихни тўрттга монархия – Оссурия-Бобил (Вавилон), Мидия-Эрон, Юнон-Македон ва Рим монархияла-ри бўйича даврлаштириш қабул қилинган эди. Гуманистлар бундай даврлаштириш ўрнига инсоният тарихини «қадимги», «ўрта» ва «янги»га бўлишни таклиф қилдилар. Улар бундай бўлишга мадани-ят характеридаги фарқни асос қилиб олдилар.

Хозирги кунда ҳам бир қатор олимлар ижтимоий-иктисодий хаётдаги ўзгаришларга асосланган марксистик даврлаштириш-га нисбатан гуманистларнинг даврлаштиришини ҳаётийроқ деб хисоблашади. Албатта гуманистлардан кейин ўтган давр орасида тарих фани жуда катта ривожланиш йўлини босиб ўтди. Кўплаб янги ғоялар, тарихни тушуниш ва тушунтиришга янгича ёндашув-лар пайдо бўлди, тарих фалсафаси шаклланди, тараққиётнинг янги конуниятлари очилди. Зотан, гуманистлар таклиф қилган даврлаш-тириш маълум маънода ўз долзарблигини ҳамон йўқотгани йўқ. Қолаверса, марксистик тарихшунослиқда янги тарихни даврлаш-тириш ўтган асрнинг 20–30-йилларида қандай зиддиятли бўлган бўлса, охиригача шундай давом этди. Бу ёндашувнинг асосини таш-кил қилган «инқилобдан – инқилобгача» даврлаштириш ўта шартли ва номукаммал эди.

Капиталистик муносабатларнинг шаклланишида, қарор топи-шида ҳам инқилоблар эмас, Гуманизм ва Реформация ғоялари би-лан боғлиқ янги билимларнинг шаклланиши, Буюк географик каш-фиётлар натижасида дунёнинг тузилиши ҳақида янги тасаввурлар-нинг пайдо бўлиши, янги савдо йўлларининг очилиши ҳал қилувчи аҳамиятга эга бўлди.

Бу давр Фарбий Европада миллатларнинг ва мутлақ монар-хия кўринишидаги миллий давлатларнинг шаклланаётган дав-ри эди. Юз бераётган ҳар бир ўзгаришда шаклланаётган янгича дунёқарашнинг таъсири сезилиб турарди. Энг аввало бутун ўрта асрларда хукмронлик қилиб келган инсонни ақлий, маънавий кам-

ситишга ва жисмоний чеклашга асосланган дунёқараш ўрнига янги, гуманистик дунёқараш шаклана бошлади.

Бошқа даврларда бўлгани сингари бу даврда ҳам инсоният даҳшатли вайронагарчиликлар, қирғинлар ва ижтимоий бўхронларга олиб келган урушлардан халос бўла олмади. Бунинг устига янги давр Европа халқлари тарихида уларнинг турмуш тарзини, жамиятнинг маънавий асосларини бир неча бор ўзгартириб юборган инқилоблар даври, мустамлакачилик асоратига тушган Америка, Осиё ва Африка халқлари тарихида эса мустақиллик ва озодлик учун тўхтовсиз курашлар даври ҳам бўлди. Аммо ҳаётдаги, ижтимоий муносабатлардаги, маънавият ва маданиятдаги, иқтисоддаги туб ўзгаришларга урушлар ва инқилоблар эмас, одамларнинг доимий яратувчилик фаолияти орқали эришилди.

Буюк географик кашифиётлар, табиий фанлардаги янгиликлар, католик черковига қарши кураш натижасида янгила ҳаёт тарзи шаклланиб борди. Капиталистик муносабатларнинг устувор муносабатга айланиб боргани сари жамиятнинг тобора кўплаб қатламлари ишлаб чиқариш ва тадбиркорлик фаолиятига тортилди. Бу давр Европа цивилизациясининг тезкор тараққиёт даври бўлиб, кейинчалик индустрисал цивилизация номини олди.

Китобда жаҳон тарихининг янги даврини ҳозирги замон цивилизациясининг шаклланиш тарихи сифатида ёритишга, бу жараёндаги Осиё, Африка ва Америка халқларининг ҳам ўрнини кўрсатишга ҳаракат қилинган. Миллий давлатларнинг ташкил топиши, дунё ҳаритасининг ўзгаришига сўзсиз катта таъсир кўрсатган географик кашифиётлар, урушлар, инқилоблар, кўзғолонлар сингари тарихий воқеалар билан бир қаторда янгила тафаккур, янгила дунёқарашнинг шаклланишига улкан хисса қўшган фан, адабиёт, санъат ва кундадлик турмушдаги ўзгаришларга ва албатта турии халқларнинг ушбу жараёндаги ролига алоҳида эътибор берилди. Ўқув қўлланма учун дастуруламал сифатида олинган ғоя – ҳар қандай цивилизация кўпдан-кўп халқлар, миллатлар, элатлар фаолиятининг ва ўзаро самарали таъсирининг маҳсули эканлигини ўқувчига етказишидир.

Ўқув қўлланма асосан олий ўқув юртларининг «тарих ўқитиши методикаси» таълим йўналиши талабалари учун мўлжалланган. У икки қисмдан иборат бўлиб, биринчи қисм XVI–XVIII асрларни ўз ичига олади. Бу даврнинг асосий хусусияти унинг ўтиш босқичи эканлигидадир. Бу даврда жамиятнинг ижтимоий тизими

ва иқтисодий базисида кескин ўзгаришлар юз берди. Иккинчи қисм XIX аср бошидан Биринчи жаҳон урушининг якунланиши – 1918 йилгача бўлган давр воқеаларига бағишлиланган. Бу даврда Ўарбий Европа ва Шимолий Американинг илғор мамлакатларида индустритал цивилизация қарор топди.

Янги даврнинг бошланиши, ҳозирги замон цивилизациясининг шаклланиши ўта мураккаб жараён эканлиги, бир китобда барча тарихий воқеаларни қамраб олиш ва уларга ҳаммани қаноатлантирадиган даражада баҳо бериш мумкин эмаслиги аён Шунинг учун ҳам ушбу воқеаларни баҳоли қудрат ёритишга ҳаракат қилинган.

I БЎЛИМ

ЕВРОПАДА ЯНГИ ДАВРНИНГ БОШЛАНИШИ

І БОБ. БУЮК ГЕОГРАФИК КАШФИЁТЛАР ВА МУСТАМЛАКА ТИЗИМИНИНГ ШАКЛЛАНИШИ

XV–XVII асрлардаги Буюк географик кашфиётлар Европада капиталнинг дастлабки жамғарилиш жараёни билан боғлиқ эди. Янги савдо йўлларининг очилиши, кашф этилган ерларнинг ўзлаштирилиши ва у ерлардаги бойликларнинг таланиши бу жараённи тезлаштириди, мустамлака тизимининг шаклланишини бошлаб берди, жаҳон бозорининг таркиб топишига, Европада савдо капиталининг, банк иши ва кредитнинг ривожланишига олиб келди. Қитъалар ўртасида иқтисодий ва маданий алоқалар ривожланди, жаҳон савдоси Ўрта денгизидан Атлантик океанига кўчди.

Илк янги даврда Европа ижтимоий-иқтисодий ва маданий тараққиётининг характери ҳам кўп жиҳатдан географик кашфиётлар билан боғлиқ бўлди. Бу пайтга келиб техник ва иқтисодий тараққиётда эришилган юқори натижалар европаликларга очилган янги ерлардан унумли фойдаланиш имконини берди.

Салиб юришларидан кейинок Шарқ билан ўрнатилган жадал савдо алоқалари, натижасида хинд, араб ва форс матолари, заргарлик ва ҳашам буюмларининг Европага оқиб келиши географик кашфиёларнинг иқтисодий асосларини ташкил қилди.

XV асрдаги географик кашфиётлар Пиреней ярим ороли давлатлари – Испания ва Португалия денгизчилари томонидан амалга оширилди.

Географик кашфиётларнинг биринчи, португал босқичи (1418–1460) шахзода Энрике Денгиз Саёҳатчisi¹ (1394–1460) номи билан боғлиқ. Бу иқтидорли ташкилотчининг дengiz экспедицияларида

¹ Энрике (Генрих) Денгиз Саёҳатчisi – 1394–1460 йиллари яшаган, Португалия шахзодаси, кирол Жуан I нинг ўғли. Португалияликлар томонидан Африканинг истило килинишини бошлаб берган истилочи, салибчи, олим ва ташкилотчи.

фақат зодагонлар эмас, савдогарлар ҳам иштирок этганлар. Ҳали XV асрнинг 20–30-йилларида ёқ португалияликлар Мадейра ороли-ни, Канар ва Азор оролларини кашф этдилар, Африка қирғоқлари бўйлаб жанубга қараб анча силжишди. Улар Баходур бурнини айла-ниб ўтиб, 1434 йили Гвинея ва Яшил бурун ороллари қирғоқларига, 1462 йили эса Съерра-Леоне қирғоқларига етдилар. 1486 йили Бар-толомео Диаш¹ томонидан Африканинг жанубий қирғоқларида Эзгу Умид бурнининг кашф этилиши Хиндистонга экспедиция тайёрлаш учун реал имконият яратди.

Португалиялик денгизчиларнинг кашфиётлари, саёҳат даврида денгизларнинг оқимлари, шамолнинг йўналиши кабилар тўғрисида улар тўплаган билимлар картографиянинг ривожланишига туртки бўлди. XVI аср бошларида тропиклар чизифи, экватор ва кенгликлар шкаласи акс эттирилган дастлабки хариталар пайдо бўлди.

Ернинг юмалоқлиги ҳақидаги таълимотдан келиб чиқиб, итали-ялик олим, астроном ва космограф Паоло Тосканелли² дунё харита-сини яратди. Унда Осиё қирғоқлари Атлантик океанининг гарбий соҳилларида қилиб белгиланган эди. Олим Европа қирғоқларидан гарбга қараб сузид Хиндистонга бориш мумкин деб ҳисоблайди. У ернинг экватор бўйлаб узунлигини нотўғри тасаввур қилиб, 12 минг км. хатоликка йўл қўяди. Кейинчалик буни буюк кашфиётга олиб келган буюк хато деб аташди.

XV аср охирига келиб кемаларни бошқариш асблори (компас³, устурлаб⁴) ва санъати анча ривожланиб, уларнинг очиқ денгиздаги холатини аникроқ белгилаш имконияти пайдо бўлди. Кемаларнинг янги тури – каравеллалар⁵ пайдо бўлиб, паруслар тизими ёрдамида шамол оқими бўйлаб ва шамолга қарши анча тез – соатига 22 км. тезлик билан сузиш мумкин бўлди.

¹ *Бартоломео Диаш* – 1450–1500 йиллари яшаган, Африкани айланиб ўтиб, Эзгу Умид бурнини кашф этган ва Хинд океанига йўл очган португалиялик машхур денгиз саёҳатчиси.

² *Паоло Тосканелли* – 1397–1482 йиллари яшаган флоренциялик олим. Астрономияга оид асрлари билан машхур бўлган.

³ Компас милоддан аввалги III асрда ёқ Хитойда кўлланилган бўлиб, аммо бу туридан денгизда фойдаланиб бўлмасди. Янги турдаги компас XIII асрда араблар орқали Европага кириб келган.

⁴ *Устурлаб (астролябия)* – денгизда географик кенгилик ва узунликни аниклашда ёр-дам берадиган бурчак ўлчайдиган асбоб.

⁵ *Каравелла (португалча Caravela-кема)* – ўртача катталиқдаги елканли кема. Буюк ге-ографик кашфиётларда ҳал қилувчи роль ўйнаган.

Европаликлар томонидан Осиёга Ўрта дengизи орқали ўзлаштирилган савдо йўллари, қуруқлиқдан ўтувчи карvon йўллари, шу жумладан Буюк ипак йўли 1453 йили Константинополни забт этган турклар томонидан ёпиб кўйилди. Натижада Европа Шарқдан келадиган товарлардан ажralиб қолди. Матолар, қанд, бўёқлар, мурч, занжабил, гуллар ва зираворлар Европа бозорларига қарийб келмай кўйди. Айниқса, мурчнинг етишмаслиги кундалик турмушга қаттиқ таъсир қиласи эди. Зоро, XVI асрда мурч олди-соттида пулнинг ўрнини босиши, келин учун бериладиган сеп сифатида қўлланилиши мумкин эди. Бу ҳол европалик савдогарларни Ҳиндистонга, «Зираворлар ороллари»га ва европаликларга деярли маълум бўлмаган, аммо афсонавий бой деб қаралаётган Япония ва Хитойга янги йўлларни излашга мажбур қилди. Европаликларни ташаббус кўрсатишга мажбур қилаётган яна бир сабаб пул зарб қилишда қўлланиладиган қимматбаҳо металларнинг етишмаслиги эди. Бу пулларсиз савдо, хусусан, Шарқ билан савдо ҳам жадал ривожланилиши мумкин эмасди. Аллақачон бойлик белгиси бўлиб қолган олтиннинг янги захираларини топиш европалик савдогарлар, зодагонлар ва ҳатто хукмдорларни ҳам безовта қилиб кўйганди.

Кишилардаги тадбиркорлик руҳи, бойликка, капитал жамғаришга интилиш, инсоннинг имкониятларига ишонч туйғуси энг дадил режаларни ҳам амалга ошириладиган қилиб кўйди.

Ҳиндистонга ғарбдан йўл очиши фикри шундай дадил режалардан эди. Ўз-ўзича бу ғоя янги эмасди¹, уни антик давр алломаларининг китобларидан, араб-мусулмон олимлари асарларидан ҳам топиш мумкин эди. Хусусан, буюк ватандошимиз Абу Райхон Беруний биринчилардан бўлиб океан ортида ер борлигини тахмин қилган. Ҳиндистонга янги йўлларни топиш европаликлар учун ҳаётий заруратга айланиб қолганида Атлантик океани орқали (денгизчилар уни «Зулмат денгизи» деб аташарди) ғарбга томон сузиб, бу мамлакатга бориш режаси пайдо бўлди. Бу лойиҳани амалга оширишга жон-жаҳди билан киришганлардан бири генуялик Христофор Колумб² эди. У Португалия, Англия ва Франция қироллик уйларига ўзининг Тосканелли томонидан маъкулланган, Атлантик океани-

¹ Баъзи маълумотларга қараганда, Америка кирғокларига Колумбдан 70 йил олдин хитойлик Чжэн Хэ (1371–1435) кемалари етиб борган. Карапнг: А.А. Маслов. Утраченная цивилизация: в поисках потерянного человечества. – Ростов н/Д: «Феникс», 2005. С. 206.

² Христофор Колумб – 1451 – 1506 йиллари яшаган, 1492 йили Американи кашф этган машхур дengиз саёҳатчisi.

да ғарбга қараб сузиб, Ҳиндистон қирғоқларига бориш режасини таклиф қилди. Португалияликлар бу даврга келиб Африка орқали Ҳиндистонга йўл очиш арафасида турган эди, шу сабабли кирол Альфонс V Колумбга рад жавобини берди. Франция ва Англия эса экспедиция хозирлаш учун етарли флотга эга эмасди, бунинг устига бу мамлакатлардаги ички вазият ҳам экспедиция жўнатиш имконини бермасди. Шу сабабли Колумб Испаниянинг буюк қироллари Изабелла ва Фердинандни¹ янги денгиз йўлларини очиш мақсадида экспедиция жиҳозлашга кўндириш учун узок йиллар уринди.

Ниҳоят, 1492 йил 17 апрелда Испаниянинг қироллик оиласи Колумб билан шартнома тузди ва экспедицияга пул ажратди. Шартномага биноан X. Колумб янги очилган ерларнинг вице-қироли қилиб тайинланиши, адмирал унвонини мерос қилиб олиши, янги очилган ерлардан олинадиган фойданинг 1/10 қисмини, янги ерлар билан қилинадиган савдодан тушадиган даромаднинг эса 1/8 қисмини эгаллаши лозим эди.

1492 йил 3 август куни «Санта Мария», «Пинта» ва «Нинья» кемаларида Колумб экспедицияси йўлга чиқди. Колумбнинг кўплаб қийинчиликларни енгишига тўғри келди: номаълум томонга сузиш учун тайёр турган денгизчиларни топиш осон эмасди, узок сузиш вақтида уларда муваффақиятга ишончни сақлаб туриш ҳам қийин эди. Экспедиция бошланганига 70 кун ўтгандан сўнг 1492 йил 12 октябрь куни денгизчилар Гуанахани оролига етиб келдилар. Оролни Колумб Сан-Сальвадор – «Муқаддас Халоскор» деб атади ва испан қиролларининг байробини ўрнатди. Кейин Гаити ва Куба ороллари кашф қилинди. Денгизчининг бу Ҳиндистон эканлигига ишончи комил эди ва шунинг учун янги очилган ерларнинг аҳолисини «ҳиндулар» деб атай бошладилар.

Колумбнинг кашфиёти португалияликларни безовта қилиб қўйди. 1494 йили Рим Папаси воситачилигида Тортесильяс шахрида шартнома имзоланди. Унга мувофиқ Азор оролларидан ғарбда жойлашган ерларга эгалик қилиш ҳукуқи Испанияга, шарқда жойлашган ерларга эгалик қилиш ҳукуқи эса Португалияга берилди.

Колумб эса кейин, 1493–1496, 1498–1500, 1502–1504 йиллари, яна учта экспедиция уюштириди. Бунинг натижасида Кичик Антил

¹ Изабелла – 1451–1504 йиллари яшаган, Кастилия ва Леон кироличаси, Фердинанд II – 1452–1516 йиллари яшаган Арагон кироли. Улар 1469 йили турмуш куришиб, Испанияни бошқаришган. Уларни «Буюк католик қироллар» ҳам деб аташади.

ороллари, Пуэрто-Рико ороли, Ямайка, Тринидад ва Марказий Америка ҳамда Жанубий Американинг шимолий кирғоқлари кашф этилди.

1502–1504 йиллардаги Янги Дунёга тўртинчи экспедицияси вактида Колумб Хинд океанига чиқиш ва дунё бўйлаб сузиш учун имконият очишга ҳаракат қилди. Бу охирги саёҳат давомида Колумб буюк кашфиёт қилди: у Кубадан жанубда қитъанинг кирғоқларини топди ва Кариб денгизи кирғоги бўйлаб 1500 км худудни тадқиқ қилди. Атлантик океанини «Жанубий денгиз»дан ва Осиё қирғоқларидан қуруқлик ажратиб турганлиги исботланди. Шундай бўлсада, адмирал ўзи тасаввур қилганидек, Атлантик океанидан Хинд океанига ўтиш йўлини топмади.

Юкатан қирғоқлари бўйлаб сузиш даврида Колумб нисбатан ривожланган қабилаларга дуч келди. Улар рангли мато тайёрлашни билишар, бронза идишлардан ва болталардан фойдаланишар, металл эритишни билишар эдилар. Ўша пайтда адмирал бунга эътибор бермайди, бироқ кейинчалик маълум бўлишича, бу ерлар ривожланган маданият мамлакати, Американинг буюк цивилизацияларидан бири – майялар давлатининг ерлари эди.

Колумб сўнгги бор Америкадан қайтиб Испания қирғоқларига келгандан икки ҳафта кейин қиролича Изабелла вафот этади. Адмирал ўзининг охирги таянчидан жудо бўлган эди. Колумбнинг янги очилган ерлардан олинадиган фойдадан ўз улушкини олиш учун қилган барча ҳаракатлари зое кетди. У 1506 йили ҳамма унугтан, қашшоқ ҳолатда вафот этди. Буюк денгиз саёҳатчисининг ўлганлиги хақидаги хабар ҳам 27 йилдан кейин матбуотда эълон қилинди.

Христофор Колумб умрининг охиригача Хинди斯顿га янги йўл очганлигига ишониб яшади.

Хинди斯顿га элтувчи денгиз йўлиниң кашф этилиши. Хинди斯顿га элтувчи денгиз йўлини 1498 йили португалиялклар кашф этилди. 1497 йили Португалия қирғоқларидан сузуб кетган Васко да Гама¹ экспедицияси Эзгу Умид бурнини айланиб ўтиб, Хинд океанига чиқди. Африка қирғоқлари бўйлаб шимол томонга сузган португалиялик денгизчилар Мозамбикдаги араб савдо шаҳарларини кашф этилди. 1498 йил май ойида эса араб денгиз-

¹ *Vasco da Gama* – 1460–1524 йилари яшаган, Хинди斯顿га денгиз йўлини очган ва уч марта саёҳат қилган португалиялик машхур денгиз саёҳатчиси.

чиси Аҳмад ибн Мажид¹ кўмагида улар Ҳиндистоннинг Калькутта портига етиб келдилар. Европада сотиши учун кўплаб молларни юклаган экспедиция 1499 йили Португалияга қайтиб келди. Қарийб икки йил давом этган саёҳат ниҳоятда оғир кечди. Йўлда экипаж аъзоларининг 2/3 қисми ҳалок бўлди. Лекин шунга қарамасдан, Васко да Гама экспедициясининг муваффақияти Европага катта таъсир кўрсатди. Европа савдогарлари, биринчи навбатда португалияликлар, Шарққа қараб отландилар. Португалияликлар Ҳиндистон билан савдо қилувчи арабларни бу ердан сикиб чиқаришди ва бу савдони Португалия қиролининг монополияси деб эълон қилдилар. Лиссабонга зираворлар ва ширинликлар олиб келган савдогарлар 800 фоизгача фойда олардилар.

Савдо йўлларининг Ўрта денгизидан океанларга кўчиши натижасида Голландиянинг Антверпен шахри жаҳон савдосининг янги марказига айланиб, Европа бозорларидаи нархни белгилайдиган бўлди.

1500 йили Ҳиндистон ва Антверпенда зираворлар нархидаги фарқ кўйидагича эди

(грамм кумуш ҳисобида)²:

	Ҳиндистонда	Антверпенда
1 кг. Занжибил	0,9	22,1
1 кг. Зира	2,6	38,5
1 кг. Қалампирмунчоқ	3,5	47,0

Португалияликлар арабларга нисбатан ўта қаттиқўллик билан Ҳиндистоннинг қирғоқ бўйи аҳолисини, кейин эса Малакк ва Индонезия аҳолисини эксплуатация қилди. Улар ҳинд рожаларидан араблар билан ҳар қандай савдони тўхтатишни, араб аҳолисини ўз худудларидан қувиб чиқаришни талаб қилдилар. Португалияликлар арабларнинг ва маҳаллий савдогарларнинг кемаларига хужум килиб, уларни талар, экипаж аъзоларини эса қириб ташлардилар.

¹ Аҳмад ибн Мажид ибн Мұхаммад ал Саадий – таҳминан 1421–1500 йиллари яшаган, араб денгизчisi, географи ва ёзувchisi, Васко да Гама экспедициясида қатнашган. Унинг «Фойдалар китоби» ўз даврида машҳур бўлган.

² Всемирная история. Весь школьный курс в таблицах / сост. М.Ю. Дуда. – Минск: Современная школа: Кузьма, 2011. С. 216.

Айниқса дастлаб эскадра командири, кейин Ҳиндистоннинг вице-қироли бўлган Альфонс д'Албукерке¹ золимлиги билан машҳур бўлди. У португалияликлар бутун Ҳинд океани қирғоқлари бўйлаб мустаҳкам жойлашиши, араб савдогарлари учун океанга чиқадиган барча йўллар ёпилиши керак, деб хисоблар ва Арабистоннинг жанубий қирғоқларидағи химоясиз шаҳарларни талар эди. Арабларнинг Ҳинд океанидан португалияликларни қувиб чиқариш учун қилган харакатлари муваффакият қозонмади. Улар 1509 йили Ҳиндистоннинг шимолий қирғогидаги Диу яқинида қаттиқ мағлубиятга учрадилар.

Ҳиндистон билан савдони монополия қилиб олган португалияликлар бу бой мамлакатга ғарбий йўлни излашда давом этдилар.

XV аср охири XVI аср бошларида флоренциялик денгизчи ва астроном Америго Веспуччи² португалияликлар экспедицияси таркибида Бразилия қирғоқларини тадқиқ этди ва 1501 йили Колумб очган ерлар Ҳиндистон қирғоғи эмас, янги материк деган хulosага келди. Эндиликда янги материк Америка³ деб атала бошланди. 1515 йили янги ерларни Америка деб атаган биринчи глобус Германияда пайдо бўлди. Кейин шу номдаги атлас ва хариталар ҳам чиқарилди.

Ҳиндистонга ғарбий йўлнинг очилиши. Колумб очган ерлар Ҳиндистон эмас янги материк эканлигини англаш ҳам денгизчиларнинг Ҳиндистонга ғарбий йўлни очишга бўлган қизиқишини сўндира олмади. 1513 йили Васко Нуњес Бальбао отряди Панама бўғозини кесиб ўтгандан сўнг улкан океан борлиги маълум бўлди. Бальбао уни Жанубий денгиз деб атади. 1519 йил 20 сентябрда португалиялик тажрибали денгизчи Фернандо Магеллан (Магайльянш)⁴ бошчилигидаги экспедиция Испания қиролининг байроби остида энг узоқ ва фожиали сафарга жўнаб кетди. У кўпчилик ҳали ҳам Ҳиндистон деб атаётган янги қитъани жанубдан айланиб ўтиб, ғарбга йўл очиш вазифасини олдига қўйган эди. Бир йилдан сўнг,

¹ Альфонс д'Албукерке – 1453–1515 йиллари яшаган. Португалия мустамлака империясининг яратувчиларидан бири, Буюк Албукерке ҳам деб аташган.

² Веспуччи Америго – 1454–1512 йиллари яшаган, Американинг биринчи батафсил тавсифини яратган италиялик машҳур денгиз саёҳатчиси. «Америка» унинг шарафига шундай деб аталган.

³ Янги очилган ерларни А. Веспуччи «Янги Дунё» деб аташни таклиф қиласди. Аммо лотарингиялик картограф М. Вальдземюллер таклифига биноан 1507 йилдан «Америка» деб атала бошланди. 1538 йилдан бу атама Шимолий Америкага ҳам татбиқ этилди.

⁴ Магеллан Фернандо – 1480–1521 йиллари яшаган, биринчи бўлиб Ер шарини айланиб сузган испаниялик машҳур денгиз саёҳатчиси.

яъни 1520 йил ноябрда экспедиция Америка қитъаси билан Оловли Ер орасида сувнинг мураккаб кўтарилиш ва тушиш тизимиға эга бўлган бир бўғозни айланиб ўтиб (кейинчалик уни Магеллан бўғози деб аташди), нотаниш улкан океанга чиқди. Бу океанда сузган уч ой давомида бирон марта ҳам бўрон турмади, об-ҳаво қулай келди. Океаннинг бошқа пайтларда бўронли бўлишини билмаган Магеллан унга Тинч деб ном берди. Экипаж аъзолари сувсизлик, очлик ва ва касаллиқдан нобуд бўлдилар. Улар факат 1521 йил 6 март куни Мариан ороллари гурухига киравчи кичик бир оролга етиб келдилар ва озиқ-овқат ҳамда сувни фамлаб олиш имкони туғилди. Гарбга қараб сузишни давом эттириб, Магеллан Филиппин оролларига етиб келди ва шу ерда маҳаллий аҳоли билан бўлган жангда ҳалок бўлди. Экспедициянинг қолган аъзолари д’Элькано бошчилигига сузишни давом эттиридилар ва Молукк оролларига етиб келдилар. У ердан зираворлар ва ширинликлар юклаб олдилар.

1522 йил 6 сентябрь куни Магеллан экспедицияснинг тирик қолган аъзолари Испаниянинг Сен-Лукар портига етиб келади (улар шу портдан кетишган эди). Экспедициянинг 253 аъзосидан фақат 18 киши омон қолган эди. Аммо энди Ер юмалоқ эканлиги ва уни айланниб сузиб дастлабки портга қайтиб келиш мумкин эканлиги амалда исботланди. Бундан ташқари, кема кундалик дафтаридан маълум бўлди, доимий гарбга қараб сузган денгизчилар уч йилда 1 кунни «тежаб қолдилар», бу эса Ернинг ўз ўқи атрофида айланишини ҳам исботлади.

Янги ерларнинг очилиши Испания билан Португалия ўртасидаги зиддиятларнинг янада кучайишига олиб келди. Узоқ тортишувлардан сўнг 1529 йили бу икки давлатнинг Тинч океанидаги таъсир зоналарини белгиловчи Сарагосс шартномаси имзоланди. Унга биноан Испания Молукк оролларига бўлган ўз даъвосидан воз кечди, аммо Филиппин ороллари устидан ўз ҳукмронлигини сақлаб қолди. Бу ороллар испан таҳтининг вориси, шахзода Филипп шарафига (у кейинчалик қирол Филипп II) шундай атала бошланди. Аммо яна узоқ вақт Магеллан саёҳатини қайтаришга ҳеч ким журъат қилмади ва Тинч океани орқали Осиё қирғоқларига очилган йўл амалий аҳамиятга эга бўлмади.

Кариб ҳавzasидаги испан мустамлакалари. Мексика ва Перунинг забт этилиши. 1500–1501 йиллари испан экспедициялари Жанубий Америка қирғоқларини шимол томон тадқиқ этиб,

Флорида ва Мексика кўрфазига етдилар. Бу даврга келиб испанлар Катта Антил ороллари: Куба, Ямайка, Гаити, Пуэрто-Рикони; Кичик Антил ороллари: Тринидад ва Тобаго, Барбадос, Гваделупа ва бошқаларни ҳамда Кариб дengизидаги майда оролларни эгаллаган эдилар. Испан мустамлакачилари ва хукумати айниқса Кубага катта эътибор қаратдилар. Улар Кубани «янги дунёнинг эшиги» деб билишар эди. Бу ерда қальялар, кўчиб келувчилар учун кўрғонлар, йўллар қурила бошланди, пахта, шакарқамиш экинзорлари пайдо бўлди. Куба ва бошқа Антил оролларида хўжаликни шакллантириши жараёнида одамларнинг шафқатсиз эксплуатация қилиниши ва Европадан олиб келинган касалликлар туфайли маҳаллий аҳолининг сони кескин камайиб кетди. Шу сабабли XVI аср ўрталаридан бошлаб Антил оролларига Африкадан қуллар олиб келиш бошланди.

1510 йилдан бошлаб Американинг ички ҳудудларини ўзлаштиришга киришилди. XVII аср ўрталаригача давом этган бу жараён конкиста (босиб олиш) деб номланади. 1510 йили материикдаги дастлабки кўрғонлар қурилиши бошланди. 1519 йили Америка қитъасида европаликлар қурган биринчи шаҳар – Панамага асос солинди.

1517–1518 йиллари Юкатан қирғокларига ҳиндуларни қул қилиш учун келган Эрнан де Кордлоба ва Хуан Грихалва¹ отрядлари Колумбгача бўлган цивилизацияларнинг энг қадимгиси – майялар давлатига дуч келдилар. Ҳайратдан қотиб қолган конкистадорлар олдида қалъа деворлари билан ўралган ажойиб шаҳарлар, эхромлар қатори, деворларига худолар ва муқаддас ҳайвонларнинг суратлари ўймакорлик усули билан ишланган саройлар намоён бўлди. Саройларда испанлар кўплаб тақинчоқлар, ҳайкалчалар, олтин ва мисдан ясалган идишлар, жанглар ва курбонликлардан лавҳалар ўйиб ишланган олтин лаганлар топишиди. Саройларнинг деворлари нозик дид билан ишланган, рангларга бой ажойиб расмлар билан безатилган эди. Умрларида от кўрмаган ҳиндуларга конкистадор суворийлар жуда қўрқинчли, баҳайбат маҳлук бўлиб кўринар эди. Уларни айниқса ўточар куроллар даҳшатга солади.

¹ Эрнан де Кордлоба – 1485–1547 йиллари яшаган, испан конкистадори, Мексикани забт этишда ва ацтеклар давлатини йўқ қилишда катнашган, кўпроқ Эрнан Кортес номи билан машҳур. Хуан Грихалва – 1489–1527 йиллари яшаган, испан конкистадори, Мексика ва Кубани ишғол қилишда катнашган, Марказий Америкада маҳаллий ҳиндулар томонидан ўлдирилган.

Майялар – Колумбгача бўлган Америка халқлари ичида ўз ёзувига эга бўлган ягона халқ эди. Уларнинг ёзуви, тадқиқотчи олимларнинг тасдиқлашича, Қадимги Миср, Шумер ва Аккад ёзувларига ўхшаб кетади. Майялар анчагина бой кутубхонага, ўзларининг қуёш тақвимига эга бўлишган. Уларда астрономик билимлар ҳам шаклланган бўлиб, Қуёш ва Ойнинг тутилишини олдиндан айтиб бера олишган. Испанларнинг қурол-аслаҳадаги устунлиги ва майя шаҳар-давлатлари ўртасидаги ўзаро келишмовчиликлар бу ерларда испан ҳукмронлигининг ўрнатилишини тезлаштириди. Шунга қарамасдан Мексиканинг забт этилиши узоқ йилларга чўзилди. Майяларнинг охирги макони 1679 йили, яъни Юкатанга юриш бошланганидан 173 йил кейин испанлар томонидан эгалланди. Бу давр мобайнида кўплаб иқтисодий қийинчиликлар, урушлар, хаёт тарзининг ўзгариши сабабли маҳаллий аҳолининг сони кескин камайиб кетди. XVI асрнинг дастлабки 50 йилида улар сони 4,5 млн дан 1 млн гача камайди.

Мексиканинг забт этилиши билан бир вақтда конкистадорлар Жанубий Америка қирғоқларида афсонавий бой мамлакат Эльдорадони излашни ҳам давом эттиридилар.

1524 йили ҳозирги Колумбия худудини забт этиш бошланди. Конкистадор Хименес Кесада¹ Магдалена дарёсининг юқори оқимида чибча-муиска қабиласининг ерларига дуч келди. Бу қабилаларда ерларни омоч билан ҳайдаш, қулолчилик ва тўқимачилиқ, мис, олтин ва кумушга ишлов бериш анча тараққий этган эди. Айниқса чибчалар моҳир заргарлар бўлиб, идишларга олтин, кумуш ва қимматбаҳо тошлардан безак беришарди. Хименес Кесада 1536 йили Санта-Фе де Богота шаҳрига асос солди.

XVI асрнинг 30–40-йилларида ҳозирги Эквадор, Перу ва Боливия, кейин эса Чили ва Аргентина худудлари забт этилди. Бу ерларда кечува ва инк қабилаларининг анчагина тараққий этган давлатлари мавжуд бўлиб, улардан баъзилари конкистадорларга катта матонат ва жасурлик билан қаршилик кўрсатдилар. Масалан, Перунинг забт этилиши 40 йилдан зиёдроққа чўзилди.

Дастлаб конкистадорлар олдинги даврларда йигилган қимматбаҳо металларни қўлга киритиш билан шуғулланган бўлса, XVI асрнинг 30-йилларидан бошлаб бой руда конларини мунтазам экс-

¹ Хименес Кесада – 1509–1579 йиллари яшаган испан тарихчиси, шоир ва ёзувчи. Американи забт этишда иштирок этган.

плуатация қилиш бошланади. Перу, Боливия ва Чили ҳудудида то-пилган олтин ва кумуш конлари, Перудаги мис конлари XVI аср ўрталарига келиб дунёда қазиб олинаётган қимматбаҳо металлнинг ярмини бера бошлади.

Шу даврдан бошлаб мустамлакачиликнинг моҳияти ўзгаради. Конкистадорлар босиб олинган ерларни хўжалик юритиш мақсадида ўзлаштиришдан воз кечадилар. Энди кўчуб келган испанлар учун зарур ҳамма нарса «Янги Дунё»нинг олтини ва кумуши эвазига Европадан келтириладиган бўлди.

Европадан Америкадаги мустамлака ерларга факат бойишни мақсад қилган зодагонлар кўчуб кела бошладилар. 1503 йилдан 1660 йилгacha Америкадаги испан мустамлакаларидан Испанияга 300 тонна олтин ва 25 тонна кумуш ташиб кетилди¹.

Янги босиб олинган ерлар испан қиролларининг мулки деб эълон қилинди. 1512 йилдан бошлаб маҳаллий ҳиндуларни қулга айлантиришни тақиқловчи қонунлар чиқарилади.

XVI асрнинг биринчи ярмида Америкадаги испан мустамлакаларини бошқаришнинг умумий тизими вужудга келди. Иккита вице-қироллик ташкил қилинди: Янги Испания вице-қироллиги (Мексика, Марказий Америка, Венесуэла ва Кариб денгизидаги ороллар); Бразилиядан ташқари деярли бутун Жанубий Америка ҳудудини эгаллаган Перу вице-қироллиги вужудга келди. Вице-қироллар испан зодагонларининг олий табақасидан тайинланиб, улар мустамлакаларга уч йил муддатга жўнаб кетар эдилар. Вице-қироллар ўзи билан оила аъзоларини олиб кетиши, у ерда кўчмас мулк сотиб олиши ва тадбиркорлик билан шуғулланиши мумкин эмасди. Вице-қиролларнинг фаолиятини «Ҳиндистон кенгаши» деб аталувчи орган назорат қилиб боради. Бу кенгашнинг қарори қонун кучига эга бўлган.

Мустамлакалар билан савдо «Севилья савдо палатаси» (1503) назорати остида эди. Бу палата барча юкларни божхона назоратидан ўтказар, бож йигар ва эмиграция жараёнини назорат остида ушлаб турарди. Испаниянинг бошқа шаҳарлари Севильядан ўтиб Америкадаги мустамлакалар билан мустақил савдо қилиш хукуқидан маҳрум эдилар. Вице-қироллар эса ўз ҳудудларида тўлиқ ҳарбий ва суд хокимиятига ҳам эга эдилар.

¹ Карапан г: История мировых цивилизаций: учебное пособие / коллектив авторов; под науч. ред. Г.В. Драча, Т.С. Пониотовой. – М.: КРОНУС, 2012. С. 248.

Мустамлака шароитида хинду этник гурухлари ва қабила иттифоқларининг йўқолиб кетиши, улар тилининг эса испан тили билан алмасиши юз берди. Бундан ташқари испанларнинг маҳаллий хиндулар билан араласиши – метислашиш жараёни ҳам жадаллашиди, метисларнинг сони тез ортиб борди. XVII аср ўрталарида кўплаб районларда европаликлар билан негрларнинг никоҳидан туғилган кўп сонли мулатлар гурухи ҳам пайдо бўлди. Бу Кариб денгизи қирғоқлари, Куба ва Гаитига хос бўлган жараёнлар эди. Иркый-этник гурухлар ўртасидаги ижтимоий ва хукукий фарқ кейинчалик Испания қонунларида ҳам ўз аксини топди.

Португалия мустамлакалари. Португалияликларга қарашли худудлардаги мустамлакачилик тизими бир оз ўзига хослиги билан ажralиб туради. 1500 йили португалиялик дengиз сайёҳи Педру Алвариш Кабрал¹ Бразилия қирғоқларига тушиб бу худудни Португалия қиролининг мулки деб эълон қилди. Бу пайт Бразилияда бир неча қирғоқ бўйи худудларидан ташқари ерларда ўтрок аҳоли йўқ эди. Уруғчилик тузуми даражасида яшаётган кам сонли хинду қабилалари мамлакатнинг ичкари худудларига қувиб юборилди. Бразилия худудида қимматбаҳо металларнинг қазилма бойликлари йўқлиги, ўтрок аҳоли бўлмаганлиги сабабли меҳнат ресурсларининг танқислиги бу ерда мустамлака тузумининг ўзига хослигини белгилаб берди. Бошқа бир омил савдо капиталининг анчагина ривожланганлиги бўлиб, бу ҳам мустамлака тузумининг характеристига таъсир кўрсатди. Бразилияни фаол ўзлаштириш 1530 йили бошланиб, у қирғоқка яқин худудларни хўжалик юритиш билан бошланди. Бу ерларда феодал ер эгалиги шаклини ўрнатишга харакат қилинди. Қирғоқка яқин худудлар 13 та капитанийга бўлинниб, бутун ҳокимият шу ерга эгалик қилувчиларнинг қўлида жамланган эди. Португалиянинг ўзида ҳам ортиқча аҳоли кўп бўлмаганлиги сабабли Бразилияни хўжалик учун ўзлаштириш жуда секин амалга оширилди. Кўчиб келувчиларнинг орасида дехқонларнинг деярли йўқлиги ва маҳаллий аҳолининг кам сонлилиги туфайли феодал ер эгалигини жорий қилишга уринишлар яхши натижада бермади. Африкадан келтирилган негр-қулларни эксплуатация қилишга асосланган плантация шаклини жорий этган худудлар эса анча тез ривож-

¹ Педру Алвариш Кабрал – тахминан 1467–1520 йиллари яшаган португалиялик дengиз саёҳатчиси. Ваксо да Гама очган йўлдан иккинчи Хиндистон экспедициясига бошчилик килган.

ланиб борди. Шунинг учун XVI асрнинг иккинчи ярмидан бошлаб Африкадан қулларни олиб келиш авж олади. 1583 йили мустамлакада 25 минг оқ танли кўччинчилар ва миллионлаб қуллар яшарди.

Испан мустамлакаларидан фарқли ўлароқ бу ерда аҳолининг аралашув жараёни жуда секин кечди; португал маданиятининг маҳаллий аҳолига таъсири ўта сезиларсиз эди; португал тили ҳукмрон тил бўла олмади. Португаллар билан хиндулар тилининг аралашмасидан иборат «ленгуга жерал» деб аталувчи тил асосий мулоқот тили бўлиб қолди. Бу тилдан бразилияликлар кейин яна икки юз йил давомида фойдаландилар.

Испания ва Португалияning мустамлакачилик сиёсати

Испания	Португалия
Американинг забт этилиши: зўравонлик ва алдовнинг барча воситалари қўлланилди. Мексика, Перу, Чили, Янги Гренада (Колумбия), Аргентина, Боливия босиб олинди. Ҳиндулар қуллик ва ўлимга маҳкум килинди	Хинд океанида қароқчилик билан шуғулланди. Ҳинди斯顿нинг кирғоқ бўйида кучли химояланган факториялар қурди. Маҳаллий аҳолига ҳужум килди, талади

Мустамлакачилик ва католик черкови. Американи мустамлакага айлантиришда католик черкови ҳам катта роль ўйнади. Черков мустамлака аппаратининг муҳим қисмига айланган эди.

Американинг кашф этилиши ва мустамлакага айлантирилишини папалик янги салиб юриши деб қарайди ва маҳаллий аҳолига христиан динини сингдириш мақсад килиб қўйилади. Шу муносабат билан испан қироллари мустамлакалардаги черков ишларини бошқариш, миссионерлик фаолиятига раҳбарлик қилиш, черков ва монастирлар қурдириш ҳуқуқини қўлга киритдилар. Мустамлакаларда черков жуда тезлик билан энг катта мулкдор – ер эгасига айланниб борди. Конкистадорлар эса маҳаллий аҳоли устидан ҳукмронлик ўрнатишда бу аҳолининг христиан динини қабул қилиши айни муддао бўлишлигини яхши тушунар эдилар. XVI асрнинг биринчи ярмидан бошлаб ҳар хил монахлик орденларининг вакиллари Америкага кела бошладилар. Улар жойларда ўз қўргонларини барпо қилишиб, христианликни тарғиб қилиш, ҳинду болалари учун мактаблар очиш ишлари билан шуғулландилар.

Христианлаштириш сиёсатининг биринчи босқичида конкистадорлар ва миссионерлар маҳаллий аҳолининг фақат диний қарашларини эмас, уларнинг маданияти, тили, маънавий қадриятларини, тарихий ёдгорликларини, умуман тарихий хотирасини йўқ қилиб ташламоқчи бўлдилар. Шунга қарамасдан, хиндулар маданияти йўқолиб кетмади, у испан маданиятининг таъсири остида ўзгарди, холос. Аста-секин испан ва ҳинду маданиятларининг синтези асосида янги маданият шаклланиб борди.

Католик миссионерлар ҳам бу жараёнга кўмаклашдилар. Улар кўпчилик ҳолларда хиндуларнинг вайрон бўлиб кетган ибодатхоналари ўрнида черковлар бунёд қилдилар, маҳаллий аҳолининг айрим диний тимсолларидан фойдаландилар. Масалан, Мехико шаҳридан унча узок бўлмаган жойда вайрон бўлган хиндулар ибодатхонаси ўрнида муқаддас Мария Гваделупская черкови курилади ва хиндуларнинг саждагоҳига айланади. Бу ерда ишланган расмларда Муқаддас Мария «қизил танли аёл» қилиб тасвирланган.

Тинч океани ҳавzasидаги географик қашифётлар. XVI асрнинг иккинчи ярми – XVII аср бошларида испан денгизчилари Перу худудидан Тинч океани ҳавзасига бир нечта экспедиция уюштиридилар. Бу экспедициялар давомида Соломон ороллари (1567), Жанубий Полинезия (1595) ва Меланезия (1605) кашф этилди. Ҳали Магеллан саёхати давридаёқ «Жанубий қитъя» мавжудлиги тўғрисида ғоя пайдо бўлиб, янги очилган Жануби-Шарқий Осиё ороллари бу қитъанинг қисми деб қаралди. Бу тахмин XVII аср бошларидағи география асарларида дадил илгари сурилди ва харитага «Терра инкогнита Австралия» (номаълум жанубий ер) номи билан киритила бошланди. 1605 иили Перудан йўлга чиққан экспедиция Жануби-Шарқий Осиё қирғоқларидаги ерларни кашф этди. Экспедиция бошлиғи П. Кирос¹ шу ороллардан бирини янги қитъя деб тахмин қилиб, бу ҳақда хабар бериш учун Испанияга жўнаб кетди. Сузишни давом эттирган экспедициянинг қолган аъзолари тезда Кирос қитъя эмас, номаълум ороллар гурухини кашф этганлигини тушунишди. Бу Янги Гибрид ороллари эди. Экспедиция бошлиғи Л. Торрес² сузишда давом этиб, бу ороллардан жанубда ҳақиқий янги қитъя –

¹ Педро Фернандес Кирос – тахминан 1565–1614 йиллари яшаган испан денгизчиси, Соломон ва Маршалл оролларининг бир қисмини очган.

² Луис Ваэс де Торрес – 1560–1614 йиллари яшаган испан денгизчиси, Янги Гибрид ороллари, бир қанча бўғозлар ва Австралияни кашф этган.

Австралияни кашф этди. Янги Гвинея ва Австралия оралиғидаги бўғоз Торрес бўғози деб атала бошланди. Янги қитъани ўзлаштириши учун иқтисодий имкониятга эга бўлмаган Испания хукумати Торрес кашфиётини қарийб 100 йил сир сақлаб келди.

Торрес билан деярли бир пайтда, 1606 йили голландиялик денгизчи Биллем Янзонсон экспедицияси Австралия қирғоқларига сузуб келади. Аммо иқтисодий имкониятлари чекланганлиги сабабли Голландия ҳам қитъани ўзлаштиришга шошилмади. Фақат XVII аср ўрталарида голландияликлар Австралия қирғоқларини тадқик эта бошладилар. 1642 йили А. Тасман¹ Индонезия қирғоқларидан шарққа томон сузуб, Австралияни жанубдан айланиб ўтди ва кейинчалик Тасмания деб аталган оролларни кашф этди.

Торрес саёҳатидан 150 йил кейин, Етти йиллик уруш (1756–1763) даврида Манилани эгаллаган инглизлар у ердаги архивларда Торрес кашфиёти тўғрисидаги хужжатларни топишидди. 1768 йили инглиз денгизчиси Ж. Кук² Океания оролларини тадқиқ қилиб, Торрес бўғозини ва 1770 йили Австралияning шарқий қирғоқларини иккинчи бор кашф этди. Кейинчалик биринчи деб Торрес кашфиёти тан олинди. Аммо Кук экспедициясидан кейин инглизларнинг қитъани ўзлаштириши бошланди. 1788 йил 26 январь куни Янги Жанубий Уэльсга капитан Артур Филипп жамоаси келиб тушди ва кейинчалик Сидней деб аталган шаҳарга асос солдилар. 26 январь ҳар йили миллий байрам – Австралия куни сифатида нишонланади. XIX асрда қитъага европаликларнинг оммавий кўчиб келиши бошланади.

* * *

XV–XVII асрлардаги географик кашфиётлар дунё тараққиётига жуда катта таъсир кўрсатди. Маълумки, илгари ҳам европаликлар Америка қирғоқларига етиб боришган, Африка қирғоқларига ҳам денгиз саёҳатлари уюштиришган лекин фақат Колумбнинг кашфиётини Европа ва Америка ўртасидаги доимий алоқаларга асос солди, жаҳон тараққиётида янги босқични бошлаб берди.

¹ Абел Тасман – 1603–1659 йиллари яшаган нидерландиялик денгизчи ва савдогар. Европаликлар ичida биринчи бўлиб Янги Зеландия, Того ва Фиджи оролларига етиб борган.

² Жеймс Кук – 1728–1779 йиллари яшаган инглиз ҳарбий денгизчиси, тадқикотчи, картограф. Уч марта дунё бўйлаб саёҳат килган. Шимолий Америка, Янги Зеландия, Австралияни, Тинч, Хинд ва Атлантик океанларини тадқик килган. 1779 йили Гавай оролларида маҳаллий аҳоли томонидан ўлдирилган.

Буюк географик кашфиётлар европаликларнинг олам ҳакидаги тасаввурларини бойитди, бошқа материклар ва у ердаги халқлар тўғрисидаги ёлғон тасаввурларни бузиб ташлади.

Янги билимлар дастлаб Европада, кейин бошқа қитъаларда ҳам саноат ва савдонинг ривожланиши учун катта туртки бўлди. Молия тизими, банк ва кредит ишларининг янги шакллари пайдо бўлди. Асосий савдо йўллари Ўрта денгизидан Атлантик океанига кўчди ва бу савдонинг характеристерини тубдан ўзгартириди.

Янги ерларнинг очилиши ва мустамлакаларга айлантирилиши нинг энг муҳим натижаларидан бири «нарх-наво инкилоби» бўлиб, у Европада дастлабки капиталнинг жамғарилишига катта туртки бўлди, капиталистик хўжалик укладининг шаклланишини тезлаштириди.

Буюк географик кашфиётларнинг натижалари

Савдо мисли кўрилмаган даражада кенгайди, қитъалар ва мамлакатлар ўртасида муҳим савдо алоқалари ўрнатилди	Савдо йўллари Ўрта денгизидан океанларга кўчди. Антверпен жаҳон савдосининг янги марказига айланди
Европанинг ривожланган мамлакатларида устахона эгалари ва саводогарлар бойиб кетди	Осиё, Африка ва Америка халқларини эзиш ва мустамлакачилик жараёни бошланди. Жаҳон мустамлака тизими шаклланди

Бироқ янги ерларнинг очилиши мустамлака ва метрополиялар халқлари учун бир хил аҳамият касб этмади. Мустамлакачиликнинг натижаси факат янги ерларни ўзлаштириш бўлмасдан, бўйсундирилган халқларни даҳшатли эксплуатация қилиш, уларни қуллик ва қирилиб кетишга маҳкум қилиш билан кўшиб олиб борилди. Забт этиш жараёнида қадимги цивилизацияларнинг кўплаб ўчоқлари йўқ қилинди, бутун бошли қитъа тарихий ривожланишининг табиий одими бузилди, мустамлака мамлакатлар халқлари шаклланётган капиталистик бозор муносабатларига зўрлик билан жалб қилиндилар ва ўз меҳнатлари билан Европада капитализм ривожланиши жараёнини тезлаштиридилар. Шу тариқа янги индустрималь цивилизация шаклланишига ўз ҳиссаларини қўшдилар.

Буюк географик кашфиётлар янги давр эшикларини катта очдилар. Энг узоқ қитъалар ўртасида алоқалар кенгайиб, жаҳон савдоси ривожлана бошлади.

Биринчи боб бўйича саволлар

1. Хиндистонга ғарбдан йўл очиш нима сабабдан XV асрда европаликлар учун ҳаётий заруратга айланиб қолди?
2. Американинг кашф этилиши европаликлар ҳаётида қандай ўзгаришларга олиб келди?
3. Американинг туб аҳолиси маданияти ҳақида нималарни биласиз?
4. Буюк географик кашфиётлар Американинг туб аҳолиси тақдиррида қандай роль ўйнади?
5. Цивилизациялар тўқнашуви натижасида Америка халқларининг маданиятида қандай ўзгаришлар юз берди?
6. Янги ерларнинг очилиши муносабати билан Испани ва Португалия ўртасидаги зиддият қандай якун топди?
7. Тинч океани орқали Осиёга очилган йўл қандай амалий аҳамиятта эга бўлди?
8. Американинг ва Тинч океани ҳавzasидаги бошқа ерларнинг очилиши Европанинг иқтисодий ривожланишида қандай аҳамият касб этди?
9. Тинч океани ҳавzasидаги географик кашфиётлар натижасида қандай ерлар очилди?
10. Европада капиталистик муносабатлар шаклланишида «нарх-наво инқилоби» қандай роль ўйнади?

II БОБ. ЯНГИ ДАВР БОШЛАРИДА ЕВРОПАНИНГ ИЖТИМОИЙ-ИҚТИСОДИЙ ҚИЁФАСИ

XVI асрнинг биринчи ярмидан бошлаб бир қатор Ғарбий Европа мамлакатларида ишлаб чиқарувчи кучларнинг сезиларли ривожланиши юз берди ва аста-секин капиталистик муносабатларнинг шаклланишига олиб келди.

Ички миграцион жараёнлар. Жамият ишлаб чиқарувчи кучларнинг асосий таркибий қисми одамлар ҳисобланади. Шунинг учун ишлаб чиқарувчи кучлар ривожи тарихида демографик жараёнлар алоҳида ўрин тутади. Ҳар қандай жамият аҳоли кўпайишининг ўзига хос қонуниятларига эга. Шаклланган ижтимоий муносабатлар жамиятда аҳоли ўсишининг маълум даражасини таъминлайди. Шундан келиб чиқиб, Янги давр бошларида Европа мамлакатларида кўп болали оилалар урф бўлган. Аммо шунга яраша болалар ўртасида ўлим, айниқса шаҳарларда, юқори эди. Шаҳарлар аҳолиси асосан қишлоқдан ёки кам тараққий этган кичик шаҳарчалардан кўчиб келганлар ҳисобига кўпаярди. 40–50 ёш «кексалик» ҳисобланарди.

Шаҳарларда аёллар сони эркакларга нисбатан 20–30 фоизга кўп эди.

XVI–XVII асрлар Европа халқлари тарихида ўтиш даври, янги капиталистик муносабатларнинг шаклланиш даври бўлди. Бу даврда майда ишлаб чиқарувчиларнинг оммавий экспроприация килиниши, ишсиз дайдиларнинг кўпайиши, умумий нобарқарорлик туғилишнинг камайишига, никоҳ ёшининг ошишига сабаб бўлди. Ўттиз йиллик уруш фаол жанг худудларида шаҳар аҳолисининг 33% га, қишлоқ аҳолисининг эса 40% га камайишига олиб келди. Нидерландиядаги инқилоб ва озодлик учун уруш жараёнида кўплаб аҳоли ҳалок бўлди. Умумий ҳолат анча мураккаб ва зиддиятли эди.

Аҳолининг кучайиб бораётган миграция жараёнлари турли йўналишда юз бераётган бўлса-да, асосан кам тарақкий этган мамлакатлардан тез ривожланаётган мамлакатларга, шаҳарларга, пойтахтларга кўплаб кўчаётганлиги кўзга ташланади. 1584–1621 йиллари Жанубий Нидерландиядан 150 минг иммигрант, жумладан, савдогарлар ва мануфактурчиларнинг кўчиб келиши Бирлашган Провинциялар республикасини жадал иқтисодий ривожланишга олиб келди. Аҳолининг зичлиги Европанинг ривожланган мамлакатларида 1 кв. км.га 30–35 кишини ташкил қилди. 1514 йили Голландия аҳолисининг 15% и шаҳарларда яшарди. Европа аҳолиси 1450 йили 55 млнга яқин кишини, 1650 йили эса 100 млн кишини ташкил қиласарди. Аҳолининг йиллик ўсиши 6,2% га teng эди.

Баъзи Европа мамлакатларида 1500–1800 йиллари аҳолининг кўпайиш жараёни (миллион киши ҳисобида)¹:

Йиллар	Англия	Швеция	Голландия	Франция	Германия	Россия	Италия	Испания	Европа (жами)
1500	—	—	1,0	—	—	—	9,0	—	84
1550	3,0	—	1,3	19,5	—	—	11,5	5,3	97
1600	4,1	—	1,5	19,6	—	—	13,5	6,7	111
1650	5,2	—	1,9	20,3	—	—	11,7	7,0	112
1700	4,9	1,37	1,9	22,6	16	16	13,6	7,4	125
1750	5,8	1,78	1,9	24,6	17	25	15,8	8,6	146
1800	8,6	2,35	2,1	29,3	24,5	39	18,3	10,6	195

¹ Ливи Баччи М. Демографическая история Европы / Серия «Становление Европы» / Пер. с итал. А. Миролюбовой. – СПб.: «Александрия», 2010. С. 18.

**Баъзи Европа мамлакатларида 1500–1800 йиллари
шахар аҳолисининг микдори
(умумий аҳолига нисбатан % хисобида)¹**

Мамлакат	1500	1550	1600	1650	1700	1750	1800
Англия	3,1	3,5	5,8	8,8	13,3	16,7	20,3
Голландия	15,8	15,3	24,3	31,7	33,6	30,5	28,8
Германия	3,2	3,8	4,1	4,4	4,8	5,6	5,5
Франция	4,2	4,3	5,9	7,2	9,2	9,1	8,8
Испания	6,1	8,6	11,4	9,5	9,0	8,6	11,1
Италия	12,4	12,8	14,6	14,0	13,4	14,2	14,4
Португалия	3,0	11,5	14,1	16,6	11,5	9,1	8,7

Капиталистик мануфактура. Мануфактуралар пайдо бўлишининг сабаблари. Ишлаб чиқарувчи кучларнинг ривожланиши асосан ижтимоий меҳнат тақсимоти орқали юз берди. XVI асрда хунармандчиликнинг 100 дан ортиқ асосий тури мавжуд бўлса, XVIII асрда улар сони 250 тага етди. Тармоқ ичидаги меҳнат тақсимоти ҳам анча кенгайди, фақат тўқимачиликнинг ўзида 20 дан ортиқ мутахассисликлар пайдо бўлди. Жадал ривожланиш ўрта аср цехчилик анъаналарига эга бўлган соҳалар – техник ва маданий жиҳатдан энг муҳим янгиликлардан бўлган Иоганн Гутенбергнинг китоб чоп қилиш усулида (1445) ҳамда қофоз, шиша, совун, ойна ва матолар ишлаб чиқаришда кузатилади. Айни пайтда дентиз савдосининг ривожланиши, океан орти аҳолисининг ўсиб бориши, Янги Дунёдан олтин ва кумуш оқимининг келиши оқибатида Европада хунармандчилик маҳсулотларига талаб ҳам ортиб боради.

Албатта, шаҳарлардаги устахоналарда хунармандлар аввалгидай меҳнат қилишар ва уларнинг кўплаб маҳсулотлари, аввалгидай сифатли эди. Аммо маҳсулотлар энди етишмасди.

Товарларга ўсиб бораётган талабни қондириш учун йирикроқ корхоналар куриш зарурати туғилди. Аммо устахоналарнинг катта-кичклиги, унда ишлаётган уста ва шогирдлар сони, маҳсулотларнинг сони ва сифати цех низомларида қатби кўрсатиб ўтиларди. XVII асрга келиб бу чеклашлар саноатни ривожлантиришга тўсиқ бўлиб қолди.

¹ Ливи Баччи М. Демографическая история Европы / Серия «Становление Европы» / Пер. с итал. А. Миролюбовой. – СПб.: «Александрия», 2010, С. 56.

Йирик корхоналарга зарурат эса йилдан-йилга ортиб борарди. Шундай қилиб, янги типдаги корхоналар – мануфактуралар пайдо бўла бошлади. Бу корхоналарда энди янгича меҳнат тақсимоти йўлга қўйилган бўлиб, уларда ёлланма ишчилар меҳнат қиласади. Маҳсулотлар ҳали ҳам қўлда тайёрланарди. «Мануфактура» лотин тилидан таржимада «қўлда ясалган буюм» («manus» – қўл, «factuga» – буюм) деган маънони англатади.

Марказлашган мануфактура. Дастрлаб ҳар бир ишчи ўз уйида меҳнат қиласади. Бундай мануфактура тарқоқ мануфактура деб номланган. Бироз кейинроқ иш берувчилар, шунингдек, бой усталар (энди шаҳарларда ҳам) маҳсус бинолар қура бошладилар, унда бир том остида турли хил мутахассисликдаги ёлланма ишчилар меҳнат қиласади. Уларнинг ҳар қайсиси факат битта ишни бажаар, бу эса ишни тезроқ ва сифатли қилиб бажариш имкониятини берарди. Бундай мануфактурани марказлашган деб атайдилар.

Капиталистик мануфактура ана шундай пайдо бўлди. Унда устахонанинг, корхонанинг эгаси савдогар-капиталист ёки капиталист-тадбиркор бўлиб, у капитал ва ишлаб чиқариш воситаларига эгалик қиласади. Демак, мануфактура – бу қўл меҳнати хукмон бўлган, меҳнатни алоҳида ишлаб чиқариш жараёнига тақсимлаш мавжуд бўлган ва ёлланма ишчиларнинг меҳнати қўлланиладиган йирик корхона. Капиталистик мануфактура майда ишлаб чиқаришдан йирик саноат ишлаб чиқаришига ўтишни бошлаб берди.

Марказлашган мануфактуранинг тузилиши

	Бозор	
	Мануфактура эгаси	
Ёлланма ишчилар ишлайдиган йирик марказлашган корхона		

Тарқоқ мануфактуранинг тузилиши

	Бозор	
	Олибсотар	
Хунарманд	Хунарманд	Хунарманд

Мануфактуралаб чиқарши ривожланганлигининг аҳамияти. Меҳнатни тақсимлаш бир вақт бирлигига кўпроқ маҳсулот

ишлаб чиқариш имкониятини берар, меҳнат унумдорлигини оширап, сарф-харажатларни камайтираш ва маҳсулот таннархини арzonлаштираш эди. Фақат сифатли ва арzon маҳсулот ишлаб чиқарган корхонагина кучайиб бораётган рақобатга бардош бера оларди.

XVII асрда Англияда, Нидерландияда хўжалик юритишнинг янги шакли устувор эди, Францияда эса энди ривожланиб бораётганди. Хўжалик юритишнинг янги шакли ойна, қанд, қофоз, шойи, мато ишлаб чиқаришга кенг тарқалади. Англияда мануфактура ишлаб чиқариши айниқса мато тўкишда кенг кўлланилар эди.

Мануфактура капиталистик ишлаб чиқариш корхонаси бўлиб, унинг эгаси бўлган капиталист битта фоя – кўпроқ фойда олиш фояси билан банд бўлган. Мануфактура ишчилари ўта ғайриинсоний усулларда ҳам эксплуатация қилинган. Тадбиркорлар фақат меҳнатни жадаллаштириб қолмасдан, иш кунини узайтириш ва иш хаққини камайтириш билан бирга дайдиларни ўз корхоналарида мажбурий ишлатишга рухсат берувчи «қонли қонунларни» ҳам кўллар, болалар ва аёлларни ҳам оғир меҳнатга жалб қиласди.

Мануфактура ижтимоий ишлаб чиқаришни тўлиқ қамраб олмади ва олиши ҳам мумкин эмасди. Капиталистик мануфактура Англия, Голландия ва Францияда айниқса кенг тарқалди ва катта аҳамиятга эга бўлди.

Капиталистик ишлаб чиқаришнинг шаклланиши

Капиталистик ишлаб чиқариш қуидагиларни талаф қиласди:	
Меҳнат қуролларига эга бўлмаган, пул эвазига ёлланиб ишлашга тайёр тарқалган, эркин кишилар	Йирик корхоналарни очиш учун зарур бўлган бойликнинг тўпланганилиги
Ёлланма ишчилар	Буржуазия

Янги ихтиrolар. XVI–XVII асрлар – янги ихтиrolар даври бўлди. Одамлар энергия манбаларини излар эдилар, чунки уларсиз ишлаб чиқаришни ривожлантиришнинг иложи йўқ эди.

XVI асрда ёк ихтиiroчилар энг оддий механизmlарни яратдилар. Улар сув ва шамол кучи билан ҳаракатга келарди. Энергиянинг кенг тарқалган манбаларидан бири шамол тегирмонлари эди. Уларсиз XVI асрдаги Нидерландиянинг кўринишини тасаввур қилиш мумкин эмас. У ерда ҳатто минорасининг тепаси айланиб турадиган

алоҳида турдаги тегирмонлар ҳам кенг тарқалганди. Бироқ агар шамол бўлмаса, тегирмон ишламас эди. XVI асрда тегирмонларга аррани улаб кўя бошладилар ва уларни ҳам шамол харакатга келтиради. Тегирмон ғилдираги берадиган энергия ёрдамида қофоз мас-сасини тайёрлашар, терига ишлов беришар, рудани майдалашар ва бошқа ишларни бажарар эдилар¹.

Ўша даврда яратилган техник ихтиrolарнинг жуда кўпчилиги винтни қўллашга асосланган. Аввал винтни ёғочдан, кейинчалик эса металдан ясай бошладилар. XVI асрда токарлик станоги ихтиро қилингандан ва бронзадан винт куйишни ўрганишгандан сўнг винтларни ясаш ва ишлаб чиқаришда қўллаш кескин ошди. Винтли прессни китоб чоп қилиш ва танга зарб қилишда ҳам қўллай бошладилар.

Кўпгина ихтиrolар тоғ-кон саноати билан боғлиқ эди. Шахта ва конлардан сувни чиқариб ташлаш учун насосларни қўллаш зарурати бор эди (бундай насосларни «помпа» деб аташарди). Шахталарнинг чуқурлиги тобора ошиб борар, 200 метрдан 800 метргача етар эди. Бундай чуқурликдаги шахтани қуритиш учун 600 дан кўпроқ ишчини сувни чиқариб ташлашга жалб қилиш талаб қилинарди. Бу ишда ёқа деб аталувчи мосламанинг ихтиро қилиниши ҳақиқий инқилоб бўлди.

XVI аср ўрталарида диаметри 10 метр бўлган ғилдираклар қўллана бошланди. Ғилдирак сув билан харакатга келарди. Унинг ёрдамида ёғоч идишларда рудани, тери халталарда сувни навбат билан кўтаришарди. Бундай ғилдиракка 2 киши хизмат кўрсатарди, холос. Бу машиналар от ёки сув кучи билан харакатга келтириларди.

XVI асрда рудани майдалаш, кўйдириш, ювиш ва ёйиб чиқиши жараёнлари битта корхонада – мануфактурада олиб борилар ва бу олинадиган металлнинг сифатини яхшиларди. Лекин XVI аср ўрталаридан бошлаб мустамлакалардан кела бошлаган арzon кумуш ва мис Европадаги кўплаб конларнинг узоқ вақтга ёпилишига олиб келди.

Металл ва металл қоришималарини иқтисодиётга жорий қилиш янада жадалроқ бўлиши ҳам мумкин эди. Бироқ жуда кўп металл ҳарбий эҳтиёжларга сарф қилинарди. Бронза танқислиги туфайли ўқ отар тўпларни ҳам чўяндан куя бошладилар.

¹ Фарб мамлакатларида тегирмон тушунчаси кенгрок бўлиб, ундан фақат буғдойни ун қилишда эмас, бошқа мақсадларда ҳам фойдаланилган.

XVII асрда шахталарда рудани портлатардилар, руданинг ўзини эса ёғоч излардан юрувчи кичик вагонларда таширдилар. Руда қазиб олишнинг кўпайиши, қимматбаҳо металларга ишлов беришнинг яхшиланганлиги, керакли қоришмаларни ола билиш курол ва уй анжомлари тайёрлашни, тангалар зарб қилишни такомиллаштириди.

Яна бир янгилик кўмирдан фойдаланиш билан боғлиқ. Узок вақтлардан буён европаликлар ёғоч ўтинлардан фойдаланишга ўрганиб қолган эдилар. Тоф-кон саноати ва металлургия районларида XVI асрга келиб ўрмонлар майдони кескин камайиб кетди. Ҳокимият янги кўчатлар ўтқаза бошлади, бироқ бу ёқилғи масаласини ҳал қила олмасди ва шунда, XVI асрда, кўмир қазиб олиш ва қўллашни ўргандилар.

XVII аср бошларида кўмирни тозалашни ўрганиш ва ундан фойдаланиш ишлаб чиқаришнинг юксалишига олиб келди. Кўмир қазиб чиқаришнинг маркази Англия бўлиб қолди. У ерда юз йил давомида, 1540 йилдан 1640 йилгача уни қазиб чиқариш 250 минг тоннадан 1,5 млн тоннагача ошди. Замондошлардан бири «Хариталарингизни тўғрилаб қўйинг, Ньюкасл – бу Перу!» деб ёзганди. Кўмир мамлакат учун қумушдан кам баҳоланмас эди.

Янги ихтиrolар китоб чоп қилишнинг кўпайишига олиб келди. Китоблар суратли бўлиб чиқа бошлади, уларга талаб кўпайди. Техник адабиётлар ҳам чиқарила бошланди. Тоф-кон ишларининг билимдони бўлган гуманист-профессор Георгий Агреколанинг (1490–1555) китоблари энг машҳур асарлар бўлиб қолди. Агреколанинг асарларидан бири «Кон ишлари ва металлургия ҳақида ўн икки китоб» деб аталади. Хоҳловчилар энди турли хил механизмларнинг тузилиши ҳақидаги гравюрали «қўлланмалар» сериясини сотиб олишлари мумкин эди. Бироқ бари бир кўпгина ихтиrolар шаҳар цехлари қаршилигига дуч келиб, ҳаётга татбиқ қилишда тўсиқларга учрап эди. Цех ҳунармандлари нима учун қаршилик қилардилар? Биринчидан, рақобатдан қўрқсанларидан. Лекин иккинчи сабаб ҳам бор эди. Турли хил асбобларни қўллаш ўрта аср кишисининг онгига, унинг ота-боболари анъаналари бўйича ишлаш лозимлигига бўлган ишончига мос келмас эди. Улар ўзининг оғир жисмоний меҳнати эвазига келмаган бойликни гуноҳ ҳисоблашади. Бу ерда ўрта асрдаги «адолат» тушунчаси ҳам, тўлиқ мулкий тенгликни англаш сифатида аралашиб кетган эди. Бу тушунчалар Европада XVII аср ўрталаригача ҳукмронлик қилди.

Куролсозлик. Европада йирик қуроллар XV асрда ёк мавжуд эди: «Брауншвейг Меттаси» 8 тоннадан зиёд эди, бироқ бомбардалар-нинг¹ «маликаси» «Кутурган Грета» хисобланарди, унинг оғирлиги 16 тонна, ўқининг диаметри 70 сантиметр эди.

XVI асрда тўп ясаш ишларида ҳам ўзгаришлар юз бера бошлади. Техниканинг ривожланиб бориши билан ўйиб ясалган қуроллар ўрнини мустаҳкамрок, бронздан қуилганлари эгаллай бошлади.

Артиллериянинг ривожланиши қалъа деворларининг ўзгаришига олиб келди. Баланд деворлар ядролар зарбидан қуларди ва шу сабабли энди шаҳарлар улкан тупроқ уюмлари билан ҳимоялана бошладилар. Ядролар тупроқ қалинлигини ёриб ўтолмаганлиги сабабли бомбардлар саҳнадан кетадилар, уларни узун тўғри оғизли қуроллар – тўпларга айлантириб, қайта қуя бошлашди. Энди тошдан эмас, темирдан ясалган ўқлар пайдо бўлди. Бироқ ядроларнинг учиш йўли тўғри эди. Шунда тупроқ қўрғонларини бузиш учун мортиралардан² фойдалана бошладилар, улар баланддан ўт очиш имконини берардилар. Улар портладиган бомбалар билан ўқланарди. Аста-секин тўпларни кемаларга ҳам ўrnата бошлашди.

Артиллерия фани ҳам ривожлана борди. Итальян математиги Тарталья³ снарядларнинг учиш йўлини хисоблаб чиқди ва куювчи усталарга маслаҳатлар берди. Шу тариқа тўплар такомиллашиб борди, аммо улар ҳали мукаммал эмасди ва тўпчиларнинг ўзига ҳам душманга соладиганидан кам хавф солмасди. Тўплар оғиздан ўқланар, нокулай эди, ўқ отиш пайтида тез-тез нили портлаб турарди.

Қуроллар такомиллашиб борган сари ҳарбий илмда улардан ҳимояланиш тактикаси ҳам ишлаб чиқилди: тўпнинг рўпарасида отлиқларнинг зич сафлари турарди, қанотлар найзалар билан қуролланарди. Кўпинча душманга катта зарап етказмайдиган биринчи ўқ отилгандан кейин найзалар билан қуролланган рицарлар артиллерия расчётини ўраб оларди, марказ эса олдинга ташланар ва тўпни қайтадан ўқлашга улгурмаган тўпчиларни кириб ташлар эди.

Шу даврда кўлда ўқ отиш қуроллари ҳам тарақкий этди. XVI аср ўрталарида мушкетлар деб аталувчи пиликли милтиқлар яратилади.

¹ Бомбарда – XV – XVI асрлардаги тош ўқлар билан отувчи артиллерия қуроли.

² Мортира – киска, баланддан ўқ отадиган артиллерия қуроли.

³ Никколо Тарталья (асли фамилияси Фонтана) – 1499–1527 йиллари яшаган итальян математиги. Назарий математика, амалий механика, баллистика ва топография масалаларига бағишлиланган асарлар ёзган.

Мушкетлар билан қуролланган аскарлар мушкетёрлар деб аталарди ва даставвал улар фақат пиёдалар эдилар. Мушкет ҳам порох ва 8–10 та ўқ билан оғзидан ўқланарди ва ёғоч кўндоққа жойлашган эди. Мушкетнинг тепкисида чўғланиб турган пилик бўлиб, тепки пастга тортилганда пилик порохни олов олдирарди.

Биринчи кремнийли милтиқлар ҳам XVI асрда пайдо бўлди (бунда пилик ўрнига кремнийли ўт олдиргич қўлланарди). Ўша даврларда ёк стволларда тўғри излар очила бошланган, бироқ бунақа милтиқлар жуда қиммат турар ва камёб эди.

XVII асрнинг биринчи ярмида Францияда милтиқларга кўндоқ ҳам ясай бошладилар. Бироқ бу қурол отлиқ аскарлар учун ярамас эди, шу сабабли уларга қисқа оғизли милтиқлар ва тўйпончалар яратдилар. Кўл гранаталари ҳам қўлланана бошланди.

Ўқ отиш қуролларининг роли ортиб бориши билан рицарларнинг роли пасая бошлади. Энди рицарлик жасурлик белгиси бўлмай қолди.

Қишлоқ хўжалигидағи ўзгаришлар. Farбий Европада XVI–XVII асрларда шаҳарлардаги сингари қишлоқларда ҳам капиталистик муносабатлар шаклдана бошлади. Аммо қишлоқда меҳнат қуролларининг такомиллашуви, ижтимоий меҳнат тақсимоти, федал ишлаб чиқариш муносабатларининг емирилиши нисбатан секинлик билан юз берди. Шу сабабли қишлоқда капиталистик муносабатларнинг шаклланиши ҳам секинлик билан амалга ошди.

Бу жараён энг шиддат билан ўтказилган жой Англия бўлди, чунки бу ерда дехқонларни экспроприация қилиш ўта қатъият билан амалга оширилди. XVII аср ўргаларида Англия типик аграр мамлакат бўлиб, аҳолининг 4/5 қисми қишлоқларда яшарди ва қишлоқ хўжалиги билан шугулланар эди. XVI–XVII асрлар Англия тарихининг ўзига хос томони шундаки, бу ерда, масалан, Франция ва Германиядан фарқли равишда, капиталистик муносабатларнинг шаклланиши қишлоқда шаҳардагига нисбатан олдинлаб кетди. Шу сабабли Англия қишлоғидаги ўзгаришлар фанда «аграп инқилоб» номини олган.

Бу жараённинг мазмуни шундаки, анъанавий хуқуқга кўра ерга эгалик қилаётган дехқонлар барча воситалар яъни куч ишлатиш йўли билан ҳам ўз ерларидан сиқиб чиқарилди, уларнинг ўрнини йирик арендаторлар эгаллади. Ички ва ташқи бозорда қишлоқ хўжалик маҳсулотларига талабнинг юқорилиги капиталистик таш-

киллаштирилган дәхқончилик ва чорвачиликни юқори фойда келтирадиган соҳага айлантирди. Ер капитал киритишнинг фойдали соҳасига айланиб қолди, лордлар юқори рента тўловлари эвазига катта-катта ерларини арендага бера бошладилар.

Натижада инқилобдан олдинги Англияда ер ва рента учун кураш жамиятда юз берадиган можароларнинг асосини ташкил қилди. Энг оғир аҳволда кичик ер эгаларининг кўпчилигини ташкил қиласидиган дехқонлар – копигольдерлар қолди. Уларнинг ерга эгалиги маълум муддатга бўлиб (одатда 21 йилга), ушбу муддат тугаши билан лордлар рента ҳақини ошириши мумкин эди. XVII аср ўрталарига келиб копигольдерлар тўлайдиган рента ҳаки XVI асрдагига нисбатан Сеффок ва Эссексда 4 марта, Уорвикишерда – 3 марта, Ноттингемширда – 6 марта, Уилтширда – 8 марта оширилди.

Мамлакатнинг шимоли ва шимоли-ғарбида қадимги аслзодалар – зодагон-феодаллар кўпроқ эди. Дехқонларнинг тўловлари – пул ва натура солиқлари уларнинг асосий даромадларини ташкил қиласиди. Лорд ер солиғини йиғиб оларди. Дехқонлар пул билан биргаликда натура билан бир фунт қалампир ёки бошқа нарса, олтинранг шпоралар ва дехқон қарамлигининг қадимий белгиси – лорд ошхонаси учун бир жуфт идиш тўлар эди. Бундан ташқари лорд яна судъя ҳам ҳисобланарди. Бундай помешчиклар қишлоқ хўжалик маҳсулотларини бозорда камдан-кам сотардилар. Улар бойиб кетган савдогарлар орасидан чиқсан янги зодагонларга нафрат билан қарапарди.

Савдоning ривожланиши. XVI – XVII асрларда савдо ва тадбиркорлик фаолиятининг марказлари бўлган шаҳарларнинг ўсиши давом этди. XVI аср бозорлари ўрта аср ярмаркаларидан катта фарқ қиласиди. Янги давр бозорлари факат қурилиши билан эмас (катта майдон узра бир неча бино, қолган жойларни эса савдо расталари эгаллаган), бозор иштироқчилари билан ҳам ажралиб туради. Бунда энди факат сотувчи ва харидор эмас, ҳаммоллар, мардикорлар, жарчилар, паттачилар, хуллас турли касб ва табақа вакиллари бозорда аралашиб кетган. Уларнинг кийимларига қараб қайси табақа вакили эканлигини билиб олиш мумкин. Буларнинг ҳаммаси ўз имкониятларига яраша товарни бозордан топа оларди. Кимdir ёғ, пишлоқ, балиқ, паррандалар, гўшт, мева ва сабзавот сотса, бошқа бирорлар қишлоқдан пичан, ўтин, сомон, жун, каноп, қўлда тўқилган матоларни олиб келишади.

Одатда шаҳар бозорлари ҳафтада бир ёки икки кун бўйларди, чунки дехқонларга сотиши учун маҳсулотларини тайёрлаб олишга вақт ва шаҳарга бориш учун бўш пайт топиш керак эди. Аста-секин, шаҳарлар ўсиб боргани сайин бозорлар ҳар куни ишлай бошладилар.

Бозор шаҳарликлар ҳаётида қандай катта ўрин эгаллаганлигини ўша пайтлари дунёга келган мақоллардан ҳам билиш мумкин: «Бозорда қадр-кимматдан бошқа ҳамма нарса сотилади», «Сандиқда пулинг бўлгунча бозорда дўстинг бўлсин».

Ёпик бозорларнинг қурилиши XVII асрга тегишли. Энг катта бозорлар шаҳар ҳокимликлари томонидан Лондон ва Парижда қурилган эди. XVII аср охиридан бошлаб бозор савдоси билан дўконлар ракобат қила бошлайди. Катта шаҳарларда ҳар иккала тарафида дўконлар чўзилиб кетган кўчалар мавжуд бўлиб, уларда ҳамма нарса: гўшт, парранда, темирчилик маҳсулотлари, зебу-зийнат буюмлари сотилар эди. Бу дўконлар ўрта асрлардагидан нимаси билан фарқ қиласиди? Уларда энди ўз молларини хунармандлар эмас, профессионал савдогарлар сотар эдилар. Ўша давр кишиларидан бири «дўконлар дунёни эгаллади, шаҳарларни ютиб юборишмокда», – деб ёзган эди.

Сайёр савдо, яъни атторлик ҳам фаоллашади. Атторларни йирик Европа шаҳарларининг кўчаларида кўриш мумкин эди. Улар Венециядаги Муқаддас Марк майдонида, Париждаги Янги кўприк ёнида, Кёльнда, Лондонда, Римда... изгиб юришардилар. Уларнинг дадил қичкириклари узоқдан эшитилиб туради, нон, кўкат, апельсинлар, газеталар, эски кийим, кўмир ва бошқа кўпгина нарсаларни таклиф қилишарди.

Одамлар бундай савдогарларни дайди деб хисоблашар ва эҳтиёткорлик билан муносабатда бўлишар эди. Аммо кўпинча бунақа атторлар тез орада дўкон сотиб олар ёки ижарага олиб, дўкондор бўлиб қоларди.

XVII асрда ярмаркаларнинг аҳамияти пасайиб кета бошлади. Шаҳарлар ўсиши билан энди ҳар-ҳар замонда бўладиган ярмаркалар шаҳар аҳолисининг талабини қондира олмас, кундалик савдо керак эди.

Савдо компаниялари. Савдо-сотикнинг ривожланиши савдо компаниялари ёки савдо жамиятлари сонининг ошишига олиб келди. Савдогарларнинг ҳаёти хавф-хатарга тўла, улар ҳар куни мол-

мулкини ва ҳатто ҳаётини ҳам хавфга қўйишар эди. Худди ана шу хавф-хатар савдогарларни бирлашишга ундарди.

Дастлаб бундай компания ўзаро ҳамма нарса – меҳнат, хавф-хатар, пулни бўлишадиган яқин қариндошлардан иборат бўлган. Кейинчалик компаниялар ўз таркибига меҳнати ва пулини қўшишга рози бўлган бегоналарни ҳам қабул қила бошладилар. Компания аъзолари унинг фаолияти натижаси учун ўз мол-мулклари билан жавоб берардилар. Акционерлик жамиятлари¹ ана шу тарзда ташкил қилинар эди.

Эркин бозор одатларини бузиб юборган монополияларнинг² пайдо бўлиши ҳам янги давр белгиси эди. XVII асрдаёқ ҳалқаро монополиялар вужудга келади. Бу иш анча мураккаб ҳисобланар, ақл, куч, чаққонлик ва энг асосийси катта пул талаб қиласарди. Голландияликлар ҳаммадан кўп монополияларга эга эдилар.

Дунё савдоси. Дунё савдо-сотифининг марказида Голландиядан ташқари Англия ҳам туради, бу эса Буюк географик кашфиётларнинг натижаларидан бири эди.

Англияда энг йирик бўлган Лондон портларида улкан елканли кемалар зич туради. Денгизлар оша савдо қилиш инглиз савдогарларини савдо компанияларига бирлашишга мажбур қилди. Бундай компаниялар сони катта тезлик билан ошиб борди.

1600 йилда Ост-Индия компанияси ташкил қилинган бўлиб, мамлакатга мурч ва қалампир олиб келиш ҳуқуқи фақат шу компанияга берилган эди. 1607 йилда компания ўз аъзоларига қўшган маблағларининг 500% микдорида дивиденд тўлади. Мамлакатга пахтани фақат «Левантий» компанияси олиб келиши мумкин эди. Улар Ўрта денгизи мамлакатлари билан савдо қилишдек имтиёзли ҳуқуқни ҳам қўлга олишганди. Россия билан машҳур «Московия» компанияси савдо қиласарди. Банкирлар ва даллоллар, қассоблар ва пиво пиширувчилар, машҳур зодагонлардан то қиролгача – барча-барча қайсиdir компаниянинг пайчилари бўлишга уринарди. Қироллар компанияларни тузишга жон-жон деб рози бўлар, чунки

¹ Акция – акционерлик жамияти чикарган ва унинг эгасига акционерлик жамияти фойдасидан даромад олиш ҳуқукини берувчи кимматбаҳо коғоз. Акционерлик жамияти – маблағи акциялар сотиши йўли билан ташкил қилинадиган капиталистик корхонанинг ташкилий шакли.

² Монополия – ишлаб чиқариш, савдо қилиш, кондан фойдаланишининг бир шахсга, шахслар гурухи, давлатга бериладиган имтиёзли ҳуқуқи.

берган патенти¹ учун хазинага улкан пуллар келиб тушар ва ўзлари бепул пайчи бўлиб олишар эди. Бундан ташкири кўпгина компаниялар узок мамлакатларда Англия манфаатларини химоя килиш мажбуриятини ҳам олишарди. XVI аср охири, айниқса дастлабки Стюартлар даврида, маълум товарлар билан ёки белгиланган худудда савдо килиш хукуқини асосан лондонлик бойлар сотиб олади. Лондонлик савдогарларнинг баъзилари 100 мингдан 500 минг фунт стерлингча бойлик тўплаганлиги тўғрисида маълумотлар сакланиб қолган. Савдодан келадиган фойданинг шу тариқа ўта тенгсиз тақсимланиши, саноат ва савдони монополиялаштириш сиёсати, ички бозорнинг кам тараққий этганлиги капитализм ривожланишига ғов бўлиб, қиролнинг иқтисодий сиёсати билан капиталистик тараққиёт эҳтиёжлари ўртасида кескин қарама-қаршиликлар келтириб чиқарди.

XVII аср бошларига келиб инглиз савдо компаниялари Эрондан Шимолий Америкагача, Швециядан Ҳиндистон ва Цейлонгача бўлган жуда катта худудни ўз таъсиrlарига олган, Ҳиндистон ва Америкага тобора кўпроқ кириб бораётган эди. 1640 йилга келиб инглиз савдосининг ҳажми XVII аср бошларидагига қараганда икки баробар зиёд эди.

Биржалар². XVII асрга келиб Европанинг қарийб ҳар бир савдо шахри ўз биржасига эга бўлди. Замондошларнинг фикрича биржা – бу «банкирлар, савдогарлар, негоциантлар³, биржа даллоллари ва банк агентлари, комиссирлар ва бошқа шахслар учрашадиган жойдир». Даставвал биржалар кўча ва майдонларда жойлашиб, маҳсус биноларга эга бўлмаган, лекин XV асрда ёк шаҳар ҳокимликлари бу мақсад учун маҳсус бинолар кура бошладилар.

Барча биржалар одамларнинг улкан тўдаси тўпланганлиги билан бир-бирига ўхшаб кетарди. Амстердамда туш пайтига бориб биржада 4500 гача одам тўпланарди. Лондон биржаси энг йириклидан бири эди.

Ҳар бир негоциант фойдали келишувга эришиш ва осиб қўйилган эълонлардан савдо кемаларининг келиши ёки сузуб ке-

¹ Патент – савдо ёки ишлаб чиқариш билан шуғулланиш хукуки ёки имтиёзини берувчи хужжат (маъноларидан бири).

² Биржса – товарлар ва кимматбахо коғозлар олди-сотидиси бўйича келишувга эришиладиган жой.

³ Негоциант – асосан бошқа мамлакатлар билан савдо ишлари олиб борадиган кўтарачи савдогар, коммерсант.

тиши ҳақидаги хабарни билиш мақсадида то тушгача биржада бўлишни ўзининг мажбурияти деб билар эди. Обрўли савдогар биржага келмадими – унинг ишлари ёмон ахволдалиги ҳақида мишишлар тарқала бошларди.

Албатта, биржа ўйинларида кимdir бойиб кетиб, бошқаси эса хонавайрон бўлган ҳолатлар ҳам кўплаб учраб туради. Ўша давр кишиларидан бири ёзади: «Сельд балиғи олдиндан, маълум бир санаға, ҳали у ушланмасдан олдин сотилар, дон ва бошқа товарлар ҳали дон пишиб улгурмасдан, товарлар эса етиб келмасдан олдин сотиларди». Биржалар кўтара ва халқаро савдода бош ролни ўйнар, пулнинг курсини ўрнатишга таъсир қилас, қимматбаҳо қофозлар муомаласини йўлга қўярди.

Банклар. XVI–XVII асрларда банк тизимида ўзгаришлар кузатилади. Факат хусусий эмас, балки давлат банклари ҳам тузилди. XVII асрда Амстердам ва Англия давлат банклари фаолият кўрсатарди. XVIII асрда юксак банк фаоллиги айниқса Амстердам, Лондон, Париж, Женевада кузатилади.

Банклар савдогарларга, саноатчиларга, давлатларга йирик кредитлар берарди. Банкирлар ишchan эҳтиёткорликка риоя қилишлари лозим, чунки банк иши катта таваккалчилик билан боғлиқ эди. 1789 йили Францияда рўй берган инқилоб туфайли ҳукумат алмашди ва голланд банклари зарбага учраб, уларнинг кредитлари йўқقا чиқди, кўпчилиги хонавайрон бўлди.

Бироқ савдо ва саноатнинг ривожи энди банкларнинг иштирокисиз бўла олмас ва улар куч йифар, ўсар, бойир эдилар. Мана бир мисол, 1523 йилда Яков Фуггер (1459–1525) деган киши «Муқаддас Рим империясининг» императори Карл V га ёзган эди: «Маълум ва кўриниб турибдики, Сиз жаноби олийлари менинг ёрдамимсиз Рим тахтига эга бўлишингиз мумкин эмас эди». Ҳақиқатда ҳам Карл V ўзини сайлаган князларни сотиб олиш учун 850 минг гульден сарфлаган бўлса, шунинг учдан икки қисмини у Фуггерлардан қарз олган. Габсбургларнинг урушлари ҳам ана шу оиланинг пуллари эвазига олиб борилган.

XVI асрда Фуггерлар Европанинг энг бой оилаларидан бири, факат князларга эмас, императорларга ҳам қарз берувчи банкирлар сифатида маълум эдилар. Оила молиявий қудратининг асосчилари император Карл V нинг замондошлари Раймунд ва Антон Фуггерлар эдилар. Уларни Карл V графлик шарафига сазовор қилган. Фуггер-

лар улкан ер майдонлариға эга бўлиб, тог-кон ишлари ҳамда савдо билан шуғулланардилар. Кўпгина князлар Фуггерлар оиласи билан қариндош бўлишни ҳавас қилишарди. Уларнинг бойлиги қанчалар тез кўпайганига ўзингиз баҳо бериб кўринг: 1511 йилда Фуггерларнинг мулки 250 минг гульден баҳоланганд бўлса, 1520 йилда 2 миллион, 1546 йилда 4,5 миллион гульдендан зиёд бўлган.

Шундай қилиб, Фуггерлар князларга ва ҳатто Габсбургларга ҳам пул қарз берувчилар бўлиб, улар Рим папаси учун черков йиғимларини тез-тез йигар ва индульгенциялар билан савдо қилишарди, демак Папа билан ҳам пул муомаласига эга эдилар.

Фуггерлар хайр-эхсонлари ҳамда олимлар ва рассомларга ҳомийлиги билан ҳам машҳур эдилар. Ўзлари дикқат билан танлаб олган санъат асарлари ва кутубхоналар ҳам оиланинг шоншуҳратини оширап эди.

Фуггерлар ҳакида: «бу эътиқодли католиклар, касблари бўйича банкирлар, ўз кўлларида уруш ва тинчлик тақдирини ушлаб туради», деб ёзишган замондошлари.

Яngi zodagonlar. Қолоқ шимол ва ғарб XVII асрда ҳам феодал эскиликлар юрти бўлиб қолаверди. Бироқ бу патриархал ҳаёт охирилаб қолган, қишлоқларда улкан ўзгаришлар рўй бераётганди. Англияда XV асрдан бошлаб ғов тутиш сиёсати кўлланар, тобора кўпроқ помешчиклар янгича хўжалик юрита бошлади: ҳайдаладиган ерларни яйловларга айлантирас, бунинг учун ижарачиларни эгаллаб турган ерларидан ҳайдаб юборишар, ишлаш учун эса батраклардан ва ёлланма қишлоқ хўжалиги ишчиларидан фойдаланишарди. Жун сотиш бойиш имкониятини берарди. Чет эллик саёҳатчилар XVII аср бошларида Англия ҳудудининг учдан бир қисми яйловга айлантирилганлигини, минг, балки ўн минг бошдан иборат қўйлар чексиз қатор билан Лондондан шимол томонга чўзилиб кетган катта йўлнинг икки тарафида ўтлаб юришини айтиб ўтган.

Ана шундай қўрғонларнинг эгаларини янги зодагонлар деб атай бошладилар. Ёлланма меҳнатни қўллаб, улар қишлоқ тадбиркорларига айландилар. Бу уларнинг яшаш тарзини ҳам ўзгартирди. Улар буржуазия билан яқин муносабат ўрнатдилар: ўз қўрғонларида саноат корхоналари ташкил қилдилар, савдогарлар билан бирга савдо билан шуғулландилар, бой буржуазия оилалари билан қариндошлиқ алоқаларига киришдилар.

Фермерлар. Янги хўжалик тарзи мулкдор дехқонларни ҳам ўзига бўйсундирди. Йирик хўжайинлар – замондошларнинг гувоҳлигига кўра, «пар тўшакда ухлаш» ва «кумуш идиш-товоқда овқатланиш» имкониятига эга бўлганлар камбағал қўшниларини қарзга қўмиб ташлар ва хонавайрон қилар, уларнинг жамоа далаларидаги ерларини сотиб олар, ишлаш учун батракларни ёллар эдилар. Уларнинг далаларида мукаммаллаштирилган меҳнат қуроллари – икки гилдиракли омочлар, уруғ экиш мосламалари, тупроқ майдалагичлардан фойдаланиларди. Бундай дехқонларни фермерлар дейишиади. Янги зодагонлар ва фермерлар – XVII аср бошларида инглиз кишлоқларида фаол ривожлантирилган янги, капиталистик муносабатларга асосланган турмуш тарзининг маҳсули эди. Айни пайтда, оталарининг ерларидан қувилган минглаб дехқонлар ерни ижарага олиш ёки ҳеч бўлмагандага бирор тасодифий иш топиш илинжида кишлоқма-кишлоқ изғиб юришарди.

Буржуазия. Савдонинг ўсиши шаҳар аҳолиси ўртасида буржуазия сонининг кўпайишига олиб келди. «Буржуа» сўзининг ўзи Францияда XII асрдаёқ пайдо бўлганди ва шаҳарнинг «хурматли» фуқароларини англатарди. Судъялар, адвокатлар, нотариуслар, врачлар, аптекачиларга ана шундай мурожаат қилишарди. Жамият «хурматли одам» бойликка эга бўлишини, шаҳар ташқарисида ери бўлишини ва ўз уйида яшаб, ўзини муносиб тутишини талаб киларди.

XVII аср ўрталарида буржуазиянинг юкори қисмини савдогар-негоциантлар ва банкирлар ташкил қиласарди.

Молиячилар. Молиячи-банкирлар буржуазиянинг алоҳида гурухи саналарди. Улар ўз банклари ва компанияларидаги ишларидан ташқари давлат молияси билан ҳам шугулланар, қироллик хизматини ҳам ўтардилар. Улардан кўпчилиги бу машғулотларни сармоячилик фаолияти билан бирга олиб бораради.

Француз қироли Людовик XV давридаги Кастаньеларнинг кудратли молиявий оиласини мисол қилиб олиш мумкин. Уларнинг бойиши Испан тахти учун бўлган уруш билан бирга бошланди. Ўша давр тарихчиси: «Уларнинг бирлари Каркасонда тали (давлат солиғи) йиғувчи эди, бошқалари Ост-Индия компанияси бошқарувчиси, ўғиллари ва жиянлари эса вазирлар бўлишдан олдин Тулузга парламенти мажлисида ўтирас эдилар. Каркасонда Кастанье мануфактуралари ишлар, Парижда эса Кастанье банки бор

эди... Амстердамда Кастанье банки ишларди», – деб ёзади. Улар курол сотиб олувчиларни пул билан таъминлар ва мустамлакачилик юришларини молиялаштирар эдилар. Қиролнинг асосий кредиторларидан бири «Негр бурни» компаниясини барпо қилишда, Гвинея компаниясида, испан Америкасига негрларни олиб кириши ҳақидаги шартномани тузишда, қисқасини айтганда, Франциянинг барча йирик халқаро савдосида иштирок этган Антуан де Кроз эди. 1712 йили у Луизиана билан савдо монополиясини ҳам эгаллаб олди.

Францияда давлатнинг марказлашган молия тизими бўлмай, хазина тушуми ўргада турувчиларга боғлиқ эди. Шундай ўргада турувчилардан бири қайсиdir бир солиқни йиғиш хуқуқини сотиб олувчилар эди. Улар маълум бир миқдордаги пулни хазинага тўлар, кейин эса барча йифилган пулларга хўжайинлик қиласар эдилар. 1730 йилдан кейин Францияда қиркта йифимларни бош сотиб олувчилар бўлиб, амалда мамлакатнинг молияси уларнинг қўлида эди. Кимлар йифимлар йиғиш хуқуқини сотиб олиши мумкин? Факат жуда бой одам, бунинг устига агар ҳокимиятда ҳам алокалари бўлса. Қироллиқда йифим йиғиш хуқуқини сотиб олувчилар 1789 йилги Буюк француз инқилобига қадар ҳам мавжуд эди.

Зодагонлик. Шаҳар аҳолиси. Францияда зодагонлик бир хилда эмас эди. Биринчидан, қадимий наслий зодагонлик мавжуд эди (ўз наслини илк ўрта асрлардан бошлаган), улар ўз даромадларини ерлари, саройда ва армиядаги хизматларидан оларди. Қироллар улардан совға ва нафақаларни аяшмасди. Бироқ барибир саройда хизмат қилмайдиган, ўз ерларини эса аллақачон сотиб юборгандар орасида камбағаллашган оиласар ҳам бор эди. Уларни «ҳаво феодаллари» деб аташарди, чунки уларга ҳаводан бошқа ҳеч нарса тегишли эмасди.

Замондошлар ерга ўzlари ишлов беришга ёки ҳунармандчилик қилишга мажбур бўлган зодагонлар ҳақида ёзиб қолишидирган. Шутарзда Оверндаги қадимий, лекин камбағаллашган зодагон наслидан бўлган шевалье де'Прад кўмирчилик касби билан шуғулланишга мажбур бўлган эди.

Чекка провинциялардаги зодагонларнинг йиғилишлари бу хона-вайрон бўлган аслзодалар учун байрам куни бўларди. Шунда улар байрамона тушликларда дехқончасига куруқ ўтган узок кунлар учун ўзларини роса сийлашарди.

Француз зодагонларининг бир қисми савдо ва тадбиркорлик билан шуғуланишини ўзлари учун қадр-қимматини ерга урувчи фаолият деб хисоблашарди. Лекин XVIII асрда ишчан зодагонлик шакллана бошлади. Агар зодагон ерларида темир рудаси ёки тош кўумир топсалар, у тадбиркор бўларди ёки бу ерларни ижара-га берарди. Баъзи бирлари савдо компанияларининг пайчилари ёки йигимлар йигиш ҳуқуқини сотиб олувчи бўлиб олишади, мустамла-ка қўргонларини яратишда қатнашишади.

Бир қатор француз тарихчиларининг гувоҳлик беришларича, XVIII асрда Францияда зодагонлик «иши жараёнининг ҳақиқий жа-заваси билан қамраб олинган эди... Ҳаммасидан кўпроқ савдо билан шуғулланарди». Янги фаолият уларнинг рухини ўзгартириб юбо-рар, кирол ҳукмронлигини чеклаш истагини туғдирар эди.

Шахар аҳолисининг бир қисмини «қуий табақа» вакилла-ри ташкил қиласи эди. Бойлик ошиб борар, лекин у билан ёнма-ён қашшоқлик, қашшоқлар сони ҳам ошиб борарди. Ўша пайтларда ҳар бир шахар ўз қашшоқларига эга эди ва фақат ўз меҳнати би-лан кун кўрадиган ёки ёлланиб ишлаётган ҳар бир киши уларнинг сафига тушиб қолиши ҳеч гап эмасди. Бунинг сабаблари жуда кўп эди, масалан, касаллик, ишдан айрилиш, ойлик маошнинг камайи-ши, эр-хотиндан бирининг вафоти, болалар кўп бўлганда нон нар-хининг ошиши... Бу кулфатлар қашшоқлик ва гадоликка олиб ке-ларди. «Ўз қашшоқларига» шахар бирор ёрдам беришга ҳаракат қиласи, улар ҳақида қайғуришга уринарди. Масалан, Венецияда хокимият уларга маҳсус хужжат ёки жетон (Авлиё Марк белгиси) беришар, улар қашшоқларга шаҳарда яшаш ва ҳатто черков ёнида, бой маҳаллаларда ва бозорларда садақа сўрашга рухсат берарди. Қашшоқларга ачинишар, лекин нафратланишмас, чунки инсонни очиқ осмон остига ҳайдовчи хонавайронлик ҳаммага хавф солиб турарди. Агар қашшоқ «бегона» бўлса, унинг олдида фақат битта йўл-дайдилик ва гадоликкина қоларди.

«Рисоладаги» одамлар дайдилардан нафратланишарди. Қадимги даврларда бойнинг остонасида турган гадо Худонинг элчиси хисобланарди. Христианлар бу қиёфада Исо пайғамбарнинг ўзи ҳам келиши мумкинлигига ишонишарди. Бироқ XVI асрга келиб бундай одамларга ачиниш ҳисси қарийб йўқ бўлиб кетди. Уларнинг ҳаёти дўзах, кўринишлари ҳам даҳшатли, яралар билан қопланган ифлос жулдирвоқилар тўдасидан иборат бўларди. Шахарликлар дайдилар-

дан қўрқишарди, уларни дарвозадан қувлашишарди, лекин улардан бутунлай кутулишнинг иложи йўқ эди. Уларни касалликлар қулатар, ўлим изма-из юрар, аммо дайди ва гадолар барибир камайиб қолмас эди.

XVI асрда ёлланма ишчиларга эҳтиёж пайдо бўлди, аммо йўллардаги дайдилар тўдаси эса тадбиркорларда нафрат уйғотарди. Уларнинг қиёфасида арzon ишчи кучи бўлиши мумкин бўлган ишёқмасларни кўришишарди, холос.

Ҳокимият дайдилар хақида қонунлар қабул қиласди, шаҳар кўчаларида садака сўрашни тақиқлади, уни бузганларни аёвсиз жазолайди. Германиянинг Кёльн шаҳрида уч марта «қонунсиз» садака сўрашда қўлга тушган дайди осиб ўлдирилишга ҳукм қилинарди. XVI асрда Англияда дайдиларга қарши шундай шафқатсиз қонунлар қабул қилинди, ҳалк уларни «қонли» деб атади: хоҳлаган киши дайдини мажбуран ўз ишчисига айлантириши мумкин эди. Қочиб кетган, лекин қўлга тушган дайдига тамфа босишарди. Бу ахволдан чиқиши йўли бормиди? Ҳар ким насибасини изларди. Баъзилари талончилик, қароқчилик билан шуғулланувчи тўдаларга бирлашардилар. Бошқалари ҳарбий хизматга кирап ёки хизматкорликка ёлланишар эди. Бойлар кўп эди ва улар хизматкорсиз яшай олмасди. Фақат биргина француз шахри Лионда XVI асрда аҳолининг чорагини хизматкорлар ташкил қиласди. Кўпгина усталар, хунармандлар, ўзига тўқ дехқонлар ҳам хизматкорга эга эдилар. Бироқ хизматкорликка ихтиёrsиз боришарди, чунки у ўзига-ўзи хўжайин эмас, куну-тун хўжайини хизматида эди. Шундай қилиб, улар йўл четида яшашар, уларнинг кўпчилиги шу жойда туғилар, шу жойда ўлардилар.

Деҳқонлар. Ўрта асрлардагидек XVI–XVII асрларда ҳам Европа аҳолиси жуда секин кўпаяди. Деҳқонлар бутун аҳолининг 88 фоизини ташкил қиласди. Шаҳарларнинг деярли бутунлай ўсмаётганлигининг сабабларидан бири қишлоқ хўжалигини юритишининг қолок усувлари эди.

Масалан, Францияда ерни кўлда ёғоч омоч билан ёки қадимиий чўкич билан ҳайдашарди. Ҳатто XVIII асрда ҳам Темир омоч камдан-кам, асосан бой дехқон хўжалигида қўлланарди. Темир қиммат эди. Ёғоч омочдан сўнг ерни бороналаб чиқишар, кейин экишарди. Буғдой пишганда уни кўл ўрок билан ўришарди, чунки ўт ўришга мўлжалланган бел ўрок (чалғи) билан буғдой ўришга одат йўл қўймасди. Қишлоқларда хурофот ҳукм сурарди. Далани

буғдой ёки арпа билан ва ёқилган шам билан уч марта айланиб чиқмагунларича ҳайдашни бошламас эдилар. Уруғни фақат 30 та тешикли (кўп ҳам эмас, оз ҳам эмас) бўри терисида сепишарди. Битта шаҳарликни боқиши учун маҳсулотнинг шунақа миқдори талаб қилинардики, уни фақат ерда ишлаётган 8–9 дехқонгина етишира оларди. Эҳтимол тақдир юборган синовлар дехқонларда шароитга мослаша олиш қобилияти, қарор қабул қилишда имиллаш, ҳар қандай янгилик киритилишидан қўркиш, кун кўриш манбаларини излашда ўжарлик каби характер белгиларини пайдо қилгандир. Шимолий Европа дехқонлари, масалан, кончи ҳам, темирчи ҳам, тўқувчи ҳам, юқ ташувчи ҳам, каботаж¹ сузуви ҳам, ёлланма ишчи ҳам эдилар. Кўшимча даромадсиз яшашнинг иложи йўқ эди.

Асрлар давомида дехқон қул ҳам, крепостной ҳам, ернинг эркин эгаси ҳам, буйруқни бажарувчи ва ижарачи ҳам бўлиб кўрди. Агар ўрта асрларда дехқонлар асосан шахсан қарам бўлган бўлсалар, янги давр бошларига келиб кўпчиликлари шахсий эркинлик қанчалар муҳим бўлмасин, у тўқ ҳаётни кафолатлай олмаслигини яхши тушишишарди.

1676 йили Юқори Австриядан бир руҳоний ўз даврини шундай шарафлайди: «Худога шукроналарким, энди округимиизда крепостнойлар йўқ ва бугун ҳар бир киши ўзи ҳоҳлаган ерда яшashi мумкин!» Ҳа, дехқон эркин, лекин аввалгидай ер сенъорга тегишли, давлат солиқ олади, черковга ўндан бирини бериш керак, сенъорга эса улушини. Бундай эркинликда очлиқдан ва оғир меҳнатдан ўлиб колмасликнинг иложини қилиш жудаям қийин эди.

Янги даврда янгича турмуш тарзининг белгилари намоён бўлади, савдо ривожланади, меҳнат тақсимотига асосланган мануфактура ишлаб чиқариши пайдо бўлади ва ривожланади, техника аввалгидан тезроқ мукаммаллашади.

Аҳоли турли қатламларининг ҳолати ва машғулоти ўзгаради: буржуазия ўсиб ва бойиб боради, зодагонлар янги хўжалик ҳаётига тортилади, дехқонлар аста-секин шахсий қарамлиқдан озод қилинади, ёлланиб ишлаётган кишилар сони ўсиб боради.

Кундалик ҳаёт. Сиз Европа мамлакатларининг янги давр бошларидаги иқтисодий ва сиёсий ривожланиши билан, монархлар ва зодагонлар, савдогарлар, хунармандлар, дехқонлар ҳаёти билан та-

¹ Каботаж – бир дengизнинг ёки бир давлатнинг портлари орасида кирғоқ бўйлаб кемаларда сузуб юриш.

нишдингиз. Лекин сиз улар қандай шароитда яшаганлигини, ўша пайтларда одамлар қанча умр кўрганлигини, нималарни истеъмол қилганлигини, қандай касалликларга дучор бўлганлигини, нималардан кўрқанликларини ва Худодан нимани тилаганлигини биласизми?

Ўрта асрлар ва янги давр бошларидағи воқеалардан маълумки, дехқонлар сенъорларга қарши кўп маротаба кўзголон кўтаришган, ҳақиқий урушлар олиб боришган. Бироқ бу унчалар ҳам тез-тез бўлиб турган эмас. Одатда улар қийинчилик билан бўлса ҳам бир-бири билан келишишган. Ҳатто ўзларининг шахсий эрксизликла-ри ва кўплаб мажбуриятларини ҳам дехқонлар зарурий деб кабул қилганлар. Феодаллар ҳам, ҳатто ёмон тинчлик ҳам яхши жанжал-дан маъқулроқ эканлигини тушунганлар. Дехқонларнинг ҳақиқий душманлари эса вабо, очлик ва урушлар эди.

«Эй, Худо! Бизларни вабо, очлик ва урушдан ўзинг асрагин!», – XVII асрда дехқонларнинг илтижолари ана шундай бошланар эди.

Ҳам ташки, ҳам ўзаро доимий урушлар XVI–XVII асрларда Европа ахолисининг кенг оммасида ишончсизлик ва қўрқув туйғуларини уйғотарди. Урушлар вайроналик, талон-торож, зўравонлик олиб ке-лар ва ўлим даҳшатини соларди. У даврларда уруш ўзини ўзи боқарди ва аскарлар ҳимоясиз шаҳарликлар ва энг аввало қурол тақиб юриши ҳуқукидан маҳрум қилинган бечора дехқонлар хисобидан кун кўрар эдилар.

Қишлоқ ва шаҳарлар ахолиси ишончсизлиги ва қўрқувининг яна бир сабаби очлик ва унинг даҳшати эди. Очлик Европада тез-тез такрорланиб туради (бу паст ҳосилдорликнинг оқибати эди). Масалан, Германияда 1660–1807 йиллар оралиғида ўртача ҳар тўрт йилдан биттасида очарчилик рўй берган.

Ва ниҳоят эпидемиялар, энг аввало, вабо ва ўлат қўрқув келти-рарди. Ўрта асрларнинг қирғин келтирувчиси бўлган вабо янги давр бошларида ҳам одамларни тинч қўймади. Масалан, Парижда 1612, 1619, 1631, 1638, 1662 ва 1688 йилларда авжига чиқди. Фақат XVII асрда олти марта эпидемия тарқалган. XVIII асрда бироз енгил-лик бўлди, лекин барибир 1720 йили Тулон ва Марселда вабонинг даҳшатли эпидемияси бўлди. Тарихчиларнинг ёзишига қараганда, эпидемия натижасида Марсель ахолисининг ярми қирилиб кетган, кўчалар жасадга тўла бўлган, уларни йифиб олишга одам бўлмаган. У даврда ҳали ўлат ва терлатма (тиф) каби касаликларни ҳам да-

волай олмаганлар. XVIII асрда ҳар 100 кишидан 95 таси ўлат билан касалланган, ҳар еттинчи bemor эса вафот этган. Терлама XVII ва XVIII асрларда айниқса кўп бўлган. Шундай эпидемиялардан бирида бу касаллик юзлаб бечора парижликларни қабрга олиб кетди. Гўрковлар ўлганларнинг жасадини кўмиб улгуришмасди.

XVIII асрда Европада кенг тарқалган яна бир касаллик чечак бўлди. Ундан айниқса ёш болалар катта жабр кўрарди. Бу касаллик ҳам миллионлаб одамларнинг умрига зомин бўл. Кўркув ва эртанги кунга ишончсизлик рухи бу кулфатларнинг ниҳояси кўринмаганидан келиб чиқарди. Ахоли эпидемиядан ўзини ўнглаб олишга улгурмасдан қаҳратон қиши бошланади, сўнг ҳосил яхши бўлмайди ва шундай оғатларнинг охири йўқдай туюларди. Факат XIX асрга келиб (1798 йили Женнер томонидан эмлаш усули кашф қилингандан сўнг) европаликлар бу даҳшатли жараёндан чиқа олдилар.

Бундай шароитда Европа аҳолиси секин кўпайди, баъзан эса бутунлай кўпаймади ҳам. Айниқса янги туғилган чақалоқлар орасида ўлим кўп эди. Камдан-кам болалар улғайишга улгуради. Масалан, XVIII асрнинг II ярмида Францияда туғилган ҳар 1000 нафар боладан 273 нафари 1 ёшга етиб борган. Бу кўрсатгич Англияда – 165, Швецияда – 200, Данияда – 191 нафарни ташкил қилган¹. Қирқ ёшдагилар кекса, қария саналган, камдан-кам одамлар 70 ёшгача яшардилар. Ўртacha умр 30–34 ёш хисобланарди.

Баъзи Европа шаҳарларида XVIII асрда чечакдан ўлган аҳоли миқдори²

Шаҳар	Йил	Чечакдан ўлганлар. (Барча ўлганларга нисбатан % ҳисобида)
Лондон	1710–1739	8,2
Дублин	1715–1746	18,4
Копенгаген	1750–1769	8,8
Берлин	1782–1791	9,1
Вена	1752–1753	10,2

Факат XVIII асрга келиб аҳоли сонининг камайиши тўхтади ва аста-секин унинг кўпайиш жараёни бошланди. Европа аҳолиси

¹ Ливи Баччи М. Демографическая история Европы / Серия «Становление Европы» / Пер. с итал. А. Миролюбовой. – СПб.: «Александрия», 2010. С. 164.

² Шу асар, 129-бет.

1500 йилдаги 84 миллион кишидан 1800 йилга келиб 195 миллион кишигача ўси. Аҳолининг йиллик ўсиши 6,2% ни ташкил қилди. (Ер юзи аҳолиси эра бошида 150–200 млн киши, 1700 йили – 600 млн, 1800 йили эса – 950 млн кишини ташкил қилган).

Укубатга тўла бўлган бундай ҳаёт шахснинг шаклланишига ҳам таъсир қиласарди. Бундай ҳолатда ўлим одатий ҳодисага айланар, уни ҳар доим кутиб яшаш керак эди.

Сон-саноқсиз урушлар бўлганига қарамасдан эркаклар узоқроқ яшардилар. Аёллар умри айниқса қисқа эди. Кўпинча улар энди кучга тўлган пайтларида – йигирма билан қирқ ёшлар оралиғида вафот этишарди. Даладаги ва уйдаги оғир, укубатли меҳнат, туғиш пайтида тиббий ёрдамнинг йўқлиги, доимий ташвишлар ўз кучини кўрсатарди. XVI асрда Европа мамлакатларининг учдан икки қисмини эркаклар, фақат учдан бир қисминигина аёллар ташкил қиласарди.

Шахсий гигиенанинг паст даражаси ва тиббий ёрдамнинг қарийб йўқлиги касалликларнинг кучайишига имкон яратарди. XVIII асрда яшаган бир киши: «қичима ва бошқа барча тери касалликлари етарли тоза юрмаслик оқибатида келиб чикарди, ўтган замонларда эса фақат ички кийимнинг йўқлиги туфайлигина шунчалар кўп тарқалиб кетган эди», – дея ёзиб қолдирган.

Ички кийим европаликлар турмушига XVIII асрда кириб келди. Агар XIV–XV асрлардаги ўрта аср шаҳарларида ҳаммомлар жуда кўп бўлиб, аҳоли жон-жон деб уларга борган бўлса, XVI–XVIII асрларда эса ҳаммомлар қарийб йўқ бўлиб кетди ёки «даволанадиган жой» сифатидагина сақланиб қолди. Нима учун? Эпидемиялар кучайиши билан улар касаллик тарқаладиган жойга айланиб қолди, одамлар ҳаммомга боришдан қўрқишаради. 1800 йили Лондонда бирорта ҳам ҳаммом йўқ эди. Ванна хоналари ҳатто бой хонадонларда ҳам камдан-кам бўларди.

Канализациянинг йўқлиги ҳам эпидемия тарқалишининг сабабларидан бири эди. Бу йирик шаҳарлар учун айниқса катта муаммо бўлган. Парижни тоза сақлаш масаласи билан ҳатто Франция Фанлар академияси шуғулланган. У даврларда европаликларнинг овқати йилнинг фаслига ва иқлим шароитига, энг муҳими оиланинг иқтисодий аҳволига боғлиқ эди.

XVI–XVIII асрларда асосан ўсимлик маҳсулотларини истеъмол қилишарди, аслида улар ҳам етишмас эди. Кўпайиб бораётган

аҳолини таъминлаш асосан экиладиган майдонларни кенгайтириш хисобига юз беради. XVI асрдан XVIII асртаги қарордаги уч баробар кўпайган Европа аҳолисини боқиши учун ер майдонларининг ҳам шунчак кенгайиши талаб қилинар эди. Буғдор, гуруч, маккажӯхори (Америка кашф қилингандан сўнг) танқис эди. Оқ нон то XVIII асртаги ноёб, бойлик белгиси бўлган ва то шу давртагача европаликлар кора нон ва атала билан кун кечиришган. XVIII аср бошларида ҳам европаликлар қишлоқларда арпа, сўли, жавдар ейишар эди¹.

Фақат 1750–1850 йиллар оралиғидагина оқ нон «инқилоби» рўй берди, бу пайтга келиб буғдор бошқа дон экинларини (энг аввало Англиядада) сикиб чиқарди.

Картошканинг ҳам европаликлар дастурхонига келиши қийин кечди. Картошкага узоқ вақт ишонқирамай қарашибди. Фақат XVIII – XIX асрлар чегарасига келиб бу таом узил-кесил овқат хисобланди. Қанчалар ажабланарли бўлмасин, унинг дастурхонга келишига урушлар ва очлик сабаб бўлди, чунки фақат бир кишини буғдор билан боқа оладиган ер парчаси, картошка экилганда икки кишини боқиши мумкин эди. Картошка камбағалларининг овқати хисобланарди.

XVIII асрда Голландияда камбағал кишиларнинг асосий овқати шолғом, қовурилган пиёз, қуруқ нон бўлган. Шаҳарликлар дастурхони камбағалироқ эди. Кечқурунги овқат асосан сутга бўқтириб олинган нон ушоқларидан иборат бўлган.

Европа мамлакатларининг аҳолиси гўштни жуда кам истеъмол килишган². Масалан, XVIII асрда гўшт истеъмол қилиш бир кишига бир йилда ўртача 22 кг ни ташкил қилган (Париж бундан мустасно эди, у ерда бу рақам 72 кг ни ташкил қиласади). Гўштни ҳафтада бир марта, шунда ҳам тузлаб қўйилганини ейишарди. Англиядада ҳам, Германия ва бошқа давлатларда ҳам шундай эди. Ана шундай ғарифона дастурхонга муҳим қўшимча балиқ хисобланарди. Қирғоқбўйи шаҳар ва қишлоқларida балиқ истеъмол қилиш яшаш

¹ Бир катор европалик олимларнинг (В. Абелль, Г. Шмидлер, М.Л. Баччи) таъкидлашича, Ўрта асрларда Европада гўшт истеъмол қилиш анча юкори бўлган. Масалан, Германияда аҳоли жон бошига йилига ўртача 100 кг.гача бўлган ва факат янги даврда 14 кг.гача тушиб кетган. (Таккослаш учун: ҳозирда Люксембург, Австралия, Янги Зеландия, Испания каби мамлакатларда ўртача йилига 110–130 кг ни ташкил қиласади).

² XVII асрда нондан олинниши мумкин бўлган 1000 калория кувват агар гўштдан олинса 5–17 марта, балиқдан олинса 55 марта, тухумдан олинса 7 марта, қантдан олинса 10–20 марта киммат бўлган.

ва болаларни ўстиришга ёрдам берди. Дин ҳам балиқ ейишга йўл қўярди. Христиан тақвимида 150 дан ортиқ рўза кунлари белгиланган. Сешанба, жума, шанба – рўза кунлари. Бу кунларда ҳатто бой одамлар ҳам гўшт ея олишмасди, балиқни эса тановул қилиш мумкин эди. Бу кунлари ҳатто бозорларда ҳам гўшт билан ёғ сотиши мумкин эмасди.

Бой кишиларнинг уйларида овқат хилма-хил ва кўпроқ бўларди. Кунлик ейиладиган таомларнинг қувватини ҳисоблашга уриниб, олимлар камбағал оилаларда у 2,5 минг, бой оилаларда 6–7 минг калория ўртасида ўзгариб туришини аниқладилар¹.

XVIII асрда Европада янги ичимликлар – чой, қахва ва шоколад ича бошладилар. Ўша даврда 1782 йилда бир киши: «Сизга қахва таклиф қилмайдиган бирорта ҳам буржуа хонадони йўқ. Нонуштага сутли қахва ичмайдиган биронта ҳам сотувчи, ошпаз ёки хизматкор аёл топилмайди», – деб ёзган.

XVI–XVII асрларда Европада қанд истеъмол қилиш кўпайди. XVI асрда ёқ Англия ва Германияда қанд пишириш билан шуғулланадиган корхоналар бор эди, XVII асрда эса бу соҳа Голландияда ривож топди.

XVI асрда ёқ таом пишириш китоблари мавжуд эди. Ошпазлик касби юксак баҳоланаради. Таом тайёрлаш йўриқномасига қараганда энг ноёб овқатларни гўштдан, балиқ ва сабзавотдан тайёрлашган. Овқатга кўпгина зираворлар ва ўтлар қўшиларди. Мева ва сабзавотларни уй шароитида узоқ вақт сақлаш усуслари ҳам ривожланганди.

Бой шаҳарликларнинг уйларида озиқ-овқат захираларини сақлаш учун ертўла ва омборхоналар бўлган. Оилалар озиқ-овқат ва бошқа биринчи зарурат молларини сотиб олишни қайд қиласидиган маҳсус дафтарлар тутишарди. Уй хўжалигини юритиш муҳим иш деб ҳисбланиб, оиланинг ҳар бир аъзоси ўз хизматига эга эди.

Бой хонадонларда ошхонани жиҳозлашга катта эътибор берилади. Уйда бир нечта ошхона бўлиши мумкин эди, жуда ҳам бой хонадонларда ошхона учун алоҳида бино қуриларди. Турли катталикдаги ва турли мақсадда ишлатиладиган идиш-товоқлар, коса, товаларсиз ўзига тўқ оиланинг ошхонасини тасаввур қилиб бўлмасди.

Янги давр бошларида шаҳарлар. XVI асрда Европадаги энг йирик шаҳар Лондон эди. Ҳатто Франция, Германия, Италия ва Испа-

¹ Олимларнинг айтишича, оғир жисмоний меҳнат қилганда овқатнинг қуввати 4–4,5 минг калория бўлиши керак.

ния аҳолисига нисбатан Англия аҳолиси камайиб қолган XVII аср охирида ҳам Лондон Европанинг энг катта шахри бўлиб қолаверди. 1700 йили бу ерда мамлакат аҳолисининг ўндан бир кисми, тахминан 550 минг киши яшарди. XVIII аср ўрталарига келиб лондонликлар сони 675 минг кишига етди. Вабо ва бошқа юкумли касалликлардан ўлим жуда юқори бўлишига қарамасдан шахар йириклишиб борди.

Англиянинг қолган шаҳарларининг аксарияти катта эмасди. Бир нечта шаҳарлардагина 10–20 минг аҳоли яшарди, холос. Англиянинг пойтахти бир неча қисмдан иборат эди: Сити шаҳрининг ишбилармонлик маркази; Вэстминстерда қирол, парламент ва бойлар истиқомат қиласиди; Темза соҳили бўйлаб оддий халқ яшайдиган кварталлар чўзилиб кетган, дарёнинг чап қирғоғида тор кўчали Саутворк жойлашган бўлиб, унда баъзи бир театрлар ҳам бор эди (1630 йилга келиб Лондонда улар 16 та эди, шу даврда Парижда эса битта театр мавжуд эди).

Лондон нимадан қурилганди? XV аср бошларидан буён ғишт кенг қўлланди, айниқса, шаҳарнинг учдан бирини йўқ қилган 1666 йилги буюк ёнғиндан сўнг шундай бўлди.

Лондон йирик савдо маркази сифатида ривожланди ва ўзининг бозорлари билан машҳур эди. Уларнинг сони кўп эди. Айниқса, 1666 йилги ёнғиндан кейин қайтадан қурилган Лондон усти ёпик бозори ўзининг катталиги билан машҳур эди.

Тарих Англия пойтахтида ҳар йили ўтказилиб туриладиган ярмаркалар ҳақида ҳам хотира сақлаб қолган. Ёмғирдан кейинги қўзиқориндай дўконлар пайдо бўларди. Агар 1663 йили шаҳарда фақат 50–60 та дўкончалар бўлган бўлса, 1700 йилда уларнинг сони 300 тадан 400 тагача етди. Уларнинг аксарияти зеб бериб безатилган эди. 1728 йилда Лондон дўконларининг кўринишидан ҳайратга тушган бир француз сайёхи ёзган эди: «Бизнинг Францияда нима йўқ, ойна йўқ, одатда улар жуда чиройли ва тиниқ бўлади. Бу ерда дўконлар ойна билан ўраб ташланган ва уларнинг ортига товар қўйилади, бу уларни ҳам чангдан асрайди, ҳам харидорларга кўриниб турари ҳамда дўконларга ҳамма тарафдан чиройли кўриниш беради».

Ўша даврдаги Лондонни кўчаларда у ёқдан бу ёққа изғиб юрган сайёр савдогарларсиз тасаввур қилиш қийин. Бўйнига осиб олинган қутиларга товар жойлашган бўларди. Сотиш мумкин бўлган барча нарсани таклиф қилишарди.

Инглиз жамияти хилма-хил табақалардан иборат эди. Ҳамма ўз даромадига яраша кун кечирар, даромад эса турлича эди. Бой кишиларнинг уйлари ҳар беш, ўн йилда яна ҳам ҳашаматлироқ бўлиб кетар, чиройли сувоқ билан безатилар, дараҳтларнинг қимматбаҳо навларидан ясалган ҳашамли мебель билан жихозланарди. Хоналарни безашда ёғоч панеллар, мато ва гулли қофозлар ишлатила бошланди. XVII асрдаёқ турар жой биноларига камин кура бошладилар. Камин ёрдамида хонани иситишнинг иложи йўқ, лекин қишининг совуқ кунлари унга яқин ўтирилса, иссиниш мумкин эди.

У даврларда ҳали уйларда даҳлизлар қуришмас, хоналар бирбиридан алоҳида эмас, ҳатто ётадиган хонадан ҳам бошқа хоналарга ўтиларди. Энди деразалар ҳажми катталашди, бу эса хоналарни анча ёруғроқ қилди.

Камбағалларнинг истиқомат жойлари ташландиқ, хароб, канализация ҳақида у ерда эшитишмаган ҳам эди, лекин очлик ва касаллик ҳамма ерда мавжуд эди.

Камбағал оиласлар кўпинча биттагина хонада тикилиб яшашарди. Сал бойроқ бўлғанлари икки хонали квартирага эга эдилар. Бечораларда мебель қарийб бўлмас эди. Уларнинг мулклари кўпинча стол ва стуллардан, ёстиқли қилиб курилган ёғоч кроват, қулфланадиган сандик (унда энг оддий кийимларни сақлашарди) ва ошхона анжомлари, хамир қорийдиган лаган, қозонча кабилардан иборат эди. Энг камбағаллари полга ёйиб қўйилган похол устида ухлашар эди. Қишлоқ уйларида яшаш хоналаридан ташқари уй ҳайвонлари учун бино – молхона ҳам бўларди.

Гўзалликнинг янги меъзони. Ҳаётдаги ижобий ўзгаришлар юриш-туриш ва кийинища ҳам янгиликларга олиб келди. Гўзалликнинг янги ғояси янги давр бошларида Италияда пайдо бўлди, у ерда инсон шахсига қизиқиши уйғонган эди. Уйғониш даври одамлари юз ва қомат гўзаллигининг янги қоидаларини ўрнатдилар. Баланд бўй, кенг елкалар, ингичка бел, чиройли оғиз, оппоқ тишлар гўзаллик идеалига айланди.

Оқиши соchlар модага кирди ва аёллар бўянишга ёки париклардан фойдаланишга мажбур бўлдилар. Бундан ташқари пешона кенг бўлиши керак эди ва шунинг учун манглай устидаги соchlарнинг бир қисмини қириб юришга, қош ва киприкларни теришга тўғри келарди.

Гўзалликнинг бу идеали Уйғониш даври рассомлари чизган портретларда мужассамлашган. Кийимлар готика¹ давридагига нисбатан кенгроқ бўлди. XVI асрда янги фасонга кўра енглар қирқила бошлиди. Кесилган жойлардан оқ рангдаги ички кийим кўриниб турарди – оқ мато энг қимматбаҳо ҳисобланарди. Енглар елкадаги куйлакка ленталар билан маҳкамланарди. Енгнинг фасони энди одамнинг у ёки бу табақага мансублигини кўрсатиб турарди.

Эркаклар модасида каштали матодан тикилган плашчлар оммавийлашиб кетди. Кекса кишилар, олимлар, зиёлиларнинг вакиллари узун, ерга етадиган плашч кийиб юришарди – бундай кийим обрўли, «муносиб» ҳисобланарди. Ҳозир ҳам бунақа плашчлар бир қатор мамлакатларда университет кийими сифатида сақланиб қолган.

Энг модали бош кийимларидан бири патлар билан безатилган берет ҳисобланарди. Аёллар куйлаклари кўплаб кашталар, олтин занжирлар ва бошқа қимматбаҳо зеб-зийнатлар билан безатиларди. Йўғон ва узун соchlар аёлларнинг энг илфор модадаги соч турмаклаши ҳисобланарди. Олий табақа хонимларининг соч турмаклари олтин ва кумушдан ясалган нозик тўрчалар билан безаларди.

XVI асрда Испаниянинг юксак иқтисодий аҳволи Европа хаётининг олдинги ўрнига Испания қироллик уйининг мода ва ахлоқини олиб чиқди. Испан модасига тақлид қилишарди, у афсонавий гўзал ҳисобланарди.

Қомат гўзаллигини кўрсатишга интиладиган Италия Уйғониш даври модасидан фарқли равишда, испан модаси геометрик шакллар таъсири остида қолган эди. Костюмни қимматбаҳо баҳмал ва парчадан тикишар, олтин ва кумуш ипларни ишлатишар, қимматбаҳо тошлар, олтин занжир ва белбоғлар билан безатишарди (Америка очилгандан сўнг мамлакатда қимматбаҳо тошлар ва олтин етарли эди), шунингдек, жуда қиммат бўлган мовий ранг ҳалқалардан ҳам фойдаланишарди.

Испан модаси қоматнинг табиий шаклини сунъийси билан алмаштиради, бунга қалин матолар тиқиб қўйиладиган эркаклар курткалари (уларни «ғоз қорин» дейишарди), корсетлар ва аёллар кўйлагидаги металл пластинкалар ёрдам берарди. Аёлларнинг кий-

¹ Готика – (итал. Gotiko – хотларга хос) – XII асрнинг иккинчи ярми – XV асрлар Фарбий Европа санъатига хос услуг. Уйғониш даври гуманистлари ўзларидан олдинги санъатнинг «ёввойи» характерини таъкидлаш учун шундай аташган.

имлари қаттиқ ва харакатсиз бўларди. Эркаклар кийими рицарларнинг костюмини эслатарди.

Испан костюмлари тикувчилик санъати намунаси бўлиб, испан модаси бутун Европада шухрат қозонган эди. XVII аср иккинчи ярмида абсолютизм гуллаб-яшнаган даврда мода маркази Францияга кўчди. Шу даврдан бошлаб Европа модасини Париж белгилайдиган бўлди.

Эркаклар парчадан тикилган камзул, ички нимча ва тиззагача тор шим кийиб юрардилар. 1640 йилга яқин Францияда қайрилма гажакли эркаклар париги модага кириб, узоқ муддат сақланиб қолди. Аёлларнинг соч турмаклари хам мураккаб эди, улар симдан ясалган каркаслар билан ушланиб турадилар. Аёллар куйлаклари парча ва шоҳидан тикилар, кўплаб кашталар билан безатиларди. Аёллар кийимини тўқилган рўмоллар, елпигичлар, тугмалар, түфноғичлар тўлдириб туради. Оёқ кийими кумуш қадагичлар билан безатиларди. Белбоғларга (корсет) талаб алоҳида эди. Битта белбоқقا бир килограммгача кит мўйлови сарфланарди. Ана шу қаттиқ «кийим»ни белга тортиб боғлашарди, чунки моданинг талабига кўра бел «ариникидан йўғон бўлмаслиги» керак эди. Лекин кийимнинг яна бир вазифаси бор эди, у кишининг маълум бир аҳоли қатламига мансублигини кўрсатиб туриши керак эди. Дехқон ёки шаҳарликнинг пули бўлган тақдирда хам у юқори жамият вакиллари каби кийинишга ҳақли эмас эди.

Пули бор оддий кишилар бойлардай кийинишни хохлардилар, бироқ ҳокимият эгалари кийимларга тааллукли «такиқловчи» қарорлар чиқаришган эди.

1548 йилда Карл V чиқарган буйруқда кийимлар «князни графдан, графни барондан, баронни бюргердан, бюргерни дехқондан фарқлашга» ёрдам бериши кераклиги ёзилган. Ҳатто Мартин Лютер хам қўзғолон кўтарган дехқонларнинг жундан тўқилган плащ кийиш талаблари ҳақида ғазаб билан ёзган эди.

Шундай қилиб, кийим фақат совуқдан, ёмғирдан ёки қуёшдан ҳимояланиш воситасигина эмас ёки фақат инсоннинг ўз дидини кўрсатишга интилишигина эмас экан. Кийим тарихий даврни, унинг дунёқарашини хам ифодалайди. Даврлар ўзгаради. Даврнинг дунёқараши, урф-одати, кишиларнинг орзу-умидлари ва ўйхаёлларини ўзида яққол акс эттирган мода хам ўзгариб боради.

* * *

Илк янги даврнинг хўжалик ҳаёти ва иқтисодиётидаги ўзига хос жиҳатлар – янги ва анъанавий усулларнинг ҳамжиҳатлика мавжуд бўлиши эди. Қишлоқ хўжалигидаги анъанавий усуллар устивор бўлса, саноатда, масалан, тўқимачилиқда янги усуллар жадал кириб келаётган эди. Европа иқтисодининг қатор соҳалари жадал ривожланиш йўлига тушиб олганлиги сезилиб турарди. Натижада ижтимоий стратификация жараёни кўзга ташлана бошлади: турли қатламларга мансуб гурухларнинг ўзаро бирекиши оқибатида буржуза жамиятининг янги синфлари шакллана бошлади. Илк буржуазия таркибига қишлоқдаги ва шаҳардаги тадбиркорлар – янги зодагонлар, савдогарлар, мануфактура эталари, шаҳар зиёлилари ва бой қишлоқликлар қўшилишди. Янги жамиятнинг ижтимоий таркиби шаклланиши билан янгича урф-одат ва ахлоқ нормалари ҳам қарор топиб борди.

Иккинчи боб бўйича саволлар

1. Янги давр бошларида Европада ички миграцион жараёнларнинг кучайишига нималар сабаб бўлди?
2. Кундалик турмуш ва ишлаб чиқаришдаги ўзгаришлар кишилар дунёқарашининг шаклланишига қандай таъсир кўрсатди?
3. Европада дастлабки капиталистик мануфактураларнинг пайдобўлиши ишлаб чиқариш ва ижтимоий меҳнат тақсимотида қандай ўзгаришларга олиб келди?
4. Ишлаб чиқаришдаги янгиликлар савдонинг характеристида қандай ўзгаришларга олиб келди?
5. Капиталистик ишлаб чиқаришнинг шаклланишида янги техник ихтиrolар қандай роль ўйнади?
6. Халқаро ва ички савдонинг ўсиши қандай ижтимоий ўзгаришларга олиб келди?
7. Янги давр бошларида аҳолининг ижтимоий қатлами ва кундалик ҳаётида қандай ўзгаришлар юз берди?

III БОБ. УЙГОНИШ ДАВРИДА ЕВРОПА МАДАНИЯТИ

Уйғониш манбалари

Янги давр бўсағасида. Юз йиллар давомида итальян дехқонлари ерларини экишга тайёрлаётуб, қачонлардир оппоқ ҳайкал бўлган мармар парчаларини топиб олишарди. Аксарият ер эгалари бунга эътибор беришмас, уларни кераксиз нарса деб ҳисоблашарди. Баъзилари, онглироқ ёки тажрибалироқлари, бу номаълум ижод маҳсулларини қадимшунослик ишқибозларига сотишга харакат қиласидар. Варварлардан ва шафқатсиз вакт зарбасидан ажиб бир тарзда қутилиб қолган, антик давр тарихида бутунлай йўқолиб кетгандек туюлган бу «излар» энди янги цивилизация ўрнатилишида муҳим роль ўйнаши керак эди.

XV аср охири – XVI аср бошларида Фарбий ва Марказий Европанинг кўпгина мамлакатлари мисли кўрилмаган юксалишни бошидан кечираётган эди: ҳамма ёқда мануфактуралар пайдо бўлар, улар турли хил маҳсулотлар ишлаб чиқарар, савдо жонланаётган, савдорлар ва саёҳатчилар энг чекка ерларга ҳам бориб етишган, йирик савдо уюшмалари ва компаниялар пайдо бўлаётган эди.

Кўпгина фанларнинг муваффақиятлари ва Буюк географик кашфиётлар одамларнинг олам ҳақидаги тасаввурларини ўзгартириб юборди, маданий алоқаларни кенгайтиришга имкон берадиган янги уфқлар очилди.

Аслида, жамият ҳаётининг эски феодал анъаналарида ўзгариш юз бермаган бирон-бир соҳа қолмади, хисоб.

Фалсафа ва санъатда улкан тўнтариш содир этилди. Идеал излаб, тақлид қилиш учун сўнгги ўрта асрлар одамлари Қадимги Юнон ва Рим маданиятига мурожаат қилишарди. Антик меросга қизиқиши шунчалар кучли эдики, унutilган китоб жовонларидан, монастир кутубхоналаридан эски қўлёзмаларни, қадим муаллифларнинг асарларини юзлаб олимлар иштиёқ ва гайрат билан ўрганишди, ҳайкаллар, тангалар, вайроналар, барельефлар излаб уларни тасвирлашга киришдилар, баъзан эса ҳаётларини ҳавф остига қўйиб уларни асраб қолдилар.

Шундай қилиб, ўрта асрлар охирида аввал унутиб юборилган қадимиий маданият қайта туғилди ва шу билан биргалиқда янги давр – Уйғониш бўсағасида турган жамиятнинг ўзини ҳам маънавий янгиланишга олиб келди.

Ўрта асрлардан – Уйғонишига. Уйғониши (Ренессанс)нинг ватани Италия бўлди. Такдирнинг ўзи унга Қадимги Греция ва Римнинг ажойиб цивилизацияси меросхўри бўлишни белгилаб берди. Қатор Европа мамлакатлари сингари Италияда ҳам капиталистик бозор муносабатлари шакллана бошлади. Бой савдогарлар, мануфактураларнинг эгалари, банкирлар ўз кунларини дуо ўқиш билан эмас, саёхатлар, савдо келишувлари, ўқиш, илмий сухбатлар билан тўлдирдилар. Улар ўзларининг кундалик ҳаётларини ҳаракатчан, фойдали ва чиройли қилишга уриндилар, ўлимдан кейинги мангу соодатни кутмай, ердаги ҳаётнинг кувончларидан баҳраманд бўлишга шошилдилар.

Кўп сонли буржуазия саводли эди, факат пулни эмас, илмни ҳам баҳолай оларди, санъатни тушунар ва кувватларди. Бойларнинг буюртмаси билан маҳобатли қурилишлар барпо этилди, турар жой ва жамоатчилик бинолари саройларга ўхшарди, суратлар, девор безаклари, ҳайкаллар билан безатиларди. Мулкдор фуқаролар ноёб буюмлар ёки санъат асарларини йиға бошладилар.

Италия шаҳарларининг хукмдорлари ҳам ўзларини маданият хомийлари деб хисоблашарди. Улардан бაъзи бирлари тасвирий санъат билан шуғулланишар, шеърлар ёзар, олимлар, рассомлар, шоирлар, мусиқачиларга ҳомийлик қилишарди. Ҳатто оддий одамлар ҳаётида ҳам санъат катта аҳамиятга эга эди. Янги чизилган ажойиб суратни ёки ҳайкални ҳалқ шаҳар кўчаларидан тантана билан олиб ўтарди.

Кишиларнинг ҳаёти ва турмуши таниб бўлмас даражада ўзгариб кетди. Энди кўнгил очишлар, ҳалқ сайллари, князларнинг чиқишилари, очиқдан – очиқ ўйнаб кулиш ва бойлигини кўз-кўз қилиш имкониятини берадиган театрлар мухим рол ўйнай бошлади. Иш кунлари ва байрамларда қуёш чиқиши биланоқ кўп сонли дўконлар очилар ва эгалари ўткинчиларга товарларини мақташарди. Дўконларда ҳамма нарса бор ажойиб мебель ва қимматбаҳо идиштовороқлар, денгиз орти шириналлари ва Шарқдан келтирилган заргарлик безаклари, бебаҳо қуроллар ва гиламлар – ҳаммаси сотилади. Шаҳарлик ўзига тўқ оиласдан чиққан, модани севувчи жаноблар ва хонимлар ўз кўринишлари ва хулқи билан ўрта аср аскетизмидан¹

¹ Аскетизм – туйғу, истакларни ўз хоҳиши билан чеклаш ёки бостириш, жисмоний азобларни ўз истаги билан тортиш, ҳаёт кувончларидан воз кечиш.

воз кечганликларини кўрсатиб, турлича товланувчи қимматбаҳо матолардан тикилган ажойиб кийимларда сайр килишарди.

Гуманизм. Ўрта асрларнинг охирига келиб кўп ўқийдиган, саёҳатга борадиган, бир неча тилда гапира оладиган, фалсафа, тарих, санъат билан қизиқадиган саводли ва маълумотли кишилар сони кўпайди. Улар бу дунёдаги хаёт қувончларини қадрлашга ўргандилар, табиатга, жамиятга, инсонга янгича қарайдиган бўлишди. Теварак оламга илохий, черковчасига эмас, дунёвий, инсоний қарааш тарафдорлари ўзларини гуманистлар (лотинча *humanus* – инсоний) деб атадилар.

Бирок диний урф-одатлар, феодал тартибларни қўриқловчи черков улар билан доимий ва аёвсиз кураш олиб борди. Олимлар таъқиб қилинди, улардан энг жасурлари динсизликда айбланиб, гулханларда ёқилди, китоблар кўйдирилди, санъатнинг буюк асарлари жиноий ва гуноҳкор деб эълон қилинди. Гуманистларнинг қандай қараашлари бундай ғазабга сабаб бўлди?

Асосий баҳс инсоннинг шахси атрофида олиб борилди. Ўрта асрларда христиан рухонийлари ердаги хаётни «уятли», одамларни эса нотавон ва бечора деб билишарди. Инсоннинг танаси унинг мангу барҳаёт қалби учун фақатгина сиртқи қобиқ, «чумолилар учун озиқ» холос, ундан уялиш, бошқаларнинг кўзидан яшириш керак. «Абадий нарсалар хақида ўйла. Осмонларга интилиб яша», – деб ёзганди ўрта аср шоири.

Үйғониш даврида инсонга нисбатан буюк бурилиш юз берди. Ҳали хеч қачон тарихда инсон шахси шунчалар юксакликка кўтарилимаган эди. Гуманистлар ердаги хаётни куйладилар. Улар оддий ҳаётни унинг барча қувонч ва ташвишлари билан гўзал деб аташади.

Йирик шахарларда эркин фикр тарқалади, диний қолоқ тушунчалар эса тез-тез маълумотли кишиларнинг масхарасига дуч кела бошлияди. Кўчаларда черков хизматчилари шаънига айловлар эшитиш мумкин эди.

Албаттга, кўпчилик аҳоли ҳам, гуманистларнинг ўзлари ҳам динга ишонувчи бўлиб қолавердилар, аммо улар учун муқаддас китоблар инсон донолигининг хазинаси, маънавий тажриба, ажойиб фалсафий асарлар эди.

Гуманистлар инсон ҳақидаги ўрта асрчилик тасаввурини вайрон қиласр экан, замондошларининг қизиқишини қиёфасиз «авлиёлар»га

эмас, реал кишиларга қаратди, ҳар бир шахснинг ноёблигини ва қадрини кўрсатишга уриндилар. Уларнинг олдида Ўйгониш одамлари кучли, гўзал ва харакатчан кўринишида пайдо бўлди. Улар вақтни қадрлай оладилар: уларнинг куни меҳнат билан, атрофдаги оламни тушуниш ва ўзгартиришга уриниш билан тўлдирилган.

Гуманистлар ақлнинг қудрати ва инсоннинг жисмоний гўзаллигини улуглайди, у нимани истаса ўшанга эриша олишига ишонади. «Инсон ер ва осмонни ўлчайди... Осмон ҳам инсон учун жуда баланд бўлиб кўринмайди, ернинг маркази ҳам унчалар чукур туюлмайди...» – дейилган XV аср қўлёзмаларида.

Ўйгониш даврида саводлилик юксак баҳолана бошланди. Мулкдор одамлар грек тилини биладиган олимларни ўз болаларига яхши маълумот бериш учун таклиф қилишарди. Машхур савдогар Жованни Морелли ўз ўғиллари учун «Ёзувлар» ёзган. Уларда ҳаётда нима қилиш кераклигини билиб олиш учун қадимги муаллифларнинг асарларини ўқиши ва таълимотлар устида бош қотиришни маслаҳат беради. Ахир билим ақлга кўп ёқимли ва таскин берувчи онлар ҳадя этадики, бошқа ҳеч нарса бундай қила олмайди, фан эса «сен маҳлук эмас, одам эканлигингни англашга» имкон беради.

Гуманистлар инсоннинг Оламда тутган ўрни ҳақида ҳам кўп фикр юришди. Флоренциялик бир олим «Инсон қадри ҳақида нутқ» деб аталган китобида ёзадики, Худо инсонни яратиб унга шундай дебди: «Мен дунёда нима борлигини кўриш қулай бўлиши учун сени оламнинг марказига қўйман».

Флоренция-гуманизм ўчоги. XV аср ўрталарига келиб Италияниг кўплаб мустақил вилоятлари ичидан қудратли Тосקנה олдинга чиқди. Ям-яшил ўтлоқлар, чиройли адирлар орқали Арно дарёси ўзининг лойка сувли тўлқинлари билан оқиб ўтади. Унинг кирғоқларида Тоскананинг қадимий пойтахти Флоренция жойлашган.

Ўз номига монанд Флоренция (лотинча – «гуллаётган» дегани) бой ва гуллаб-яшнаётган шаҳар эди. Аҳолиси «ориқ» ва «семиз» халқка бўлинарди. Биринчисига майда ҳунармандлар, ёлланма ишчилар, шаҳар камбағаллари кирап эди. Иккинчисига банкирлар, савдогарлар, мануфактураларнинг эгалари, юристлар кирапарди. Жун газламалар ишлаб чиқариш, савдо, банк ишларининг яхши йўлга қўйилганлиги шаҳар буржуазиясига катта бойлик тўплаш имконини берди. Банкирлар ҳамشاҳарларига, денгиз орти савдогарларига ва

ҳатто Рим папасининг ўзига ҳам пул қарз беришарди. Улар инглиз қироли Эдуард III га Франция билан урушга тайёрланиш учун жуда катта маблаг қарз бериб ёрдамлашишиган эди.

Шаҳардаги энг бой ва обрўли оиласардан бири, асли аждодлари шифокорлар (медик) бўлган медичилар эди (фамилиялари ҳам шундан келиб чиқсан). Медичилар кейинроқ банкирлар уйига асос солдилар. Улар сиёсий ҳаётда фаол иштирок этиб, узоқ йиллар Флоренцияда хукмронлик қилдилар ва флоренцияликларнинг муҳаббат ва хурматини қозона олдилар. Улардан бирининг вафотидан кейин «У ҳеч қачон оддий фуқароларга хос бўлган камтарлик чегарасини босиб ўтмаган, чунки доимий кўз-кўз килинган ҳашам ҳакиқий бойлиқдан кўра одамларнинг кагтароқ ҳасадига сабаб бўлишини тушунар эди...», – деб айтишган эди.

Флоренциянинг «Ажойиб» деб ном олган хукмдори Лоренцо Медичи¹ ўзини гуманистларнинг издоши ва шогирди деб ҳисобларди. Уффици шахри суратлар галереясида унинг портрети сақланиб қолган. Озғироқ, хунук бир одам санъат асарлари орасида томошабинга қайғули ва ўйчан қараб турибди. Унинг бутун қиёфасида хотиржамлик, ўз қадрини ҳис қилиш туйғуси, ўткир ақлни пайқаш мумкин. Лоренцо жуда саводли, грекча ўқир ва гапирап, шеърлар ёзарди. Ўз ҳовлисидаги боғда у рассомлик ва ҳайкалтарошлиқ мактабини ташкил қилган ва антик асарлар коллекциясини йиқсан эди. Унинг шогирлари орасида келажакда машҳур архитектор, ҳайкалтарош ва рассом, Уйғониш даҳоларидан бири Микеланжело ҳам бўлган.

Лоренцо ўзи шаҳар кўчаларида ташкил қиладиган, бир неча кун давом этадиган байрам сайлларини, қувноқ томошаларни севарди. Шоир ва мусиқачиларнинг чиқишиларини қўллаб-куватлар, баъзан ўзи ҳам оломоннинг шодон қийқириқлари остида бу мушоираларда чиқиб туради. У ўз шеърларининг бирида замондошларини ҳаётнинг ҳар бир лаҳзасидан баҳраманд бўлишга чорлайди:

*O, ёшлиқ, гўзалсан,
Бир он, дақиқа. Куйлагин,
Эртани кутма, ўйнагин!
Бахти бўл, сен шунга лойиқсан!*

¹ Лоренцо Медичи – 1449–1492 йиллари яшаган, Флоренциянинг давлат арбоби, Флоренция республикасининг раҳбари, маданият ва поэзия ҳомийси.

Медичиларнинг ҳаммаси санъат асарларини тўплар, жамоат қурилишларига пул эхсон қилишарди. Уларнинг ўз саройлари (Плаццо Медичи) гуманистик маданиятнинг ҳақиқий марказига, бадиий қадриятлар коллекциясининг ноёб маконига айланганди. Саройнинг ўзи ҳам ҳақиқий меъморий асар эди. Кўпол, ишлов берилмаган тошдан қилинган пастки қисми бинони ўрта аср қасрларига ўхшатиб туради. Бироқ бинонинг нозик мутаносиблиги, деразаларнинг кўплиги, эшикларнинг зеб бериб безатилганлиги ва учинчи қават устидаги кенг карниз унга байрамона кўриниш баҳш этади. Ички ҳовли колоннадалар билан ўраб олинган, кираверишда наслий герб: текис майдонда олтита шар (дори) аждодларининг шифокорлик касбига ишора эди.

Шаҳар бойларининг фойдали, қиммат буюртмалари Флоренцияга машҳур меъморларни жалб қиласарди. XV аср ўргаларида Рим папаси Лев X (бу ҳам Медичи авлодидан) Микеланжелога наслий черковнинг эски биносига капелла – оила аъзоларини кўмадиган бино кўшишни топширди. Медичилар капелласининг унча катта бўлмаган биноси гумбазли қилиб қурилган. Ички деворлар бўйлаб – қабрлар, меҳробнинг рўпарасига Ажойиб Лоренцо кўмилган. Замондошлари Микеланжелонинг фақат меъморий ечимларигагина эмас, қабрларни безаб турган ғаройиб ҳайкалларига ҳам қойил колишган. Қабрлардан бирининг қопқоғида у Кундузнинг (кучга тўлган паҳлавон қомати) ва Туннинг (гўзал, қариётган аёл) аллегорик тасвирини жойлаштириди. Флоренцияликлар Тун тасвирида тез ўтиб кетадиган гўзаллик тимсолини ва аста-секин ўз маънавий таъсирини йўқотиб бораётган ўз шаҳарлари рамзини кўрдилар.

XV АСР ОХИРЛАРИ – XVII АСРНИНГ БИРИНЧИ ЯРМИДА

Ғарбий Европа санъати

Дастлабки утопиялар. Фамгин ўрта асрлар поёнига етиб борарди. Европа устида инквизиция гулханларининг тутуни тобора сийракроқ ёйила бошлади. Билимлилик ва эркин фикрлаш ҳатто тождор кишилар саройларида ҳам ўзига жой эгаллайверди. Таъқиб ва чеклашлардан сўнг ниҳоят санъат диний тақиқдан чиқиб, ёруғликка, ердаги ҳаётнинг қувончларига юз тутди.

XIV асрдаёқ Италияда ёзувчилар инсоннинг жисмоний гўзаллигини ва унинг баҳтга бўлган ҳуқукини тасдиқловчи, руҳий мұкаммаллигини улуғловчи асарлар яратишганди. Кейинроқ бошка мамлакатларда ҳам итальян гуманистларининг издошлари ва тарафдорлари пайдо бўлди.

Англияда уларнинг ғоялари доно сиёсатчи ва қиролнинг биринчи вазири Томас Морга¹ (1478–1535) кучли таъсир кўрсатди. Томас Мор Оксфорд университетида ўқиган, бир неча тилни билар, тарих, фалсафа, адабиёт билан шугулланар эди. XVI аср бошида у «Давлатнинг энг яхши тузуми ва янги утопия фани ҳақида қанчалар ёқимли бўлса, шунчалар фойдали ҳам бўлган «Олтин китоб»ни ёзди ва чоп эттириди. Файри одатий бу асар китобхонларни лол қолдирди.

Асарнинг биринчи қисмида Томас Мор давридаги Англия тасвирланади. Муаллиф очлик, даҳшатли турмуш шароити ва инглиз дехқонларининг ҳуқуқсизлиги, камбағалларга қарши қонунларнинг адолатсизлиги ҳақида қайғу ва ачиниш билан ёзади. Еб тўймас кўйлар (албатта рамзий) «ҳатто одамларнинг ўзларини ҳам ютиб юборишиади, далаларни, уйларни, шаҳарларни вайрон ва пайҳон қиласди», – деган машҳур гап ҳам айнан Томас Морга тегишли. Англиядаги барча баҳтсизликларнинг манбанини ёзувчи хусусий мулкда деб билади.

Асарнинг иккинчи қисмида Утопия оролидаги кишиларнинг ажойиб ҳаётлари ҳикоя қилинади. Оролликлар – дехқонлар ва хунармандлар муттасил меҳнат билан ўз оролларини ер юзидағи энг обод ва гўзal жойга айлантирганлар. Атрофда ҳамма ёқ экинзор, далалар, гуллаб ётган боғлар.

Жамоа мулки ўрнатилган – мулк ва ер барчаникидир. Жамиятда тартиб ҳукмрон, жиноятлар йўқ ҳисоби. Камбағал ҳам, бой ҳам йўқ, барча керакли нарсаларни эса оролликлар маҳсус омборлардан бепул оладилар. Орол ахолиси бир-бирига ҳасад қилмайди ва ҳар 10 йилда бир марта нимага эга бўлсалар, ўша нарсаларни ўзаро алмашадилар. Санъат ва фан билан шугулланиш умумхалқ ҳурматига сазовор.

Муаллиф фуқаролар турмуш тарзининг энг майдага томонларини ҳам ўйлаб, ҳал қилиб бўлинган идеал давлатни тасвиirlайди. Аммо бу орзуни қандай ҳақиқатга айлантиришни у билмасди, шунинг учун ҳам бу ер юзидағи жаннатни оролга кўчирди ва уни «Утопия»

¹ Томас Мор – 1478–1535 йиллари яшаган, инглиз мутафаккири, ёзувчи, гуманист.

деб атади, таржимада у «мавжуд бўлмаган ер» маъносини англатади. Ўшандан буён келажакдаги адолатли жамият тасвиранган асарларни «утопия» деб аташади.

Томас Морнинг замондоши, француз ёзувчиси Франсуа Рабле (1494–1553) чекка бир шаҳарчада туғилди, болалигини фермада ўтказди. Ўсмирлигидаги у жуда диндор эди ва монастирга ўқишига кирди, лекин унда узоқ қолмади, кувноқ характер ва қизиқувчанлик монастир қоидалари билан келиша олмасди. Кейинчалик у фан билан кўп шуғулланди, машҳур врач ва ўз замонасининг энг билимли кишиларидан бири бўлди. Рабле тарихни, тилларни яхши билар, бутун Францияни кезиб чиқкан, уч марта Римда бўлган эди. У кузата олар ва ёдда сақлаб қоларди, ажойиб ҳикоячи ва ижодкор эди. У 20 йилга яқин «Гаргантюа ва Пантагрюэль» романи устида ишлади. Асар қаҳрамонлари – халқ афсона ва эртакларида учрайдиган до-нишманд улкан қироллар. Рабле уларнинг ҳаётини, ҳазил ва кулги аралаш хилма-хил таомларнинг ақлга сифтмайдиган микдорини та-наввул қилувчи кувноқ базмларини юмор билан тасвиrlайди. Лекин Рабленинг қаҳрамонлари жуда нотинч оламда яшайдилар, уларнинг хукмдорлари «фақат ўз кишиларига ёмонлик қилишга ва ўзларининг разил манфаати учун оламни урушлар билан ғазаблантиришгагина қодир». Шунда оққўнгил улканлар душман қўшинини яхшигина тепки ёрдамида ёки бутунлай ғайриодатий – «тили билан бутун бошлиқ қўшинни босиб» енгадилар.

Бироқ агар китоблардаги ёзувлар факат афсонавий куч билан енгилса эди, Рабле ўз замонасининг – гуманизм гуллаб-яшнаган даврининг кишиси бўлмас эди. Улканлар билан бирга унинг романни сахифаларида одатдаги бўйли қаҳрамонлар ҳам пайдо бўлади: эзилганлар ҳимоячиси оғайни Жак Вайранчи, оддий кишиларнинг соғлом фикрлари рамзи бўлган дайди Панург. Кувноқ дўстлар дунёning чеккасига саёҳатга жўнайди ва кўпгина ҳайратланарли ерларда бўлишади. Уларнинг орасида Рим папасига хурматсизларча муносабатда бўлганлиги учун қўшнилари папаменлар (католикилар) томонидан вайрон килинган пажфиглар ороли ҳам бор. Ер юзининг турли бурчакларидан келадиган ўлпонни еб кун кечира-диган очофтат қўшнилар ороли ҳам тасвиранган. Қафасда инда-масдан ўтирган Папего қуши тартиби назорат қиласди. Рим папа-си ва унинг тарафдорларига ишора қилинаётганини пайқаш қийин эмас.

Романда масхарабозлар халқни қувонтириб, хукмрон мулкдорларнинг аҳмоклиги, очқўзлиги, такаббурлиги устидан кулги кўзгатиб халқ сайлларининг қадимий анъянларини уйғотарди. Олим, файласуф ва гуманист Рабленинг қувноқ ва панд-насиҳатга тўла китоби ўз замондошларига манзур бўлди.

«Инсон табиатнинг ажойиб мўъжизаси!». Йироқ Англияда Уйғонишнинг бошқа бир титани Вильям Шекспирнинг (1564–1616) юлдузи балқиди. Шоир ва драматург ўсмирлик йилларини Эйбол дарёси бўйидаги Стрегфорд деган кичик чекка шаҳарчада ўтказди, кейинчалик унинг мудроқ ва бир маромдаги ҳаётидан шовқин-суронли Лондонни афзал билди. Шекспир театрга муҳаббат қўйган, у баъзан актёр сифатида сахнага чиқар, пьесалар ёзарди. Ўраб турган оламни у сахна деб, одамларни эса актёрлар деб тасаввур киларди. У замондошлари учун театр тақдир зарбалари остида бу-килмасликни, сотқинлик ва иккюзламачилиқдан нафратланишни, тубанликка қарши туришни ўргатадиган мактаб бўлиб қолишига астойдил ишонарди.

Шекспир асарларида кўплаб ажойиб, доно ва мағрур кишилар бор. Қаҳрамонлар севади ва азоб чекади, хато қилади, ҳафсаласи пир бўлади, ўз баҳти учун курашади ва кўпинча бу курашда енгилади. Энг яқин кишилари хиёнат қилган баҳтсиз Офелия ҳалок бўлади, тухматга ишониб Отелло Дездемонани ўлдиради, заҳарланган ханжар Ҳамлетни нобуд қилади, қирол Лирни ўз қизларини дайдиб юришга ва гадоликка маҳкум этади. Ҳар бири ёвузлик билан рўбарў келиб, нима қилиш керак, деган саволга ўз жавобларини излашади:

*Шу дилозор фалакнинг тақдирларига
Шикоятсиз-шиквасиз чидаб турмоқми?
Йўқса, унга рад-бадал бериб қўзгалмоқ,
Қурол олиб ё енгмоқ ё маҳв бўлмоқми?*

Ёш Ромео ва Жульеттага бутун олам қарши. Феодал жаҳолат оқибатида севишганлар ҳалок бўлишади. Лекин ҳеч нарса уларни эркин ва баҳтли қилган юксак ва ёруғ туйгулардан воз кечишга мажбур қила олмайди. Шундай қилиб, мағлубият ва ўлимга қарамасдан, Шекспирнинг «Инсон – табиатнинг ажойиб мўъжизаси!», – деган фикри тасдиқ топади.

Испания йўллари бўйлаб кезиб юриб, кимки ожиз ва баҳтсиз бўлса, барига ёрдам бериб келаётган дайдиб юрувчи рицарь Дон Кихот ва унинг содиқ хизматкори Санчо Панча ҳам рухнинг ана шундай кучига ва жасоратига эгадир. Бу ажойиб образлар испан ёзувчиси Мигель де Сервантес (1547–1616) қаламига мансуб.

Сервантес камбагаллашган зодагон оиласидан бўлиб, университет таълимини олди ва ҳарбий хизматга кирди. Денгиз жангларидан бирида у бир қўлидан айрилади, уйга қайтиш пайтида эса йўлда қароқчилар қўлига тушиб қолади ва беш йил Жазоирда асирилик азобини тортади. Улкан маблағ эвазига оиласи уни сотиб олиш ва ватанига қайтаришга муваффақ бўлади. Шу ерда Сервантеснинг хаётидаги энг муҳим давр бошланади – у ёзувчи бўлади. «Дон Кихот» ёзувчи томонидан ўрта аср рицарлик романларига пародия сифатида ёзилган эди.

... Баланд бўйли, озгин, ғамгин қиёфали рицарь нимжон қирчанғига ўрнашиб олиб, эски, ғижимланиб қолган либосларини ва картон соябонли шляпасини кийиб, саёҳат қилингга отланади. Атрофда турли хил адолатсизлик: батракка маошини тўламаётган ҳасис хўжайин, шафқатсиз суд томонидан ҳукм қилинган сургундагиларнинг уқубатлари – унинг олийжаноб қалбини газабга тўлдиради. Ҳақиқий рицарь сингари Дон Кихот қуролини яланғочлаб, хўрланганлар ҳимоясига ташланади, чунки «эркинлик учун худди шон-шараф учун қилинганидек, жонни хавфга қўйиш керак». У тез-тез ноқулай ахволга тушиб қолади. Бир куни шамол тегирмонларини баҳайбат ёвуздар деб ўйлаб, уларга найза билан ташланади, бошқа бир сафар душман қўшини билан жангта киришади, аслида бу қўшин қўйлар тўдаси бўлиб чиқади.

Бироқ дикқат билан кузатган ўқувчи Сервантес қаҳрамони устидан кулишга шошилмасди. Ташқаридан қараганда кулгули туюлган Дон Кихотнинг ақлсиз ҳаракатларида донолик, олийжаноблик ва инсонийликни кўрган бўларди. Ўз хизматкори кузатувида адолатсизлик оламидаги сўнгги олийжаноб рицарь, одамларнинг озрок яхши бўлишларига ёрдамлашиш учун йўлларда ҳамон кезиб юрганга ўхшайди.

Уйғониш даврининг охиригача Фарбий Европа мусиқа санъати черков билан боғлиқ бўлиб қолди. Мусиқа диний маросимнинг асосий қисмини ташкил қиласарди, диндорларга сўздан кўра кучлироқ таъсир қилиб, уларга илоҳий кайфият баҳш этарди.

Минг йиллар давомида черков қоидадан салгина четга чиқишига йўл қўймасдан, мусиқий асарлар ижро этилишини сергаклик билан кузатиб келди. Лекин XVI аср охирига келиб жамият ҳаётида рўй бераётган ўзгаришлар таъсири остида мусиқа аста-секин ўзгара боради. Худди рассомлик ва ҳайкалтарошлиқдаги диний сюжетга гуманистлар томонидан инсоний позициядан қаралганидек, мусикада ҳам диний асарлар инсон туйгуларига қаратиладиган бўлди. Дунёвий асарлар кенг тарқала бошлади. Оддий одамлар оғир меҳнат шароитида, турмушда эрмак бўладиган қўшиқларни айтишарди. Байрам карнаваллари кунларида кўчадаги юришлар пайтида қувноқ рақс куйлари жаранглар эди. Халқ байрамлари учун бу куйларни Ажойиб Лоренцо басталаганди.

Дунёвий мусиқа маданиятини кўп сонли гуманистик мусиқа тўгараклари тарғиб қиласи эди. Энди мусиқа ижоди фақат саройдагилар эмас, балки кўплаб илмли кишилар ҳаётининг бир қисмига айланди. Яхши хулқ-автор қоидалари ўзига тўқ оиласарнинг фарзандлари мусиқий асбобларни чала олишларини такозо этарди. Итальян рассоми Караваджо лютня торларини секингина чертиб, орзу қилиш кайфиятига берилган ўсмирнинг суратини чизган.

Ўйғониш рассомларининг суратларида тез-тез оиласий мусиқа тинглаш сахналарини кўриш мумкин. Номаълум муаллифнинг суратида учта мусиқачи аёл ноталар бўйича тиришқоқлик билан куй чалишяпти. Нота белгиларини муаллиф шундай аниқ чизганки, уларга қараб ўша куйни гўёки ҳозир ҳам чалиш мумкин.

Мадригалларнинг – аксарияти ўз замонасининг машхур шоирлари шеърларига басталанган лирик вокал асарларни куйлаш ва яратиш санъати юксак баҳоланаар эди. Мадригаллар кенг аудитория учун куйланар ва операнинг издоши саналар эди.

Ўйғониш мусиқаси черков қоидаларининг торгина доирасидан чиқиб, XVII–XVIII асрларнинг ўлмас мусиқий асарларига йўл очди ва бошқа дунёвий санъатлар қаторидан муносиб жой эгаллади.

Ўйғонишни кўпинча титанлар даври деб ҳам аташади. Ҳақиқатдан ҳам табиат ҳар бирини кўп киррали қобилият билан сахийларча сийлаган бунча генийларнинг асарлари билан характерланган бошқа даврни Европа тарихида топиш қийин.

Улардан бири Леонардо да Винчи (1452–1519) эди. Унинг ниҳоятда қобилиятлилиги замондошларини ҳайратга соларди. Леонардо рассом, шоир, меъмор, ҳайкалтарош, мусиқачи эди – «илоҳий

куйларди», физика, математика, астрономия, тарих, фалсафага қизиқар, механика ва ҳарбий ишни биларди.

Леонардо да Винчини билган одамларнинг ёзишларича, у ўзининг ташқи қиёфаси билан ҳам энг юксак гўзалликнинг намунаси эди: бўйи баланд ва қомати келишган, жуда кучли (ўнг қўли билан девордаги темир ҳалқани ёки тақани худди кўргошиндек эгарди), ҳамма вақт олифталардай кийинган, сухбати мафтункор эди.

Леонардонинг ўлимидан сўнг етти минг саҳифа ёзув, суратлар, чизмалар мерос бўлиб қолган. У расм чизишни афзал кўриб, уни санъатлар маликаси, деб ҳисоблаган бўлса ҳам, ундан суратлар жуда кам қолган.

Буюк рассом бир пайтнинг ўзида зеҳни тадқиқотчи ҳам эди. Математик ҳисоб-китоблар унга суратларда кенгликнинг беҳадлигини, узоқлигини кўрсатишга ёрдам беради. Узок муддатли тажрибалар буюк рассомга ҳажмни жуда нозик товланиш, ёруғлик ўйини билан тасвирлашни ўргатди.

Леонардо ўз асарларининг қаҳрамонлари этиб худолар ва авлиёларни эмас, оддий одамларни олди. «Чақалоқ кўтарган Мадонна» ана шундай асардир. Ёруғлик ва соянинг юмшоқ оқимларида кўкрагига гўдагини босиб турган она. Кўлларининг авайлаб кучоклаши, енгилгина ярим табассум – Ер Онасининг ўз гўдагига чексиз муҳаббатини англатиб турибди. Мадоннанинг ортида ажойиб пейзаж кўриниб турган иккита дераза. Гўё келгуси авлодларга топишмок қолдиргандек, Леонардо ерни улкан баландликдан тасвирлаган. Ҳали одамлар ҳавога кўтарилишни орзу ҳам қила олмаган даврда фақат ҳақиқий даҳогина оддий инсоннинг хаёли ета олмайдиган дунёни тасвирлай олади.

Мона Лизанинг (Жоконда) – бой флоренцияликнинг хотини портретида ҳам бундан кам сир яширинмаган. У креслода хотиржам ва улуғвор ўтирибди, кўзлари томошибинга тикилиб қарайди, лабларида сезилар-сезилмас табассум, «шунчалар ёқимлики, бу портретни кўриб инсонийликдан кўра кўпроқ илоҳий озиқ оласан...», – деб ёзган эди рассомнинг биографи. Мона Лизанинг юзи ва қоматини сезилмас тутун қоплаган, у чизиқларни юмшатади. Бу аёлда бизнинг замондошларимизни ҳам ҳаяжонга соладиган қандайдир алоҳида сир бордай туюлади.



Суратли асарларидан ташқари Леонардонинг бир нечта йирик деворий расмлари ҳам қолган. «Махфий кечा»нинг тасвири бой Милан монастирини безаган. Инжилдаги афсонага кўра Исо пайғамбар ўлимидан олдин шогирдларини сўнгги бор тўплаган. Ҳозиргина унинг «Сизлардан бирингиз мени сотасиз», – деган башорати айтилган. Шогирдлар даҳшатли сўзлардан қотиб қолишган. Улардан ҳар қайсининг муносабати такрорланмас: ҳайрат, қўркув, ғазаб, ишончсизлик, Исо Масих хотиржам ва қайгули, фақат унинг столда ётган ҳолсиз қўллари тақдирга бўйсунганиликни, сўзсиз ҳалокатнинг мукарарлигини ифодалайди.

Умрининг охирини Леонардо ватанидан йироқда, унга сарой рассоми ўрни таклиф қилинган Францияда ўтказди. Рассом даҳоси барчанинг ҳайрат ва олқишига сазовор бўлди, унинг ўлими барчани қайғуга солди, чунки замондоши ёзганидек, «рассомлик санъатига шунчалар шуҳрат олиб келган инсон илгари ҳеч қачон бўлган эмас...».

Леонардо да Винчидан унинг санъатдаги доимий рақиби Микеланжело Буанаротти (1475–1564) қарийб ярим аср кўпроқ яшади. Флоренцияни безаш ва медичилар авлодини улуғлаш учун жуда кўп ишлар қилган буюк Микеланжелонинг қабр тошини учта аллегорик фигура: рассомлик, ҳайкалтарошлиқ ва меъморчилик безаб турибди. Лекин у ўзини ҳайкалтарош уста деб билар, уни «санъатлар ичиди биринчи», – деб ҳисоблар, инсонни, унинг гўзаллигини ҳамма нарсадан яхшироқ шарафлайди, деб ўйларди.

Микеланжело мармар харсангга табиатнинг ўзи ҳайкални солиб қўйган, муаллиф фақат ортиқчасини йўниб ташлаши керак, деб ҳисобларди. У бир сонетида шундай ёзган эди:

*Мармар ўз бағрида сақлайди кўп сир,
Ортигин қўшолмас юксак даҳо ҳам.
Фақат онгга тўлиқ бўйсунгани дам
Уни қўллар ясай олади бир-бир...*

Хали ҳаёт пайтидаёқ Микеланжело энг моҳир уста сифатида шуҳрат қозонди. Унга бир куни Флоренция черковларидан бири нинг ховлисида ажойиб мармар ётганлигини хабар қилишди. Бу тош устида аввал ҳам бир неча ҳайкалтарошлар ишлаган ва уни бутунлай бузиб қўйишган эди. Черков ҳокимияти ҳамма нарсага

кўл силтаган, харсанг эса узок ўиллардан буён шундайлигича ётар эди. Микеланжело ниҳоятда баланд – 5,5 метрлик ҳайкал яратиш иштиёқида ёнарди. Мармар бўлагини яна бир марта ўлчаб кўриб, у ўйлаб қўйган ишига кириди.

Тугалланган асар замондошларини донг қолдирди. Микеланжело ажойиб ўсмирнинг яланғоч коматини яратган эди. Инжил афсонасига кўра ёш чўпон Давид даҳшатли девсифат Голиаф билан жангга тушишга журъят қиласи ва палахмондан отилган тош билан уни қулатади. Ҳайкалтарош жанг олдида турган Давидни тасвирлади. Унинг юзи ғазабга тўлиқ, кучли қўллари палахмонни қисиб турибди. Ҳайкал ҳажми ва гўзаллиги билан барча маълум асарларни ортда қолдирди, ҳатто грек ва рим ҳайкалларидан ҳам ўзиб кетди. Замондоши «Давид» ҳакида шундай деганди: «Монументнинг очилиши ҳалқ тантанасига айланиб кетди. Флоренцияликлар ҳайкални шаҳар ҳокимиияти биноси олдидаги майдонга, ҳокимлар шаҳарниadolатли бошқарсинлар ва уни жасурлик билан ҳимоя қилсинлар», деб ўрнатдилар.



Замондошларидан жуда озчилик Микеланжело ўзини яна бир соҳа – поэзияга бағишлиганини билишарди. У бутун умр шеърлар ёзди, лекин унинг шеърияти ўлимидан қарийб юз йил кейин дунё юзини кўрди. Бунинг устига ношир ўқувчи яхши қабул қиласи ва тушунади деб ўйлаб унинг кўплаб шеърларини қайта кўчириб, ишлаган. Микеланжелонинг ҳақиқий поэзиясини инсоният фақат XIX асрдагина кашф этди. Унинг шеърлари ўзининг ақлбовар қилмас дарражадаги кучи, тошдан ясалган улуғвор қоматларга ўхшашлиги билан лол барчани қолдирди. Шеърларнинг машқларини расмлар чизилган варакда кўриш мумкин. Уларда бўйсунниш қийин бўлган материални бўйсундиришга ўрганган тош йўнувчининг кучи кўриниб туради. «Йўнилмаганлиги» поэзияга такрорланмас ўзига хослик баҳш этади.

Кўпчилик гуманистлар қатори Микеланжело муҳаббат лирикасига кўнгил қўйди. Сонетлар цикли шоирнинг гўзал севгилиси ҳакида хикоя қиласи. Унинг муҳаббати жавобсиз бўлса ҳам, муаллиф ўзининг маҳбубасида табиатнинг энг яхши асарини кўради:

*Барчасин яратган бўлагу – бутун,
Ва сўнг энг аълосин саралаб олган.
Ўз юксак ҳукмига муносиб бўлган,
Мўъжизасин унда кўрсатмоқ учун...*

Лекин шоирни фақат дунёвий гўзалликкина ҳаяжонлантириб ва илҳомлантириб қолмайди. Шеърлар ўз ижодкоридан умри жуда узоқ бўладиган, санъатнинг мукаммал гўзаллиги ҳақидаги фикрларга тўлиқ:

*Тириклиқдан, борлиқдан кўра
Санъатнинг қисмати буюкдир ҳар дам,
Уни енга олмас ўлим ҳам, вақт ҳам...*

Ижодкор умрининг сўнгги йиллари меҳнат ва ёлғизлиқда ўтди. У 89 ёшида, юқори шуҳрат чўққисига эришиб вафот этди. Қабрга қўйиш куни Флоренциянинг кўплаб шоирлари буюк инсонга таъзим учун келишди ва хилхона эшигига лотин ва итальян тилларида шеърларни нақшлаб кетишли.

Италиян Уйгонишини Рафаэль Санти (1483–1520) ижоди-сиз тасаввур қилиш қийин. Бу даҳо фақат 37 йил умр кўрди, холос. У кўп сонли дўстлари ва шогирдларини доғда қолдириб, кучи ва шуҳрати яшнаётган пайтда бу дунёдан кетди. Табиат Рафаэлга меҳнатсеварлик, камтарлик ва хушахлоқ ато этган эди. Одамлар унга алоҳида меҳр кўшишарди. Унда очиккўнгиллик ажойиб ақл ва ноёб истеъдод билан бирлашиб кетганди. Балки шунинг учун ҳам Рафаэлнинг суратларида олам мукаммал ва гўзал, муштарак ва хотиржамдек туюлади.

Рафаэль ҳар хил ишларни бажааради. Папанинг буйруғи билан Ватиканда хоналарни ва танатанали маросим залларини безатди, Римда Авлиё Пётр черковининг лойиҳасини чизди, черков меҳроблари ва аслзодалар саройларини безади. Папа Юлий II нинг топшириғига кўра унинг шахсий хоналарини расмлар – станслар билан безади. «Рафаэль станслари» деб ном олган бу ажойиб расмлар рассомнинг номини абадийлаштириди. 1508–1517 йиллари у учта хонани фрескалар билан безади.

Улар ичида энг машҳурлари «Афина мактаби», «Илиадорнинг кувилиши» ва «Боргода ёнгин» асарлари. Айни пайтда Рафаэль кўплаб картиналар ҳам яратди. Ижодкорнинг санъатида аёллар обра-

зи алохидა ўрин тутади. «Мадонна Конестабиле» аёллик латофати ва оналик муҳаббатининг мужассамлигидир. Рафаэль унинг қоматини кўл атрофидаги унча баланд бўлмаган кирларнинг майин кўланкаси фонида жойлаштирган. Нозик дараҳтлар, тиниқ ҳаво хаёлчанлик ва енгил фироқ туйғусини пайдо қиласди. Мадонна бошининг зўрға илғанадиган оғиб туриши, тананинг айлана чизиклари ўғлига нозик муҳаббатини таъкидлайди. Фақат Мадонна ва гўдакнинг бошлари узра ёлқин камалаккина уларнинг илохийлигини эслатиб туради.

Рафаэль муқаддас Сикст монастири учун меҳробнинг бош образи – «Сикстин мадоннаси»ни яратди. «Шу хилдагиларнинг ягонаси», деб баҳолашган эди уни санъат билимдонлари. 1513–1514 йиллари яратилган бу асар ҳақиқатдан Рафаэль ижодининг чўккиси хисобланади.

Охиста, гўё яланг оёклари билан булутларни босмаётган, уларнинг устида учиб юргандай бўлиб, Биби Марям ўз қисматига пешвоз чиқмоқда. Ҳали гўдак Исо Масихнинг нигоҳлари катталарникидек жиддий. У гўё келажақдаги азоблар ва ўлимни олдиндан сезаётгандай. Онанинг қарашларида ҳам қайғу ва хавотир бор, у олдинда нима бўлишини билади ва шунга қарамасдан ўғлининг ҳаёти эвазига Ҳақ йўллари очиладиган одамлар томон олдинга интилади.



Ҳақиқат тасвиричилари. Италян Уйғонишининг гуманистик гоялари Гарбий ва Марказий Европа мамлакатлари санъатига таъсир кўрсатди. Уларнинг орасида ўзаро рақобат қилаётган феодал католик Испания ва унинг ҳукмронлигидан қутила олган кичкина Голландия ҳам бор эди. Голландияда капиталистик муносабатларнинг ўрнатилиши протестанизмнинг¹ тарқалиши билан бир пайтда рўй берди.

Протестантлар² дабдабали диний маросимлардан воз кечдилар, ўз черковларини тасвирий санъат асрлари билан безатмадилар. Суратларнинг буюртмачиси черков эмас, шаҳар бойлари бўлиб қолди. Улар учун тасвиричилар тарихий ва афсонавий суратлар билан барча пейзаж, натюрмортлар, портретлар, турмуш саҳналарини ҳам чиздилар.

¹ Протестантизм – черковни ислоҳ қилиш учун ҳаракат

² Протестант – черковни ислоҳ қилиш тарафдорлари.

Голландия санъати ўзининг энг юксак тараққиётига Рембрандт Харменс ван Рейн (1606–1669) ижодида эришди. У тегирмончи оиласида, Рейн дарёси ирмоғи яқинида туғилди, шунинг учун ҳам оила фамилиясига «ван Рейн» қўшилган. Рембрандт яхшигина маълумот олди ва ота-онаси уни амалдор қўлмоқчи бўлишди. Аммо ўсмир ўзига рассомликнинг мураккаб йўлини танлади.

Рембрандт ҳеч қачон Италияда бўлмаган, лекин нусха ва гравюралардан Уйғониш титанлари санъатини тинимсиз ўрганаради. Кейинчалик, машхур бўлиб кетганидан сўнг, у уйда тасвирий санъат коллекциясини тўплади. Унда Итальян рассомлари ижодига катта ўрин ажратилган. Буюк голландияликка уларнинг ҳаётга муҳаббати, инсонга хурмати, ижодни ўрта асрчилик диний чекловларидан озод қилишга интилишлари яқин ва тушунарли эди.

Ижодкорни доимо инсон, унинг ички дунёси қизиктиради. Рембрандт одамларни диққат билан кузатади, уларни тушунишга, англашга ва уларнинг фикрларини, руҳий ҳолатларини суратларда акс эттиришга уринади.

Рембрандт машхур портретчи бўлганди. Обрўли бюргерлар, врачлар, амалдорлар бирин-кетин рассомнинг олдида қиёфасини чиздириш шарафига мұяссар бўлиш учун ҳаракат қилдилар. Буюртмачилар фақат тасвирда берилган шоҳи ва баҳмал, кимматбаҳо тақинчоқ ва безаклар жилосининг енгиллигинигина эмас, рассом одамларнинг ўзига хослигини, уларнинг характерли ишора ва ҳолатини таъкидлаш қобилиятини ҳам қадрлашарди.

Йиллар ўтиши билан Рембрандт инсон руҳи қаърига янада чуқурроқ кириб боришга муваффақ бўлди. Бу мулкдор одамларга ҳаммавақт ҳам ёқавермади ва шунда Рембрандт оддий шаҳарликлар, камбағал хунармандлар расмини чиза бошлади. «Қизил кийинган чол портрети», – оғир ўтган умр ҳақидаги фожиали қиссадир. Ёруғлик оқими қоронгиликдан чол қоматини олиб чиқади. Озгина эгилган елкалар, тугунсимон қон томирлари бўртиб чиққан қадоқ қўллар, оппоқ соқол, тиришган пешона ва қора қўзларнинг нигохи сурат қаҳрамонига Инжил донишмандлари қиёфасини баҳш этади. Ижодкорнинг ўзи ҳам изланиш ва надоматларга тўла ҳаётни яшаб ўтган. Тақдир Рембрандтни аяб қўймади, шон-шуҳрат ва омад, тан олмаслик ва тўлиқ унудиши билан алмашди. Севимли хотини вафот этади, қарзлар ошиб боради, уй, мебель, Рембрандтнинг ўзи чизган расмлари ва не-не машаққатлар билан йиғилган коллекция сотилади.

Бирок қундалик турмуши қанчалик оғирлашмасин, тасвирий санъатга шунча кўп куч бериларди. Сўнгги асари – «Адашган ўғилнинг кайтиши» энг оғир даврда – ўғлининг ўлимидан сўнг яратилган.

Инжилда оиласини ташлаб кетиб, узоқ вақт санғиб юрган, кўп йиллардан сўнг эса, бойликларини совуриб бўлган, ортга қайтган ўғил кечирилади ва ота уйига қабул қилинади. Рембрандт учрашув пайтини тасвирилаган. Адашган ўғил уй остонаси ёнида тиз чўкиб турибди. Йиртиқ кийим ва сочсиз бош ўтган умрнинг кулфатларини шундаққина айтиб турибди. Кексайиб, кута-кута кўр бўлиб қолган отанинг бармоқлари ўсмирнинг елкасига тегаяпти. Қўл харакатидан қарийб умидини узган одамнинг ёрқин қувончини ва чексиз муҳаббатни англаймиз. Сурат жозибали нур билан, майин жимирилаш билан тўлдирилган, олтинранг жилолар қаҳрамоннинг руҳий янгиланишини таъкидлаб, ҳатто адашган ўғилнинг жулдур кийимларида ҳам товланади.

Голландиядан фарқли ўлароқ, Испания XVII асрда ҳам ўрга аср колдиклари ва инквизициялар мамлакати бўлиб қолаверди. Бу ерда янги, гуманистик маданият куртаклари қийинчилик билан чиқаётган эди. Босқинчилик урушлари халқни аслзодаларнинг ялтирок хаётлари билан таққослаганда янада даҳшатлироқ кўринадиган муҳтоҷликка маҳкум этди. Бу фарқни қиролнинг сарой рассоми Диего Веласкеснинг (1599–1660) санъати ўзида намоён қилди.

Веласкес зодагонларнинг ва қирол Филипп IV нинг портретлари ни чизарди. Ўз қаҳрамонларининг ички дунёсини очиб берар экан, у хеч қачон буюртмачиларига ёқмаган. Веласкеснинг тасвирий санъати сарой амалдорларининг жиддий юзлари, совуқ нигоҳи, улуғвор қиёфасини ўзида ифодалаган. Испанлар ҳукмдорининг ўзи ҳам худди шундай: оғир жағ ва йирик бурунли, хунук юз, кўзлари бепарво ва ғамгин тикилади. Портретнинг тантанавор намойишкороналиги ва байрамоналиги ҳукмдорнинг қуруқ ва қобилиятсиз эканлигини яшира олмайди.

Киролнинг қудратли меросхўри граф Оливерсни рассом кора либосда тасвирилаган. Оқ, қайрилган ёқа устида каттакон калла, унинг қиёфасида шафқатсизлик, бепарволик, ақл ва заковат аралаш манманлик акс этиб турибди.

Дехқонлар, ҳунармандлар ва аскарлар ҳаётидан унча катта бўлмаган саҳналарни чизаётганида Веласкесни бутунлай бошқача кайфият чулғаб оларди. «Нонушта» суратида майхонадаги қувноқ

саҳнча тасвирангган. Икки ёш йигит гадо қарияни камтарона таомларига таклиф қиляпти. Рассом ёш йигитларнинг ифодали ҳаракати ва ёқимли табассумини тасвиrlаган. Босиқ ва ҳаётда тобланган қария уларнинг гапларига қулоқ соляпти. Ўз талантининг бутун кучи билан рассом меҳнат кишиларига муҳаббат ва хурматини ифодалайди.

Веласкеснинг энг салмоқли асарларидан бири ҳаётининг охира ида чизилган «Йигирувчилар» полотносидир. Тасвиrда гобеленлар устахонаси. Бу ерда тўқувчи-аёллар қўли билан ажойиб гиламлар яратилади. Чиройли ва ўз қадрини биладиган, оғир меҳнатни бажараётган бу аёлларнинг қўллари чаққон, ҳаракатлари эпчиl. Оддий ишчи аёлларнинг олийжаноблиги ва латофатини таъкидлар экан, муаллиф уларнинг қобилияти ва меҳнатсеварлигига таъзим қиласди.

Табиатнинг энг яхши маҳсули – инсонга Веласкес ўз асарларида асосий ўрин ажратади. Унинг ҳайкали пойига иккита сўз, «Ҳақиқат ижодкори» деб ёзиб қўйган.

Мангу шаҳар бўйлаб саёҳат. Шаҳарлар ҳар бир даврнинг энг яхши ифодаси эканлиги азалдан маълум. Уйғониш давридаги Рим бўйлаб қисқа саёҳат қилиб, бунга ишонч ҳосил қилишга уриниб кўрамиз. XVI асрга келиб Рим католик дунёсининг маънавий пойтахти – гуманизм марказига айланади, сўниб бораётган Флоренциянинг ўрнини эгаллади. Шаҳарнинг янги мақомига унинг киёфаси ҳам мос келиши керак эди.

XV асрда Рим қайта қурила бошланган эди. Аввалига қўчаларни кенгайтириб, Ватиканга, папа қароргохига олиб борувчи йўлларга кўприклар қурадилар. Европа шаҳарлари орасида биринчи бўлиб Римда музей барпо қилинади. Аввал папага қарашли бўлган антик даврга оид ҳайкалтарошлик намуналари коллекцияси Капитолий тепалигига кўпчилик томоша қилиши учун қўйилган.

XVI асрда Римни қайта лойихалаш давом этади. Шаҳарнинг савдо марказига олиб борадиган йўллар пайдо бўлади, майдонлар ободонлаштирилади. Тўғри Ватиканга элтувчи қўчалар қурилади, улар фавворалар ва қазишмалар пайтида топилган қадимий ҳайкаллар билан безатилади.

Бу даврнинг энг салобатли қурилиши деб Ватикандаги янги черков – Сикстин капелласини (бу номда буюртмачи папа Сикст IV абадийлаштирилган) ҳисоблаш мумкин. Капелланинг улкан зали

энг муҳим черков маросимларига мўлжалланганди. Сикстин капелласини безатиш Уйғониши даврининг энг машхур рассомларига топширилган эди. Уларнинг орасида бир ўзи, ёрдамчисиз тўрт йил давомида 600 кв.м. шифтни Инжил афсоналари руҳидаги расмлар билан безаган Микеланжело ҳам бор эди. Улардан бири – «Одам атонинг яратилиши». Яратувчи – Худо қўлини ерда ётган биринчи одамга чўзib турибди, ана шу қўл тегизиш унга ҳаёт ато қиласи.

Шаҳарнинг марказида эски Сан Пьетро черкови ҳовлисида меъмор Брамантे мўъжаз ибодатхона – Темпъеттони қуради. Бино антик қурилишларни эслатади, ротанда шаклига эга ва дорик услубидаги ўн олти колонна билан ўраб олинган. Унча катта бўлмаган ибодатхонага бунинг барчаси улуғвор кўриниш бахш этади. Замондошлари унда мутаносиб тузилган оламнинг моделини кўрдилар.

Римнинг ва бутун Европанинг бош католик черкови Авлиё Пётр собори бўлиб қолди. Уни яратища (собор 100 йилдан ортиқрок вақт ичida қурилган) турли хил меъморлар қатнашган. Қурилишни 70 дан ошган Микеланжело тугатди. У деярли тайёр бўлиб қолган бинони танқид қилди ва 15 кун ичida унинг лойдан ясалган янги моделини яратди. Ҳаётининг сўнгти йилларини у ўз лойихасини амалга оширишга сарфлади. Черковнинг асосий безаги қилиб Микеланжело улуғвор гумбазни ясади, у кўпгина Европа черковлари учун намуна вазифасини ўтади.

Авлиё Пётр собори олдига қачонлардир цирк аренасида турган қадимий ёдгорликни тикилашди. Афсонага қўра ўша ерда Авлиё Пётр катл қилинган экан. Ёдгорликнинг чўққисига эга хоч ўрнатилди.

Қайта лойиҳалаш улкан миқёсда давом этарди, ҳатто Колизейни бузиб ташлаш режаси ҳам бўлиб, унинг ўрнига кенг кўча қуришмоқчи эди. Яхшиямки, бу режа аналга ошмади ва Колизей абадий шаҳарнинг ўтмиши ва бугунини боғлаб, ҳали ҳам Римни безаб турибди.

XVI–XVIII асрларда фандаги тараққиёт

Инсоннинг уни ўраб турган оламга қизиқиши ортиб бориши янги давр хусусиятларидан бири бўлиб қолди. Оламнинг эски, ўрта асрдаги образи бузила бошлади. Олам чегаралари сурилди. Олимлар Ернинг Күёш атрофида айланишини исбот қилдилар. Жордано Бруно оламнинг чексизлиги ҳақидаги назариясини яратди.

У ишонч пойдеворини бузди. Фромборқдаги ибодатхонани ўраб турган қалъа деворида жойлашган мўъжазгина минорада 30 йил ёлгиз ва тинч одам – буюк поляк астрономи Николай Коперник (1473–1543) яшади. Айнан у минг йиллар давомида қабул қилинган Ернинг ҳаракатсизлиги ҳақидаги таълимотдан воз кечиб, фанда улкан тўнтаришни амалга ошириди.

Николай Коперник кенг маълумот олди, Краков ва Италия университетларида ўқиди. Тасвирий санъат, математика, фалсафа, грек тили, астрономия, хукуқ, тиббиёт ва бошқа фанларни ўрганди. Айнан ана шу йиллар уни Оламнинг ривожланиш қонунларини ўрганишга интилаётган тадқиқотчига айлантириди.

24 ёшида у ватанига қайтиб келиб, каноник¹ бўлди. Энди унда яшашга маблағ ва вақт бор эди. Оддий мосламалар ёрдамида у 30 йил осмон жисмларини кузатди. Мураккаб хисоб-китоблар унга, Ер Қуёш атрофида ва ўз ўқи атрофида айланади, деган гелиоцентрик хулоса чиқаришга ёрдам берди.

Ерни ҳаракатсиз деб хисоблайдиган дунёга бу ҳақда айтиш у пайтларда хавфли эди. Шунга қарамасдан у буни айтишга қарор қилди, чунки ўз билимини одамларга қолдириш кераклигига ва ўзининг ҳақлигига шубҳаси йўқ эди. 1543 йили «Осмон жисмларининг айланиши ҳақида» деб номланган китоби чоп қилинди. Коперник ўлим тўшагида эди. 1543 йил 23 май куни дўстлари китобни олиб келганларида у бехуш ётарди.

Николай Коперникнинг қабри қаерда эканлигини ҳалича ҳеч ким билмайди, лекин ундан ёдгорлик бўлиб китоб қолди. Таълимот ўз издошларини топди.

«Диний ишонч ва ақидапарастлик душмани». 1600 йили Римда, Гуллар майдонида «черков оталари» буйруғи билан Жордано Бруно (1548–1600) гулханда ёқилди. У Италиянинг кичик бир шаҳри Нолада туғилди, 17 ёшида доминикан монастирида тингловчи бўлди. Ҳамма уни Жордано Бруно – нолалик деб чақиради. Монастирда ажойиб кутубхона бўлиб, у жуда кўп ўқир, кенг илм оларди. Аммо Бруно қанча кўп билгани сари, диний таълимотнинг ҳаққонийлигидан шунча кўп шубҳаланаарди. Унга айниқса, Коперникнинг китоби кучли таъсир кўрсатди. Унинг таълимотини ривожлантира бориб, Жордано: «Оламнинг чеки йўқ, у ҳадсиз ва

¹ Каноник – епископ ёки кафедрал собор қошидаги рухонийлар коллегияси аъзоси (католик ёки англикан черковларида).

сўнгсиз», – деган хulosага келди. У марказга эга эмас, Ер ҳам, Күёш ҳам оламнинг маркази эмас. Олам – бу сон-саноқсиз юлдузлар ва ҳар бир юлдуз – бу йироқдаги қуёш, уларнинг ҳар бири атрофида ўз сайёralари айланади. Олам абадий мавжуд ва у йўқ бўла олмайди.

28 ёшида у Римдан қочишга мажбур бўлди – инквизицияга хуфия хабарлар бориб турарди. Сарсонликдан иборат хаёт бошланди. Ҳамма ерда у ўз таълимотини тарғиб қилар, лекин жуда кам одам уни тушунишга қодир эди.

Бруно афсунгарлик илми билан ҳам жиддий шуғулланади. Қадимги яхудийларнинг «Каббала»сини ўрганади ва рухнинг кўчиб ўтиши ғоясига ишонади.

Женевада кальвинистлар Брунони худосиз сифатида қамоққа ташладилар ва гулханда ёқишлирага озгина қолди. У Парижда аввал обрў қозонди ва ҳатто қиролга дарс бера бошлади. Бироқ олим саройда ҳам ўз қарашларини ҳимоя қилди. Кейин Англияда олимлар билан баҳсга киришди. Уни яна тушунмадилар ва устидан куладилар. Яна Франция, сўнгра Германия... Ҳамма ерда қувғин, ҳамма ерда газабланган оломон. Аммо мияда: «Динга ишониш онг билан келиша олмайди», – деган фикр тобора аниқроқ жаранглайди. Жордано Бруно бир марта ён беришга йўл қўяди – илмсиз, оми халқ учун диннинг зарурлигини тушуниб тан оларди.

Ватан соғинчи уни тинч қўймайди – у Италияга қайтиб келади. Ёлғон чақув билан уни инквизиция қамоққа олади. Айбловлар аҳмоқона ва исботсиз, улар учун жиддий жазо берилиши мумкин эмас. Факат кутиб туриш керак. Аммо Бруно қамоқхонада ҳам Худога ишониш ҳақида баҳслаша бошлайди.

Буюк донишманд саккиз йил қамоқда ўтирди ва черков унинг ўз ғояларидан воз кечишини саккиз йил орзу қилди. Аммо у ўз таълимотидан воз кечмади. Инквизиция суди алломани гулханда ёқиб ўлдиришга ҳукм қилди. Уни тонгда ёқдилар... Кейин гулхан ўрнида унга ҳайкал қўйдилар. Ҳайкал остига: «У барча халқлар учун фикр эркинлиги, дея ўз овозини кўтарди ва ана шу эрк йўлида ўлимга борди», деб ёзиб қўйилди.

«Ноёб иродали, ақлли ва жасоратли одам!...». Галилео Галилей (1564–1642) буюк олим, астроном, физик, шоир, комедиялар муаллифи эди. Галилейнинг атроф оламни англашга қўшган ҳиссасини хоятда улкан. У осмонни телескоп билан кузатган европалик биринчи олим эди.

Галилео Галилей камбағал оиладан чиққанди машхур инсон эди. У Флоренция ва Пиза университетларида таҳсил олган. Ёш профессорнинг номи тезда машхур бўлиб кетади.

Галилей гелиоцентрик назарияни асослашга жуда катта ҳисса кўшди. У осмон жисмларини 32 марта катталаштириб кўрсатадиган телескоп ясади. Шу телескоп ёрдамида Галилей Қуёшдаги доғларни ва илгари маълум бўлмаган бир қанча юлдузларни кашф этди. Фақат уларни «Медичи юлдузлари» деб аташга тўғри келди. Маълум бўлдики, Сомон Йўли кўплаб юлдузларнинг жамланмасидан иборат, Ойнинг юзи тоғлар ва кратерлар туфайли нотекис, Юпитер эса тўртта йўлдошга эга. Телескоп ёрдамида қилинган барча кашфиётлар Коперникнинг таълимотини тасдиқлади ва Оламнинг тузилиши ҳақидаги тасаввурларда тўнтариш бўлишини англали.

Галилей фақатгина янги оламларни кашф қилиб қолмади, жисмларнинг эркин тушиши, маятникнинг ҳаракати қонунларини ва физиканинг бошқа бир қанча қонунларини хам шакллантириди. Ўзининг астрономия соҳасидаги кузатувларини олим «Юлдузлар ахбороти»да баён қилди. Инквизиция унинг ишларини қоралади. 1616 йилда Коперникнинг таълимотини расман тақиқладилар. Шунда олим айёрликка борди – у Муқаддас ёзув ва табиат ҳақида таълимот билан чиқди. «Оламнинг икки тузилиши ҳақида диалоглар» Галилей ҳаётининг асосий китоби бўлиб қолди. Ватикан ғазабга тўлди. Папа Галилейни Римга чақирди. 70 ёшли олим муқаддас инквизиция суди олдидаги жавоб бериши керак эди. Кекса, касалманд одамнинг иродасини синдириш мақсадидаги сўроқ беш ой давом этди. «Буюк инсоннинг хўрланиши узоқ ва тўлиқ бўлди. Бу хўрликлар олимнинг буюк ғояларидан воз кечишига ва уқубатлардан енгилган одамнинг азобланишига олиб келди...», – деб ёзган эди Галилейнинг француз биографларидан бири.

1633 йил 22 июнда Муқаддас Миневра монастирида суднинг барча аъзолари иштирокида хукмга бўйсунниб, тавба қилаётган гуноҳкор кийимида Галилей тиз чўкиб воз кечиши сўзини ўқиди. Бироқ яна ўн йил кўр ва бемор Галилей инквизиция назоратида бўлди. Унга китоб ёзиш ман қилинганди.

Кейинчалик одамлар воз кечиши сўзидан сўнг, ўрнидан туриб олим: «У эса барибир айланади!», – дея хитоб қилганлиги ҳақида афсоналар тўқиди. Бу эса одамларнинг фанни бўғиб, йўқ қилиш мумкин эмаслигига ишончидан далолат эди.

«Яшаш, эркинлик ва мулк ҳуқуқи». Фалсафани ривожлантиришда Англияда катта муваффакиятларга эришилди. Айникса, Жон Локк (1632–1704) ғоялари XVIII аср файласуфларига кучли таъсир кўрсатди.

Жон Локкнинг асосий хизмати шундан иборатки, у инсоннинг табиий, туғма ҳуқуқлари: яшаш, эркинлик ва мулк ҳуқуқлари хақидаги таълимотни яратди. Локк шунингдек, «ҳокимиятни бўлиш» – ижро ҳокимиятини қонун чиқарувчи ҳокимиятдан ажратиш ҳақидаги таълимотни ҳам ишлаб чиқди. Локк томонидан олға сурилган ҳокимиятнинг бўлиниш принципи кейинчалик француз маърифатпарварлари томонидан ривожлантирилди ва ҳозирги замон давлатчилигининг асосий принципларидан бирига айланди. Олим «Тарбия инсон тафаккурини шунчалар бойитиши керакки, одамлар сиёсий ҳаётга ва амалий фаолиятга қодир бўлсинлар» дея таъкидлаб, педагогикага ҳам ўз улушини қўшди. Бу ғоялар абсолютизм ва феодал муносабатлар ҳукмронлигини асослайдиган назариялар устивор бўлган XVII асрда олға сурилган эди.

Аниқ фанлар даҳолари. Янги аср бошларида Европа фанининг қудратли юксалиши учун буюк инглиз олими Исаак Ньютон (1642–1727) ва немис олими Готфрид Вильгельм Лейбниц (1646–1716) пойдевор кўйдилар.

Болалигига Исаак Ньютон юввош, кўзга ташланмайдиган, ҳаёлчан, инжиқ бола бўлган. Уни мактабга кеч беришган, синфда у қобилиятсиз ўқувчи ҳисобланган. 14 ёшга кирганида фанга қизика бошлайди. Шу пайтдан бошлаб фан унинг ҳаётидаги асосий машғулоти бўлиб қолади.

1661 йили Ньютон Кембрижда ўқишни бошлади, кейин шу ерда математика кафедрасини очди. У университетдаги энг ёш профессор эди. Унинг энг муҳим илмий муваффакиятлари шундаки, Ньютон механика ва астрономиянинг назарий асосларини яратди, бутун олам тортишиш қонунини очди, дифференциал ва интеграл ҳисоб асосларини ишлаб чиқди, кўзгули телескопни кашф қилди.

1671 йилдаёқ Ньютон шиша линзали энг катта телескоплардан кўра осмон жисмларини анча яхшироқ кўрсатадиган кичкина кўзгули телескопни ўзи ясади. Шу тарзда у юлдузлар дунёсини одамларга яқинлаштириди. Фанни ривожлантиришдаги хизматлари учун ҳайратга тушган замондошлари уни 1672 йили Лондон Қироллик жамияти аъзоси этиб сайладилар, 1673 йилдан унинг

президенти бўлди. Металларнинг хусусиятини яхши билганлиги сабаб 1695 йилдан Зарбона назоратчиси, 1699 йилдан эса директори бўлган. Ньютон ҳали 30 ёшга кирмасдан академик бўлганди. У Париж Фанлар академиясининг хорижий аъзоси этиб сайланган. Илмий муваффакиятлари учун унга дворянлик инъом этилган.

Готфрид Лейбниц, буюк математик ва файласуф математикани «ёқимли эрмак» деб ҳисобларди. У ажиб бир инсон эди – тарих ва сиёсат билан шуғулланарди, дипломат ва сайёҳ, юрист ва педагог ҳам эди. 15 ёшида университет талабаси, 19 ёшида бакалавр унвонига талабгор бўлди. Майнц шахрида, князь саройида хизмат қиласар экан, у «Инсон тафаккури борасида янги тажрибалар» деб номланган китобини ёзди ва унда «Ойдан қандайдир машиналар ёрдамида» келиб қолган жонзорларнинг ҳуқуқи ҳақида фикр юритади. Мисрга экспедиция уюштириш лойиҳаси ҳам Лейбницга тегишилди. У Париж Фанлар академияси аъзоси этиб сайланган, Пётр I билан хатлар ёзишарди.

Ньютон «буюк» деб атаган олим – Христиан Гюйгенс (1629–1695) ўзининг барча улкан қашфиётларидан амалий фойда излади. У телескоплар, шу жумладан, улкан 70 метрликларини ҳам курди, Сатурннинг сирли ҳалқасини очди, механик планетарий яратди, ёруғликнинг иккиланган синиши ҳодисасини тушунтириди, бошка планеталар оламини тасвирлади, маятники соат ясади. У бутун умр физик ва математик изланишлар устида ишлади, инсоннинг оламни англаш уфқларини кенгайтирди.

Икки минг йилдан ортиқрок вақтдан бўён римлик врач ва табиатшунос, милоддан олдинги II асрда яшаб ўтган Клавдий Галеннинг меҳнатлари тиббиётда сўзсиз обрў ва хурматда эди. Унинг таълимоти, гўёки артериа ва вена қонлари – турли хил суюқлик, «иссиқлик ва ҳаёт»ни факат артериал қон тарқатади, венаники эса «органларни озиқлантиради» деб даъво қиласарди.

Бу қарашларнинг ҳукмронлигига Уильям Гарвей (1578–1657) барҳам берди. У илмий физиология ва эмбриологияга асос солди. Унинг қашфиётлари инсон организмининг тузилиши ҳақида кўп нарсаларни билиб олиш имконини яратди. Ўз даврининг энг илмли кишиларидан бири бўлган Гарвей қирол табиби эди (Яков I ни ва Карл I Стюартни даволаган). У 1607 йилдан умрининг охиригача Қироллик врачлар коллегияси аъзоси, айни вақтда Варфоломей ка-салхонасининг бош врачи ва жарроҳи сифатида хизмат кўрсатди.

Уни жуда ёшлигиданоқ табиий фанлар ўзига тортарди. Беш йил у Европа бўйлаб саёҳат қилди. Ҳамма ерда Гарвей машхур профессорларнинг маъruzаларини тинглади.

1628 йилда Гарвейнинг «Ҳайвонларнинг юрак ҳаракати ва қони хақида анатомик тадқиқотлар» китоби чоп қилинади, бу 72 саҳифали рисола Гарвейнинг номини абадийлаштириди.

Гарвей қон айланишининг сирини очди. У биринчи бўлиб ҳайвон танасида (одамнинг ҳам) ёпиқ йўл бўйлаб қоннинг бир хил миқдори айланишини исбот қилди. Бу жараёнда юрак асосий роль ўйнашини кўрсатиб, юракдан қон артериялар орқали чиқиб, веналар орқали қайтишини аниқлади, юрак ҳар гал қисқарганда чиқадиган кон миқдорини белгилади. Умрининг охириги йилларида ҳайвонларнинг индивидуал ривожланишини ўрганди. Эпигенез назариясини¹ биринчи бўлиб таърифлаб берди.

Европанинг барча тиббиётшунослари Гарвейга қарши чиқдилар, уни тухматлар, ҳақоратли хатлар таъкиб қилди. Гарвей ўз тадқиқотларини тўхтатмади. Уни гўдакнинг ривожланиш муаммолари қизиқтиради. «Барча тирик – тухумдан», – деб ифодалади у ўз назариясини.

Инсон ҳаётининг икки сири – унинг туғилиши ва юрак ҳамда қоннинг аҳамияти шу тариқа кашф этилди. Ҳаёт Гарвейга кўплаб синовларни юборди: ҳамкасбларининг душманлиги, ҳомийси – Карл I нинг қатл қилиниши, фуқаролар уруши унга кўплаб кулфатлар келтирди. Жуда қариб қолгандагина унинг хизматлари тан олинди.

Фандаги муваффақиятлар

Олим номи	Асосий кашфиёти
Коперник	Ер ва бошқа барча сайёralарнинг ўз ўқи ва Қуёш атрофифда айланишини кашф қилди
Бруно	Оlamнинг чексиз, ўлчамсиз ва абадийлигини асослади
Галилей	Коперник тизимини илмий асослади, механиканинг дастлабки асосини яратди, Қуёшдаги доғларни ва қатор юлдузларни кашф қилди

¹ Эпигенез назарияси – (юноча genesis – келиб чиқиш) – эмбриогенезда органлар, дастлаб структурасиз бўлган эмбрион массасидан аста-секин шаклланади деб тушунтирувчи назария.

Лейбниц	Монадлар ҳакида таълимотни яратди, математик анализни бошлади.
Ньютон	Классик механикага асос солди, бутун олам тортишиш қонунини яратди, математик анализни бошлаб берди.
Гарвей	Илмий физиология ва эмбриологияга асос солди. Қон айланишининг сирини очди. Эпигенез назариясини тарьифлаб берди
Локк	Ҳокимиятнинг бўлиниши принципини ишлаб чиқди

Буғ машинасининг «отаси». Буғ машинаси ихтиорисининг номини айтиш қийин, чунки унинг модели турли даврда ҳар хил мамлакатларда пайдо бўлган. Туғилаётган саноатга содда, арzon ва қувватли двигатель зарур эди. Шунинг учун Жеймс Уаттнинг (1736–1819) кашфиёти нафақат буюк, балки узоқ кутилган ҳам эди.

Жеймс Уатт Шотландиянинг Гринюк шаҳридаги обрўли хона-донда нимжон ва касалманд бола бўлиб ўсади. Унинг бобоси математика ва дengizchilik санъати ўқитувчisi, отаси эса омадли тадбиркор эди. Жеймснинг математикага қобилияти 13 ёшида намоён бўлди. 1784 йили Уатт универсал буғ двигателига патент олди.

Тақдир Ж. Уаттга ақлли ва уддабурон шерикни рўпара қилди. Унинг иши билан йирик саноатчи, ихтиорисини биринчи бўлиб баҳолаган Мэттью Болтон (1712–1809) қизиқиб қолди. Яхши таъминланган устахоналарда юксак малакали ишчилар томонидан янги машиналар ясаладиган Болтоннинг заводларида ихтиорчининг foяси текшириб кўрилди.

Ўзининг саноат лидери бўлишида ва «дунё устахонаси» деб ном олишида Англия кўп жиҳатдан Болтон ва Уатт компаниясидан миннатдор бўлмоғи лозим. Уатт ҳаётининг сўнгида кўп саёҳат қилди, Шотландиядаги қадрдан ерларни бориб кўрди, ёш ихтиорчиларга ўз маслаҳатлари билан ёрдам берди.

* * *

XVI–XVIII асрлар янги даврнинг бошланиши, фаннинг қизғин ривожланиш даври бўлди. Инсоннинг эркинлик, баҳт, ўзқобилиятини намоён қилиш ва ривожлантириш, муносаб маънавий ва майший ҳаёт кечириш хуқуқи ғоялари пайдо бўлди. Айнан шу даврда Англия буржуа инқилоби, Шимолий Америкада мустақиллик учун кураш ва айниқса Буюк француз инқилоби жараёнида пайдо бўлган

кишиларнинг озодлик ва тенглик ғоялари яна узоқ вақт кўплаб халқлар курашининг мазмунига айланиб қолди.

Учинчи боб бўйича саволлар

1. Европада Уйғониш (Ренессанс) жараёнинг бошланишига нималар сабаб бўлди?
2. Европа Уйғониши даврида Осиёда маданият ва фаннинг ривожланиш даражаси қандай эди?
3. Уйғониш даври Европа санъати ва адабиётида қандай йўналиш ва оқимлар устивор эди?
4. Уйғониш даври Европа санъатида инсон мавзусининг моҳияти ни-мада?
5. Уйғониш даври фан тараққиётида қандай ўзгаришлар юз берди.
6. Европада табиий фанлар ривожланишининг иқтисодий тараққиётга таъсири қандай бўлди?
7. Гуманистик ғоялар кейинчалик Европа жамиятидаги қандай ўзгаришларга асос бўлди?
8. Янги техник ихтиrolар ишлаб чиқаришни ташкил қилишда қандай ўзгаришларга олиб келди?

IV БОБ. XVI–XVII АСРЛАРДА ҚИРОЛЛИК ҲОКИМИЯТИНИНГ КУЧАЙИШИ. АБСОЛЮТИЗМ.

Абсолютизм¹. «Худонинг иродаси шулким, ҳар қандай қарам бўлиб туғилган ўйлаб ўтирасдан бўйсунмоғи лозим». Бу жумла XVI–XVII асрлардаги сиёсий ҳокимиятнинг мазмунини ифодалайди.

Абсолютизм – шундай бошқарув шаклини, унда олий ҳокимият хеч чекланмаган ҳолда бир кишига – монархга тегишилди. Барча-барчага қарши жанг қилган феодал тарқоқлик даврини эсланг. Ўзаро урушлар Европа давлатлари ахолисига, биринчи навбатда хеч қандай ҳимояга эга бўлмаган дехқонларга қанчалар кулфат келтирганини сиз биласиз.

Абсолютизм даврини қандай баҳоламоқ керак? Келинг, бу саволни давлат манфаатлари ва «оддий одам» – дехқон, хунарманд, ёлланма ишчи, буржуя ва бошқалар нуқтаи назаридан кўриб чиқайлик.

¹ Абсолютизм, абсолют монархия атамалари билан бирга Фарбда «янги», «ренессанс», «шахсий» монархия атамалари ҳам кенг тарқалган.

Абсолютизм даврида чекка худудларнинг қўшиб олиниши давом этади, эски феодал аслзодаларнинг ўз мустақиллигини сақлаб қолишга уринишларига барҳам берилади. Масалан, Францияда юз йиллик уруш тугагандан кейин Нормандия, Бургундия ва бошқалар уларнинг мустақиллигини таъминлайдиган эски хуқуқларидан айрилдилар ва қирол ҳокимиятига бўйсундирилди.

Англияда Генрих VIII Тюдор (1491–1547) ҳали ҳам баъзи бир мустақиллигини сақлаб қолган айрим шимолий графликлар ва Уэльсга қарши юриш қилди, уларни Лондонга бўйсундириди. Бу худудларни бошқариш учун маҳсус давлат органлари – Шимол Кенгаши ва Уэльс Кенгаши тузилди.

Абсолютизм ўз давлати чегарасида «барча-барчага қарши» деб номланган, мамлакатнинг барча аҳолисига бахтсизлик келтирган, вайронали урушларни тўхтатишга қодир бўлди. Йорклар билан Ланкастерлар ўртасидаги ўзаро жанглар каби қонли воқеаларнинг тақрорланмаслиги учун Тюдорлар сулоласидан чикқан янги қироллар феодал қўшинларни тарқатиб юборди, қўзғолон қилаётган феодалларнинг қўрғонларини ер билан яксон қилди, бўйсунмаган аслзодалар исёnlарини бостириди. Исёнчиларнинг ерлари тортиб олинди ва қироллик мулкига қўшилди. Қалья деворлари, тупрок қўргонлар ва сув билан тўлдирилган чуқур хандаклар ҳам шаҳарларга ўз эркинлигини сақлаб қолишида ёрдам бера олмадилар. Уларнинг ҳам хуқуқлари анчагина чеклаб қўйилди.

Абсолютизм даврида тоифавий-вакиллик органлари (инглиз парламенти, испан кортеслари, Франциядаги Генерал Штатлар) ўзларининг аввалги аҳамиятини йўқотади. Монархларнинг асосий орзуси – улардан бутунлай қтулиш эди. Вакиллик органларини йўқ қилишнинг иложи бўлмаганлиги сабабли монархлар уларнинг аҳамиятини камайтирадиган ҳар хил йўлларни ихтиро қиласидилар.

Англияда Тюдорлар парламент билан ҳисоблашишга мажбур эди. Қадимий одатга кўра инглиз қироллари парламентнинг розилигисиз солиқ йиғиш хуқуқига эга эмасди. Парламент билан муносабатда Тюдорлар ўзларининг уста дипломат эканликларини кўрсатдилар. Генрих VIII ҳукмронлик қилган 37 йил давомида парламент 21 марта тўпланди. Черковни ислоҳ қилиш учун кураш бошлаган Генрих VIII ўз режасини амалга оширишда парламентдан яхши фойдаланди.

XVII аср бошларида Англияда Стюартлар (шотландияликлар) ҳукмронлик қила бошладилар. Қирол ва парламент ўртасида зид-

дият кучайиб борди. Янги сулоланинг биринчи қироли Яков I Стюарт (1566–1625) ўзининг парламентга нафратини очикдан-очик намойиш қилди. «Тушуна олмайман, – деди у бир куни испан элчисига, – менинг аждодларим қандай қилиб бунаقا ташкипотга йўл қўйди экан. Мен нимадан қутула олмаётган бўлсам, ўша билан келишишга мажбурман». Аммо инглиз қироллари «вето» хукуқига эга эди ва парламентнинг ҳар қандай қарорини тақиқлай оларди.

Ўзининг биринчи парламентини 1604 йилда тўплаган Яков I унга нутқ билан мурожаат қилди: «Менинг қиёфамда Худо сизларга ўз иноятини юборган. Мен эрман, бутун орол эса менинг қонуний хотиним. Мен бошман, орол эса менинг танам, мен подачи, орол аҳолиси эса менинг подам».

Таркибини монарх белгилайдиган махфий кенгаш марказий маъмурий ва ижро органи бўлиб қолди. XVI асрда ёк у давлат сиёсатининг ички ва ташқи йўналишларини белгиловчи, молия ва мудофаа масалалари билан шуғулланувчи доимий ишлайдиган ижро органига айланганди.

Францияда мутлақ монархия XVI асрда шаклана бошлади. Валуа сулоласидан бўлган қирол Франциск I (1515–1547) ўз хукуқларига ва ўз ҳукмронлигининг чекланмаганлигига шунчалар ишонар эдики, бирон марта ҳам Генерал Штатларни чақирмади. У ўз буйруқларида: «Менинг иродам шундай», деб ёзар ва янги қонунни тасдиқлашга шу етарли деб ҳисобларди, «чунки биз шуни хоҳлаймиз», – дерди у.

Инглиз парламентидан фарқли равища Франциянинг Генерал Штатлари доимий ишловчи органга айланмади. Улар жуда камдан-кам, кучли зарурат туғилгандагина чақирилар эди. 1614 йилдан бошлаб бутун XVII аср давомида Генерал Штатлар бирор марта ҳам тўпланмади.

Суд тизими. Суд тизимининг ташкил қилиниши ҳам абсолютизмни мустаҳкамлашга хизмат қилди. Англияда суд ишларининг катта қисми қироллик судлари ихтиёрига ўтказилар, бу эса жойлардаги зодагонларнинг мустақиллигига путур етказарди. Қироллик судлари иккита эди – Қироллик суди ва Умумий судлар. Исёнкор асл зодалар билан курашиш учун ҳали биринчи Тюдорлар томониданоқ «Юлдуз палатаси» тузилган бўлиб, у Англиядаги барча судлов тизимини кузатиб борар эди.

Давлат хизматчилари Англияда унча кўп эмас, 1000 кишидан 1500 кишигача эди. Аммо уларнинг ҳаммаси ҳам қиролдан маош олмасди. Қолганларига илтимос қилиб келувчилардан пул олишга рухсат берилган, демак амалдорларни халқнинг ўзи боқарди.

Францияда амалдорлар анча кўп – XVI асрда 8 минг ва XVII асрда 46 минг киши мансабдор эди. Мансаблар мерос бўлиб ўтар, шунингдек, сотилар ҳам эди. Одамнинг шахсий фазилатлари бундай тартибда ҳал қилувчи роль ўйнамас, ҳаммаси пул бор ёки йўқлигига боғлик эди. Бу ерда ҳам Англиядаги каби амалдан келадиган асосий даромад ойлик маош эмас, халқнинг амалдор хизмати учун берадиган ҳақки эди.

Жамият ҳаётининг ҳамма жабхалари монарх назорати остида турарди. Махаллий ҳокимият устидан ҳам кучли назорат ўрнатилган эди. Англияда қирол тайинлайдиган амалдорлардан ташқари сайланадиган лавозимлар ҳам бор эди. Халқ судъялари алоҳида таъсирдан фойдаланишарди. Графликларни бошқаришда асосий роль уларга тегишли эди, улар графлик зодагонлари мажлисларида «энг ҳурматли ва муносиб рицарлар» орасидан сайланарди. Аммо бунака мустақиллик одатда юзаки бўларди, чунки ҳукумат сайловларни диққат билан кузатиб борар ва маъқул бўлмаган номзод бу мансабга умуман ўта олмасди. Шундай ҳам бўлардики, Махфий Кенгаш кимни сайлаш кераклиги тўғридан-тўғри кўрсатилган хатларни графликларга жўнатар эди.

Халқ судъялари орасида қадимги, олий насаб аслзодаларнинг ҳам, янги зодагонларнинг ҳам вакиллари бўларди. Халқ судъяларини таҳтнинг «кўзи ва қулоги» деб аташарди. Улар фақат суд жараёнларини олиб боришлиргина эмас, фитналарни фош қилиш, дехқонлар ва паст табақадаги шаҳарликлар исёнларини бостириши, солиқларни йиғиши, дайдиларни таъқиб қилиш, камбағалларга ёрдам бериш учун пул йиғишни ташкил қилиш ва ҳоказоларни ҳам баҷаришлари керак эди. Бундан аёнки халқ судъяларининг роли жуда катта эди.

Францияда ҳам Англиядаги каби ҳукумат бошлиғи бутун ҳокимиётга тўлиқ эга бўлган қирол саналарди. Унинг қошида ҳукумат ҳисобланмиш кенгаш бор эди. Қиролнинг ўзи кенгаш аъзоларини тайинлар ва барча масалаларни ўзи ҳал қиласди. Ҳукумат аъзолари олий насаб шаҳзодалар, олий руҳонийлар, молиячилар, юристлардан иборат бўларди. Амалда мамлакатда қиролнинг

шахсий ҳукмронлиги ўрнатилган эди. Жойларда, чекка ўлкаларда ҳокимиятни губернаторлар бошқаар, лекин уларни ҳам олий табақа вакилларидан киролнинг ўзи тайинларди. Ҳаммадан кўра Францияда қироллик ҳокимиятига парламентлар халақит берарди. Жойлардаги олий суд органлари устидан шикоят қилиш ҳукуқи айнан ўша парламентларга берилган эди. Бундай парламентлар мамлакатда 17 та (XVII асрда) ва Париж парламенти энг катта таъсирга эга бўлиб, унинг фаолияти мамлакат ҳудудининг учдан бир қисмига тарқаларди.

Парламентлар факат суд эмас, балки баъзи бир сиёсий ҳукуқларга ҳам эга эдилар. Париж парламенти агар қирол жуда ёш бўлса, ренгентни (давлатнинг вақтинча ҳукмдорини), тайинларди, қиролнинг шартнома ва буйруқларини кўриб чиқар ва шу кабилар билан ҳам шуғулланарди. Париж парламенти билан Людовик XIV (1638–1715) анча кескин муносабатда эди. Унинг: «Сиз, давлат – бу бизлар, деб ўйладингизми? Давлат бу – мен», – деган машхур ибораси ҳам Париж парламентига қаратса айтилганди. Кейин оқ у парламентдан бир қатор ҳукуқларни олиб кўйди ва кўпгина парламент аъзоларини сургунга жўнатди. Бу хақда 1652 йили эълон қилинган «Кирол декларацияси»да шундай дейилади: «Биз ҳозир ва бундан кейин Париждаги бизнинг парламент палатамизни ташкил қилувчи шахсларга давлат ҳаётининг умумий масалалари ва бизнинг молиямизни бошқариш масалаларини кўриб чиқиши, шунингдек, ниманидир кўрсатма беришни ва биз кимга бошқаришни топширган бўлсак, ўшаларга нима биландир мурожаат қилишни қатъян тақиқлаймиз, номи кўрсатилган палата томонидан бизнинг ушбу буйруғимизга қарши шу пайтгача қандай қарор қабул қилган бўлса, барчасини куч ва аҳамиятини йўқотган деб эълон қиласиз ва бизнинг бошқа аҳолимиз ҳам у қарорларга ҳеч қанақа эътибор бермасликларини талаб қиласиз».

XVI асрда абсолютизмнинг зарурлигини асословчи таълимот шакллана бошлади. Қирол ҳукмронлиги келиб чиқиши жиҳатидан илоҳий эканлиги овоза қилинди. Диний таълимотга дунёвий таълимот ҳам қўшилди. XVI–XVII асрларда Францияда давлат ва ҳукуқ ҳақидаги фан анча ривожланган эди. Унинг асосий қоидаларидан бири, барча олий қонуний ҳокимият монархнинг қўлида мужассамланиши лозимлиги ҳақидаги қоидадир.

XVI–XVII асрларда қирол саройидаги ҳаёт қатъи тартибга солинганлиги ҳам қирол нуфузининг ошишига ёрдам берди. Фран-

цияда XVII аср ўрталарида олий насаб оилаларнинг қарийб бир ярим минг вакили сарой хизматида эдилар. Сарой ҳаёти асосининг мазмуни қирол шахсини илохийлаштиришдан иборат бўлган ахлок ташкил қиласди.

Людовик XIV даврида қирол қароргохи Версалга кўчирилди. Людовик Парижда, бу ифлос, шовқин-сўронли, тор ва қийшик кўчалари бўлган, чидаб бўлмас даражада сасиб ётган, халқи эса аллақачон баррикадалар қуришни ўрганиб олган ўжар шаҳарда яшашни хоҳламади.

Кечаю-кундуз Париждан Версалга минглаб одамлар ва юзлаб от қўшилган экипажлар, ун, гўшт, кўкат, балиқ ортилган аравалар ҳаракатланарди. Аслзодаларнинг фойтуналари жуда тез чопишарди, улар почта имтиёзига эга эдилар – ўз вақтида четга чиқмаган бечораларни жазосиз босиб кета олишарди.

Версаль кишида ажойиб таассурот қолдиради. Улкан бинолар, катта майдонлар ва боғлар – буларнинг ҳаммаси француз қиролининг буюклигига ишора эди. Ҳатто боғдаги ҳайкаллар ҳам унинг буюклигини эслатиб турмоғи лозим – Юпитер ҳайкали ҳам Людовик XIVнинг ўзига ўхшатиб ясалган эди.

Ҳар куни саройда бўладиган спектаклларда барча «қиролни ўйнамоги» керак эди. Людовик XIV ҳафтасига икки-уч марта овга чиқарди. Ов бўлмаган кунлари кечқурун саройда маскарадлар, концертлар, қарта ўйини ташкил қилинарди. Бундай ҳаёт тарзи қиролга айёр ва хавфли аслзодалар вакилларининг «кўл остида», «кўз ўнгидা» бўлишини таъминларди.

1715 йили 72 йил таҳтда ўтирган Людовик XIV вафот этди. Уни замондошлари «Қирол–Күёш», буюк деб аташган. Шу куни Күёш сўнди, буюклик ҳам кетди. Унинг узоқ йиллик фаолиятига кўмиш маросимида сўзлаган руҳоний битта жумла билан якун ясади:

– Фақат Худо буюк!

Бу сўзлар фоний дунёнинг буюклик даъво қилаётган барча хукмдорларига қарата айтилганга ўхшайди.

Қирол ва черков. Абсолютизм XVII асрнинг иккинчи ярмида Францияда энг ривожланган шаклга кирди. Барча Европа монархлари Людовик XIV га тақлид қилишга уринишар эди. Мутлақ монархлар хукмронлиги шунчалар кучли эди, улардан баъзилари ҳатто черков ва монастир мулкига кўз олайтиришни ҳам ўзларига эп кўрдилар, черков ташкилотларини бўйсундиришга ҳаракат

қилдилар. Рим папасига «қўлқопни ташлаш»¹га журъат қилган биринчи монарх Англия қироли Генрих VIII бўлди.

Баъзи бир европалик монархлар, аксинча папа уларнинг хам ҳокимиятини мустаҳкамлайди деб ҳисоблаб, католик динини мустаҳкамлаш учун курашардилар. Улар мамлакатда ўзбошимчалик авж олишидан, ички низолардан кўркишарди.

Германия ва Италияда XVI асрда ҳали марказлашган давлат ташкил бўлмаган эди. Бу ерларда кичик, бир-бири билан доимий жанг қилаётган давлатлар бўлиб, уларда чекланмаган ёки қарийб чекланмаган ҳокимият монархлар қўлида эди. Бу давлатлар расмангина «Мукаддас Рим империяси»га бўйсунарди. Венецияда, тоғли Швейцарияда ва Нидерландияда республика тузуми мавжуд эди.

Абсолютизм ва шахс. Давлат одатда, қироллик ҳокимияти мустаҳкамланишидан манфаатдор. Оддий одам уруш ва ўзаро қирғинлардан камрок жабр кўради. Лекин бундай давлатда инсон шахсий ҳуқуқларга эга бўлмайди. Буни ҳаёт «Битта монарх, битта конун, битта дин» принципи бўйича ривожланган Франция мисолида яққол кўриш мумкин.

Ўша пайтлар амалда бўлган қонунларга кўра тенгсизлик, жинс, миллат, дин, касб-хунар, жамиятдаги ўрни каби белгиларда мавжуд эди. Хотин-қизларнинг аҳволи оғир, уларнинг шахсий ҳуқуқлари деярли йўқ эди. Масалан, улар отаси ва ака-укаларига қулоқ солиши, эрга теккак эса эрнинг ҳукмронлиги остида қолиши керак эди. Аёллар ўз мулкларига хўжайнлик қила олмас эди. Болалар хам ҳуқуқсиз саналарди.

Оилада отанинг ҳуқуқи катта эди. Ота болаларининг мулкига ва даромадига улар билан бирга яшаган пайтлари тўла хўжайнлик қиласарди. Француз қонунларига кўра ота ўғилларини қаматиши, жазолаши мумкин эди. Фақат судьянинг олдига боришга эринмаслик ва ўғлини «тузатишга олишлари»ни сўраш кифоя эди, холос. Қонуннинг ана шу моддаси бўйича қамоқхоналарда ўттиз яшар ўғилларни, уларнинг орасида рухонийларни ҳам учратиш мумкин эди. Отанинг иродаси оилада қонун ҳисобланарди.

Диний мансублик асосида ҳам тенгсизлик мавжуд эди. Людовик XIII (1601–1643) Францияни католиклар мамлакати деб эълон

¹ «Қўлқопни ташлаш» – Ўрта аср рицарларида бир-бирини дуэльга чакириш усули. Қўлқопни юзга отиш дуэльга чакириш учун етарли асос ҳисобланган. Бу ерда қарши чикиш маъносида келтирилган.

қилган, демак, бошқа динлар мавжуд эмас, деган хуроса чиқарди. Бундай шароитда протестантлар, яхудийлар ўртасидаги никоҳлар ҳам хақиқий эмасдек бўлиб қолади, чунки давлат факат католик рухонийлари ўтказган никоҳ ва чўқинтиришларнигина тан олади.

Миллий тенгсизлик ҳам Европага кўп кулфатлар келтирди. Айниқса, яхудийларнинг ахволи оғир эди. Масалан, Эльзасда никоҳдан ўтиш учун улар шахсан қиролнинг рухсатини олишлари керак эди. Уларга ер сотиб олиш тақиқланганди, агар улар ерни ижарага олсалар, унга ишлов беришда христиан хизматкорлардан фойдаланмасликлари шарт эди. Яхудийларни атайлаб улар савдо фаолияти ва банк ишлари билан шуғуллансинлар деб, яъни даллолликка ундан, ердан қувиб чиқаришган. Ижтимоий тенгсизлик мавжуд эди, унда зодагонлар ва рухонийлар имтиёзларга эга бўлиб, қолган аҳоли эса ундан маҳрум эди.

* * *

Янги давр аниқ миллий чегараларга ва битта ҳукмрон динга (монархнинг динига), битта «ерли» миллатга эга бўлган мустаҳкам абсолютлик давлатлар мавжудлиги билан характерланади. Ўз давлати доирасида абсолютизм ахолининг барча қатламларига азобуқубат келтирувчи «барча-барчага қарши» деб ном олган вайрон қилувчи урушларни тўхтатиш имкониятини яратди.

IV боб бўйича саволлар

1. Абсолютизм қандай бошқариш шакли эди?
2. Давлат бошқарувининг яна қандай шаклларини биласиз?
3. XVI–XVII асрларда Европада абсолютизмнинг кучайиши жамиятда қандай ижобий ҳодисаларга олиб келди?
4. Абсолютизм даврида Европа жамиятида черковнинг роли қандай эди?
5. Абсолютизм шароитида давлат ва шахс муносабатлари қандай принципларга асосланган эди?
6. Абсолютизм шароитида кишиларнинг шахсий ҳаётига давлатнинг аралашви қай тарзда юз беради?
7. Англия ва Францияда кирол билан табақавий вакиллик органи ўртасидаги муносабатларда қандай ўхшашлик ва фарқлар бор эди?
8. Францияда ўша пайтдаги қонунларга кўра кишилар ўртасидаги тенгсизлик қандай белгиларга кўра мавжуд эди?

В БОБ. РЕФОРМАЦИЯ ВА ЕВРОПАДА АБСОЛЮТИЗМНИНГ МУСТАҲКАМЛАНИШИ

Германияда Реформациянинг бошланиши

XVI аср ва XVII асрнинг биринчи ярми Европада Реформация¹ черковни қайта қуриш учун кураш байробги остида ўтди. Бу ҳаракат барча Европа мамлакатларини, жамиятнинг барча қатламларини камраб олади.

XVI аср бошларида католик черкови. Ҳар бир диндорнинг орзуси Худонинг ердаги жонли мужассами хисобланмиш Рим папаси яшаётган мукаддас шаҳар – Римни кўриш эди.

Юз минглаб кишилар барча Европа мамлакатларидан ва жамиятнинг барча қатламларидан ўз орзуларига етиш учун йироқ Италияга, Римга зиёратга жўнашарди. Аммо кўпинча бу зиёрат диндорларнинг ҳафсаласини пир қиласи – қилинадиган.

Тунаш учун дехқонларнинг уйларида ёки йўл ёқасидаги меҳмонхоналарда тўхтар эканлар, зиёратчилар папа ва кардиналлар яшаётган ҳашаматли уйларни, уларнинг очкўзлиги, Худонинг хизматкорларига сира ҳам мос келмайдиган ҳаёт тарзини афсус ва на доматлар илига газаб билан бир-бирларига айтишарди.

Папанинг қудрати фақат унинг Худога чуқур ва сидқидилдан ишончи билангина эмас, черковнинг бойлиги билан ҳам изоҳланарди.

Оддий дехқондан тортиб то қудратли князгача ҳамма ўз даромадларининг ўндан бирини черковга беришлари керак эди. Папа хазинаси олий диний лавозимлар – епископ ва аббатларни тайинлаш ҳам катта фойда келтиради. Папа амалдорларининг сонсаноқсиз армияси ҳаёсизларча юлғичлик билан шугулланишарди. Папа амалдорларига пора бермасдан папалик идораларида бирорта ҳам ҳужжатни олиб бўлмасди. Қимматбаҳо совгаларсиз Римга бориб ўтирасдилар – порани фақат кардиналлар эмас, папанинг ўзи ҳам оларди.

Шу даврда айниқса индульгенциялар – гуноҳлардан кечиши ҳақидаги папа ёрликлари билан савдо қилиш кенг тарқалади. Черков фақат содир этилган гуноҳнигина эмас, қилинажагини ҳам кечирар эди!

¹ *Реформация* – XV асрда Германияда пайдо бўлган ва Европанинг кўплаб мамлакатларига ёйилган, католик черкови таълимотига ўзгариш киритиш ташаббуси остида ўтган ижтимоий ҳаракат.

XVI асрда индульгенцияларни сотиши католик мамлакатларда бутунлай ҳаёсиз характерга эга бўлди. Уларни ҳар бир бурчакда сотишарди, айниқса монахлар бу иш билан фаол шугуланишарди. Халқ тўпланган ҳамма жойда уларга индульгенцияларни сотиб олишни, «ўз номига тўлдириш ва қиёмат кунида рухини кутқаришни» та-клиф қилишарди.

XVI аср бошларида католик рухонийлари ва Рим папасидан норозилик аҳолининг кенг қатламларини ҳамраб олди. Князлар ўз ишларига рухонийларнинг аралашаётганидан (улар ҳам черков ерларидан бир қисмини ўзиники қилиб олишга йўқ демийишасди), шаҳарликлар – шаҳар худудида жойлашган монастирларнинг юлгичлигидан, дехқонлар – черков мулкларининг кўпайиб бораётганидан ва катта диний солиқлардан норози эдилар.

Католик черковининг сиёсати, айниқса, тарқоқ Германияда кучли норозилик уйғотарди, чунки баъзи бир ерларга рухоний ҳукмдорлар бошчилик қиласи ва масалан, Франциядаги каби ўз фуқароларини ҳимоя қила оладиган кучли императорлик ҳокимиияти йўқ эди.

Марказлашган давлат ва марказий ҳокимииятни мустаҳкамлаш ўйлидан кетган давлатларда Рим папасининг даъволари қироллик ҳокимиияти томонидан кучли қаршиликка учради. Тарқоқликни бошдан кечираётган Германияда эса папа ҳамон катта ҳокимиият даъво қилаётган эди. Тўғри, баъзи бир немис князлари ҳали XVI асрдаёқ ўрта бўғин рухонийларни ўз ҳокимииятига бўйсундирган эди. Ҳатто князлардан бири ўз ерида ўзи папа эканлигини ҳам айтган. Бироқ асосий худудларда рухонийлар анчагина катта дунёвий ҳокимииятга ҳам эга эдилар. Немис ерларидан жуда катта миқдордаги пул рухоний-князлар ва турли хилдаги солиқ йигувчилар орқали папа хазинасига тушаётган эди. Шу каби сабабларга кўра Германия Реформациянинг ватани бўлиб қолди. Уни князларнинг бир қисми, шаҳарликлар, дехқонлар кўллаб-куватларди.

Европада Реформациянинг ривожланишига Мартин Лютернинг (1483–1546) таълимоти катта таъсир қилди. М. Лютер Саксониянинг Эйслебен шаҳрида – мис саноатининг ўша пайтдаги йирик марказларидан бирида туғилган. Унинг отаси ўзига тўқ тадбиркор – мис эритиш корхонаси ва мис конларининг эгаси эди. Кон ишлари ни бошқариш князларга тегишли бўлиб, олинган анчагина қисм мис ҳам князларга бериларди. Бу ҳол кон ишлари билан шугулланувчи ўртаҳол бюргерларнинг доимий норозилигига сабаб бўларди.

Шундай қилиб, Лютер ўзининг ҳолатидан норози бўлган, католик руҳонийларига нисбатан мухолифат кайфияти шаклланган бюргерлар доирасида улгайди.

18 ёшида Лютер Эрфурт университетига ўқишига кирди. Бу ерда у гуманистларнинг радикал тўгараги аъзолари билан танишди ва бир қанча вакт улар таъсири остида бўлди. Бироқ университетни тамомлагандан сўнг Лютер августичилар монастирига хизматга кирди ва унинг дунёкараши шу ерда тўлиқ шаклланди. Монахлар ордени уни Саксониянинг Виттенберг шаҳрида ташкил қилинган университетга дарс бериш учун юборди. Лютер тез орада илохият доктори илмий даражасини олди.

Реформация учун кураш қандай бошланди? Лютер билан Рим ўртасида ажралиш қандай рўй берди?

1517 йилнинг 31 октябрь Мартин Лютер черков эшигига бир неча варак қоғозни ёпиштириб қўйди. Бу машҳур «95 тезис» – индульгенцияларни сотишга қарши эътиrozлар эди. Аслида факат илмий мунозара учун мўлжалланган ушбу тезислар лотинчадан немис тилига таржима қилиниб, бутун Германияни тўлқинлантириб юборди. Кенг муҳокамалар давомида Лютернинг қарашлари ва позицияси аниқ бўлиб борди.

1520 йил 15 июнда папа Лев X (1475–1521) Лютерни черковдан хайдашга таҳдид қилувчи булла¹ эълон қилди. Папа вакиллари булла матнини Германия бўйлаб тарқатиб, Лютер асарларини ёқишини ташкил қилди. Бунга жавобан Лютер ўз талабалари ёрдамида черков китоблари ва булла матнини ёқади. 1521 йил бошида Лютер ва унинг тарафдорлари черковдан хайдалди.

Лютер Рим судига боришдан бош тортид ва 1521 йилда уни Вормс шаҳридаги императорлик судига чакиришди. Бундан икки йил олдин – 1519 йили немис князлари Муқаддас Рим империясининг императори қилиб, буюк католик қироллар Фердинанд ва Изабеллаларнинг набираси испан қироли Карл I (1500–1558)ни сайлашган эди.

Янги император энди Карл V деб аталарди. Испания ҳакида, «бу – куёши ҳеч қачон ботмайдиган империя», дейишарди. Ўз бошида бир неча тожларни йиққан Карл V Испания, Нидерландия,

¹ Булла-Рим папаси томонидан қабул килинадиган алохида мухим қарорлар шундай аталади.

немис ерлари, Неаполь ва Сицилия, Янги Дунё мустамлакаларига хукмронлик қиларди.

Карл V ҳақида унинг «ватани йўқ қирол» дейишарди. Нидерландияда туғилиб, у ерда 17 ёшгача яшади. Ўсмирилигига Карл ҳар томонлама маълумот олди, фламанд, испан, немис, француз ва Итальян тилларини биларди. Карл V чиройли ва келишган, қоматли одам эди. У ишда чарчамас, ўз мақсадига етишишда тиришқоқ, ҳар қандай тўсиқларни енга оларди. Бироқ ўз характерининг дадиллигига қарамасдан у камгап, ўжар ва муғамбир ҳам эди. Карл V дунё христианларининг католик мамлакатини тузишини орзу қиларди.

Лютернинг дўйстлари, унинг хаёти учун хавотирланиб, Вормсга бормасликни маслаҳат берадилар. «Мендан ҳамма нарсани кутинглар, фақат қочишини ва воз кечишини эмас. Мен қочмайман ва энг сўнгги кунимгача тан оладиганим, ўз таълимотидан воз кечмайман!», – бу жасур инсон ўз тарафдорларига ана шундай жавоб берди.

Вормсга борадиган йўлда унга тантанали учрашувлар уюштирилар, кўплаб ҳалқ тўпланди ва у ўз дуоларини ўқиди. Вормс сейми унинг учун энг шарафли онлар бўлиб қолди. Шаҳар кўчалари ва майдонларини ҳалқ оқими тўлдириб юборди.

Император Лютердан ўз таълимотидан воз кечишини талаб қилди, лекин у папага бўйсунишдан ва индульгенцияларнинг сотилишини маъқуллашдан бош тортди. Йигилганларга мурожаат қилиб, Лютер ўзининг машҳур сўзларини айтди: «Мен шу сўзимда турибман. Ва бошқача бўла олмайман. Худо менга кўмаклашади. Омин». Унинг нутқи давомида залдан маъқуллаган хитоблар эшитилиб турди.

Судан кейин кўпчилик Лютерни ҳам Ян Гуснинг (1369–1415) тақдири кутаяпти, деб ўйлаганди. Аммо Саксония курфюрсти Фридрих III Донишманд (1463–1525) унинг қочишига ёрдам берди, Лютерни ўз қасрларидан бирига яшириб қўйди. У ерда Лютер рицарь Георг номи билан яшади ҳамда Инжил ва бошқа диний ёзувларни немис тилига таржима қилди.

У қасрда яшар экан, бу вақтда Виттенбург ва бошқа ерларда католицизмнинг қулаши бошланди. Реформация бошланди. Германия йўллари бўйлаб ҳалқни фақат Рим папалари эмас, балки дунёвий князлар ҳокимиятини ағдариб ташлашга чорловчи саёқ жарчилар изғиб юришарди.

Лютер бу чакириқларни қабул қила олмас эди. У ўз тараф-дорларига кескин қарши чиқди ва князларни черков устидан ўз хукмронликларини ўрнатишга чакирди. М.Лютернинг 1525 йил май ойида «Босқинчи ва қароқчи дехқон тўдаларига қарши» нутқида шундай дейилади: «Бу дехқонлар мана уч йилдирки Худога ва одамларга қарши даҳшатли гуноҳларни ўзларига олишибди, шунинг учун ҳам улар бир неча карра ҳам жисмонан, ҳам маънан ўлимга лойикдирлар.

Биринчидан, улар ўз хўжайинларига содиқликка ва вафодорликка, итоаткор бўлишга қасам ичганлар. Иккинчидан, улар қўзғолон килишар экан, ўзларига тегишли бўлмаган монастир ва қасрларни шаккокларча талон-торож қиласар ва ўғирлаб кетишар экан, улар йўллардаги қароқчи ва қотиллар мисоли фақат шунинг ўзи учуноқ икки карра тана ва рух ўлимига маҳкумдирлар. Қилмиши тасдифини топган ҳар қандай исёнкор Худо ва император қаҳрига дуч бўладики, ундей одамни бошқалардан олдин янчидан ташлаган ҳар қандай киши адолатли ва яхши иш қилган бўлади... Чунки исён шунчаки қотиллик эмас, мамлакатни алангага ташлайдиган ва вайронага айлантирадиган улкан ёнғинга қиёсдир... Шунинг учун ҳам, дехқонларни кимнинг қўлидан келса, ўша уриши, бўғиши, санчиши керак, бу ишни ошкора ёки маҳфий қилиши мумкин ва ёдда сақлаши керакки, исёнкордан кўра заҳарлироқ, заرارлироқ, шайтонроқ ҳеч нарса бўлиши мумкин эмас. Уни худди қутурган итдек ўлдириш керак...»

Лютеран черкови ва Лютер таълимомоти. Лютер таълимотининг асосий моҳияти шундаки, инсон «қалбини қутқаришга», «гуноҳлардан фориф бўлишга» черков ва унинг маросимлари орқали эмас, инсонга худо томонидан инъом этилган эътиқод орқалигина эришиш мумкин. У инсон эътиқодини унинг худо билан алоқасидаги ягона восита деб билади. Бу билан Лютер руҳонийларнинг жамиятдаги имтиёзли ҳолатини инкор этади ва князлар ҳамда бюргерларнинг умумий хоҳиш иродасини ифода этади.

Католик черковнинг таълимотига қарама-қарши ўлароқ, Лютер черков ва руҳонийлар инсон билан худо ўртасида воситачилик қила олмайди, деб эълон қилди. Рим черковининг одамлар «гуноҳларини кечиришга» бўлган даъвосини эса тўғридан-тўғри ёлғон деб атади. Бу албатта черковнинг мутлақо кераги йўқ, дегани эмас, у бошқача бўлиши керак, холос. Руҳонийлар диндорларга Инжилни тушунтирсинлар, уларга муқаддас китобларни ўқишини ўргатсинлар.

Лютер руҳонийлар ҳам уйлана олишлари, одатдаги кийимларни кийиши, оддий одамлар қандай бўлса, шундай бўлиши керак, деб ҳисобларди. Черков ҳам «арzon» бўлиши керак – узок чўзиладиган маросимлардан озод бўлиши, руҳонийларнинг қимматбаҳо кийимидан, бой ички безаклардан воз кечмоги керак. Лютеран черкови эса дунёвий ҳокимларга – князлар ва императорларга бўйсунмоғи керак. Бундай таълимот князларнинг ҳам манфаатларини ифодаларди. Черков ислоҳоти шиори остида монастирларнинг ерларини тортиб олиш ҳоллари учрай бошлади.

1529 йили Карл V князларга монастир ва черков мулкини олиб қўйишини тақиқлади. Шунда Лютернинг тарафдорлари унга норозилик билдирилар. «Протестант» сўзи ана шундай пайдо бўлди. Черков ислоҳотчиларини протестантлар деб атай бошладилар.

«Мамлакат кимники бўлса, дин ўшанини...». Карл V католик черковини ҳимоя қилишга уринди. Ўзи ашаддий католик бўлгани учун эмас, папага қарши курашнинг изидан дунёвий ҳоқонларга ҳам қарши кураш бошланиб кетиб, дехқонлар ҳосилнинг ўндан бирини тўламай қўядилар – князъ ва императорларга солик бермайдилар, деб кўрқанлиги учун ҳам шундай қилди.

Бироқ Реформация ҳаракатини тўхтатишнинг иложи йўқ эди. Кейин лютеранлик дунёвий ҳокимлар учун унчалик даҳшатли эмасди, ахир улар черковни князларга бўйсундириш тарафдорлари эди. Узоқ йиллар давомидаги курашлардан сўнг Карл V князларга ўзлари эътиқод қилган динни ўз ерларида ўрнатиш хукуқини берадиган қонун чиқарди.

Германиянинг шимолий ва шимоли-шарқий ерлари, шунингдек, Марказий Германиянинг ҳам баъзи бир князликлари лютеранликни қабул қилдилар, жануб эса католиклигича қолди. Кейинчалик бу диний урушларга олиб келди.

Халқ Реформацияси доҳийси. Халқ Реформациясининг доҳийси Томас Мюнцер (1493–1525) бўлди. Иккита университетни тугатган юқори билимли одам нега бундай йўлни танлади? Руҳоний бўлгани учун Мюнцер доимо оддий одамлар билан муомала қиласади. Реформациянинг дастлабки йилларида у Лютерни ёқлади, кейин эса уларнинг йўли ажralиб кетди. Князлар манфаатини кўзлаган Реформация унинг қарашларига тўғри келмас эди. Мюнцер «ҳокимият оддий халққа берилиш керак», чунки Худонинг иродаси шундай, дер эди. Ўз насиҳатларида у ўз қавмига, худо ҳақиқий диндор-

лар билан, танланганлар билан гаплашади ва халқ попларга эмас Худога қулоқ солмоғи керак, дейди.

Мюнцер халқни «ўз хукмини ўтказишга» – ҳокимларни ағдаришга чақирди. Натижада «кучиллар хор бўлиб, заифлар улуғланур», «Худо подшолиги» пайдо бўлади, ерда – адолатли жамият ўрнатилади. «Барча нарсалар умум мулки бўлмоғи даркор... ҳар бир кишига унинг эҳтиёжига қараб моддий ва маънавий бойлик берилмоғи керак», – деб хисобларди у. Қачон кўрғон ва монастирлар ҳамда «бойлар ва камбағаллар душманлари» йўқолса, хусусий мулк бўлмаса, ўшандагина Германия баҳтли бўлади, дейди Мюнцер.

Бундай нутқлар таъсирида шаҳар ва қишлоқлар аҳолиси ҳаяжонга тушди. Улар черковларни ёпиб қўйиб, католик руҳонийларни ҳайдаб юбордилар.

Дехқонлар урушининг сабаблари. 1524 йили Германия бўйлаб хавотирли хабар тарқалди – мамлакат жанубида дехқонлар кўзғолон кўтардилар. 1525 йили бутун герман ерларини тарихчилар «Буюк дехқонлар уруши» деб атаган ҳаракат қамраб олди. Бу кутилган воқеа эди, албатта.

XV аср ўрталарида ёқ кардиналлардан бири Рим папасига черков ва феодаллар томонидан қилинаётган ишлар Германия дехқонларининг ғазабини келтираётганини етказган эди ва «Бу қонунсизликлар барча раҳбариятга нисбатан халқнинг ғазабини келтирмоқда ва агар улар тўхтатилмаса, унда халқ руҳонийларга қарши гусчилар қабилида иш қиласи, деб хавотирланиши керак. Бу руҳдаги пўписалар аллақачон аниқ эшитилмоқда», деб ёзган эди.

Дехқонлар урушларининг асосий сабаблари нимада?

Герман ерларида Европанинг қолган қисмидаги каби қишлоқ аҳолиси орасида озод кишилар, ер бўйича қарамлар, шахсан қарам дехқонлар бор эди. Ер бўйича қарам дехқонлар ҳам эркин хисобланарди, бироқ улар феодалнинг ерларида яшар ва шунинг учун турли хил мажбуриятларни бажарап эдилар.

Товар-пул муносабатларининг ривожланиши билан зодагон ва князлар зебу-зийнат буюмларига эга бўлиш мақсадида кўпроқ пул топишга ҳаракат қилишарди. Феодаллар жамоа ерларини олиб қўя бошлидилар ва дехқонларнинг ерларини қисқартирилар. Дон, гўшт, жун, каноп – барчаси шаҳарга сотиш учун кетарди. Дехқонларга ўрмондан шох-шабба йиғишига, ов қилишига, ҳовузлардан балиқ ов-

лашга рухсат берилмас эди. Хўжайинлар қарам дехқонлардан оли-надиган тўловларни оширидилар.

Дехқонлар нарх ошишидан қийналарди. Янги Дунёдан олтин ва кумушнинг оқиб келиши «нархлар инқилоби»ни юзага келтири – пул қадрсизланиб, товарларнинг нархи ошди. Князга, сенъорга ва черковга солик тўлагандан сўнг дехқонларда хеч нарса қолмас ва кўпчилиги судхўрларга мурожаат қилишга мажбур бўлар эди.

Бунинг устига дехқонлар шахсий хукуқларга эга эмас эди ва сенъорлар устидан шикоят қила олишмасди. Улар ўз депутатлари-ни империя сеймига жўнатишни талаб қилган ҳолатлар ҳам бўлган. Аммо зодагонлар ва руҳонийларнинг фикрича, дехқонлар ўз вакилларини тоифавий вакиллик органига юбориш хукуқига эга эмасдилар.

Мамлакатнинг жануби-ғарби қўзғолончиларнинг асосий харатат ҳудуди бўлиб қолди. 40 минг киши дунёвий ва диний феодаллар зулмига қарши кураш олиб борди. Улар феодал қарамлик ёзилган хужжатларни ёқар, монастир ва қасрларни вайрон қилас, сенъорларнинг молларини бўлиб олишар ва жамоа ерларини қайтаришарди.

Қўзғолончиларнинг талаблари ҳақида уларнинг дастурлари – мақсад ва талабларини ўқиб чиқиб, тасаввурга эга бўлиш мумкин. Дехқон отрядларининг раҳбарлари дастур туздилар ва уни «12 модда» деб агадилар. Унда шундай дейилади: «Биринчидан, бизнинг тинч сўров ва истакларимиз, бизнинг умумий иродва ва фикримиз – бундан буён бутун жамоа бўлиб ўзимизга руҳоний сайлаш, у ўзини керагича тутмаган пайтда уни алмаштириш хукуқига эга бўлмоқ...

Иккинчидан, биз адолатли ўндан бир дон солиғини беришга ро-зимиз, бироқ лозим бўлганидай беришга. ... Бундан буён бу ўндан бирини жамоа қўядиган бизнинг черков оқсоқолимиз йифишини истаймиз ва йифилган маҳсулотлардан бутун жамоа сайлаган руҳонийга, унга ва унинг яқинларига яшашга етарли миқдорда жамоа қарори билан берилишини истаймиз.

Учинчидан, то ҳозиргача бизни «қарам» одамлар деб ҳисоблаш одат эди, агар Исо Масих ўзининг қимматбаҳо қонини тўкиш билан бизнинг барчамизни, чўпондан тортиб энг юксагимизгача, хеч кимни қолдирмай, озод этганлигини ҳисобга олсак, бу одат ачи-нарлидир. Шунинг учун биз озод бўлишни исташимиз ва шундай бўлишимиз Унинг ёзганларига мос келади.

Тўртинчидан, шу пайтгача қишлоқ одами қушларни овлаш, оқаётган сувдан балиқ тутиш хукуқига эга эмаслиги одатий ҳол эди. Бизнинг фикримизча, бундай бўлиши тўғри эмас...

Бешинчидан, биз ўрмондан фойдаланишда ҳам қийналиб қолганмиз. Чунки, бизнинг хўжайинларимиз барча ўрмонларни ўзлариники қилиб олишган. Мана бизнинг фикримиз: ўзлаштирилган, лекин сенъорлар ва даллоллар томонидан сотиб олинмаган ерлар яна жамоага кайтарилиши керак.

Олтинчидан, биз кундан-кун кўпайиб ва ортиб бораётган солиқлардан жуда қийналяпмиз. Истардикки, бу ишда бизга етарлича эътибор берсалар ва бизни бунчалар қаттиқ қийнашмасалар.

Еттинчидан, бундан буён биз сенъорга ўзимизни қийнашга йўл қуиши хоҳламаймиз, сенъор ерни қандай қилиб дехконга ижара-га берган бўлса, у ҳам дехқон билан сенъорнинг келишувига қараб шунга мос равишда ерни олмоғи керак. Сенъор бундан ташқари уни хеч нарсага, хеч қанақа ҳовли ишларига ёки бошқа бирор хизматга мажбур қилмаслиги керак.

Саккизинчидан, биз, кимнинг ери бўлса, ҳаммамиз шундан қийналамизки, ана шу ернинг ўзи ижара ҳақини тўлашга етишмайди ва ана шунака ерда дехқон ўзини ўзи йўқотаяпти ва ўз қадр-кимматини хўрлайяпти. Жаноблар, бу ерларни обрўли одамлар кўриб чиқишини буюрсалар ва ижара ҳақини адолат юзасидан шундай ўрнатсинларки, дехқонларнинг қилган меҳнатлари зое кетмаса, чунки хар қандай меҳнат тақдирланишга лойикдир.

Тўққизинчидан, биз ҳаддан зиёд жарималардан қийналяпмиз, чунки кўпинча иш билан эмас, душманлик ёки хушомад юзасидан муттасил янги қарорлар чиқаришади ва бизни жазолашади. Бизнинг фикримиз шундай: бизларни илгари чиқарилган қарорларга кўра, ишнинг ахволига қараб жазолашса, зулм қилмасалар.

Ўнинчидан, биз баъзи бировлар ўзлари жамоага тегишли ўтлоқлар, шунингдек, ҳосилдор ерларни ҳам ўзлаштириб олганлигидан қийналяпмиз. Бу ерларни биз яна умум бўлиб фойдаланишимиз учун қайтариб берилишини истардик.

Ўн биринчидан, биз ўлимдан сўнгги тўлов, деб аталган одатнинг бутунлай бекор килинишини хоҳлаймиз.

Ўн иккинчидан, мана бизнинг қарор ва якуний фикримиз: агар бу ерда Худонинг сўзига мос келмайдиган битта ёки бундан кўпроқ

модда бўлса, агар муқаддас ёзувлар асосида шуни тушунтирсалар, биз улардан воз кечишига тайёрмиз.

1524–1525 йиллардаги дехқонлар қўзғолони уларнинг мағлубияти билан якунланди. Қўзғолончилар орасида бирлик йўқ эди – ҳар бир вилоятда дехқонлар алоҳида ҳаракат қиласидилар. Энг яхши ташкил қилинган ҳаракат, дехқонларга тоғ-кон ишчилари ва шаҳар қашшоқлари ҳам қўшилган, қўзғолонга эса Томас Мюнцер бошчилик қилган Марказий Германиянинг Тюрингия вилоятида бўлди.

Лютер қўзғолонни маъқулламади, ўзининг «Босқинчи ва қароқчи дехқон тўдаларига қарши» (1525) асарида дехқонларнинг ҳаракатларини қоралади. Князлар эса, хатто Реформацияни маъқуллаганлари ҳам ўз феодал ҳукуқларидан ажралишни исташмас эдилар.

Зодагонлар дехқон отрядларини бирма-бир бостиридилар. Тюрингияда, Франкенхаузен шаҳри яқинида Мюнцернинг 8 минг кишилиг тўдаси тор-мор қилинди. Унинг ўзи ярадор ҳолида асир тушди. Уни қатл қилдилар. Мағлубиятга учраган дехқонларни князлар аёвсиз жазоладилар. Ҳаммаси бўлиб, 100 мингга яқин киши қатл қилинди.

Дехқонларнинг урушдаги мағлубияти мамлакатда феодал тартибларнинг сақланиб қолишига олиб келди, баъзи ерларда яна уч юз йил дехқонларнинг шахсий қарамлиги сақланиб қолди. Сиёсий тарқоқлик ҳам давом этди. Бу ҳолатлар капиталистик муносабатларнинг ривожланишига тўсиқ бўлди.

Германияда дехқонлар уруши

Реформация иштирокчилари	Максад ва талаблари	Дехқонлар урушидаги роли
Дехқонлар	Крепостной ҳукуқнинг бекор қилиниши, феодал зулмнинг сусайтирилиши	Асосий ҳаракатлантирувчи куч
Бой шаҳарликлар	«Арzon черков» жорий қилиши, черков мулкларини эгаллаб олиш	Қисман дехқонларга қўшилди, кейин феодаллар томонга ўтиб кетди
Йирик феодаллар	Черков ерлари ва бойликларини эгаллаб олиш, Рим папаси ва императордан тўлиқ мустақилликка эришиш	Дехқонларнинг чиқишлирини бостириди

Европада Реформациянинг тарқалиши. Католик черковининг Реформацияга қарши қураши

Кальвинистик черков. Реформация бутун Европа бўйлаб дадил тарқала бошлади. У Англия, Франция, Дания, Норвегия, Нидерландия, Швейцарияга кириб келди.

XVI асрга келиб Швейцария иттифоқига Базель, Шаффхаузен ва Аппенцелль қўшилиб, кантонлар сони ўн учтага етди. Аср охирларида мамлакат аҳолиси 1 млн кишига яқинни ташкил қиласр эди. Швейцария иттифоқи доимий марказий ҳокимиятга, умумий пулга, армияга, байроқ ва муҳрга эга эмасди. Олий органи Тагзатцунг (парламент) ҳисобланган, аммо кантонлар ҳукуматлари Тагзатцунг қарорларини ҳар доим ҳам бажаравермаган. Кантонларнинг иқтисодий манзараси ҳам бир хил эмасди, Цюрих, Базель ва Берн каби кантонлар бошқалардан анча илгарилаб кетганди. XVI аср бошларидан бой шаҳарлар ўз қишлоқ округларига таъсирини кучайтириб, уларнинг маъмурий суд соҳасидаги ҳуқуқларини анча камайтиради. Кантонларда ҳокимиятни суиистеъмол килиш ҳоллари кўпайди. Кантонлар ҳокимиятларининг черковга босими ҳам кучайди ва бундай ҳолатдан норози қатламлар сони ортиб борди.

Ана шундай бир шароитда Швейцария яна битта протестантлик таълимоти – кальвинизмнинг ватани бўлди. Таълимотнинг асосчиси Жан Кальвин (1509–1564), асли француз бўлиб, Пикардияда собор прокурори оиласида туғилган. У Парижда ва Орлеанда таълим олди, Буржеда университетнинг ҳуқуқ факультетини тамомлади, гуманистик доираларга яқинлиги бўлиб, теологияни чуқур ўрганди. 1534 йилдан у тақдирини Реформация билан боғлади: диний таъқиблардан дастлаб Страсбургга, кейин эса Базелга қочди, шу ерда 1536 йили унинг илоҳиятга бағишлиган асосий китоби – Христианликка оид ўғитлар босилиб чиқди. Шу йили ўтаётуб бир кунга Женевада тўхтади ва Фарелнинг маслаҳатига қўра бу ерда умрининг охиригача ушланиб қолди. Бу ерда у «Женева папаси» лақабини олди.

Ўз даври учун ажойиб маълумот олган бу одам, эски католик таълимотни кулатишга интилди. Кальвин ўз таълимотида Реформация учун умумий бўлган қоидалардангина фойдаланиб қолмасдан, уларни ўз ғоялари билан тўлдирди, олдинги ислоҳотчилар қўйган саволларга ўз позициясидан туриб жавоб берди. Худо томонидан

тақдирнинг олдиндан белгилаб қўйилганлиги ҳакидаги таълимотни умумий қўринишда Лютер ва Цвингли¹ шакллантирган эдилар. Кальвин асосий ургуни бу гоянинг мутлақлигига ва муқаррарлигига қаратади. Ҳали олам яратилмасдан олдин Худо ҳар бир кишининг тақдирини олдиндан белгилаб қўйган: бирорларга – абадий лаънат, бошқаларга, сайлаб олинганларга – абадий фароғат. Бироқ ўлганидан сўнг айнан қаерга тушишини тириклардан ҳеч ким олдиндан билмаганлиги сабабли ҳамма сабр-тоқат билан ва нолимасдан меҳнат қилишлари лозим. Худонинг қудрати чексиз бўлганлигидан одам унинг ҳукмини ўзгартиришга қодир эмас. Бироқ агар у ўз ишларида муваффакият козонса, унда бу ўз вазифасини тўғри бажараётганига Худонинг ишорасидир. Агар, аксинча, инсон йўқотиши ва заарлар кўрадиган бўлса, бу Худо ундан юз ўғирганлигидан гувоҳлик беради, дейилади Кальвин таълимотида.

Кальвиннинг таълимоти қайноқ ҳәётий курашга, шу жумладан, тадбиркорликка ҳам тайёр бўлган шахснинг ривожланишига кўмаклашади. Меҳнат, тежамкорлик, ҳисоб-китоблиликни Кальвин яхши фазилатлар деб ҳисоблайди.

Реформациянинг тақдири учун Кальвиннинг янгича черков тузилишини киритганлиги катта аҳамиятга эга бўлди. Черков жамоаси ўзининг раҳбарларини – руҳоний ва оксоқолларни (просвитерларни – грекчадан «энг кексалар»ни) сайлар ва назорат қиласарди. Шуннинг учун кальвилистик черков баъзан просвитериан черкови (масалан, Англияда ва Шотландияда) деб ҳам аталарди. Умумий ишларни ҳал қилиш учун черков жамоасининг вакиллари кенгашларга – синодларга йиғилишарди. Бундай черков буржуазия учун ҳам, шаҳаркоммуналар учун ҳам, кучли қиролликлар учун ҳам қулай эди.

Кальвин фуқароларнинг ҳукмдорни ўзгартириш хукуқини тан оларди, лекин шу шарт биланки, агар у Худо ўрнатган қонунларни бузган бўлса.

Кальвиннинг фан билан қураши. Католиклардан ҳам даҳшатлироқ душман, бу олим-файлласуфлар эди, Кальвин уларни шундай деб атарди. Кальвин ўз таълимотига қаратилган танқидни тан олмасди. Испан олими Мигель Сервет² ана шундай «гуноҳ»

¹ Ульрих Цвингли – 1484–1531 йиллари яшаган, швейцариялик черков ислохотчиси, христиан гуманисти, файласуф.

² Мигель Сервет – 1509–1553 йиллари яшаган, испан мутафаккири, врач, инсон организмида қоннинг айланиши муаммоси билан шугулланган.

қилган эди ва шунинг учун у «Женева папаси» буйруғи билан 1553 йили ёқиб юборилганди.

«Дуо ўқи ва ишла!». Кальвин Женевада қатын тартиб ўрнатди. Аввалги халқ байрамлари, карнаваллар қайтмас бўлиб унутилиб кетди. Йил давомидаги байрам кунлари қисқартирилди. Ҳамма «Дуо ўқи ва ишла!» деган қатын буйруққа бўйсуниши шарт эди. Француз ёзувчиси Вольтер XVIII асрда «Кальвин монастир эшиклирини у ердан монахларни қувиб чиқариш учун эмас, бутун дунёни у ерга қувиб киритиш учун очган», деган эди.

Бундай бир маромдаги ҳаёт кўпгина женеваликларга ёқмади ва улар кунлардан бир куни Кальвинни шаҳардан қувиб юборишиди. Тўғри, бир неча йилдан сўнг уни яна орқага қайтариб, шаҳарга киритишди.

Тежамкорлик ғоялари ўсиб бораётган бир пайтда мулк йиғиши, буржуазия синфи учун жуда ҳам ёқимли иш эди. Кальвинизм протестантлик диний таълимоти сифатида бутун Европага ёйилди. Реформация Англияда англикан черковининг ўрнатилишига олиб келди ва черков тепасида қиролнинг ўзи туради, Францияда эса протестантлар католикларга қарши кураш олиб боришарди.

Барча протестантларни Рим папаси динсизлар деб эълон қилди.

Кальвинизмнинг асосий оқимлари

Оқимнинг номи	Пайдо бўлган жойи	Пайдо бўлган йили
Англиканлик	Англия	1558 йил
Баптистлар	Англия	1611 йил
Гугенотлар	Франция	1546 йил
Квакерлар	Англия	1650 йил
Пресвитерианлик	Голландия	1618–1619 йиллар
Пуританлик	Англия	1563 йил

Иезуитлар. Католицизм Уйғониш ва Реформацияда ўз аксини топган диний норозилик билан келиша олмас ва буни хоҳламасди.

Реформация билан курашиш учун Рим папаси 1540 йили «Иисус жамияти» ёки иезуитлар (Иисус – лотинча «Иезус») орденини тасдиқлади.

Иезуитлар олдида аниқ вазифа – «адашган оломонни черков бағрига қайтариш» туради. Орден низомида жумладан шундай

дейилади: «... Бизнинг бутун жамиятимиз ва демакки унга кира-ётган ҳамма ва ҳар бир киши бизнинг муқаддас отамиз Папага ва унинг барча ворисларига ишонч ва ҳақиқат билан бўйсуниш мажбуриятини олади ва фақат шу шарт билангина Худо учун меҳнат қилиш хукуқига эга бўладилар... Бизнинг жамиятимизнинг умуман буюк итоатини ва унинг ҳар бир аъзосининг тўлиқ ўзлигидан кешишини кўрсатиш учун бутун ҳалқ олдида ўз шахсий иродамиздан қатъи воз кечганигимизни исботлаш учун биз алоҳида итоаткорлик қасамини ичмоғимиз керак... Исо Масихнинг жангчилари бўлишга қатъи қарор қилгандан кейин улар (орден аъзолари) кун ва тун қиличларини қўлдан қўймасликлари ва ҳар бир соат ўз вазифаларини бажаришга тайёр туришлари шарт.

Ҳамма ва ҳар бир киши орден Низомига тааллуқли нарсалар бўйича орден генералига шак-шубҳасиз бўйсунишга қасам ичмоғи лозим».

«Иисус жамияти»нинг асосчиси испан зодагони Игнатий Лайола (1491–1556) эди. Лайола ҳарбий обрў қозонишин орзу қилас ва Карл V нинг Францияга қарши урушларида иштирок этганди. Жангларнинг бирида ядро унинг оёғини мажақлаб кетди ва у бир умрга чўлоқ бўлиб қолди.

Узоқ давом этган даволаниш даврида Лайола кўп, асосан авлиёлар ҳаётига бағишлиланган китобларни ўқиди. Аста-секин унда ўзини диний қаҳрамонликлар билан машҳур қилиш истаги пайдо бўлди. 1523 йили Лайола Куддус шаҳрига ҳаж қилди. Европага қайтгандан сўнг у диний маълумот олишни якунлаш учун Парижга келди. У садақа билан кун кўриб, жуда ҳам қашшоқ яшарди, лекин динни ўрганишни тарқ этмади.

Фанни эгаллаш осон бўлмади: Лайола катта қобилият эгаси эмасди. Аммо барча қийинчиликларни у мисли йўқ бир ўжарлик билан енгиб ўтарди. Бу эрта қарив қолган одам хотиржам, эътиборли эди, ҳамиша ўйлаб ва шошилмасдан, кескин ва қатъи гапиради. У дўстларини ўз таъсирига бўйсундирди ва янги орден – иезуитлар орденига асос бўлган кичик тўгарак тузди.

Орденнинг низоми Рим папаси хукмронлигини кенгайтириш мақсадини «Иисус жамияти» олдига қўйган эди. Иезуитлар ордени аввалги монахлик орденларига ўхшамасди. Иезуит бўлиш – ҳаётдан кетишни англатмас эди. Аксинча, улар жамият орасида қолмоқлари ва ўз ғайратларини хукмдорлар ва аъёнлар эътиборига эга бўлишга,

уларнинг ҳокимиюти ва пулларидан черковни мустаҳкамлаш учун фойдаланишга қаратмоқлари лозим эди. Баъзи бирлари кироллар, князлар, катта амалдорларнинг руҳонийлари бўлишидди. Тавба қилиш пайтида олинган сирлар шу заҳотиёқ Римга жўнатилар, тавба сирлари ана шундай «сақланарди».

Кўпгина бой кишиларни иезуитлар орден фойдасига васият қолдиришга кўндира олдилар. Орден бойиб борди. У ерларнинг, корхоналарнинг, савдо кемаларининг, Янги Дунёдаги колонияларнинг мулкдорига айланди.

Иезуитлар яхшигина миссионерлар ҳам эдилар. Керак бўлган ерда улар пул сарф этиб, ҳомийлик ҳам қилишарди. Иезуитлар мактаблар очишидди, ўсмиirlар уларда бепул маълумот олардилар. Олимлар билан улар илмий баҳслар олиб боришарди, оддий халқни эса ажойиб диний хизматлар ва қизиқарли насиҳатлар билан жалб қиласдилар, уларнинг тадбирлари ҳеч қачон зерикарли бўлмасди.

«Бу дунё зўрлари» бўйсунмаган ҳолатларда иезуитларда ҳамма вақт заҳар ва ханжар тайёр эди. Қотил гуноҳкор хисобланмасди – орденнинг лавозим бўйича катта амалдори иезуитлар орденининг кичик аъзоси амалга оширган жиноят учун маънавий гуноҳни ўз бўйнига оларди. Иезуитлар орденининг «Ҳамма нарса Худони шарафлашга!» деган шиори бу ерда жуда қўй келарди. Иезуитлар орденининг: «Агар бизга оқ бўлиб туюлган нарсаларнинг кора эканлигини черков аниқласа, биз дарҳол уни қора деб тан олишимиз шарт», деган қоидасини билишарди. Орден Римнинг қўлидаги итоаткор курол эди.

Папаликнинг Реформацияга қарши кураши. Европанинг бир қатор мамлакатларида ўз хукмронлигини йўқотиши Римни шошилтириб қўйди. XVI асрнинг 40-йилларидаёқ папалар йўқотилган мавқеларини, энг муҳими ўз бойликларининг манбай – ҳосилнинг ўндан бири солиғини қайтаришга уринадилар. Контрреформация (Реформацияга қарши кураш) даври бошланди. Бу курашда папаларга иезуитлар ёрдам бердилар. «Дин соғлиғи»ни инквизиция¹ ҳам ҳимоя қилиб чиқди, у айниқса Италия ва Испанияда авж олди.

Бўлиб ташланган Италия католик реакциянинг барча оғирлигини ўзида ҳис қиласди. Инквизиция гулханлари бутун мамлакат бўйлаб,

¹ Инквизиция – қидирув, суд ва жазо функцияларини бажарувчи католик черкови трибунали. 1229 йили Тулуза шаҳрида тузилган. 1233 йили Рим папаси Григорий IX нинг маҳсус булласи билан инквизициянинг қарори барча католиклар учун мажбурий бўлди.

ҳеч кимни, айниқса олимларни аямай ловулларди. 1600 йилда буюк олим Жордано Брунони гулханды ёкишди. Шундай қисмат Галилео Галилейга ҳам насиб бўлишига озгина қолди.

Черков илгор илмий ва фалсафий фикрга қарши ташланди. Папа ёкиб юборилиши лозим бўлган, тақиқланган китоблар рўйхатини эълон қилди. XVI асрнинг иккинчи ярмида Реформацияга қарши курашга қирол Карл V нинг ўғли Испания қироли Филипп II (1556–1598) бошчилик қилди.

Паст бўйли, қўкраги бўртиб чиққан Испания қироли касалманди киши кўринишига эга бўлса-да, бироқ бу ногирон танада енгилмас рух мужассам эди. Филипп II яхшигина маълумотли ва давлат арбобининг ажойиб қобилиятига эга эди – акс ҳолда у қандай қилиб узок ўн йилликлар давомида ўз давлатини бошқарган? Унинг империяси улкан эди: унга Испания, Португалия, Италиянинг бир қисми, Жанубий Америка ва Африкадаги мустамлакалар киради. У буюк католик қирол сифатида дунёда ўз хукмронлигини ўрнатиш орзуисида эди.

Филипп II нинг буйруғи билан Мадрид яқинидаги Эскориал атап-миш ажойиб меъморий мажмуа қурилди, унга сарой, ибодатхона ва монастир киради. Бу ерга қирол қароргоҳини кўчирдилар, у бу ерда мамлакатдаги энг яхши кутубхонани ташкил қилди, шу ердан у мамлакатни бошқарди. Табиатан камгап ва унча ҳам хушмуомала бўлмаган Филипп II ўз саройидан қарориб чиқмасди, ўзининг кўп сонли фармонларини эса сарой идораси орқали ёзма равишда эълон қиласди.

Бу дин мутаассиби Англия, Германия ва Франциядаги католикларга, уларнинг протестантларга қарши курашида ёрдам берди. Филипп II даврида мамлакатда юз мартадан зиёд аутодафелар бўлиб ўтди. «Мен диндан қайтган фуқароларим бўлганидан кўра, умуман фуқаром бўлмаслигини маъқул кўраман», деган эди у. Хар бир испаниялик унинг аждодлари тўрт авлод олдин ҳам «соф» испанлар ва «хуш хулқли католиклар» бўлганлигини исбот қилиб бериши керак эди. Авлодлари чўкинган мавр ёки яхудий бўлганларни эса қирол динсизлар деб ҳисоблаб, қатлга жўнатар эди. Кўплар ҳалок бўлдилар, баъзилар қочиб қолишиди. Бундан ташқари, Филипп II нихояси кўринмайдиган урушлар олиб борди ва факат Туркия устидан ғалаба қозонди. Динсизлар билан кураш ва урушлар пул талаб қиласди. Соликлар ошиб борарди. Дехқонлар, савдогарлар, ману-

фактураларнинг эгалари хонавайрон бўлишди. «Дин софлиги учун» кураш билан Филипп II мамлакатни қашшоқ ахволга солиб кўйди.

XVII асрда Испанияда Янги Дунёдан мамлакатга жуда кўп микдорда олтин ва кумуш келиб турганига қарамасдан иқтисодий танглик бошланди. Мамлакатни дунё католиклари империясига айлантириш ва динсизликни йўқ қилиш каби амалга ошмайдиган вазифа Испанияни заифлаштирди, уни иккинчи даражали давлатга айлантириди.

Протестантизм билан курашни Филипп II Нидерландияга ҳам кўчирди. У мамлакатдан диний сабабларга кўра қочиб кетган барча кишиларнинг мол-мулкини мусодара қилишга буйруқ берди. Мамлакатда инквизиция қутуради.

XVI асрда Европа олами маънавий маданиятнинг юксак парвози, хўжалик юритишнинг янги, бозор муносабатларига асосланган услубининг туғилиши, шахснинг эркинлик ва мустақилликка кўпроқ интилиши билан тайёрланган диний исёндан ларзага келди. Реформация даври – бу католик черковининг инқизози давридир. Католицизм протестантизмнинг йўлини тўсишга муваффақиятсиз уринар эди. Папа хукмронлиги остидан Скандинавия, Англия, Шотландия, Шимолий Германия, Голландия, Франциянинг бир қисми чиқиб кетди.

Реформация тарихда чуқур из қолдирди, Европа жамиятининг маънавий, сиёсий ва иқтисодий характеристини ўзгартириб юборди. Реформация, шунингдек, феодал тартибларга ҳам қарши қаратилган оммавий халқ ҳаракатларини пайдо қилди.

Реформация натижасида миллий черковлар пайдо бўлди, дунёвий ҳокимият мустаҳкамланди, миллий давлатлар ривожи учун шарт-шароитлар яратилди.

АНГЛИЯДА ҚИРОЛЛИК ҲОКИМИЯТИ ВА РЕФОРМАЦИЯ.

Денгизда ҳукмронлик учун кураш

Қизил ва Оқ гулларнинг 30 йиллик уруши Англия аҳолисининг қарийб тўртдан бирини олиб кетди. Унда қироллик династиясининг 80 аъзоси ҳалок бўлди, аъёнларнинг жуда катта қисми ўлди, норманиларнинг авлодлари қарийб тўлиқ қириб юборилди. Эски аъёнлар ўрнига янгилари келди. Ланкастерлар билан Йорклар шунчалар заифлашди, ҳатто сиёсий саҳнадан тушиб кетишли.

Курашда ғалаба қозонган Ланкастерларнинг узок қариндоши Генрих Тюдор Йорклар сулоласидан бўлган қиролнинг қизига йўланди. Ҳаёт-мамот учун жанг қилган икки «гул» шу тариқа Англияниң янги қироллари бўлмиш Тюдорлар гербида чирманиб кетдилар.

XVI аср Тюдорлар асри бўлди. (Тюдорлар сулоласидан бўлган қироллар Англияни 1485 йилдан 1603 йилгача бошқаришли.)

Шу даврда инглиз монархияси бошқа Европа монархияларидан қўйидаги учта алоҳида жихати билан фарқланади:

1. Жойларда бюрократик аппарат кучсиз эди. Маҳаллий бошқарув, табакали монархия давридаги сингари, ўз аҳамиятини сақлаб қолган – у қирол сиёсатини амалга оширади. Графликлар ва шахарларда муҳим лавозимларни жентрилар билан шаҳар буржуазиясининг имтиёзли юқори катлами вакиллари эгаллагандилар.

2. Ўз ҳокимиятини мустаҳкамлаш учун Тюдорлар парламентдан ҳам фойдаландилар, чунки асосан майда ва ўрта зодагонлардан ҳамда шаҳар бошлиқларидан ташкил топган қуий палата кучли қирол ҳокимиятини қўллаб-кувватлар, асосан аристократия вакилларидан ташкил топган юқори палата ҳам Тюдорлардан катта-катта ерлар олганлиги учун қиролга тобе эдилар.

3. Англиядаги абсолютизмнинг яна бир ўзига хос томони мунтазам армиянинг йўқлиги эди. Давлатнинг географик жойлашуви сабабли Тюдорлар асосий эътиборни флотни мусаҳкамлашга қаратди, армия эса эски ҳалқ лашкари характеристини сақлаб қолди. Шунингдек, бу юз йилликда Англия тарихи бўйлаб уч асосий ғоя ўтади: Реформация, абсолютизмнинг кучайиши ва денгизда хукмронликни эгаллаш.

«Дин ҳимоячиси». Англияда Реформациянинг бошланиши Тюдорлар династиясидан бўлмиш иккинчи қирол Генрих VIII (1491–1547) номи билан боғлиқ. У хукмронлигининг бошланғич даврида Рим папаси ва католик черковига қарши курашни ваъда қилмади. Шаҳзода Генрих қиролнинг иккинчи ўғли эди ва уни диний амал олишга тайёрлашганди, отасининг хоҳишиги кўра у Кентерберий архиепископи бўлиши керак эди. Шаҳзода лотин тили ва теологияни ўрганганди. Бироқ ҳаёт ўзича қарор чиқарди – қиролнинг катта ўғли вафот этди, Генрих қирол бўлиб қолди.

Тож кийгандан кейин унга «дин ҳимоячиси» деган ҳурматли унвон берилди, Рим папасининг алоҳида эътиборига сазовор бўлди.

Гап шундаки, Генрих VIII 1521 йили Лютер таълимотига қарши қаратилган рисола ёзди. Жавоб ўрнига Лютер ёш қиролга даҳшатли сўкиниш билан ташланди, у пайтларда сўкиниш тез-тез баҳсада исбот ўрнига ишлатиларди. Ана шунда Лев X Генрих VIII га «ҳақиқий дин»ни химоя қилганлиги учун миннатдорчилик ҳисларига тўла хат жўнатди.

Шундай қилиб, Генрих ким шаккокликка мойил бўлса ўшани таъқиб қилиб «Реформациянинг шахсий душмани»га айланди.

Диний ислоҳотчи. Бирдан ҳаммаси ўзгариб, қирол католик дини химоячисидан диний ислоҳотчига айланди. Реформация «пастдан» – халқнинг талаби билан эмас, «юқоридан» – қиролнинг хоҳиш ва иродаси билан амалга оширилди.

Нима учун Генрих VIIIнинг позицияси ўзгарди? Бу тушунарлироқ бўлиши учун унинг характеристи ҳақида бироз фикр билдириш керак. Замондошлари Генрихни золим, туйғулари жиловланмаган, осонгина жазаваси тутиб кетадиган одам сифатида таърифлашган. Ўз шахсий хоҳишларини қирол ҳамма нарсадан юқори қўярди. Айнан шахсий сабаблар уни Рим папаси билан ажралишга ундади.

Бу қиролнинг шахсий ҳаёти тартибсиз бўлиб, бир никоҳ ортидан иккинчиси келарди (ҳаммаси бўлиб у олти марта уйланишга улгурган). Унинг фақат сўнгги хотини ундан кўпроқ яшади, қолганларининг қисмати эса ачинарли бўлди: иккитаси билан ажралишди, иккитасини, уларни эр-хотинликка, бир йўла давлатга ҳам хиёнат қилишда айблаб қатл эттириди. Фақат олтинчи хотини тирик колди, аммо у ҳам Генрих ҳаёт пайтида эрталаб ўрнидан турар экан, янги қун унга нима тайёрлаб қўйганини билмас эди. Қиролнинг хулқи ана шундай эди.

Генрих VIIIнинг биринчи хотини испан маликаси Екатерина Арагонская эди. Бироқ қирол у билан ажралишга ва гўзал фрейлин Анна Болейнга уйланишга карор қилди. Рим папаси ажралишга розилик бермади. Генрих VIII ажралиш учун қанақа сабаблар келтириб кўрмади (шу жумладан, эркак жинсидаги меросхўр йўқлигини ҳам). Иш яна шу билан мураккаблашар эдики, Екатерина Арагонская испан қироли Фердинанд ва Муқаддас Рим империясининг императори ҳамда испан қироли Карл Vнинг холаси қиролича Изабелланинг қизи эди ва Рим папаси буюк католик империяси бўлган Испания билан муносабатларини кескинлаштиришни истамас эди.

Бироқ барибир Генрих ўз айтганини қилди. У Англияда Кентербрий архиепископидан ажрим олди, унинг ўзи қиролни Анна Болейн билан никоҳлаб кўйди (уч йилдан сўнг «севимли» эр уни оиласвий хиёнатда, жазонингadolатлилиги яна ҳам ишончлироқ бўлиши учун – давлат хиёнатида ҳам айблаб, қатлга юборди).

1534 йили парламент қиролни ва унинг ворисларини Англия черковининг бошлиғи деб эълон қиладиган қарор чиқарди. Бу қарор барча аҳолига етиб бориши учун эса 1535 йилдан ҳар якшанба ва байрам кунлари ибодатхоналар ва мактабларда қирол Англия черковининг ҳам бошлиғи эканлиги айтиладиган ва шундай фотиха ўқитиладиган алоҳида фармон чиқарилди.

Биринчи қадамдан кейин иккинчиси келди. Энди черковни унинг бойликларидан – ер ва бошқа мулкларидан жудо қилиш ҳамда бир йўла давлат хазинасини бойитиш, шу йўл билан қирол ҳокимиятини мустаҳкамлаш керак эди.

Уч мингта монастирлар ёпилди. Монастир ерларининг бир қисмини қирол ўз тарафдорларига бўлиб берди, бир қисмини сошиб юборди, қолганлари эса давлат ихтиёрига қолди, монастирлар мулкининг тўққиздан бир қисмини 38 та пэрлар олишди. 1547 йилга келиб, черковдан олинган мулкнинг учдан икки қисми сотилган эди. 1554 йилга келиб сотишдан келган умумий даромад бир миллион 260 минг фунтни ташкил қилди.

«Юқоридан» Реформация ўтказишининг услублари қирол деспотизми ва террори эди. Аввалига Генрихнинг Екатерина Арагонская билан ажримини ва унинг иккинчи никоҳи қонунийлигини тан олишни хоҳламаган барчани қатл қилишди. Қатл қилинганлар орасида машҳур гуманист Томас Мор ҳам бор эди. Черковни ислоҳ қилиши учун курашда Генрих VIIIнинг содик ва хормас-толмас ёрдамчиси – канцлер Томас Кромвель (1485–1540) ҳам бор эди. У ўзининг «Инглиз руҳонийларига йўл-йўриқ»ларида қирол ҳокимиятининг устунлигини ҳимоя қилиб, қирол ўз ерида Худодан пастда турувчи олий хукмрон эканлигини ва унга итоат қилиш ҳар бир соф виждонли кишининг бурчи эканлигини уқтиради. Шунинг учун уни «монархлар болғаси» деб аташади.

Шу тариқа Англияда реформаторлик черковини яратишга асос солинган эди. Черков бошлиғи қирол бўлиб қолди, папалик инкор қилинди, католик черковидан барча бойликлари тортиб олинди. Буларнинг барчаси абсолютизмнинг мустаҳкамланишига

кўмаклашди. Аммо жараён яқунланмаган ва ҳали халқ онгида чуқур илдиз отиб улгурмаган эди. Бир қисм камбағалларнинг аҳволи ҳатто ёмонлашди, чунки монастирлар ёпилгандан сўнг энди «бечора ва гариб»ларни ҳимоя қилолмас эди, монастир ерларини олган ёки сотиб олган зодагонлар эса улардан дехқонларни ҳайдаб юбордилар ва экинзорларни қўй боқиладиган яйловларга айлантирилар. «Қадимий – сахий Англия»нинг йўлларида тобора кўпроқ уйсизлар пайдо бўла бошлади ва кўплари учун бу йўллар мутлақо сахий эмасди.

Қонли Мария. Контрреформацияга уриниши. Генрих VIII ва Екатерина Арагонскаянинг қизи Мариянинг хукмронлик даврида (1553–1558) реформаторлик черкови бошига жиддий синовлар ёғилди. Англия тарихида у католик Мария сифатида маълум. Унга халқ берган бошқа бир лақаб – Қонли Мария ҳам кенг тарқалган. Мариянинг хукмронлик йиллари – контрреформацияни ўтказишга уринишdir. Қиролича протестантликни шаккоклик деб биларди. Бундан ташқари, Екатерина Арагонскаянинг қизи протестантлик унинг онаси ва ўзига келтирган азобларни эсидан чиқармаганди.

Бу пайтга келиб Англияда протестантлик ҳали илдиз отиб улгурмаган, чунки у «юқоридан» киритилган, яна бунинг устига юмшоқ ва нисбатан енгил усууллар билан киритилган эди. Католицизм мамлакатда ҳали ҳам катта эътиборга эга эди. Бу шароитда қиролича ўзининг черков бошлиғи эканлигидан католик черковини тиклашда фойдаланди. Шу мақсадда барча воситалар ишга солинди: парламентга сайловлар хукumat таъсири остида ўтди ва депутатликка номзодлар Мария тарафдорлари эдилар. Лордлар палатасидан эса реформа қилинган черков епископларини ҳайдаб юбордилар. Астасекин барча черков ўзгаришлари, масалан, руҳонийларнинг уйланиш хукуқи, бекор қилина бошланди. 1554 йили Мария Карл V нинг ўғли Филипп II га турмушга чиқди. Энди унинг ортида қурдатли католик қирол турарди. Тўйдан кейин тезда қиролича шаккокликни тугатиш учун маҳсус комиссия ташкил қилди. Мария парламент орқали Англия устидан папа ҳокимиyatини қайта тиклаш ҳакида қарор ўтказди. Шаккокликка қарши ўрта асрлар қонунлари қайта тикланди. Қатл қилишлар бошланди. Бутун мамлакат бўйлаб гулханлар ловуллади – католицизм душманларини ёқишаради. Черков судлари кечаю-кундуз ишлашарди, жосуслик ва чакимчилик авжига чиқди. Ҳалок бўлган Реформация тарафдорлари орасида Инжилни

инглиз тилига таржима қилган муаллифлардан бири Рожерс ҳам бор эди.

Кўпгина протестантлар китъага – Германия ва Швейцарияга қочиб ўтишди ва у ердан Қонли Марияга қарши қаратилган варақалар юбордилар. Мамлакатда католик-киролича хукмдорлигидан норозилик кучайиб бораради, бу норозилик Англияга Испаниянинг таъсири ортишидан қўрқаётган доиралар томонидан ҳам қизитилиб туради. Черковга ўз ерларининг бир қисмини қайтариб бериш ҳақидаги қарорни қиролича парламентдан ўтказишга муваффақ бўлди. Бу мамлакатда католицизмдан норозилик кучайишига олиб келди, Генрих VIII ва Анна Болейнларнинг кизи Елизаветани қиролича қилиш кераклиги ҳақида овозлар тез-тез эшитила бошлади. Елизаветани таъқиб қилишлар бошланди. Мария ўзига рақиб бўлиши мумкин бўлган туғишиган синглисини ҳам қатл қилиши мумкин эди. Протестант суннатларидан бири очилгандан сўнг Елизаветани сўрок қилишиб ва Тауэрга қамадилар. Католик-фанатиклар унинг бошини талаб қиласди.

Қонли Мария фарзандсиз ўтди. Унинг эри Филипп II Англия қонунлари бўйича тахтга ўтириш ҳукуқига эга эмасди ва тож Елизаветага (1558–1603) ўтди. Елизавета I буюк подшолиги ана шундай бошланди.

Елизавета I хукмдорлигининг бошланиши. Англикан черковининг мустаҳкамланиши. Елизавета хукмронлиги йилларида Англия савдо ва денгизчиликнинг ривожланишида улкан ютуқларга эришди, Реформация якунланди, доимий рақиби Испания устидан ғалаба қозонди.

Қиролича ажойиб шахсий сифатларга, кучли ирода, давлат арбоби қобилиятiga эга бўлиб, характерининг бу белгилари малика-нинг болалик ва ёшлиқ йиллари қандай ўтганлиги билан боғлик эди. Онаси қатл қилингандан сўнг қизча мушқул аҳволда қолди. Генрих VIII ўзининг Анна Болейнга бўлган нафратини гўдакка қаратди. У қизидан воз кечди ва уни тахт меросхўри деб тан олмади. Тўғри, Елизаветани саройда қолдиришди ва қироллик оиласининг бошқа болалари билан бирга ўқитишиди. Ўқида у ўзининг катта қобилиятини намоён қилди, бир неча тилда эркин гапирав ва ўқий оларди, ажойиб рақс тушар ва мусиқа асблоларини чала оларди. Унинг тахт ҳукуқини охиригача тан олмаган отаси ўлганида, Елизавета 15 ёшда эди. Бу даврга келиб у қаҳрли ҳаёт мактабини

ўтаганди. Яшаб қолиш учун у босиқликни, ҳаракатларини ҳисоб-китоб қила олишни, ҳамма билан тил топишиш ва турланишни ўрганишига тўғри келди. 25 ёшида Елизавета қиролича бўлди.

Елизавета тахтга чиққандан сўнг қилган биринчи иши протестантликни давлат дини деб эълон қилди. Англияда протестант черкови барча томондан қиролга бўйсунгани учун англикан черкови деб атала бошлади. Елизавета «черков ва дунёвий ишларнинг олий хукмдори» унвонини олди. Барча черков раҳбарлари, давлат амалдорлари, олий мансабдор шахслар янги қонунга садоқат хақида қасамёд қилдилар. Қасамёд қилишдан бош тортган епископлар янгилари билан алмаштирилди. Черков миллийлаштирилди, диний маросимлар энди халқнинг аксариятига тушунарли бўлмаган лотин тилида эмас, инглиз тилида олиб бориладиган бўлди, черков устидан папа ҳукмронлиги ва индульгенция, мўл-кўл зиёфатлар ва кўп сонли байрамлар бекор қилинди.

Унинг даврида англикан черковининг рамзи («39 модда» деб аталувчи) охирги таҳрирда ишлаб чиқилди ва 1571 йили парламент томонидан қабул қилинди. Епископлар қирол ҳукмронлигига бўйсунишарди ва уларни руҳонийлар мажлиси сайласа ҳам қирол ёрлиғи кимни сайлаш кераклигини кўрсатар эди.

Нима учун Елизавета протестанизмни қўллади? Унинг бошқа иложи бўлмагани учун бўлса керак. Католиклар унинг отаси ва онаси ўртасидаги никоҳни қонуний деб тан олишмаган. Уларнинг нуқтаи назаридаги унинг тахтга ҳам ҳаққи йўқ эди. У эътиқоди бўйича протестант эдими? Ҳеч ким бу ҳақда ишонч билан айта олмайди. Елизавета I христиан бўлиб, протестант ёки католик фанатизми унга ёт эди.

XVI аср ўрталарига келиб, кўплаб эътиқодли протестантлар пайдо бўлди, улар англикан черковини католиклик қолдиқларидан тозаламоқчи эдилар. Бу кишиларни пуританлар (инглизча «pure» – тоза) деб аташарди. Аксарият пуританлар Жан Кальвин таълимотига мансуб эдилар. Елизавета I уларни қирол ҳукмронлигига қарши чиқувчи фанатиклар деб ҳисоблар ва пуританларни ҳам худди католиклар сингари таъқиб қиласарди.

Кироличанинг асосий вазифаларидан бири мамлакат яхлитлигини мустаҳкамлаш, келишмовчилик ва жанжалларга йўл қўймаслик эди. У қийин бир муаммони ҳал қилишга ўз қариндоши, инглиз тахтига даъвогарлик қилувчи шотланд қироличаси – католик Мария

Стюартни (1542–1587) қатлга маҳкум қилиши керак эди. Бу қарорни қабул қилиш осон иш эмасди – монархнинг муқаддас қонини қандай тўкиш мумкин, ахир? Бироқ бутун мамлакатни қамраб олиши мумкин бўлган ўзаро уруш даҳшати олдида Елизавета I бунга журъат қилди. Шафқатсиз қатл Англияни диний урушдан халос қилди. 45 йиллик ҳукмронлиги даврида Елизавета парламентни 13 марта гина чақириди холос. Қиролича тежамкор бека эди, қироллик хазинасини тўлдиришга ҳаракат қилди, хазина аввалига монархлар томонидан анча сарф қилиб қўйилган эди. Ўз сарой харажатларини камайтириш учун у баъзан барча сарой аёнларини олиб қайсиdir бой ва таникли аслзоданикига меҳмонга жўнарди. Ҳафталаб, баъзан ойлаб меҳмондорчиликда бўлишарди, ундан кейин меҳмондўст хонадон эгаси батамом хонавайрон бўларди. Аммо Англияning мутлоқ ҳукмдори бўлган қироличага йўқ деб бўлармиди?

Елизавета қатъи ва аёвсиз ҳукмдор эди, айбдор бўлган сарой хизматчилари кўпинча қиролича қўлининг қаттиқлигини ўз чаккаларида сезардилар. Баъзи бирлари эшафотга жўнатилиши ҳам мумкин эди.

Елизавета саноат ва савдоға ҳомийлик қиларди ва ўзи ҳам савдо компанияларининг пайчиси эди, у корсарлардан ҳам ўз улушкини олишдан жирканмасди (корсарлар ва коперлар – қирол хизматидаги денгиз қароқчилари). Англияда копер кемаларини жиҳозловчи савдо компаниялари ҳам бор эди ва қиролича улар билан ҳам улушдош эди. Бу маҳфий фаолиятдан олинган даромад Елизавета I га Англияning давлат қарзларидан қутулиш имконини берди.

Энг машҳур денгиз қароқчилари – Дрейк¹ ва Хоукинсни² қиролича дворянлик унвони билан сийлади, Дрейкни эса қироллик флотининг вице-адмирали ҳам қилиб тайинлади.

Испания билан денгиз ҳукмронлиги учун кураши. Англияning ашаддий душмани ва рақиби католик Испания эди. Филипп II кучайиб бораётган шаккок қироличага нафрат билан қаарди.

Елизавета Испания зулмига қарши бош кўтарган Нидерландларга очиқдан-очиқ ёрдам берарди.

¹ Френсис Дрейк – 1540–1596 йиллари яшаган, инглиз денгизчиси, вице-адмирал, корсар. Инглизлар ичida биринчи бўлиб дунё океани бўйлаб сувзган.

² Жон Хоукинс – 1532–1595 йиллари яшаган, кемасоз, корсар, кул савдоси билан шуғулланган.

Мария Стюартнинг қатл қилиниши католицизмнинг Европадаги катта мағлубияти бўлди. Папа Пий V ўзининг махсус булласи билан барча католикларни Англия билан урушга чорлади.

Испан қироли Филипп II рақиби Елизаветани жазолашга қарор килди ва Англияга бостириб киришга тайёрланди. 1588 йили Филипп улкан эскадра тайёрлади ва уни «Енгилмас армада» деб агади. Унинг мақсади Англияни босиб олиш эди.

Армадада 134 кема бўлиб, кемаларда 20 минг матрос, тўпчи, эшкакчи, мушкетёrlар, аркебузирлар ва бошқа аскарлар бор эди ва худди шу кемаларга керакли озиқ-овқатлар, отлар ва отбоқарлар, 2500 та дала артиллериyaси ва қамал тўплари ҳам ортиб олинганди. Бундан ташқари шу флот Нидерландияда жойлашган 17 минг кишилик испан корпусини ҳам ўзига қўшиб олиб, Лондондан унча узоқ бўлмаган ерда, Темза бўйида лангар ташлаши лозим эди. Испанлар уларнинг ҳужуми инглиз католиклари томонидан қўллаб-куvvatланишига умид қиласарди.

Англия флоти 200 дан ортиқ жанговар ва юк кемаларидан иборат эди. Буларнинг аксариятини Англияning турли шаҳарлари томонидан юборилган савдогарлар ва қароқчилар кемалари ташкил қиласарди. Куруқликдаги армия умуман йўқ – оролда у нимага керак деб ҳисоблашарди.

Мамлакат мустақиллигини йўқотиш хавфи олдида туради. Буни барча инглизлар тушунарди. Бой кишилар ўз пулларига кема жиҳозлай бошладилар, шаҳарликлар испан десантини қарши олиш учун кўнгилли отрядларга ёзилдилар. Қироличанинг буйруғи билан Лондон атрофида ва Темза қирғоқлари бўйлаб тупрок қўрғонлари курилди. Елизавета отга миниб олиб ўз аскарларини айланиб чиқар, ё ғалаба қилиш, ё улар билан бирга ўлишга ваъда берарди. Лекин тақдир Англияни кутқарди. «Енгилмас армада»нинг омади чопмади. Кемалар бўронга дуч келишди, флотнинг бир қисми ҳалок бўлди, қолганларини инглизлар чўқтириб юбордилар.

Инглиз флоти испанларнидан фарқли равишда асосан енгил кемалардан ташкил топган ва улар яхшигина қуроллар билан жиҳозланган эди. Бундан ташқари инглизлар катта тўқнашувдан кочиб, ўз флотларининг енгил кемалардан иборатлигидан фойдаланиб, испан кемаларини битталаб чўқтиридилар. Инглизларга Голландия флоти ҳам ёрдам берди.

«Барча румблар¹ бўйича тор-мор қилинди ва тарқатиб юборилди», – вице-адмирал Фрэнсис Дрейк «Енгилмас армада» тақдири хақида шундай деб ахборот берди. Бу зарбадан Испания ўзини сира ўнглаб ололмади. Англия Европанинг буюк давлати, денгиз хукмдорларидан бирига айланди. Бу ғалаба Англияга ўз мустамлакаларини янада кенгайтириш имкониятини яратди. 1596 йили инглиз кемалари Кадис қўлтиғида испан флотини тор-мор қилди. 1600 йили ташкил қилинган Ост-Индия компаниясининг флоти Молукк оролларига (Зираворлар ороли деб ҳам аталарди) ҳамда Ҳиндистоннинг ғарбий қирғоқларидағи Сурат портига етди ва Англия билан Ҳиндистон ўртасида доимий савдо алоқаларини бошлаб берди.

Бироқ Елизаветанинг ўз фуқароларига «миннатдорчилиги» жуда қимматга тушди: «Енгилмас армада» устидан қозонилган ғалабадан кейин денгизчиларни хизматлари эвазига ҳақ тўламасдан кемалардан бўшатиб юбордилар; дайдиларга қарши қонунлар («қонли қонунлар») қабул қилинди; гадоларни қамчи билан савалашарди ва тамға босишарди; «Ижарага яшаш конуни»га мувофиқ уй эгалари квартира ҳақидан қарздор бўлиб қолганларни кўчага ҳайдаб чиқариш хукуқига эга эди.

Халқ ўз қироличасидан ҳафсаласи пир бўлди. Энди Елизаветанинг фойтунини шоду-хуррамлик билан оломон кузатиб юрмас эди. Унга ўз вақтида Филипп II, Иван Грозний ва Франция шахзодаси Франсуа Анжуйскийлар совчи қўйган бўлсалар ҳам турмушга чиқмади – чет элликларнинг Англия ишларига аралашишини истамади. Елизавета 70 йил умр кўрди ва гумондор ҳамда ёлғиз аёл бўлиб вафот этди. Елизавета I нинг ўлими билан Тюдорлар сулоласи тугалланди.

Англия учун XVI аср ана шундай яқунланди. Мамлакатда қироличанинг мутлақ ҳукмронлигини мустаҳкамлашга кўмаклашган Реформация ўз ниҳоясига етди. Давлат қудратли бўлиб, хўжаликни ривожлантиришда ва денгиз савдосида муваффақиятларга эришилди. Денгизларда ҳукмронлик аста-секин, кучли денгиз мамлакатига, «денгизлар маликаси»га айланган Англияга ўтди.

Елизаветанинг ўлимидан кейин Англия таҳти Стюартлар сулоласидан бўлган Яков I (1603–1625) га ўтди. Бу даврда ҳали Елизавета ҳукмронлиги замонидаёқ бошланган аюсолютизмнинг инқизори

¹ Румб – компас доирасида чизилган бўлаклар.

кучайди, буржуа инқилобининг иқтисодий, сиёсий ва ғоявий асослари шаклланди. Бу 1640 йили бошланган Англия буржуа инқилобининг ибтидоси эди.

Францияда диний урушлар ва абсолют монархиянинг мустаҳкамланиши

1598 йили Францияда Нант эдикти¹ чоп қилинди ва то 1685 йилгача мамлакатда диний сабр-тоқат тантана қилди. Эдиктда, жумладан, шундай сатрлар бор: «Худонинг иродаси билан Франция ва Наварра қироли Генрих, барча ҳозир бўлғанлар ва иштирок этгандарга салом! Бу абадий ва бекор қилинмайдиган эдикт билан биз қуидагиларни айтдик, эълон қилдик ва буюрдик:

VI. Бизнинг фуқароларимиз орасида жанжал ва тўполонга ҳеч қандай сабаб қолдирмаслик учун биз ислоҳ қилинган деб аталаётган динга эътиқод қилувчиларни бизнинг қироллигимиздаги барча шаҳарлар ва жойларда ва бизга тобе вилоятларда қувфин, сикув ва дин ишларида уларнинг виждонига қарши бирон иш қилинишига зўрлаш бўлмайди, уларнинг қарашлари учун ўзлари яшаётган уйларда ва жойларда таъқиб қилинмайдилар деб марҳамат қилдик ва марҳамат қиласиз...

IX. Биз, шунингдек, номи айтиб ўтилган динга эътиқод қиладиган барчага бизнинг шаҳарларимизда ва бизга тобе вилоятларда эътиқод қилишда давом этишларига рухсат берамиз.

XXII. Буюрамизки, айтилган динга нисбатан ўқувчиларни университетларга, коллеж ва мактабларга, касал ва камбағалларни эса госпиталлар ва жамоат шафқати ташкилотларига қабул қилишда ҳеч қанақа камситиш бўлмасин.

XXVII. Биз эълон қиласизки, ислоҳ қилинган дин деб аталаётган динга эътиқод қилаётган ёки эътиқод қиладиган барча кишилар барча жамоат мансабларини, қироллик, сенъорлик ёки шаҳар мансабларини бизнинг қироллигимизда ва бизга бўйсунувчи вилоятларда, ерлар ва сенъорликларда, бунга зид бўлған барча қасамёдларга қарамасдан эгаллаш ва бажариш хуқуқига эга ва биз томонимиздан фарқламай қабул қилинадилар, ишлашларига йўл қўйиладилар...

Нантда, 1598 йилнинг апрелида, бизнинг қироллигимизнинг тўққизинчи йилида берилди».

¹ Эдикт – қиролнинг алоҳида муҳим фармони.

Бир қиролликда икки мазҳаб. XVI асрга Франция ўзининг худудий бирлашувини якунлаган ҳолда кириб келди. Бургундия герцоглиги, Прованс ва Бретань графлари қироллик таркибига кўшиб олингандан сўнг Франция худуди ва ахоли сони жиҳатидан Фарбий Европадаги энг катта давлатга айланди. Мамлакатда 15 миллион киши яшарди.

XVI аср бошларида Францияда Лютер таълимотига мос келадиган ғоялар тарқалади. Айниқса, оғир солиқлардан ва меҳнат шароитидан қийналаётган шахар ахолисининг бир қисми учун Реформация ғоялари ижтимоий норозиликнинг бир кўринишига айланди. Мамлакатда Инжилнинг французы таржималари пайдо бўлди, ибодатхоналарда она тилида дуолар ўқила бошланди.

Францияда қироллик ҳокимияти мустаҳкамланганидан норози бўлган, ўз мустақиллиги пайтларини эслаб юрадиган эски аслзодаларнинг вакиллари бор эди. Сарой амалдорлари, уларнинг хизматида турган зодагонлар ҳам, табиийки, ана шундай фикрда эдилар. Кўпгина қашшоқлашган зодагонлар Германиядаги сингари черков бойликларини кўлга олишга ҳозир эдилар.

Солиқлар ставкаси баландлигидан шаҳарликлар жуда қийналарди, ахир Франция Карл V билан – Муқаддас Рим империяси ва Испания қироли билан қақшатгич урушлар олиб бораарди. Солиқларнинг катта қисмини шаҳарликлар тўлаётган эдилар.

Жанубий Франциянинг эркин фикрлашга мойил кўпгина шаҳарликлари, биринчи буржуя тадбиркорлари кальвиnistлар бўлиб қолдилар. Кальвинизм феодал ва черков тўловларига қарши норозилик ғоялари сифатида дехқонлар орасига ҳам кирди.

Ўрта асрлар даврида мавжуд тартибларга қарши қаратилган ҳар қандай норозилик диний кўринишида ифодаланаарди. Янги давр бошларида ҳам шундай эди.

Натижада XVI асрнинг биринчи чорагига келиб, Франция иккита душман лагерга – католиклар ва протестантлар лагерларига бўлинib қолди. Францияда протестантларни «гугенотлар» деб аташарди (Швейцарияда «ўртоқлар», «умумий қасам ичганлар» маъносини англатади).

Валуа сулоласидан бўлган француз қироллари католикларни кўллашарди, бироқ черков бўлиниши рўй бериб, мамлакат яхлитлигига хавф солади деб хавотир олишарди. Амалда мамлакат бирбирига қарши турган икки лагерга аллақачон бўлинган эди. Шимол

ва қирол хонадони католиклар томонида қолдилар, Жанубий Франция протестантларники бўлиб қолди.

Гугенотлар ўзларини фаол тутишарди. Улар ҳаммани «ҳақиқий» динга тортишни ўзларининг бурчи деб билардилар. Аввалига гугенотлар маҳфий мажлисларга тўпланишар, диний мадхияларни куйлашар, дуо ўқишарди. Кейин улар Рим папаси ва унинг епископларига қарши фаол курашга ўтдилар. Гугенотларнинг шаҳардаги биринчи жамоалари кичик ва тарқоқ бўлса ҳам, улар ишга жонжадлари билан киришдилар. Гугенотлар Швейцариядаги Кальвиндан адабиётлар олишарди, ўзлари ҳам маҳфий босмахоналар ташкил қилиб, варакалар чоп этардилар ва уларни бутун мамлакат бўйлаб тарқатишарди. 1534 йили бундай варакаларни ҳатто Луврдаги қирол қароргоҳидан ҳам топишган. Гугенотлар бутун мамлакат бўйлаб ўз руҳонийлари – пасторларни юборишарди.

Францияда Реформация уч босқичга бўлинади. Биринчи босқич XVI асрнинг 20–30-йиллар бошларини ўз ичига олиб, лютераникнинг мўътадил тарқалиш даври ҳисобланади. Франция қироли бу харакатда катта ҳавф бор деб ҳисобламайди ва ҳозирча диний бағрикенглик позициясини эгаллади. Иккинчи босқич (1534–1559) янги мазҳаб тарафдорларининг қатъи харакатлари, бидъатчиларнинг сони кўпайиши ва Реформациянинг ижтимоий базаси кенгайиши билан характерланади. 1534 йили Реформация тарафдорлари томонидан тузилган чакириқ варакасини Луврдаги қирол саройи деворларига ҳам осиб кетишади. Бундан ҳақоратланган қирол Франциск I диний бағрикенглик позициясидан қайтиб, янги мазҳабдагиларга қарши жиддий чоралар кўллай бошлайди. 1535 йили 35 нафар даҳрий ёқилиб, 300 га яқини қамоқقا олинди. 1560 йилдан Реформациянинг учинчи босқичи бошланади. Бу босқичда харакатга зодагонларнинг кўшилиши натижасида унинг таркиби кенгайди ва шунинг ҳисобига Реформациянинг характеристири ўзгарди. Натижада қирол яна диний муросасозлик позициясини эгаллади: у фуқароларга диний танлаш эркинлигини, руҳонийларга оила қуришни ва черков маросимларини миллий тилда ўтказишга рухсат бермоқчи эди. Бундай ислоҳот қиролликнинг моддий манфаатларига зид эмасди, бироқ папанинг обрўсига путур етказарди. Шу сабабли бундай ислоҳотга папа розилик бермади. Натижада 1560 йилдан Францияда Реформациянинг энг давомли учинчи босқичини ташкил этган фуқаро ёки диний урушлар даври бошланди.

Реформация Францияга ана шундай кириб келди.

Диний урушларнинг бошланиши. Ўша даврда Францияда қироллик ҳокимияти муқим ва кучли эмасди. Тахтда Валуа сулоласининг сўнгги вакиллари бир-бирини алмаштиарди, бироқ уларнинг орасида давлатни бошқариш даражасидаги ақл-заковат эгаси йўқ эди.

Конфессиал бўлинган зодагонларнинг икки қарама-қарши гурухлари ўртасидаги зиддият мамлакатда фукаролар урушига туртки бўлган 1560 йилги Амбуаз фитнасида ўз аксини топди. Фитна Бурбонлар томонидан уюштирилган бўлиб, тепасида шаҳзода Конде¹ туради. Ёш Франциск II хукмронлиги даврида (1559–1560) қиролнинг тажрибасизлигидан фойдаланиб, Конде Гизларни ҳокимиятдан четлатмоқчи ва Генерал Штатларни чақириб Бурбонларнинг ҳуқуқини ва протестантларнинг эркинлигини таъминламоқчи бўлди. Фитначиларнинг асосий таянчи кальвинистик руҳдаги жануб зодагонлари эди. Бироқ фитна фош этилиб, унга кўшилган кўплаб зодагонлар қатл қилинди, Антуан Бурбон ва шаҳзода Конде қамоққа олинди. Фақат кутилмаганда қиролнинг вафотигина уларни муқаррар ўлимдан қутқариб қолди. Фитна икки лагер ўртасидаги тангликни янада кучайтирди.

Шундай шароитда қиролларнинг қариндоши, католикларнинг раҳнамоси Герцог Гиз 1562 йилнинг марта месеци катта қўриқчилар гурухи билан Шампан вилоятидан ўтаётиб, Васси деган жойда ўзларининг йифинларига тўпланишган гугенотларга дуч келади. Протестант гимни куйланганлигини эшишиб, Гизнинг одамлари гугенотларни тарқатишга уриниб кўришди, бироқ қаршиликка дуч келдилар. Шунда герцогнинг одамлари қўлларидағи қурол билан тинч гугенотларга ташланишди. 20 дан ортиқ киши ўлдирилди ва 100 га яқин киши яраланди. Парижда Гизни худди қаҳрамонлардек кутиб олишди. Вассидаги воқеа бутун Францияни ларзага келтирди ва ўттиз йилдан ортиқ давом этган (1562–1594) диний урушларнинг бошланишига олиб келди. Бу курашда гугенотлар Англиядан ва Германиядаги протестант князлардан, католиклар эса Испаниядан ёрдам олиб турадилар. Агар католиклар билан гугенотларнинг ҳуқукий аҳволи солиштириладиган бўлса, ҳуқуқсиз томон гугенотлар эди. XVI асрнинг 20-йилларидан бошлаб улар қаттиқ таъқиб

¹ Конде, Людовик I Бурбон, шаҳзода – 1530–1569 йиллари яшаган, гугенотларга етакчилик килган, 1569 йили Жарнак ёнидаги жангда асир олинган ва герцог Анжуйский буйруғи билан барон де Монтесхью томонидан ўлдирилган.

қилинарди. 1523 йилда ёк биринчи бор кальвиnist – руҳоний ёқиб юборилган эди. Католиклар тарафида қирол, Париж ва мамлакат ахолисининг асосий қисми бор эди (кўпгина оддий одамлар гугенотлар орасида зодагонлар кўп бўлганлиги учун уларга ишонмасдилар). 1560 йилдан 1574 йилгача Францияда Валуа сулоласидан қирол Карл IX хукмронлик қилди. У иқтидорли эмасди, давлат ишлари ҳам уни унча қизиқтирамасди. У ҳали кичик ёшда бўлган йилларда унинг онаси ўта мағрур, айёр ва жанжалкаш аёл қиролича Екатерина Медичи хукмронлик қилди. Шу даврда Антуан Бурбоннинг ҳам саройдаги таъсири кучаяди.

Диний урушлар мамлакатни кулфат гирдобига тортди. Ёвузлик ва жаҳолат кучайди. Католиклар ўз таршкilotларини тузар, сонсаноқсиз юришлар ташкил килар, гугенотларни ўлдиришарди. Улар аёлларга ҳам, болаларга ҳам шафқат қилмадилар. Гугенотларнинг мол-мулклари ёқиб юборилди. Бунинг ҳаммасини католиклар гуноҳ ҳисобламас, зеро гугенотларни бидъатчилар деб ҳисоблашарди, шунинг учун уларни йўқ қилиш керак эди.

Гугенотлар унчалик шафқатсиз эмасдилар. Одатда кўлга киритилган шаҳарларда улар черковларни вайрон қилар, авлиёларнинг ҳайкалларини, иконаларни синдираадилар. Улар руҳоний ва монахларга шафқат қилишмас эди. Аёллар ва болаларга эса одатда тегишмасди.

Диний урушлар пайтида протестантлар қирол ҳокимиятини ён беришга мажбур қилдилар. 1570 йилда Сен-Жерменда келишувга эришилди ва қирол ярашиш эдиктига имзо чекди. Гугенотлар католиклар билан бир қаторда давлат мансабларини эгаллаш ҳукуқига эга бўлдилар. Протестантларнинг диний маросимларига ҳамма ерда рухсат берилди. Гугенотлар тўртта қалъани, шу жумладан ғарбий кирғоқдаги Ларошель портини ҳам ўз қарамоғига олдилар. Бироқ тинчлик узоққа чўзилмади.

Франциядаги ўзаро урушга Англия, Испания, Нидерланд гёзлари, немис аскарлари, итальян, испан ва швейцар ёлланма жангчилари аралашдилар.

Гугенотларнинг раҳбарлари адмирал Колини¹ ва Генрих Навварский эдилар. Карл IX католиклар ва гугенотларни яратшириш

¹ Гаспар де Шатийон, граф де Колини – 1519–1572 йиллари яшаган, 1569 йилдан гугенотлар етакчиси, Карл IX нинг яқин маслаҳатчиси. Муқаддас Варфоломей тунида Генрих Гиз буйруғи билан ўлдирилган.

мақсадида Генрихга ўз синглиси Маргаритани эрга беришга қарор қилди. Тўйни 1572 йилнинг августига белгиладилар. Шунинг учун ҳам Парижга гугенотларнинг барча йўлбошчилари ўз одамлари билан келдилар. Католикларнинг раҳбарлари ва Екатерина Медичи гугенотларнинг ва Генрих Навварскийнинг таъсири кучайишига йўл қўйишни хоҳламас эдилар. Улар протестантларнинг барча йўлбошчилари Парижга тўпланишидан фойдаланиб, уларни йўқ қилишга қарор қилдилар.

Энг аввало гугенотларнинг йўлбошчиларидан бири адмирал Колиньига суиқасд қилинди. Уни панадан отилган ўқ билан ярадор қилишди, лекин у тирик қолди. Екатерина Медичи гугенотларнинг қасд олишидан кўркиб (Парижда 20 мингдан ортиқ гугенот йиғилган эди), зарба беришга қарор қилди. Унинг баҳтига Париж аҳолиси ҳам Екатерина Медичи тарафида эди. Заиф характерли Карл IX ни бу «мангу исёнчилар»ни йўқ қилиш зарурлигига ишонтиришди.

1572 йил 24 август – Муқаддас Варфоломей байрами арафасидаги тунда Париж савдогарлари оқсоқоли тузган қотиллар тўдалари гугенотларни калтаклашни уюштиридилар. Гугенотлар жойлашган уйларни хоч билан яширинча белгилаб чиқдилар. Сен-Жермен аббатлигида кўнғироқ чалинди, бу биринчи чақириқ эди. Муқаддас Варфоломей туни бошланди. «Оқ кўнгил католиклар»нинг оломони герцог Генрих Гиз раҳбарлигига гугенотларнинг уйларига бостириб кирдилар. Аксариятини тўшакда ушлаб олдилар, бечоралар хеч нарсадан шубҳаланишмаган эди. Уйларни таладилар, гугенотларни ўлдиридилар. Аёлларни ҳам, гўдакларни ҳам аямадилар. Адмирал Колиньини ўлдириб, жасадини кўчалардан судраб ўтдилар, сўнгра дорга осиб қўйдилар, киролнинг ўзи ҳам сарой деразаси ёнида туриб бу баҳтсиз одамларга ўқ узди. 24 август тушгача 2 минг гугенот ўлдирилди. Қотиллик бир неча кун давом этди. Замондошлар ҳаммаси бўлиб 30 минг киши ўлдирилди, деб ҳисоблаганлар.

Генрих Наваррский ва шаҳзода Конде католик динига ўтганлиги учунгина тирик қолиши. Шу воқеалардан кейин протестантизм Францияда тақиқланди.

Муқаддас Варфоломей тунидаги қотиллик билан фуқаролар урушининг 1560–1572 йилларни ўз ичига олган, нисбатан мўътадил биринчи даври якунланди.

Мадридда ва Римда Варфоломей туни ҳақидаги хабарни қувонч билан кутиб олиши ва тантанали байрам қилдилар. Папа Григорий

XIII бир томонда ўзининг портрети ва иккинчи томонида кўлида хоч ушлаган ва гугенотларни ўлдираётган фаришта тасвирланган медаль тайёрлашга буйруқ берди. Испания қироли хат жўнатиб Карл IX ни шундай ажойиб онаси борлиги билан, Екатерина Медичини эса унинг шундай «фаройиб» ўғли борлиги билан табриклиди.

Сен-Жермен эдикти йўқ қилинди. Бироқ урушлар давом этди. Энди Ларошель ва бошқа шаҳарларнинг ахолиси исён кўтардилар, уларга зодагон-гугенотлар кўшилдилар.

Диний урушлар Франция учун улкан фожиа бўлди, диний мутаассиблик ва фанатизм ўн минглаб французларнинг ўлимига сабаб бўлди.

Мутаассиблик ва фанатизмнинг қурбонлари сафида Валуа сулласининг сўнгги қироли Генрих III ва католиклар сардори Генрих Гиз ҳам бор эдилар.

Уч Генрих уруши. 1574 йили Карл IX вафот этганидан сўнг тахт ака-укаларнинг энг кичиги Генрихга тегди. Генрих III мамлакатни 15 йил (1589 йилгача) бошқарди, аммо бу вактни французлар учун баҳтли давр деб бўлмайди. Замондошлари Генрихнинг енгилтаклик, майдакашлик, ўзига ортиқча бино қўйиш, безакка мойиллик каби сифатларини таъкидлаб ўтишган. Мамлакатда фуқаролар уруши давом этарди, французлар французларни ўлдиришаётганди. Бу пайтга келиб, гугенотлар мамлакатни бўлиб ташлашга қарор қилишди. Реформациянинг иккита – буржуа ва дворян йўналишлари бирлашиб, 1575 йили конфедерация ташкил қилишди. Улар мамлакат жанубида катта ерларни (Дофинэ ва Лангедокдан Сентонжгача) бирлаштириб, ўзларининг яхши қуролланган армияси, солиқ ва бошқарув тизими билан «давлат ичидаглават»ларини туздилар. Протестантликка қайтган Генрих Навварский ва шаҳзода Конде уларнинг раҳнамолари бўлишди. Айни шу пайтда Франция тахтига яна бир даъвогар Генрих Гиз ҳам католик лигани – ҳарбий тартибли оммавий ҳаракатни тузди. Амалда Генрих Гизнинг ҳокимияти Генрих III никидан кўпроқ эди. Гизни «Парижнинг тож киймаган қироли» деб бекорга айтишмасди. Ҳамма нарсадан кўра католикларни тахт ворислиги масаласи хавотирлантиради. Ака-ука Валуаларнинг ҳеч бири эркак ворис қолдирмаган ва агар Генрих III вафот этган тақдирда тахт ака-ука Валуаларнинг қариндоши – Генрих Навварскийга, ўша «гугенот» ва «бидъатчи»га ўтарди. Ўта фанатик бўлган католиклар орасида фитна пишиб етиларди, қиролни олиб

қочиш, мажбуран монах қилиб сочини қирқтириш, француз тожини эса ўзларининг севимли кишиси – Генрих Гиз бошига кийдириш лозим эди.

Католик лиганинг таъсиридан қўрқиб кетган Генрих III Париждан қочиб чиқди ва Генрих Гизни ўз ёнига чақириди. 1588 йилнинг декабрида эҳтиёт бўлмасдан қиролнинг буйругини бажарган Генрих Гиз ўлдирилди. Қотилга буйруқни Генрих III нинг ўзи берди. Қирол лиганинг бошқа раҳбарлари билан ҳам шундай йўл тутди, кимлардир ўлдирилди, кимдир қамоқхонага ташланди.

Парижликлар Генрих IIIни бунаقا иш учун кечира олишмасди. Ўлдирилганларни «шахид бўлган авлиёлар» деб эълон қилишди. Париж бўйлаб мотам маросими давом этарди. Католиклар ёник шамларни олиб юришарди, кейин уларни пуфлаб ўчириб, «Худо Валуалар сулоласининг номини ўчирсин!» деб қичкиришарди.

Католик рухонийлар диндорларга қирол соғлиғи учун дуо ўқишини ман қилдилар, диншунос олимлар эса барча фуқаро Генрих IIIга содиклик қасамёдидан озод қилинганликларини эълон қилдилар.

1589 йилнинг ёзида монах Жак Клеман (1567–1589) қиролни оғир ярадор қилди. Пичоқ урилгандан сўнг Генрих III яна бир неча соат яшади ва Францияни бошқаришга Генрих Наваррскийни ёрлақади, лекин бу орада Париж гугенотни қабул қилмаслигини ҳам айтиб ўтди.

Эҳтиёткор ва айёр сиёsatдон Генрих Наваррский ҳам мамлакат протестант-қиролни қабул қилмаслигини тушунарди.

«Париж мессага¹ арзиди», – деди француз қироли Генрих IV (1553–1610) бўлиб олган Генрих Наваррский. У иккинчи марта католик мазҳабига ўтди. 1594 йилнинг 27 февраль куни Генрих Шартр ибодатхонасида тож кийди, 22 марта эса Париж қиролга ўз дарвозаларини очди.

Генрих IV ўзининг барча кучи, таъсири, қобилиятидан католиклар билан гугенотлар ўртасида муросага эришиш йўлида фойдаланди. У католик амалдорларни таъқиб қилиб ўтирумади, аксинча, уларни эҳсонларга кўмиб ташлади. Диний урушларни тўхтатиш ва мамлакат яхлитлигини таъминлаш Генрих IV сиёsatининг асоси бўлиб қолди. Шу мақсадда 1598 йили Испания билан тинчлик шартномаси имзоланди ва католикликни давлат дини деб эълон қилган

¹ *Messa* – католиклар ибодати шундай дейилади.

Нант эдиктини чиқарди. Бу эдикт католик мазҳабини давлат дини деб эълон қилинган бўлса ҳам, гугенотларнинг сиёсий ва диний хукуқларини тартибга солди, мамлакатда диний муросасозликка эришилди.

Генрих IV янги даврда бирлашган қудратли давлат тузиш вазифасини диний муаммодан устун қўйган биринчи кучли қирол бўлди.

Генрих IV французлар хотирасида «ажойиб», «шонли» қирол сифатида қолган. Ҳатто қўшиқ ҳам айтиб юришарди: «Анри тўртингчи яшаган экан, у ажойиб бир қирол экан».

Унинг даврида Франция Испания билан жанг қилишни тутгатди, у дехқонлардан тўғридан-тўғри соликни (таляни) пасайтириди. Қашшоқ дехқонларга эга бўлган мамлакат кучли армия туза ол-маслигини қирол яхши тушунар эди. У қарзи учун дехқонларни қамоққа олиш ва молини олиб қўйишни тақиқлади. Генрих IV саноатни ва савдони ривожлантиришга ҳомийлик қилди. Унинг даврида кўплаб қироллик мануфактуралари очилди. Англиядаги Елизавета давридаги сингари савдо компаниялари тузилди. Айтишларича, у қашшоқ дехқонларга якшанба кунлари уларнинг қозонида тушликка товуқ гўшти қайнайди, деб ваъда қилган. Бу ваъда бажарилмади, лекин диний уруш ва Испания билан уруш тугалланди, соликлар бир мунча камайди, халқнинг яшаш тарзи яхшиланди. Шунинг учун у халқ хотирасида «ажойиб қирол» бўлиб қолди.

Генрих IVнинг сиёсатини амалга оширишда унинг биринчи министри Сюллининг¹ хизматлари ҳам катта бўлди. Генрих IVнинг қироллик пайтида унинг ҳаётига йигирма мартадан кўп сунқасд қилинди. Католик лиганинг собиқ сардорлари ва иезуитлар хотиржам бўлмадилар. 1610 йили қирол католик-фанатик Франсуа Раваляк (1578–1610) ханжари зарбидан ўлдирилди. Ўлимидан сўнг Генрих IVнинг шуҳрати янада ошди, у ҳақда афсоналар тўқилди, уни католиклар ҳам гугенотлар ҳам шарафладилар. Абсолютизм ғалаба қилди, қирол ички тинчлик ва барқарорликнинг кафолати бўлиб қолди.

Генрих IVнинг ўлимидан сўнг феодал аъёнлар қирол ҳокимиятини заифлаштиришга уриниб қўришди. Тахт Генрих IVнинг ўғли Людовик XIII ва унинг онаси, Генрих IVнинг иккинчи хотини Мария Медичига ўтди. Мария Медичи регент эди. Сарой аъён-

¹ Сюлли, Максимиљен де Бетюн, барон Рони, кейин герцог Сюлли – 1560–1641 йиллари яшаган француз давлат арбоби, Генрих IV даврида Франция хукумати бошлиги бўлган.

ларининг таъсирига дош беришга унинг иродаси етишмади. Улар ўзларига яхши ўринларни беришга, қимматбаҳо совғалар қилишга уни кўндирилар. Хазина бўйм-бўйш бўлиб қолди ва мамлакат даҳшатли жар ёқасида турарди. Лекин Людовик XIII бошқарган айнан ўша йиллари қиролнинг биринчи министри бўлиб Арман

Жан дю Плесси – кардинал Ришельё¹ ҳукумат тепасига келди. Францияда абсолютизмнинг мустаҳкамланиши айнан Ришельёнинг номи ва хизмати билан боғлиқ.

Кардинал Ришельё ислоҳотлар йўлини тутди ва улардан мақсад нималигини шундай ифодалади: «Менинг биринчи мақсадим қиролнинг улуғворлиги эди, иккинчи мақсадим давлатнинг қудратлилигидир».

Биринчи министр гугенотларнинг давлат ичидаги давлатини йўқотиш вазифасини қўйди. Қироллик армияси Ларошельни қўлга киритди. Гугенотлардан уларнинг қалъалари, шаҳарлари, кўргонлари олиб қўйилди. Аммо кардинал уларнинг диний эркинлигини чекламади, Нант эдикти ўз кучида қолди.

Ришельё ўзбилармонлик қилганларни аёвсиз жазолар ва амалдорларни вазифасидан олиб ташларди. У зодагонлар ўртасида дуэлни ман қилди – қонни қирол учун тўкиш керак, дерди кардинал. Жойларда ҳокимият амалдорлар, интендантларга берилди. Улар ҳукумат томонидан тайинланар ва унга бўйсунишарди. Хазинани тўлдириш учун Ришельё саноатни, савдони, кема қатновини қўллаб-куvvatлади. Унинг даврида Франция ўттиз йиллик (1618–1648) урушга тортилди. Француз армияси Европада энг кучли армияга айланди, бу ҳақда унинг ғалabalари ва Францияга янги ерлар – Эльзас ва Лотарингиянинг қўшиб олиниши айтиб турибди.

Герцог де Ришельё қиролнинг биринчи министри бўлиб, 18 йил Франция сиёсатини ўз кўлида ушлаб турди ва 150 йил – 1789 йилги Буюк француз инқилобигача сақланиб қолган сиёсий тузумни яратди.

Ришельё Генрих IVнинг мамлакатни мустаҳкамлаш ва бирлаштириш йўлини давом эттирди, унинг даврида диний тақиблар тўхтатилди. Мамлакатда диний мажароларга чек қўйиш мақсадида у «гугенотлар ҳам, католиклар ҳам менинг кўз олдимда бир хил

¹ Арман Жан дю Плесси, кардинал Ришельё – 1585–1642 йиллари яшаган француз давлат арбоби, Рим-католик черкови кардинали, янги Франциянинг курилишига улкан хисса кўшган шахс.

французлардир», «менинг давлат душманларидан бошқа душманларим йўқ эди», деганди.

Францияда Реформация ва диний урушлар ўзининг алоҳида хусусиятларига эга эди, уларда зодагонлар ва шаҳарликлар энг кўп иштирок этдилар. Мамлакат диний муросага ва абсолют монархијани қуришга эришиб, кулфатлар йўлагидан чиқиб олди. Франция Европанинг энг қудратли давлатига айланди.

Нидерландиядаги инқилоб

Тўрт юз йил аввал ҳалқ ҳаракатлари катта ва қудратли давлатда эмас, кичик, лекин ажойиб давлатда – Нидерландияда катта муваффакиятга эришди. Бу ерда инқилоб эски тартибларнинг янгиси билан алмашинишига, одамлар ҳаётидаги туб ўзгаришларга олиб келди. Бу қандай мамлакат? XVI аср ўрталарида Нидерландияга назар ташлаймиз.

Капиталистик муносабатларнинг шаклланиши. Кема катнайдиган Шельда, Маас ва Рейн дарёларининг қуий оқимида ўрта асрларда Нидерландия деб аталган мамлакат жойлашганди. (Нидерландия «қуийда жойлашган ерлар» маъносини англатади). Ўн еттита нидерланд вилоятлари XVI асрда ҳозирги Бельгияни, Франциянинг бир қисмини, Люксембург ва Голландияни қамраб оларди. Бу ерда 3 миллионга яқин меҳнатсевар аҳоли яшарди. 300 шаҳар ва 6500 қишлоқ бор эди. Нидерландияда шаҳарликлар асосан савдо билан шугулланишарди. Мамлакатнинг иқтисодий ва савдо маркази Антверпен шаҳри эди.

Антверпен Нидерландияни дарё орқали Германия ва Франция билан, денгиз орқали Англия билан боғлаб турадиган қулай йўл устида жойлашган эди. Антверпен кўчаларидан ҳар куни камида 2 минг савдо фургонлари ўтарди. Бу ерда банкнинг улкан биноси виқор билан турар ва итальян, португал ҳамда турк савдо уюшмалари бор эди. Ҳар куни ер юзининг барча мамлакатларидан келган юзлаб кемалар портга кириб-чиқиб туришарди. XVI асрда Антверпен Европанинг энг муҳим савдо маркази бўлиб қолганди. Бу мамлакат бой эди. У пайтлар Нидерландия нима билан шухрат қозонган бўлса, – моҳир усталар тайёрлаган нозик матолар, ўша пайтларда энг йирик бўлган Наюомр ва Льеж заводларида эритилган металл, Гаага ва Амстердам верфларида қурилган тезюорар ва яхши жиҳозланган кемалар, Ант-

верпен ва Лейден босмахоналарида чоп қилингандай китоблар – буларнинг барчаси мамлакат меҳнаткашларининг қўли билан яратилган эди. Асрлар давомида Нидерландия аҳолиси қирғоқ бўйи ерларини ўзлаштириди, уларни қуритди ва тўғонлар билан ўраб олди.

Нидерландияда янгича, капиталистик тартиб тез ривожланди. Бироқ бу илфор, ривожланган мамлакатда энг асосий ҳукуқ – мустақиллик йўқ эди.

Нидерландия Испания ҳукмронлиги остида. XVI аср ўрталарида Нидерландия Испаниянинг – феодал тартиблар ҳукмрон бўлган давлатнинг қўл остида эди. Испания монархияси Нидерландияда ўзининг қолоқ бошқарув тизимини ўрнатди. Аҳолига жуда юқори соликлар солинарди. Шуни айтиш етарлики, нисбатан кичкина Нидерландиядан испан хазинаси улкан денгиз орти мустамлакаларига қараганда 4 марта кўп маблағ оларди. Испан феодалларининг зулми мамлакат хўжалигини ривожлантиришга тўсқинлик қиласади. Солик йиғувчилар камбағаллардан сўнгги тийинларини ҳам тортиб олардилар. Қишлоқларда испан аскарлари ҳаддидан ошарди.

Нидерландияда кальвенистик дин аллақачон тарқала бошлаган эди. Бу ерда бидъатни йўқ қилиш учун испан қироли Филипп II юқори диний лавозимларга испанларни тайинлай бошлади ва Нидерландияда испан инквизициясини киритишга тайёрланарди.

Черков судлари мамлакат бўйлаб кезиб юрар ва ўзини католик деб ҳисоблашни хоҳламаганлар ҳамда католик ибодатхонасига бормай юрганларни кўлга олишни буюришарди.

Қўзғолоннинг бошланиши. Қонли қонунлар ҳам, оммавий қатл қилишлар ҳам Филипп Пнинг шафқатсиз сиёсатидан нидерланд халқининг аксариятида ўсиб бораётган норозиликни тўхтата олмасди. Аксинча, Нидерландияда халқ ҳаракати кенгая борди, унга шаҳарликлар, хунармандлар, дехқонлар, савдогарлар ва ҳатто зодагонлар ҳам жалб қилинди.

1566 йилнинг августида испан ҳукмронлигига қарши тарқоқ чиқишилар оммавий халқ ҳаракатига айланиб кетди. Бунга испанлар зулми ва қимматчиликдан ташқари 1565–1566 йиллардаги очарчилик ҳам сабаб бўлди. Куролланган халқ католик руҳонийларнинг билимсиз ва ахлоқизлигини фош қилаётган, черковни ислоҳ қилишга, испанлар зулмига ва инквизицияга чек қўйишга чакираётган гапга чечан нотиқларнинг чиқишиларини тинглашга тўпландилар. Бир

неча ҳафта ичиди Нидерландиядек кичик бир мамлакатда беш ярим мингдан зиёдроқ черков ва монастирлар тўлиқ вайрон қилинди. Исёнчилар католик рухонийларни ва испан амалдорларини қувиб юбордилар.

Филипп II бўйсунмаганларни бир зарба билан енгишга қарор қилди. 1567 йил ёзида Нидерландияга герцог Альба¹ бошчилигига сараланган қўшин юборилди. Альба Нидерландиянинг якка ҳокими бўлиб қолди. Жоҳил ва чекланган, лекин темир иродали мохир жангчи, фақат битта туйғу – шакокларга нафрат туйғусига эга бўлган герцог Альба ана шундай одам эди. Нидерландияда герцог Альбанинг диктаторлик режими ўрнатилди.

Нидерландиянинг пойтахти Брюсселга келибօқ Альба ҳокимиятни ўз қўлига олди. У бошқаришнинг фақат битта усулини – куч, аниқроғи террорни тан олар, фақат битта воситани – жаллоднинг қиличи ва инквизиция гулханини биларди.

Унинг Нидерландиядаги хукмронлик даврида фуқароларнинг барча хукуқлари, адолат, қонунчилик йўқ бўлиб кетиши бежиз эмасди. Биринчи навбатда Альба ёвузлиги туфайли ҳалқ орасида «қонли кенгаш» деб ном олган исёнлар бўйича кенгашни тузди. «Қонли кенгаш»да золимлик хукм сурарди. Альбанинг хукмронлик даврида бу ёвузлик курбонларининг сони 8 мингдан ошиб кетди. Бутун мамлакат дор билан қопланди. Дорлар етишмаганлиги учун тўғридан-тўғри дарахтларга, шаҳар деворларининг чиқиб турган тўсинларига осишарди. Шаҳар кўчаларида ўнлаб бидъатчилар ёндирилган гулханларнинг нафасни буғувчи тутуни сузиб юарди. Бундай террор фақатгина бидъатчиликни тугатиш учунгина эмас, испан ҳокими ҳазинасини тўлдириш ва жангчи ҳамда амалдорларга маош тўлаб туриш мақсадида нидерланд зодагонлари ва буржуазиясини талаш мақсадига ҳам эга эди.

Герцог Альба «ўндан бир» деб аталувчи янги солиқ турини киритди, ҳар қандай савдо битимидан ўндан бир қисми испан хукмронларига берилиши керак эди.

Минглаб аҳоли денгиз ортига – Англия ва Германияга қочиб кетди, бир неча юзлаб кишилар ўрмонларда паноҳ топдилар. Лекин эркесвар нидерланд ҳалқи ўзини тиз чўқтиришга йўл қўймади.

¹ Альба Фернандо де Толедо – 1507–1582 йиллари яшаган испан давлат арбоби ва саркардаси, Карл V нинг урушларида фаол иштирок этган. 1567–1572 йиллари Нидерландия диктатори.

Альбанинг зулмидан норози бўлган дехқонлар, хунармандлар, майда дўкондорлар кичик-кичик партизан отрядлари туздилар ва ўрмонларда яшириниб юриб, испанларга зарба беришарди. Партизанларни ўрмон гёzlари деб аташарди («гёzlар» – нидерландчада гадолар, қашшоқлар дегани, бу номни магрурлик билан олиб юрган ҳалқ қасоскорларини душманлари ана шундай атаган). Болта, арбалет, қилич, паншаха ва ўроқлар билан қуролланган гёzlар курашни ғалабагача олиб боришга қарор қилишган эди. Улар испанларнинг кичик отрядларига хужум қилишар, душман фойдасига жосуслик қилувчи католик руҳонийларига ҳам шафқат қилишмас эди.

Шимол қўзғолони. Мамлакат шимолида кўплаб ишчилар Голландия ва Зеландиянинг катта савдо флотида матрос бўлиб хизмат қиласарди. Савдо тўхтаб қолгандан кейин денгизчилар кирғоқ бўйи ерларни талаб ва вайрон қилиб, Испания билан денгиз уруши олиб бордилар. Улар кечаси-ю-кундузи душманни излаб денгиз кездилар. Испан кемалари ловуллаб ёнар ва чўкарди. Матрослар шафқатсиз, душманни асир олишмас эди. Бу партизан – денгизчиларни «денгиз гёzlари» деб аташарди.

1572 йили денгиз гёzlари жасорат билан Бриль шахрини эгалладилар. У барча шимолий вилоятларда тарқалган гёzчилик ҳаратининг таянч даргохига айланди. Шахзода Вильгельм Оранскийни (1533–1584) шимолий худудлар хукмдори деб эълон қилдилар. У энг йирик ва энг обрўли заминдор бўлиб, Испания хукмронлигидан норози нидерланд зодагонларига бошчилик қиласарди.

Испан қироли Карл V саройида улғайган Вильгельм Оранскийни жуда эрта дипломатик хизматга тайинлашди. Император унга катта умид боғлар ва тўлиқ ишонарди. Ҳатто ўзининг таҳтдан воз кечиш пайтида ҳам у 22 ёшли шахзоданинг елкасига суюниб олган эди. Бироқ янги қирол Филипп II (1527–1598) ўзини мустақил тутар ва Вильгельм Оранскийни ёқтирас эди. Шахзода очиқ сухбат олиб бора олса ҳам «инدامас» лақабини олди. Ҳақиқатан ҳам Вильгельм Оранский сукут сақлашни билар ва ўз сирларини бегоналардан асрай оларди. У ёлланган аскарлар тўплади ва уларни испанларга қарши урушга юборди, лекин ёлланма аскарлар ёмон жанг қилишарди. Шахзода уларга бошчилик қилиб, кўп марта муваффақиятсизликка учради. Бироқ Альба ҳам ўзининг олти йиллик хукмронлик даврида сезиларли муваффақиятга эриша олмади. Қўшинни сақлаб туриш қимматга тушар, тортиб олинган бойликлар сарф қилиб бўлинган,

мамлакатдаги қаршилик ҳаракати эса кучайиб борарди. Альба ундан Мадриддагилар норози эканлигини билар, шунинг учун истеъфога чиқаришини сўрарди. 1573 йили герцог Альба Нидерландияни тарк этди.

Альба кетганидан сўнг испанлар Лейден шахрини қамал қилдилар. Олти ойдан сўнг Лейден чорасиз ҳолатда қолди. Очлик бошланди, вабо тарқалди. Шунда исёңкорлар дадил қарор қилдилар – шаҳарни сув билан бостириш керак. Лейден қирғоқдан бир неча километр нарида, денгиз сатҳидан паст бўлган текисликда жойлашганди. Ҳимоя дамбаларини бузиб юборишса, денгиз ёрдамга етиб келар, шаҳарга гёзларнинг кемалари кира олар эди. Испанларнинг таслим бўлиш ҳақидаги таклифига очлик ва қамалдан азоб чекаётган Лейден ахолиси «Еримизни йўқотгандан кўра сув бостириб юборган маъқул», – деб жавоб бердилар. Шаҳарликлар тўғонлар курдилар. Қутурган оғатнинг даҳшатли тўлқинлари испанлар устига хужумга ташланди. Испан аскарлари қочиб қолишга мажбур бўлдилар.

Альбадан кейин Испан қироли томонидан тайинланган ҳокимлар баъзи бир енгилликлар, ён беришлар зарурлигини Филипп IIга уқтиридилар. Хазинада пул йўқ эди, аскарларга маош тўлаш тўхтатилди. Испан аскарлари мамлакатни талай бошладилар. 1576 йилда Антверпен шахрининг таланиши жуда даҳшатли бўлган эди. Шаҳарда 7 минг киши ўлдирилди.

Испанларнинг Антверпендаги ваҳшийлиги жанубдагиларни шимолий вилоятлар билан қўшилишга мажбур қилди. Исён қўтарган ҳалқ факат испанларни ўлдирибгина қолмай, монастирларни ҳам вайрон қилдилар, зодагонларнинг уйларини таладилар. Инқилобдан қўрқиб кетган нидерланд феодаллари жанубдаги исённи бостиришда испанларга кўмаклашдилар. Улар испан қиролига бўйсунишга тайёр эканликларини билдиришди. Филипп II Жанубий Нидерландияни ўз қўлида сақлаб қола олди.

Голланд Республикасининг ташкил топиши. Бунга жавобан еттита шимолий вилоятлар 1579 йилда Утрехт унияси деб номланган хужжатни имзолаб, иттифоқ туздилар. Улар «худди битта вилоят каби абадий бирлашиш»га ва испанларга қарши биргаликда жанг килишга ваъда бердилар.

Шундан сўнг тез орада улар Филипп IIни таҳтдан туширилган деб эълон қилдилар. «Худо одамларни, – дейилган эди хужжатда –

хукмдор учун эмас, аксинча хукмдорни одамлар манфаатлари учун яратади. Агар хукмдор ўз фуқаролари манфаати учун қайғурмас экан, у энди хукмдор эмас, бўйсуниш лозим бўлмаган золимдир». Бой буржуазия янги давлат тепасига Вильгельм Оранскийни қўйган ҳам бўларди, лекин у ёлланган қотил қўлида ҳалок бўлди. Шимолий Нидерландияда пайдо бўлган янги давлат «Бирлашган провинциялар» деб аталувчи иттифоқни ташкил қилган етти вилоятдан энг аҳолиси кўпи ва энг кудратлисинг номи билан содда қилиб «Голландия Республикаси» деб атала бошланди. Республика ўз мустақиллиги учун яна узоқ вакт Испания билан жанг қилишга мажбур бўлди. Факат 1609 йилдагина Испания Голландияни тан олганлиги ҳақидаги шартномага қўл қўйди.

Шундай қилиб узоқ вакт давом этган ва қизғин кураш натижасида мағрур ва эркесвар ҳалқ Шимолий Нидерландиянинг мустақиллигига эришди, лекин бўлиб ўтган воқеаларнинг тарихий аҳамияти факат шундангина иборат эмас. Бу кураш оқибатида Шимолий Нидерландияда феодал тартиблар барҳам топди ва Голландияда ҳокимият тепасига буржуазия келди, янги капиталистик муносабатлар жадал қарор топиш йўлига ўтди.

* * *

Иқтисодий, сиёсий ва маданий ҳаётнинг ривожланиши натижасида XVI–XVII асрларда бир қатор Европа мамлакатларида капиталистик тузум шакллана бошлади. Бу тузумнинг асосий жиҳатлари шундан иборат эдики, инсон озодлиги, қадр-қиммати ва эрки каби янги демократик қадриятлар асосида унинг тадбиркорлиги, ташаббускорлиги учун кенг йўл очилди, яхши яшашга интилиш, меҳнат қилиш, тежамкорлик каби хислатлар шаклланди.

Ишлаб чиқариш ва савдода вужудга келган нисбатан эркинлик саноатнинг тез суратлар билан ривожланиши учун имконият яратди. Фан ва техника шиддат билан ривожланди, янги ихтиrolар натижасида машиналар қўл меҳнатини ишлаб чиқаришдан сиқиб чиқара бошлади.

Буларнинг барчаси Европада жамиятнинг қиёфасини ўзгартириб, янги, индустрιал цивилизациянинг шаклланиши учун асос яратди.

V боб бўйича саволлар

1. Реформация қандай жараён, унинг мақсади ва вазифалари нималардан иборат эди?
2. М. Лютер ва Т. Мюнцер таълимотларининг моҳияти ва фарқлари нималардан иборат эди?
3. Католик черкови реформацияга қарши қандай кураш олиб борди?
4. Кальвин таълимотининг моҳияти нимада?
5. Англияда Реформация жараёни қандай кечди ва нималарга олиб келди?
6. Францияда диний урушлар қандай оқибатларга олиб келди?
7. Нидерландия инқилобининг сабаблари нимада?
8. Ришельёвнинг қандай тадбирлари Францияда абсолютизмнинг мустаҳкамланишига олиб келди?

II БҮЛІМ

ЕВРОПАДА ИНДУСТРИАЛ ЦИВИЛИЗАЦИЯНИНГ ШАКЛЛАНИШИ

VI БОБ. XVII–XVIII АСРЛАРДА АНГЛИЯ

Англия буржуа инқилоби

Янги, капиталистик муносабатларга асосланган тартибларнинг ўрнатилиши учун XVII аср ўрталаридаги инқилобда инглиз буржуазиясининг ғалабаси катта аҳамиятга эга бўлди. Бу инқилоб эълон қилган принциплар фақат Англияда эмас бутун Европада капиталистик муносабатларнинг хукмрон тартибга айланиши эктиёжидан келиб чиқсан эди. Айтиш лозимки, инқилобнинг ўзи ҳам шу янги муносабатлар ривожининг қонуний маҳсулни бўлди.

Англия инқилоб арафасида. XVI аср Англия учун муваффақиятли якунланди. Саноат тез ривожлана бошлади: юз йилда (1540–1640) кўмир қазиб чиқариш 8 марта кўпайди; ишқор, кўрғошин ва туз ишлаб чиқариш 6–8 марта, темир рудаси қазиб олиш эса 3 марта ортди. «Енгилмас армада»нинг мағлубиятидан кейин мамлакат дengизда хукмонликни қўлга киритди. Денгиз савдоси ривожланди: Москва, Марокаш, Ост-Индия ва бошқа бир қатор савдо компаниилари Эрондан Шимолий Америкагача, Швейцариядан Хиндистон ва Цейлонгача бўлган катта ҳудудда жуда фаол ҳаракат қилдилар; Стюартлар давридаги монополия тизими натижасида ташқи савдони асосан лондонлик бойлар эгаллаб олди. Натижада Лондонда жуда қудратли савдо олигархияси вужудга келди.

Ички савдо ҳам ривожланди. 1600 йили Лондонда дастлабки биржа фаолият қўрсата бошлади. Мамлакатнинг 4/5 қисм аҳолиси қишлоқларда яшаганлиги сабабли аграр соҳадаги ўзгаришлар Англияда ислоҳотлар ривожининг ўзига хос томонини ташкил қиласиди. Қишлоқ хўжалигига ҳам бозор муносабатлари шиддат билан кириб борди.

Фаол ташқи сиёсат юргизилиб, бўлғуси Британия мустамлака-чилик империясининг асослари яратила бошланди. Америкадаги биринчи мустамлака – Виржинияга асос солинди.

Санъат ва фан соҳасидаги муваффақиятлар ҳам салмоқли эди. Бэкон¹ ва Шекспир номлари бутун дунёга машҳур бўлди. Кўпгина жентрилар² ва савдогарлар ўз бойликларига кўра лордлар билан беллаша олардилар. Англияда бой ва кучли ўрта табақа шаклланган эди. Бу табақанинг аксарият вакиллари диний эътиқодлари ва ҳаёт тарзига кўра пуританлар³ эди. Кальвинизмнинг бу издошлари англикан черковини мўл-кўлчилик билан ўтадиган диний ибодатлардан «тозалаш»га уриндилар. Пуританлик кейинчалик инқилобий харакатнинг мафкуравий асосига айланди. Пуританлар орасида кўплаб янги зодагонлар, бой савдогарлар, усталар, мануфактура эгаларининг, ўзига тўқ дехқонларнинг вакиллари бор эди. Бу одамлар пулнинг қадрини яхши билишарди.

Пуританларнинг ўзлари қонунларни қаттиқ хурмат қиласади ва худонинг иродасини тушунишни истаганлари учун муқаддас ёзувларни ҳафсала билан ўқиширди. Улар қирол ҳукмронлиги ҳам худо иродасининг маҳсули эканлигига ишонишарди, лекин бу ҳукмронлик қадимий инглиз одатларига риоя қилса ва парламент билан хисоблашсагина улар учун қонуний эди. Парламент ҳам худонинг иродаси билан яратилганлигига пуританлар сидқидилдан ишонишарди.

Буржуа ахлоқнинг шаклланиши. Фақат ташқи дунёни эмас, ўз кудратини, қадр-қимматини англаған, яхшилик ва ёмонликни тушунишга уринган инсоннинг ички дунёси ҳам ўзгариб боради.

Инжилнинг инглиз тилига таржима қилиниши ва она тилида ибодат қилишнинг киритилиши жамиятда муқаддас ёзувларга қизиқиш уйғотди. Инжилни ибодатхоналарда тинглаш ва оиласда мутолаа қилиш одат тусига кирди.

Пуританлик кишиларнинг шахсий хулқига ҳам таъсир кўрсатди. Пуритан учун бурч туйғуси асосий мезон эди. Улар жамиятда ўзларининг хулқ-атворларига катта эътибор берар, сабр-тоқатли

¹ Фрэнсис Бэкон – 1561–1626 йиллари яшаган инглиз давлат арбоби, тарихчи ва файласуф, эмпиризмнинг асосчиси, барон, виконт унвонларига эга бўлган.

² Жентри – инглизча «gentry» – кичик ер эгаси, маълумотли зодагонлар.

³ Пуританлик (инглизча «pire» – «тоза») – христиан динидаги мазхаблардан бири. Бир неча йўналишлари бўлиб, барчасини англикан черковига салбий муносабат бирлаштириб туради.

бўлишга уринардилар. Пуританларнинг ҳаёт тарзи тартибли эди, улар эрта туришар ва ҳеч қачон ишсиз қолишмасди.

Пуританларнинг дунёқараши буржуазия гоялариға ҳам тўйлик мос келарди. Асосини пуританлик ташкил қилган буржуа ахлоқи шундай ривожланди, асосий қадрияти тежамкорлик, меҳнатсеварлик ва изланувчанлик бўлган буржуача ҳаёт тарзи ана шундай шаклланиб борди.

Мамлакатнинг ютуқлари инглизларни уларнинг ҳаракатлари тўғри эканлигига ишонтирди, буржуача ҳаёт тарзи, миллий ғуур ва инсоний қадр-қимматнинг шаклланишига кўмаклашди.

Инқилобнинг сабаблари. Стюартларнинг янги қироллик сулоласи инглиз парламенти ва пуританлик черковига қарши курашга киришиб кетди. Вужудга келган қарама-қаршилик инқилобнинг асосий сабабига айланди.

Қирол Яков I Стюарт парламент билан ҳисоблашишни хоҳламас эди ва епископлар англикан черкови учун зарур деб ҳисоблар эди. Эски тартибларни химоя қилиб Яков I ва унинг ҳукумати цех чекланишларини сақлаб турарди, махсулот сифати ёмонлашади, деган баҳона билан янги ихтиrolарни қўллаш тақиқланганди.

Ҳукмрон доираларда хазинани ўғирлаш ва пораҳўрлик одатий ҳолга айланган, қиролдан тортиб то оддий судъягача ҳамма пора оларди. Баъзи товарларни ишлаб чиқариш ва сотиш учун рухсатномани қиролнинг ўзи сотар, савдогарлар эса харажатларини қоплаш учун нархларни оширишга мажбур бўларди. Бирор кишининг монополиясига айланмаган товарни топиш қийин эди.

Яков Інинг ташқи сиёсати ҳам катта норозиликка сабаб бўлаётган эди. Айниқса инглиз буржуазиясининг мустамлакаларни босиб олишдаги асосий рақиби бўлган католик Испанияси билан муроса-созлиги ҳеч кимга маъқул эмасди. Бунинг устига Яков I пуританларни таъқиб қилишни ҳам давом эттириди. Қўпчилик пуританлар мол-мулкларини сотиб ҳали номаълум Америка томон отландилар.

1625 йили Яков I вафот этди. Унинг вориси 25 ёшли Карл Уэльский қирол Карл I номи билан (1600–1649) таҳтга келди. Бутун инглиз жамияти янги қирол ўзгаришлар зарурлигини тушунади деб умид қиласди. Аммо Карл I га нисбатан ишончсизлик унинг Франция қироли Людовик XIII нинг синглиси, католик мазҳабидаги Генриетта Марияга уйланганидан сўнг айниқса кучайди. Қатъиятсиз Карл I Генриетта Мариянинг таъсирига тушиб қолган эди.

Шу тариқа Карл I билан парламент ўртасида низо бошланди. Келишмовчиликка қиролнинг Франциядаги каби чекланмаган хокимиятга интилиши ва инглиз жамиятида рўй бераётган ўзгаришларни тушуниш ва қабул қилишни истамаслиги сабаб бўлди. 1628 йили бир йўла учта давлат – Франция, Испания ва Австрия билан уруш олиб бораётган хукуматнинг қийинчиликларидан фойдаланиб парламент қиролни «Хукуклар тўғрисида билль»¹ ёки «Хукуклар тўғрисида петиция»²ни имзолашга мажбур қилди. Бу ҳужжатларнинг муаллифлари «Эркинликнинг буюк хартияси»³ га асосланиб, парламентнинг розилигисиз бирорта ҳам солиқ жорий қилинмаслигини кўрсатди, суднинг рухсатисиз ҳар қандай қамоққа олишлар қонунсиз эканлигини эълон қилдилар. Карл I биллни бузишга уриниб кўрганда парламент норозилик билдириди. Шунда қирол парламентни тарқатиб юборди ва мухолифат қатнашчиларидан етти кишини қамоққа ташлади, улардан айримлари ўлдирилди.

Англияда ўрнатилган Карл Ining шахсий хукмронлиги 11 йил давом этди. Бу даврда савдогарлар, янги зодагонлар, хурфиқр диндорлар давлат ишларидан бутунлай четлатилди. Қиролнинг кўрсатмаси билан пуританларни таъқиб ва қувғин қилиш кучайди, гайриқонуний солиқлар жорий қилинди, цензура кучайди, мавжуд сиёсий режим билан келиша олмаганларга қарши суд таъқиби олиб борилди.

Яна нарх ошишига олиб келадиган монополия билан савдо қилиш чекланмаган кўринишга эга бўлди. Савдогарлар, янги зодагонлар, оддий кишилар – барча қирол тартибларидан жабрландилар. Эмиграция кучайди. Буларнинг ҳаммаси савдо ва саноат ривожланишининг секинлашувига олиб келди.

Инқилобнинг бошланиши. Узоқ муддатли парламентнинг исплоҳотлари. 1640 йилнинг бошига келиб хазина бўшаб қолди, ҳеч ким қарзга пул бермай кўйди. Мамлакатда очлар қўзголонлари, Лондонда эса кўча тартибсизликлари бўлиб турарди. Англияга қарши ҳарбий ҳаракатларни Шотландия бошлади.

Киролга парламентни чакириш талаб қилинган норозилик хатлари кетма-кет жўнатилиб турилди. 1640 йил 3 ноябрда янги парламент йигилди. Бу парламент салкам 13 йил тарқатилмаганлиги

¹ Билль – конун лойиҳаси

² Петиция – жамоа бўлиб берилган ариза

³ «Эркинликнинг буюк хартияси» – 1225 йили Англияда қабул қилинган конун.

учун «Узок муддатли парламент» номи билан тарихга кирди. Бу инқилобнинг бошланиши эди.

Парламент ишга киришганда қиролни ва унинг сиёсатини асосан феодал анъаналар кучли бўлган ҳамда кўпчилик католик мазҳабига эътиқод қиласидиган энг қолоқ худудларнинг вакиллари қўллаб-кувватлаши маълум бўлди. Жамоа палатасининг кўпчилигини эса пуританлар ташкил қиласиди. Улар икки партия – мўътадил пресви-терианлар ва радикал индепенденслардан иборат эди.

Узок муддатли парламент бир қанча муҳим ислоҳотларни амалга ошириди: фавқулодда судлар – «Юлдузлар палатаси» билан «Юксак комиссия»ни йўқ қиласи; Шимол ва Уэлс ишлари бўйича кенгаш тарқатилди; монополиялар қонундан ташқари деб эълон қилинди; черков судини руҳоний бўлмаган шахсларни жазолаш хуқуқидан маҳрум этди; қироллик яширин кенгашининг олий суд вазифасини бажариш хуқуқини бекор қиласи; қамоқда сақланаётган пуританларни озод қиласи; мамлакатни парламентсиз бошқаришда қиролга бош маслаҳатчи ҳисобланган Страффорд¹ қамоққа олинди ва суд қарори билан 1641 йил 12 май куни катл қилинди; матбуотнинг амалда мустақиллигини ўрнатди; епископлар ва полиция цензурасини йўқ қиласи. 1641 йил 15 февралда қабул қилинган «Уч йиллик билль» қиролнинг хоҳишидан қатъи назар парламентнинг камида ҳар уч йилда чақирилишини, Жамоа палатаси факат унинг ўз розилигисиз тарқатилиши мумкин эмаслигини ўрнатган энг муҳим қонун эди. Унда: ушбу билан қирол бизнинг черков хукмдоримиз томонидан парламентда мажлис қилувчи лордлар ва жамоа розилиги ва хукми билан қарор ҳамда эълон қиласидарки, шу ҳақдаги парламент қарорисиз бошқа бирор йўл билан тарқатилмайди, шунингдек, ушбу парламент шу мақсадда маҳсус ўтказилган кенгашнинг қарорисиз исталган пайтда унинг чақирилиш муддати орқага чўзилиши мумкин эмас ва пэрлар палатаси унинг ўзи томонидан ва ўз қарорига кўра факат ушбу парламентнинг фаолияти давомида муддати ўзгартирилиши мумкин; ушбу қарорга зид келадиган, қабул қилинган ёки қабул қилинажак ушбу парламентни тарқатиб юбориш ёки муддатини чўзиш учун қилинган ҳар қандай восита ёки қарор гайриқонуний ҳамда ҳақиқий эмас деб эълон қилинади, дейилади. Қонунсиз тўлов ва жарималар ҳам тўхтатилди. Узок муд-

¹ Страффорд Томас Вентворт (Уэнтиорт) – 1593–1641 йиллари яшаган инглиз давлат арбоби, граф.

датли парламентнинг абсолютизмга қарши қаратилган дастлабки қарорларидан бири, қирол министрларининг судга тортилиши бўлди. Кўпгина юксак амалдорлар, епископлар, судьялар Тауэрга жўнатилди.

Аслида Узок парламент томонидан амалга оширилган ўзгаришлар ўз мохиятига кўра Англия давлат тузумида юз берган инқилобий тўнтариш эди.

1642 йилнинг январида қирол билан парламент ўртасида ҳал қилувчи ажralиш рўй берди. Карл I исёнкор парламентни жазолашга ва шахсий ҳукми билан мухолифат раҳбарларини қамашга карор қилди. Бу пайтда Лондоннинг 100 минг аҳолиси парламентни ҳимоя қилиш учун кўчаларга чиқди. Яқин қишлоқлардан янги зодагонлар 5 мингта қуролланган дехқонларни бошлаб келдилар. Шунда қирол чекинди: у пойтахтдан иирик феодаллар ҳимоясига умид қила оладиган шимолга қараб кочди. Мамлакатда фуқаролар уруши бошланди. Бундай инқилобий шароитда парламент 1641 йил 22 ноябрда «Буюк ремонстрация¹» деб номланган хужжатни қабул қиласди. У 204 моддадан иборат бўлиб, жумладан шундай дейилади: «Барча кулфатларнинг илдизи деб биз асосий қонунларни йўққа чиқаришга бўлган ёвуз ниятли бадкирдор уринишларни ҳамда инглиз қироллигининг дини ва адолати кўмиб ташланган бошқарувнинг асосларини хисоблаймиз.

43. Канцлер суди, хазинадорлик суди, феодал йигимлар палатаси, шунингдек, бошқа инглиз судлари ҳам ўз юрисдикцияси² чегараларини заарли оширишга йўл кўйдилар...

54. Бу шунчалар кулфат келтириди ва хавотирга солдики, кишиларнинг анчагина миқдори қашшоқликдан қутилиш мақсадида қиролликдан бирлари янги Англияга ва Американинг бошқа кисмларига, бошқалари эса Голландияга кетиб қолдилар...

115. Барча монополиялар йўқ қилинди, чунки улар мавжудлиги туфайли бир тўда одамлар аҳолига заар келтира оларди...

132. Епископ ва улар судларининг ҳаддан зиёд ҳукмронлигига юксак комиссия судини бекор қилиш ҳақидаги биллнинг қарорлари билан чек қўйилди...

133. Судларни тартибга солиш ва суд ишларидаги сансолорлик ҳамда қимматчиликни йўқ қилиш лозим...

¹ Ремонстрация – норозилик хужжати.

² Юрисдикция – суд ўтказиш хукуки.

195. Қироллиқдаги қонун ва эркинликларни яхшилаб қўриқлаш учун барча ғайриқонуний сувиистеъмол қилишлар ва талаблар судланадиган ва жазоланадиган бўлмоғи керак...

197. Ҳар иккала палатанинг хурмат билан қилган илтимосларига мувофиқ жаноби олийлари барча маслаҳатчилар, элчилар ва бошқа мансабдор шахслар ўз уйларида ҳамда чет элларда иш олиб бориши учун тайинлансанлар, уларга парламент ишонч билдирган бўлсин, уларсиз биз жаноби олийларига субсидиялар бера олмаймиз».

Кирол билан парламент ўртасида фуқаролар уруши. 1642 йил август ойининг охирида Карл I Ноттингель қасри устида қироллик штандартини ўрнатди. Бу қирол ўз вассалларини бурчларини баҗаришга чақираётганини англатарди. Бироқ шахар бўйлаб сукунат хукмон эди. Одамлар кулфат яқинлашаётганлигини хис қилаётган эдилар. Англия икки бир-бирига душман лагерга: қирол тарафдолари – «кавальерлар»¹ ва парламент тарафдорлари – «юмалок бошлилар»² га бўлиб ташланган эди.

Парламентни савдогарлар, тадбиркорлар, янги зодагонлар қўллаб-қувватладилар. Эски тартибларнинг хукмонлигидан манфаатдор бўлганларнинг барчаси – йирик ер эгалари бўлган аслзодалар ва уларга қарам дехқонлар, сарой амалдорлари, англикан черкови қирол байроғи остида бирлашдилар.

1643 йилнинг охирига келиб мамлакат худудининг тўртдан уч кисми қирол хукмонлиги остида эди, парламент эса ҳалқни жангга чорлашга қўрқарди. Парламент қўшинининг ҳарбий қўмондонлари иродасизлик қилдилар. Бироқ тез орада Шотландия қиёфасида парламентнинг янги иттифоқчиси пайдо бўлди. Шотланд армияси Англия худудига кириб келди ва шотландлар билан парламент тарафдорларининг бирлашган қўшини қирол қўшини устидан ғалаба қозонди. Бу ғалабада Оливер Кромвель қўмондонлиги остидаги отлиқ аскарлар асосий роль ўйнадилар. Бироқ умуман олганда, аҳвол ўзгармади. Қирол аскарлари ҳатто Лондонга ҳам хавф солиб турардилар.

1645 йили жамоа палатаси парламент армиясини мустаҳкамлаш бўйича чоралар қабул қилди. Тарқоқ отрядлар ўрнига ягона қўшин

¹ «Кавальерлар» – деб шахарликлар, аслзодалар вакилларини пахмоқ париклари ва шоий ҳамда баҳмал кийимлари туфайли аташар эдилар. Фуқаролар уруши даврида бу ном салбий характерга эга бўлди.

² «Юмалок бошлилар» – деб аслзодалар қашшоқ ва оддий одамларни масхара килиб атардилар, чунки шогирдлар ва устахона хизматчиларида киска соч олдириш урф эди.

тузилди ва қўмондон қилиб қобилиятли лашкарбоши лорд Томас Ферфакс¹ тайинланди. Янги зодагонлар сафидан чиқкан ҳамда генерал-лейтенант унвонини олган Оливер Кромвель янги армиянинг жонкуярига айланди. Ана шу тарзда «янги турдаги» армия, кўнгиллилар, асосан дехқонлар, хунармандлар ва мануфактура ишчиларидан иборат бўлган ҳақиқий инқилобий армия ташкил килинди. Кўпгина офицерлар зодагон эмасдилар. Полковниклар сафига этикдўз Хьюстон, извошли Прайд, ўт ёқувчи Фокс ва бошқалар бор эди. Кўмондонлик таркибини тузишда лашкарбошиларнинг ёшига эътибор беришмас эди. Кўпгина полковник ва подполковниклар ҳали жуда ёш йигитлар эди. Армия ўзини «киролликни золимликдан озод қилувчи» деб билар ва қирол армиясидан яхши маънода, айниқса, интизоми билан фарқ қиласади. Натижалар дархол ўзини кўрсатди. 1645 йилнинг 14 июнида Нейзби қишлоғи яқинида қирол ва парламент кўшинлари ўртасида ҳал қилувчи жанг бўлиб ўтди. Шиддатли жангда «юмалоқ бошлилар» ғалаба қозонди. Қирол ва унинг ортидан бутун армияси қочиб қолди.

Ғолиблар қўлига рақибнинг бутун артиллерияси ва жуда кўп ҳарбий заҳиралари, шунингдек, 10 мингта чет эл ёлланма аскарлардан фойдаланиш ҳақида, ирландлардан ва Франция қиролидан ёрдам сўраш, католикларга қарши аввал қабул қилинган қарорларни бекор қилиш ҳақида қиролнинг режалари ёзилган шахсий маҳфий ёзишмалари ҳам тушди.

Армиянинг қолдиқлари баъзи бир шаҳар ва қишлоқларда, асосан мамлакат фарбидагина қаршилик кўрсатишга қодир эди, холос. Дехқончасига кийиниб олган қирол яширинча Оксфордга, шотландлар олдига қочиб кетди. 1646 йили 24 июнда Оксфорднинг таслим бўлиши билан уруш парламентнинг тўлиқ ғалабаси билан якунланди.

Оливер Кромвель ва «янги тартиб»даги армиянинг ташкил қилиншии. Қишлоқ зодагони Оливер Кромвель 1599 йил 25 апрель куни унча катта бўлмаган чекка шаҳарчада дунёга келди. Реформация йилларида бир қатор монастирларнинг ерлари Кромвель авлоди қўлларига ўтган эди. Оила пуританлик қоидаларига риоя қиласади. Бўш вақтлар кўпинча черковга ва Инжил ўқишига бағишлиларди. 1619 йили Кромвель хукукни ўрганиш учун Лондонга кетди. Бир

¹ Томас Ферфакс, барон Камерон, лорд, граф Оксфордский – 1612–1671 йиллари яшаган, Англия буржуя инқилобининг номояндларидан бири.

йилдан сўнг у лондонлик бой савдогарнинг қизига уйланди ва уйига қайтиб, хўжалик ишлари билан шуғулланади.

1628 йил Оливер Кромвеллинг тақдирини кескин ўзгартириб ўборди. У парламентга сайланди. 1640 йил 3 ноябрда Узоқ муддатли парламент тузилган пайтда Кромвелни мухолифатдагилар орасида кўриш мумкин эди. У сиёсий курашчининг барча сифатларига эга ва Узоқ муддатли парламент лидерлари орасида алоҳида ўрни бор эди. Фуқаролар уруши даврида 43 ёшли Кромвель ўз ҳаётининг янги саҳифасини бошлайди. У ажойиб ташкилотчи ва қўмондон эканлигини ҳам намоён килди.

1642 йилнинг сентябрида Оливер Кромвель пуритан-мазхабдошлари орасидан танлаб олинган 60 та кўнгилли отлик аскарлар гурухини бошқарди. Пайти келиб, эски тартибларни ёмон кўрадиган бу одамлар гурухи машхур «темир бикинли» отлик аскарлар отрядига айланади. Кромвель кучи ва вақтини аямасдан аскарларга таълим берди. Унинг аскарлари чидам ва интизоми билан машхур эди. 1643 йилнинг охирига келиб Кромвеллинг отлик аскарлари 1100 кишидан иборат 14 эскадронга эга эди. Улар янги армиянинг негизига айландилар. Жанг олдидан Кромвель узоқ вақт ибодат қилас, ибодатдан сўнг эса «Худодан умид кил, лекин порохни куруқ сакла!» – дерди.

Парламент ислоҳоти. «Кавальерлар» армиясининг тор-мор қилиниши парламентга муҳим ўзгартиришлар қилиш имкониятини берди. Зодагон ер эгаларини таҳт фойдасига бериладиган феодал тўловлардан озод қилдилар. Энди ер уларнинг тўлиқ хусусий мулкига айланди. Савдогарлар эндиликда савдо юритишга руҳсатнома сотиб олмайдиган бўлдилар. Черковни парламентга бўйсундирдилар, қирол, унинг тарафдорлари ва епископларнинг ерлари эса мусодара қилинди.

Парламентда ҳокимият лордлар ва савдогарлар қўлига ўтди. Фуқаролар урушида ўз жасоратлари билан ғалабани кўлга киритганлар эса нимага эга бўлдилар? Парламент дехқонларнинг феодал қарамлигини бекор қилмади. Улар тўловларни ва «ўндан бир»ни ҳамон тўлашлари керак эди. Мусодара қилинган ерлар катта майдонлар холатида сотилар, фермерлар ва ижаракчилар уларни сотиб ололмас эдилар. Бу ерларнинг фақат 9 фоизигина ўзига тўқ дехқонларга тегди, қолганлари буржуазия ва янги зодагонларни билди.

Янги зодагонлар ва буржуазия учун инқилоб 1646 йилнинг охирiga келиб яқунланган эди. Улар қиролни ҳам иззат-хурмат билан кабул килишга тайёр эдилар, факатгина у черковнинг пуританча тузилишига қарши бўлмаса ва парламент киритган ўзгаришларни ўз кучида қолдиришга рози бўлса бўлгани эди.

Жон Лильберн ва левеллерлар. Парламент фаолиятидан шахарлик, аксарият майда мулкдорлар норозилигининг ифодачиси – левеллерлар (инглизчадан – тенглаштирувчилар) эди. Уларнинг орасида Жон Лильберн (1614–1657) ажралиб турарди: Оливер Кромвель каби у ҳам унвонсиз зодагонлардан бўлиб, пуританлар оиласида тарбия топганди. Адолатга интилиш Лильбернни аввал абсолютизм билан, кейин эса парламент билан ҳам курашишга мажбур қилди.

Инқилобга қадар ҳам Жон Англияда пуританлик ғояларини тарқатиш учун кўп иш қилганди. Бунинг учун у 1637 йилда судга берилди. «Юлдузлар палатаси»нинг хукми билан 500 фунт стерлинг миқдорида жаримага, қамчи билан савалашга ва шармандалик устуни ёнига турғизиб қўйишга маҳкум этилди. Фуқаролар уруши бошланиши билан у пиёда қисмнинг капитани унвонида асосан лондонликлардан – шогирд ва устахона хизматчиларидан иборат бўлган гурухи билан «кавалерлар»га қарши жанг қилди. Лильберн Кромвель билан ёнма-ён Марстон-Мур ёнидаги урушда ҳам иштирок этди.

Лильберннинг кейинги ҳаёти фожиали бўлди. Унинг қарашлари аввал парламент билан, сўнгра сайлаш хукуқининг кенгайтирилишига қарши бўлган ва ҳокимиятни янги зодагонлар ҳамда йирик буржуазия қўлида сақлаб қолишга интилаётган Кромвель билан ҳам чуқур зиддиятларга олиб келди.

Ўзи озод бўлиб туғилган ва бир умр бошқаларнинг ҳам озодлиги учун курашган Жонни қамоқка ташлашди, мамлакатдан қувиб чиқаришди, оиласидан ажратиши. У 1657 йил 29 август куни ўзининг севимли хотини ва ҳамкори Элизабет қўлида жон берди. Уни 400 га яқин киши чуқур қайгу билан сўнгти йўлга кузатдилар.

Левеллерларнинг асосий талаблари уларнинг дастурида (1646) баён қилинган эди: 1. Қирол ҳокимиятини ва лордлар палатасини ўйкотиши. 2. Жамоалар палатаси ҳокимиятининг устуворлиги. 3. Бу палатанинг ўз сайловчилари – Англия халқи олдида масъул эканлиги. 4. Парламентга ҳар йили сайлов ўтказилиши. 5. Чекланмаган

виждон эркинлиги. 6. Барча одамларнинг туғилишидан берилган тенг табиий хукуқларини тан олиш.

Левеллерларнинг дастури Ж. Лильберн, У. Уолвин ва Р. Овертонларнинг кўплаб памфлетларида тўлиқ ифодаланган эди. Масалан, Ж. Лильберн ўзининг «Эркинликни, эркин одамни ҳимоялаш» памфлетида шундай ёзади: «Худо инсонни қалб ва онг билан ҳамда ўз шахсий сиймосига монанд қилиб яратган... Улардан ҳеч бири ўз табиатига кўра бошқалар устидан қандайдир хукмронлик, хўжайнинг қила олмайди ва ҳокимиятга ҳам эга эмас».

Қиролнинг қатл қилинини. Парламент иттифоқчилари бўлган шотландлар қароргохига тушиб қолган кирол Карл I уларни ўз тарафига оғдиришга уриниб кўрди. Лекин бу ҳеч қанақа натижага бермади. Амалда шотландлар асирни парламентга сотдилар. 1647 йилнинг февралида кирол Нейзби яқинидаги қалъага қўриқланган ҳолда жойлаштирилди. Парламент депутатларининг аксарияти, шунингдек, Кромвелнинг ўзи ҳам фақат кирол ҳокимиятининг чекланишини хоҳлардилар. Бирор ўз характеристикага кучи ва дунёкараши туфайли Карл келишишга кўнмади.

Бу орада кўшиндаги аскарлар «... қонли Карл Стюартни у тўккан қон учун ва Худонинг ишига ҳамда бу талон-торож қилинган мамлакат ахолисига келтирган зарар учун жавоб беришга тортилиши»ни талаб қила бошладилар. Бу талабга парламент депутатларининг бир қисми ҳам қўшилди. Жамоалар палатаси ҳар иккала палатадаги юристлар, офицерлар, амалдорлардан тузилган 150 кишидан иборат «собиқ кирол Карл Стюарт» устидан хукм чиқарувчи фавқулодда суд ташкил қилди.

Қирол устидан суд 1649 йили 20 январь куни бўлиб ўтди. Қора кўйлак кийган, қўриқчилар – ўн икки солдат қуршовидаги Карл I суднинг қонунийлигини тан олмаслик белгиси сифатида шляпасини бошидан олмади. У ўзини устун тутар ва келишувга эришишга уринмас ҳам эди.

Бир неча кунлик қизгин баҳслардан кейин Карл I айбдор деб тан олинди ва «золим, хоин, қотил ва давлат душмани» сифатида қатл этилишга хукм қилинди. Прокурор Кук: «У ўлиши, у билан бирга монархия ҳам ўлиши керак», – деди.

1649 йилнинг 30 январь куни Карл I Стюарт саройдан катл майдонигача бўлган йўлни аскарлар билан суҳбатлашиб, пиёда босиб ўтди. Катл супасидаги сўнгги сўзида у ўз фуқароларига улар қирол

били билан бирга давлатни бошқармокчи бўлганлигини таъна қилди. Унинг хулқ-атворида пушаймонликнинг сояси ҳам кўринмас, ўзини тутишида кўркувдан асар ҳам йўқ эди. Қатлига бир неча дақика колганда ҳам Карл I абсолют монархия тузумини ҳимоя қилишда давом этди.

Армия тантана қиласди, лекин мамлакат ахли воқеаларнинг бундай бурилишига тайёр эмас эди. Қатл пайтида иштирокчилар орасида сидқидилдан йиглаганлар, киролга ачингандлар ҳам оз эмасди.

Киролнинг қатл этилиши ҳақидаги хабар Европа монархларининг саройлари бўйлаб даҳшат тўлқини мисол қалқиб ўтди.

Инқилобнинг яқунланиши.

Англияниң конституцион монархияга айланиши

Республиканинг ўрнатилиши. Парламентнинг 1649 йил 17 марта даги қарори билан кироллик ҳокимияти «керақсиз, ҳалқ фаронлиги учун заарли ва хавфли» бўлгани учун йўқотилди. Қарорда: «Бу мамлакатда ва Ирландияда кироллик унвонининг қайсицир бир шахсга тегишли бўлиши фойдасиз, қийин ва эркинлик учун, жамият хавфсизлиги ҳамда ҳалқнинг ошкора манфаатлари учун хавфли эканлиги аниқланганлигини ва тажрибада исботланганлигини эътиборга олиб, ушбу парламент ва унинг хукми билан қарор ва эълон қилинадиким, инглиз миллатининг қироли унвони бундан бўён қайсицир бир шахсга тегишли бўлмаслиги ва амалга оширилмаслиги керак...» дейилади.

Икки кундан кейин унинг тақдирига лордлар палатаси ҳам шерик бўлди.

19 май куни Англияда республика эълон қилинди. «Бундан бўён, – дейилади Декларацияда, – Англия парламентдаги ҳалқ вакиллари томонидан бошқарилади». Бой савдогарлар, тадбиркорлар ва янги зодагонлар ҳукумат тепасига келдилар. Бутун қонуний ҳокимият тўлалигича аъзолари ўзларини «инглиз озодлиги»нинг асрорчилари деб атайдиган Узоқ муддатли парламентнинг жамоа палатаси тимсолидаги бир палатали парламентга ўтди. Пресвитерианлар парламентдан қувилгандан сўнг у ерда 100 нафар аъзо қолган бўлиб, парламент йигилишларига шундан 50–60 киши қатнашар эди. Бу аслида парламент деб аталган ташкилотнинг қолдиги эди, холос. Ижро ҳокимияти Оливер Кромвель бошчилигидаги ҳарбий

мансадорлар раҳбарлик қилаётган 41 кишилик Давлат кенгашига топширилди. Амалда Англияда «республика либосидаги» ҳарбий диктатура ўрнатилди.

Шаҳарлик қашшоқлар ва деҳқонлар ҳаётида қарийб ҳеч нарса ўзгармай қолди. Фуқаролар уруши мамлакатни вайронага айлантириди ва бу уларга очлик ва мусибат келтириди.

Халқ ҳаракатларининг бостирилиши. Левеллерлар аскарларга чақириқ билан мурожаат қилдилар: «Худди бир кишидек сизнинг ишончларингизни алдаган ва ҳар куни сизларни қул қилишга интилгандарга қарши ўз эркингиз учун курашга отланинг...» Бу чақириққа жавобан қўшинларда жонланиш бошланди.

Кўшиндаги левеллерларнинг қўзғолонини бостиришга Кромвеллинг шахсан ўзи бошчилик қилди. Энди, тадбиркорлар ва янги зодағонлар ўз ҳокимиятини мустаҳкамлаб олганидан кейин, тўқимачилар ва деҳқонлар билан иттифоқ уларни ортиқ қизиқтирасди. Кромвель кўшинни барча ўзгача фикрловчилардан тозалади. Бунинг учун парламент унга «чин қалбдан ташаккур» эълон қилди, Лондондаги Ситилик бойлар эса қимматбаҳо совға – олтин коса ва идишлар ҳадя қилди.

Кромвеллинг буйруғига биноан диггерларнинг Жерард Уинстенли бошчилигидаги ҳаракати ҳам бостирилди.

Жерард Уинстенли 1609 йили Ланкаширда дунёга келган, унинг ўлган вақти номаълум. У қаттиққўл пуритан оиласида тарбия топди, ёшлигига жуда кўп ўқиди. 12 ёшидаёқ Жерард Лондонда савдо фирмасида шогирд бўлиб ишлади. Ўз ҳаётида у оғир меҳнат ва умидсиз муҳтожликни кўрди. Бу унда фақат сиёсийгина эмас, мулкий тенглик ҳам бўладиган жамият ҳақида орзу уйғотди... 1649 йил апрелда Уинстенли бир тўда маслакдошлари билан Лондон яқинидаги муқаддас Георгий тепалигидаги бўш ётган ерда колония ташкил қилиб, ерга ишлов беришни бошладилар. Уинстенли халқни бўш ерларни эгаллаб олишга (уларнинг номлари ҳам шундан келиб чиққан: «диггер» – қазувчи, ковловчи) ва бойлар учун эмас, ўзлари учун меҳнат қилишга даъват қилди. Уинстенлининг асосий ғояси – ерга бўлган хусусий мулкчиликдан воз кечиш эди. Бу ҳақда диггерларнинг Уинстенли томонидан ёзилган манифестида шундай дейилади: «...Биз адолатли ишлашимиз ва ерни ҳамма учун – бой учун ҳам, камбағал учун ҳам – умумий хазинага айлантиришимиз лозим. Мамлакатда туғилган ҳар бир киши уни ўстирган она

ердан яратишни бошқарган онгга мувофиқ қун кўра олсин, лекин хамма бирга, бир отанинг болалариdek ишлаб, бир оила аъзоларидек бирга овқатлансинглар ҳамда ҳеч бири бошқаси устида хукмрон бўлмасин...

...Бу хусусий мулкнинг лаънатли эканлиги эса ерни сотаётгандар ва сотиб олаётгандар лендлордлар бўлишини, уни ёки зулм, ёки ўғирлик билан олганликларини ва барча лендлордлар еттинчи ва саккизинчи оятлардаги «ўлдирма» ва «ўғирлама» деган даъватларга риоя қилмай яшаётгандарини аниқ ифодалайди.

Билингки, токи ерсиз қашшоқлар жамоа ерларини ҳайдаш ва ишлов беришга рухсат олмас экан ва токи ўраб олинган кўргонларда яшаётган лендлордлардек мўл-кўлчиликда яшамас эканлар, Англияда озод халқ бўлмайди».

Диггерлар харакати ўзининг тинч характерига қарамасдан Давлат Кенгашининг эътиборини жалб қилди. Лендлорлар ҳам бу харакатда ўзларининг ерга эгалик хуқуқлари учун катта хавфни кўрдилар. Барча мулқдорларни ташвишга солаётган ушбу муаммони Кромвель ўз нутқаридан бирида шундай ифодалайди: «Зодагонлар, жентльменлар, йоменлар, улар ўртасида фарқ мавжуд; бу фарқ миллат учун жуда муҳим. Аммо тенглик принципига амал килувчилар томонидан миллатнинг ана шу табиий ҳолати вайрон килинмадими? Уларнинг максадлари дехқонларни ҳам лендлорлар сингари эркин қилиш эмасми?»

Шундай нутқдан сўнг лендлорларнинг диггерларга қарши харакати бошланганлиги ҳеч ажабланарли эмас. Лендлорларга Ферфакс солдатлари ҳам ёрдамга келдилар.

Ирландия ва Шотландиянинг забт этилиши. «Янги тур»даги армиянинг қайта тугилиши. Армияда левеллерларнинг тор-мор қилиниши Кромвелнинг қўлларини бўшатди ва у энди Ирландия масаласи билан шуғуланиши мумкин эди. Бу пайтга келиб Ирландия Англиядан тўлиқ ажralиб чиқсан эди. Ирландиянинг вице-қироли маркиз Ормонд Карл I нинг вориси бўлган Карл II байроби остида тарқоқ элементларни бирлаштира олди. «Яшил орол» роялистлар фитнасининг асосий майдонига айланди. Бир йўла иккита лавозимга – Ирландия хукмдори ва экспедицион армия Бош қўмондони лавозимларига тайинланган Кромвель ирландларни тор-мор қилиш режасини тузга бошлади. 1649 йил 13 августда яхши қуролланган 10 минг аскари бўлган 132 кемадан иборат қўшин Англия қирғоқларини

тарк этди ва икки қундан кейин Ирландияга етиб келди. Бу юриш бир неча вазифани бажариши керак эди: «яшил орол»ни Англия мустамлакасига айлантириш; ирланд ерларини аскар ва офицерларга бўлиб бериш ва шу билан қўшиндаги инқилобий кайфиятни бостириш.

Ирландияга етиб келган Кромвель «Худонинг хоҳиши билан биз бу ерга инглиз эркинлигининг шон ва шуҳратини қўллаш учун келганмиз, бу эркинликда ирланд ҳалқи ҳам унинг барча имкониятларига шерик бўлиши, инглизлар билан биргаликда эркинлик ва мулқдан баб-баробар фойдаланиши мумкин», – деб эълон қилди. Ирландиядаги уруш мисли кўрилмаган аёвсизлик билан олиб борилди. Масалан, 3000 кишилик Дрогеда гарнizonидан 30 га яқин киши тирик қолди, Уэксфорд қалъасини олиш пайтида 2000 киши ўлдирилди. Факат катта ваҳшийликлар эвазига Ирландия эгалланди. Мамлакат ахолисининг 1/3 қисми ҳалок бўлди. «Ирландиянинг тузилиши ҳакида статут»га биноан қўлига қурол олиб Кромвелга қарши курашган барча ирландияликларнинг ерлари мусодара қилинди. Кўпгина офицер ва генераллар, шу жумладан, Кромвель ҳам улкан ер майдонларининг эгалари бўлиб олдилар. Ерларидан айрилган ирланд дехқонлари очликдан ўлимга маҳкум эдилар. Аҳолининг катта қисми ўлиб кетди. «Қашшоқлар галаси бу мамлакатнинг барча қисмларида изғиб юришарди... баъзилари кўпинча от гўшти ва ўт-ўлан истеъмол қиласилар, бошқалари эса очликдан ўлардилар... Ота-онасини йўқотган бечора болалар тақдир хукмига ҳавола қилинарди, улардан баъзи бирлари бўриларга ем бўларди...», – деб ёзишганди ўшанда. Минглаб ирландлар ўз ватанларини «кўнгилли бўлиб» тарк этдилар, бошқа давлатлар қўшинига аскар бўлиб ёлландилар, Америкадаги мустамлакаларга «оқ қуллар» сифатида олиб борилар эди. Ирланд ерларининг учдан икки қисмини босқинчилар эгаллаб олди, кейин эса уларни бой зодагонлар, савдогарлар, тадбиркорлар сотиб олди. Натижада қўшин қўмондонлари ва бой савдогарлар инглиз лендлордларининг янги қатламини ташкил қилди.

«Янги тур»даги инқилобий армия шу тарзда босқинчи армияга айланди. Шундан кейин Кромвелнинг қўшинлари Карл Інинг ўғли Карл IIни қирол деб эълон қилган Шотландияга бостириб кирди ва уни босиб олди. Шотландиянинг мустақиллиги тугатилди. Янги зодагонлар ва буржуазия назарida Кромвелнинг орзуси амалга ошди. Парламент уни совғаларга кўмиб ташлади.

Кромвелнинг протекторати. Армиядаги олий мансабли офицерлар томонидан ишлаб чиқилган «Бошқарув қуороли» деб аталувчи янги конституцияга мувофиқ давлат ҳокимияти унинг бошлиғи – лорд-протектор, парламент ва Давлат Кенгаши ўртасида тақсимланди. Ўрнатилган юқори сайлов цензи (ийиллик даромад 200 фунт стерлинг ва ундан кўп) парламентдаги ўринларнинг 2/3 қисми катта мулкдорлар томонидан эгалланишини таъминлади. Бу билан катта ер эгалари вакиллигининг кучайишига эришилди. Бироқ Кромвелнинг сиёсати мамлакатда барқарорликни ўрнатмади. Дехқон ижарачилар ерни ололмадилар, уларга жамоа ерларини хам бермадилар. Республика оммавий ишсизлик ва кимматчиликка қарши курашиш учун хам ҳеч нарса қилмади. Узоқ муддатли парламент ўз таъсирини йўқотди. Бой мулкдорлар тартибсизликларга барҳам бера оладиган кучли якка ҳокимият ўрнатиш керак, деган хulosага келдилар. Бунинг учун мос келадиган номзод армия дохийси Оливер Кромвель эди. Эски парламентни тарқатиб юбордилар, Кромвель эса «озод давлат Англия, Шотландия ва Ирландиянинг Лорд-протектори»¹ бўлди. Мамлакатда ижро ҳокимияти тўлиқ протекторга тегишли эди. У барча қуролли кучларнинг олий бош қўмондони, парламентни чақиради ва тарқатиб юборади, ички ва ташки сиёсатни бошқаради, қонун кучига эга бўлган фармонлар чиқаради.

Аслида 1653 йили ҳарбий диктатура кўринишидаги Кромвель протекторати ўрнатилган аксилиңқиlobий тўнтариш рўй берганди. Протектор ҳокимияти инқилобгача қироллик қилган Стюартларнидан анча катта эди. У қирол саройига кўчиб ўтди, у ерда тез-тез қабуллар уюштирас, диний кийиниб олиб, таҳтда ўтиради. «Худо, қиролни ўзинг асрар!» деган дуони «Худо, протекторни ўзинг асрар!» дуоси билан алмаштиришди. Кромвель Узоқ муддатли парламентнинг янги зодагонлар ва буржуазия манфаатларини ҳимоя қилувчи барча қарорларини тасдиқлади. 1655 йил ёзида мамлакат 11 та округга бўлиниб, уларга протектор томонидан тайинланадиган генерал-майорлар бош бўлди. Уларга ҳарбий губернаторларнинг фавқулодда ваколатлари берилди. Мамлакатда байрамлар ва кўнгил очар йиғинлар тақиқланди. Ҳар қандай халқ йиғинлари исён деб баҳоланиб, унинг қатнашчилари қамоққа ташланди.

¹ Протектор – ҳомий, ҳимоячи. Протекторат республика тепасида умрбод лорд-протектор турадиган бошқарув шакли.

лар. Шунингдек, «жаноби олийлари»га (протекторга) билдирилган хурматсизлик учун ҳам қамоққа олинар эди. Якшанба кунига риоя қилиш ҳақидаги махсус фармон шу куни ишлашни тақиқлар ва ибодат қилиш ҳамда муқаддас китоблар ўқишни буюради. Аввалгидай черковга ҳосилнинг «ўндан бир»ини солик сифатида тўлаш сақланиб қолди. Гадо ва дайдиларнинг кўпайиб бораётган тўдаларидан қутулиш учун Кромвель уларни қотиллар ҳамда қароқчилар билан бирга Вест-Индия мустамлакаларига олиб бориб ташлашни буюради. Улар Британия плантацияларида бепул ишлашлари керак эди.

Лорд-протекторнинг асосан инглиз буржуазияси манфаатлари га мос ташқи сиёсати сўзсиз муваффакиятли бўлди. Шотландия ва Ирландиянинг Англия билан битта давлатга сиёсий бирлашуви юз берди. 1654 йили Кромвель Англиянинг денгиз савдосидаги асосий рақиби бўлган Голландияга қарши урушни ғалаба билан якунлади. Голландия 1651 йили Англия республикаси томонидан қабул қилинган «Денгиз қатнови акти»ни тан олди. Унга кўра Англияга денгиз орти товарларини олиб кириш хуқуқига фақат инглиз кемаларигина эга эди. Дания ва Швеция билан қулай савдо шартномаларининг имзоланиши Англия учун Болтиқ денгизига эркин йўл очиб берди. Португалия билан тузилган савдо шарномаси эса бу мамлакатда Англиянинг савдо устунлигини таъминлади. Денгизда хукмронлик учун курашда Испания устидан ҳам ғалаба қозонилди. «Қитъанинг калитлари унинг белида осигуриш турибди», дейишарди протектор ҳақида. Ҳатто қиролнинг ўлими учун Кромвелни кечира олмаган абсолютизмнинг буюк ҳимоячиси ёш Людовик XIV ҳам бир сафар, агар Кромвелни ўзига тенг деб тан олишга тўғри келса, у шундай қилишини айтган ва «У Европада энг кучли одам», деб қўшиб ҳам қўйган эди.

Кромвель Англиянинг янги даврдаги мустамлакачилик сиёсатига ҳам асос солди. У Эспаньола (Куба) ни босиб олиш мақсадида Вест-Индияга ҳарбий экспедиция жўнатди. Куба билан бирга Ямайка ҳам забт этилди.

Виждон эркинлигининг тан олинганлиги ҳам Кромвелнинг хизматидир. У мамлакатга диний эркинликни киритди – католиклар ва яхудийлар ўз динларига эътиқод қиласверишлари мумкин эди. Кромвелнинг ўзи жуда диндор бўлиб, парламент қўшинларининг ғалабасини худонинг иродаси деб тушунтиради.

Англияning ташки қудратига протекторат тузумининг ички заифлиги ҳеч ҳам мос келмас эди. Протекторатнинг молиявий аҳволи халокатли даражага етди. Давлатнинг қарзи ошиб, жуда катта микдор – 2 миллион фунт стерлингни ташкил қилди. Шаҳарликлар Кромвелга арзимаган қарзни ҳам бермай қўйиши. Соликлар тушуми ҳам тўхтаб қолди.

Бу орада протектор 58 ёшга кирди, унинг соғлиги заифлашди, юришидаги дадиллик йўқолди, қўллари қалтираб, қарийб ёза олмай қолди. У ўзини ёлғиз ҳис қилас, давлат арбобларидан ҳеч кимга ишонмасди. 1658 йили ёзда Оливер Кромвель касал бўлди ва шу йил 3 сентябрда вафот этди. Уни инглиз қиролларининг қадимий мақбараси – Вестминстер аббатлигига дағн қилдилар. Протекторлик унинг ўғли Ричард Кромвелга (1626–1712) ўтди. Ричард на ақли ва на иқтидори билан эгаллаган лавозимига мос эмасди. Армия уни тан олмади. Кечагина отаси олдидা тиз чўкишга тайёр турганлар ҳам унга бўйсанишни хохламадилар. Ричард бир неча ой ҳокимият тепасида бўлиб, 1659 йил май ойида истеъфога чиқди.

Англия буржуа инқилобининг асосий босқичлари

1640–1649 йиллар	Монархиянинг ағдарилиши ва фуқаролар уруши
1649–1653 йиллар	Республика бошқаруви
1653–1658 йиллар	Ҳарбий диктатура – Кромвель протекторати
1659–1660 йиллар	Монархиянинг тикланиши

Монархиянинг тикланиши. 1688 йилги тўнтарии. Ричард Кромвелнинг истеъфосидан сўнг расман республика тикланди. Парламент билан армиядаги икки қарама-қарши гуруҳ ўртасида унча узок давом этмаган курашдан сўнг ҳокимиятни Шотландиядаги инглиз армияси кўмондони генерал Монк¹ эгаллади. Кромвелнинг ўлимидан сўнг янги зодагонлар ва буржуазия инқилоб пайтида ўрнатилган тартибни ҳимоя қилувчи монархияни қайта тиклашга қарор қилишган эди. Уларнинг ушбу қарори Монкнинг ҳаракатлари билан мос тушарди. Генерал Монк Лондонда ўз полкини жойлаштириб, давлат тўнтаришини амалга оширди ва тахти қатл қилинган қиролнинг ўғли Карл II Стюарт (1630–1685) эгаллади. Республика ўз умрини яқунлади.

¹ Жорж Монк – 1608–1670 йиллари яшаган инглиз саркардаси, генерал, уни Англияда қироллик ҳокимияти реставрациясининг архитектори деб ҳисоблашади.

1660 йил 14 майда Карл билан Монк ўртасидаги музокаралар натижаси – «Бред декларацияси» имзоланди. Унга биноан қирол инқилоб пайтида янги зодагонлар ва буржуазия кўлга киритган барча имтиёзларни тан олди. Шундай қилиб, Англияда Стюартлар сулоласининг реставрацияси (кайта тикланиши) рўй берди. Бироқ бу энди аввалгидек абсолют монархия эмасди. Қирол парламент билан ҳисоблашишга мажбур эди. Шунга қарамасдан, инқилобгача бўлган тартиблар шакл жиҳатдан тўлиқ тикланди. Лордлар палатаси ҳокимият тизимида яна ўз ўрнини эгаллади. Англиканлик аввалгидай давлат дини сифатида қараладиган бўлди. Тахт ва черковнинг сотилган ерлари яна ўзларига қайтарилди. Инқилоб даври гўёки тарихдан ўчириб ташланди: инқилоб даврида қабул қилинган барча қонун хужжатлари бекор қилинди. Инқилоб йиллари қабул қилинган қонунларнинг ҳатто Реставрация томонидан маъқулланганлари ҳам парламентда кайта тасдиқдан ўтиши керак эди. Лекин қувғин йиллари Стюартларнинг ақлини киритмаганди. Тез орада Карл II ўз мажбуриятларини унуди. Инқилоб иштирокчилари қувғинларга дучор қилина бошланди, баъзи бирларидан қирол ерларини олиб кўйди, ҳокимиятни англикан черкови епископлариiga қайтириб берди. Қирол тез-тез парламентни тарқатиб турди ва бир неча йиллаб уни чақирмади. Йиллар ўтиши билан Карл II католицизмга мойиллик билдира бошлади. У мустамлака ерлар учун курашдаги Англияning энг йирик рақиби Франция билан шартнома имзолади. Тақиқни бузиб, Карл II ҳатто кучли ёлланма армия ҳам тузди.

1685 йили Карл II нинг ўрнига укаси, католик мазҳабига мансуб герцог Йоркский Яков II (1633–1701) номи билан тахтга келди. У тезда парламентни тарқатиб юборди ва Англияда католицизмни тиклашга киришди. 1687 йили 2 апрелда «Диний бағрикенглик ҳақида декларация»ни янгидан қабул қилди. Бу хужжат амалда католицизмни давлат динига айлантираси эди. Бу ҳолат жамиятда унга қарши улкан норозиликни келтириб чиқарди ва турли катламларнинг католицизм хавфига қарши бирлашишига олиб келди.

Парламент раҳбарлари Яков II инглиз тахтидан маҳрум қилишга, тахтга эса Яков IIнинг кизи Марияга уйланган Голландия ҳукмдори Вилгельм Оранскийни ўтқазишга қарор қилдилар. Вильгельм ва Мария протестантлар эдилар ва бу мамлакатда католицизм кучайиши хавфини бутунлай бартараф қилиши керак эди.

1688 йилнинг кузида Вильгельм Оранский инглиз портида кирғоққа тушди ва ўз армияси билан Лондонга йўл олди. Яков II яширинча Францияга қочди. «Шарафли инқилоб» деб ном олган бу сарой тўнтариши парламент билан қироллар ўртасидаги курашга чек қўйди.

Вильгельм ва Мария таҳтга парламент кўйган шартлар бўйича эга бўлишди. Парламент қирол Вильгельм Шга парламентнинг (қонунчилик ҳокимияти) ҳамда қирол ва унинг министрларининг (ижро ҳокимиятининг) ҳуқуқ ва мажбуриятлари мустаҳкамланган «Хукуқлар декларацияси»ни, кейин «Хукуқлар ҳақида билль»ни тақдим қилди. Бундан буён қирол армия ва суд устидан бўлган ҳукмронликдан маҳрум бўлди ва мамлакат молияси парламент ихтиёрига ўтди. Депутатлар учун сўз эркинлиги ва парламентга норозилик хати (петиция) бериш ҳуқуки эълон қилинди. Алоҳида қонун билан ҳукмрон англикан черковига мансуб бўлмаган шахс ва секталар учун диний эркинлик ўрнатилди. «Хукуқлар декларацияси»да ҳалқ номуносиб қиролни таҳтдан ағдариш ва ўрнига бошқасини қўйиш, таҳт ворислиги тартибини ўзгартириш ҳуқуқига эга эканлиги кўрсатилганди.

Парламент билан қироллар ўртасидаги кураш парламент ғалабаси билан якунланди. Шундай қилиб, Англияда кучли парламентли чекланган монархия тузуми – парламентли монархия¹ ўрнатилди.

Вильгельм Оранский голландиялик эди ва унга «бегона юртда қирол бўлиш» осон эмасди. У олийжаноб ва софдил инсон бўлиб, ташки қўринишдан жаҳлдор бўлиб туюларди. Вильгельм Оранский Европада иқтидорли қўмондон сифатида шуҳрат қозонганди. Лекин кўргина инглизлар уни бегона хисоблашар ва унчалик ёқтирамасди. 1689 йили шимолий Шотландиядаги бир қисм ер эгалари Яков Пни химоя қилиб Вильгельм Шга қарши бош кўтардилар. Қўзғолон шаҳарликлар ёрдамида жуда тез бостирилди ва Вильгельм III Шотландиянинг ҳам қироли деб тан олинди.

¹ *Парламентли монархия* – шундай бошқарув тартибики, унда ҳукумат қиролга эмас, парламентга хисоб беради.

Англияда парламентли монархиянинг ўрнатилиши

Парламент	Монарх
Армия ва судни назорат қиласи	Давлат бошлиғи
Қонунлар қабул қиласи	Инглиз черкови бошлиғи
Давлат хазинасини назорат қиласи	Меросий ваколатлар эгаси
Хукуматни сайлайди	Хукуматни тасдиқлайди
Барча учун эътиқод эркинлиги ўрнатилди	

Англия буржуа инқилобининг натижалари ва тарихий аҳамияти. Англия буржуа инқилоби абсолютизмни йўқ қилди. У феодал мулкчиликка зарба берди, аммо тугалланмай қолди, чунки дехқонларни ернинг тўлиқ эгаларига айлантирмади ва уларнинг феодал қарамлигини йўқотмади.

Умуман олганда, инқилоб Англияда капиталистик муносабатларнинг бундан кейинги ривожида ҳал қилувчи аҳамиятга эга бўлди. Ҳокимият тепасига келган зодагонларнинг бир қисми янги зодагонлар ва буржуазия билан яқин боғланган эди. Парламент орқали улар янги, буржуача турмуш тарзининг ривожланишига кўмаклашувчи бир қатор қонунларни киритдилар. Парламент саводогарлар манфаатларидан келиб чиқиб, савдо ривожига халақит бेरувчи тўсиқларни олиб ташлади. Ундан кейинги йилларда саноат тараққиётини тўхтатиб турган хунармандларнинг цех бирлашмалири ҳам йўқ қилинди.

XVII асрдаги Англия буржуа инқилобининг ғалабаси натижасида қишлоқ ҳўжалигида ҳам капиталистик муносабатлар тез ривожлана бошлади, саноат ишлаб чиқаришида тўйтариш бошланди. Жамиятда ҳам ўзгариш рўй берди – саноат буржуазияси ва ишчилар синфи ривожлана борди.

Мамлакатда ҳуқуқий давлат¹, фуқаролик жамияти² таркиб топа бошлади. Англия буржуа инқилоби, унинг республика тузуми, ҳалқ бошқаруви, барчанинг қонун олдида тенглиги каби ғоялари бошқа Европа мамлакатлари ривожига катта таъсир кўрсатди. Инқилоб эъ-

¹ Ҳуқуқий давлат – фуқароларнинг ҳуқуқ ва эркинликлари ҳамда уларнинг химояси амалда таъминланган давлат.

² Фуқаролик жамияти – озод, мустакил ва тенг ҳуқуқли инсонлардан ташкил топган жамият.

лон қилган сиёсий тамойиллар ва ўрнатган иқтисодий тартиб янги индустриал цивилизацияга асос солди.

XVIII асрда Англия

XVIII асрда Англияning давлат тузуми. XVIII асрда ҳокимият тўлалигича икки палата – лордлар палатаси ва жамоа палатасидан иборат парламент кўлида эди. Жамоа палатаси ахоли томонидан сайланса-да, мамлакатнинг 5,5 млн аҳолисидан фақат 250 минг кишигина сайлов хукуқига эга эди. Кўпгина йирик саноат шаҳарлари парламентда ёки бутунлай ўз депутатларига эга эмас ёки депутатлар сони жуда кам эди. Масалан, 500 минг аҳолига эга бўлган Лондон шаҳри 4 та депутатлик ўрнигагина эга эди. Аср охирига келиб қиролнинг парламентда кўпчилик ўринга эга бўлган партиялар ва килларидан вазирларни тайинлаши одат тусига кирди. Бу пайтда парламентда ўринга эга бўлган асосий партиялар иккита – тори ва виги эди. Улар бир-биридан нимаси билан фарқ қиласи.

Торилар қиролнинг хукуқ ва манфаатлари ҳамда мавжуд тартибларнинг бузилмаслигини қувватларди. Вигилар эса парламент хукуқларини фаол ҳимоя қиласиди ва мамлакат ҳаётида муҳим иқтисодий ва сиёсий ислоҳотлар ўтказилишининг тарафдорлари эдилар. Аср бошларида бу партияларнинг энг кўзга кўринган арбоблари герцог Мальборо¹ (виг) ва виконт Болингброк² (тори) эди. Кўпчиликнинг қувватлашидан маҳрум бўлган партия ҳокимиятга бўлган хукукини ҳам йўқотар ва хукumat истеъфога чиқар эди.

1707 йили парламент Англия билан Шотландия ўртасидаги унияди қонунлаштириди. Энди мамлакат Буюк Британия деб атала бошлиди. Шотландия парламенти тугатилиб, унинг депутатлари Англия парламенти таркибиغا қўшилди.

1716 йили парламент ваколатининг уч йиллик муддати ўрнига олти йиллик муддат ўрнатилди. Бу билан мамлакатни идора қилишда профессионал бошқарувчилар қатламишининг шаклланишига кенг йўл очилди.

1714 йили Англия таҳтида турган Оранскийлар сулоласининг охирги вакили вафот этди. 1701 йили қабул қилинган «Тахт ворис-

¹ Мальборо, Жон Черчилль, герцог, 1650–1722 йиллари яшаган, инглиз давлат арбоби.

² Болингброк, Сент-Жон Генри, виконт, 1678–1751 йиллари яшаган, инглиз давлат арбоби.

лиги тўғрисида билль» Стюартларнинг таҳтга қайтиши учун имко-
ният қолдирмаган эди. Билль Яков IIning қизи Аннани таҳт вориси
деб эълон киласи ва унинг вафотидан сўнг (агар у фарзандсиз бўлса)
таҳт Яков I неварасининг авлодлари бўлган ганноверликлар сулола-
сига ўтиши тартибини ўрнатади. Судъяларни тайинлаш ва ишдан
олиш парламент ихтиёрига ўтади. Киролдан ташқари яна бир ва-
зир (одатда қонун лойиҳасини парламент муҳокамасига киритган
вазир) томонидан ҳам имзоланган қонун актларининг ҳақиқийлиги
белгилаб кўйилади. Вазирларнинг парламент олдида масъуллиги
принципи киритилади. Шундай қилиб, давлат сиёсатининг муҳим
масалаларини ҳал қилиш бўйича амалда парламент устуворлиги
ўрнатилади.

Яков II Стюартнинг таҳтга келишидан кўркиб (у католик эди)
ва юқорида айтилган «Таҳт ворислиги тўғрисида билль»га асосла-
ниб парламент ганноверлик немис князлари сулоласидан, Яков I
нинг аждоди Георг I (1660–1727) ни Англия таҳтига таклиф қиласи.
Ганноверликлар протестантлар эди ва инглиз таҳтини бутун XVIII
аср давомида ва XIX аср бошларигача эгаллаб турдилар. Бу сулола-
дан бўлган дастлабки қирол Георг I инглизча сўзлашмас ва дав-
лат ишларига аралашмас эди. Ганноверликларни виглар қўллаб-
куvvatlaganligi туфайли Георг I ҳам, Георг II (1683–1760) ҳам шу
партияга суянарди. Амалда ҳокимият виглар партиясининг Роберт
Уолпол¹ сингари йўлбошчилари қўлида эди. Р. Уолпол 20 йилдан
ортиқрок (1721–1742) виглар партиясига, парламентга, ҳукумат ва
мамлакатга бошчилик қилди. Унинг тимсолида вигларнинг харака-
терли томонлари ўз аксини топди: бебурдлик, тадбиркорлик, уста-
монлик ва иқтисодий фаоллик. Уолпол олиб борган нисбатан тинч
ташқи сиёsat вигларнинг асосан мустамлакалар хисобига бойиб
бораётган қисмини қаноатлантирумас эди. Улар янги ерларни босиб
олишни, янги бозорларни эгаллашни талаб қиласарди. Мухолифат-
га Катта Уильям Питт² бошчилик қилди. У мустамлакалар талон-
чилари оиласидан эди. Уолпол ҳукуматнинг сиёсати парламентни
қаноатлантирумай қаттиқ танқидга учрай бошлагандан бутун кабине-
ти билан истеъфога чиққан биринчи бош министр бўлди. 1756–1761
йиллари бош министр лавозимини Катта Питт эгаллаб турди.

¹ Роберт Уолпол, граф, 1676–1745 йиллари яшаган, инглиз давлат арбоби.

² Уильям Питт (катта), граф Четэм, 1708–1778 йиллари яшаган, инглиз давлат арбо-
би.

1760 йили ҳокимиятга келган Георг III (1738–1820) отаси ва бо-босидан фарқли ўлароқ ҳокимиятни амалда бошқаришга ҳаракат килади. У вазирларни шахсан тайинлаш ҳукуқидан фойдаланиб, бу лавозимларга қиролга содик ва асосан бўйсунувчи кишиларни танлайди. Бу кишилар «қиролнинг дўстлари» номини олиб, 60–70 йиллар уларнинг сиёсий террор ва бошбошдоқлик йиллари бўлди.

Георг III нинг сиёсатини ториларнинг ҳам бир қисми қувватлайди, чунки бу пайтга келиб ториларнинг асосий қисмини ҳали ҳам сквайрлар ташкил қилаётган бўлса-да, иқтисодий ўзгаришлар туфайли улар фаолиятининг характеристи бир қадар ўзгарган, яъни уларнинг кўпчилиги фойда олишнинг буржуача усусларини ўзлаштириб олишган эдилар.

1773 йили ҳукуматга Кичик Питт¹ бошчилигидаги янги торилар келди. Кичик Питтнинг парламентни ислоҳ қилиш борасидаги ҳаракатлари депутатларнинг қаршилигига учради. Шунда Кичик Питт парламентни тарқатиб юборди ва янги сайловлар эълон қилиб, унда ғалаба қозонди. Бироқ Кичик Питтнинг парламент ислоҳоти қирол ва виглар қаршилиги туфайли амалга ошмади. Кейин эса бошланиб кетган Француз инқилоби ва унинг оқибатлари ислоҳотга тўсқинлик қилди...

Ташқи сиёсат. Англияning ташқи сиёсатида иккита бош йўналиш бор эди: биринчидан, китъадаги бирон-бир давлатнинг кучайиб кетишига йўл қўймаслик ва иккинчидан, янги мустамлакаларни эгаллаш. Англияning бу йўлдаги бош рақиби Франция эди. Иккала давлат ўртасидаги испан таҳти учун бўлган уруш (1701–1714) Англия учун фойдали бўлган Утрехт сулҳи билан якунланди. Англия Гибралтар, Минорка оролига, Францияга қарашли бўлган Гудзон кўрфази қирғоқларидаги кенг ерларга, испан мустамлакалари билан савдо қилиш ҳукуқига ҳамда Америка мустамлакаларига қуллар етказиб бериш ҳукуқи – «асиенто»га эга бўлди.

Аввалроқ Англия Португалияning иқтисодий ва сиёсий тобелигига эришган эди. Испаниядан Ямайка оролини ҳали протекторат пайтидаёқ тортиб олди, Испания ва Голландия билан рақобат ҳам Англия фойдасига ҳал бўлди.

Бутун XVIII аср давомида Англия Франция билан қизғин кураш олиб борди. Ўша давр кишилари бу курашни «иккинчи юз йиллик уруш» деб атадилар. 40-йилларда савдо рақобати Америкага қўчиб,

¹ Уильям Питт (кичик) – 1759–1806 йиллари яшаган, инглиз давлат арбоби.

Канада учун очик урушга айланди. 1760 йилга келиб инглизлар Франциянинг Канададаги асосий таянч пунктлари – Дюкен, Квебек ва Монреални эгаллаб олдилар, 1763 йили эса французларни Канададан умуман сиқиб чиқардилар.

Хиндистондаги кураш эса шиддатлироқ бўлиб, узокроқ давом этди. Англиянинг Ост-Индия компанияси ҳали XVII асрдаёқ Бомбей (Мумбай) ни эгаллаб, бир нечта мустаҳкамланган портларни барпо қилдилар. Французлар ҳам бир нечта денгиз базалари ва мустаҳкамланган пунктларни қурдилар. Бобурийлар империяси қулагандан сўнг пайдо бўлган хинд князликлари ўртасидаги зиддиятдан фойдаланиб, иккала давлат ҳам уларнинг ички ишларига фаол аралаша бошлайди. Французлар билан инглизлар ўртасида очик уруш XVIII аср ўрталарида бошланиб, инглизлар Хиндистоннинг шимоли-шарқи – Бенгалияни тортиб олди. Кейинчалик эса Бенгалия, Бихар, Мадрас ва бошқа бир қатор вилоятлар ҳам инглизлар қўлига ўтди. Қатор йирик хинд князликлари Англияга қарам бўлиб қолдилар. Франция эса Хиндистонда бешта пунктни, уни ҳам мустаҳкамламаслик шарти билан қўлда ушлаб қолди.

Шундай қилиб, XVIII асрнинг 60-йилларидаёқ Буюк Британия қўпгина мустамлакаларга эга бўлди: Шимолий Америкада 13 та штат, Канада, Ньюфаундленд ороли, Кариб денгизидаги ороллар, Хиндистоннинг бир қисми ва Африкадаги факториялар шулар жумласидан эди.

Шу тариқа Буюк Британия мустамлакачилик империясига асос солинди. Англия «денгиз хукмрони»га айланди.

Қишлоқ хўжалигидаги ўзгаришлар. Англияда икки юз эллик йил ичида юз берган «аграр инқилоб» оқибатида ерлар йирик мулкдорлар қўлида тўпланди, дехқонлар йўқолди, қишлоқ хўжалигига ёлланма ишчилар асосий куч бўлиб қолди. XVII аср 70-йилларига келиб анъанавий ер эгалари – дехқонлар қарийб қолмади.

Кироллик ерларини ва ирланд дехқонларининг ерларини сотиб олган янги мулкдорлар ижаравчиларни жуда юқори ижара нархи билан сиқиб қўйдилар. Лендлордларнинг ўзлари эса хўжалигини юритиши мас эди. Ерни улар энди йирик тадбиркорларга ижарага бе-рар, улар эса ёлланма ишчилар меҳнатини фаол қўллар эди. Ўша даврдаги инглиз қишлоғи учун характерли бўлган пирамида – лендлорд, ижаравчи фермер, батраклар – шаклланиб келаётган эди.

XVIII асрдаги Англия қишлоқ хўжалиги шаҳарларни ва саноат кўрғонларини муваффакият билан бокарди.

Йирик ер эгалигининг шаклланиши дон ишлаб чиқаришни ошириш учун шароит яратди, бу эса дон нархининг тушишига олиб келди. Шаҳар аҳолисининг ўсиши чорва маҳсулотларига, хусусан гўштга бўлган талабни оширди ва фермерлар чорвачилик билан фаол шуғулдана бошладилар. Озиқ-овқат учун ишлатиладиган ва қумлөк ерларда ҳам яхши ўсадиган экила бошланди ва бу авваллари ташланди бўлиб ётган ерларнинг ҳам ўзлаштирилишига олиб келди. Марказлашган мануфактураларнинг сони ошиб, шаҳар билан қишлоқ ўртасида савдо ривожланди. Ҳатто савдо янгиликларини ёритадиган газеталар ҳам пайдо бўлди. Тобора фойдали бўлиб бораётган савдо манфаатлари учун мамлакатда ариқлар қазилди, янги йўллар ва тош кўприклар қурилди.

Саноат тўнтириши. XVIII аср ўрталарига келиб Англияда саноат тўнтириши учун, яъни мануфактура ишлаб чиқаришидан машиналар кенг қўлланиладиган фабрика ишлаб чиқаришига ўтиш учун шароит етилди. Бу ҳол мамлакатнинг бутун олдинги ривожи билан тайёрланган эди. Бу биринчидан, якунланган аграр инқилоб жуда кўп бўш ишчи кучлари заҳирасини яратди. Аҳолининг ўсиши тезлашди. 1700 йили мамлакат аҳолиси 6 миллион, 1790 йили эса 8,2 миллион кишини ташкил қилди. Ортиқ ишчи кучининг ҳаммаси саноатда ёлланиб ишлашга тайёр эди. Иккинчидан, маҳсулотни сотиш бозори шаклланди. Шаҳарлар сони ва аҳолиси ўсиб борди. Қишлоқлардаги бой ижаракиларнинг асбоб-ускуна ва ўғитга бўлган эҳтиёжи ҳам ошиб борди. Учинчидан, мамлакат ичкарисида ер олди-сотдиси, мустамлакаларни талаш ва қул савдоси натижасида савдогар ва тадбиркорлар қўлида фабрикалар қуриш ва машиналар харид қилиш учун зарур бўлган катта маблағлар пайдо бўлди. Машиналар ихтиро қилиш эса жамиятнинг ўзига хос иқтисодий эҳтиёжига айланди. 1761 йили «Санъат ва саноатни рағбатлантириш жамияти» томонидан йигириув машинаси қашф этган кишига катта мукофот ваъда қилинган эди.

Саноат тўнтириши дастлаб тўқимачиликда бошланди. Бунинг сабаблари тўқимачиликда ишлаб чиқаришни чегаралайдиган цехларнинг йўқлиги, арzonлиги ва чидамлилиги жиҳатидан хинд матолари билан беллаша оладиган маҳсулотта эҳтиёжнинг ошиб бораёт-

ганлигига эди. Бу эҳтиёжни қондиришга фақат машиналар ёрдами-дагина эришиш мумкинлигини кўпчилик яхши тушунарди.

Тўқувчи ва механик Жон Кей (1704–1764) 1733 йили тўқув дастгоҳи ихтиро қилди. Авваллари тўқувчининг ўзи ғалтак ипла-ри орасидан ўрмакни ўтказиб туришга мажбур эди. Энди ўрмак оёқ қурилмасини босиш орқали ўтказиладиган бўлди. Бу ихтиро тўқиши жараёнини 2 марта тезлаштириди, лекин энди йигирилган ип танқислиги пайдо бўлди.

1765 йили ланкаширлик тўқувчи Жеймс Харгривс (туғилган йили номаълум – 1778) бир йўла 15–18 йигиргич ишлайдиган ме-ханик урчук ихтиро қилди. У бу урчукни ўз қизининг номи билан «Женни» деб атади. Машина арzon, қурилиши жуда содда эди ва шу сабабли тезда бутун дунёга тарқалди.

1767 йили дурадгор Хейс сув ғилдираги (чарх) билан ҳаракатга келтириладиган машина яратди. Бундай машина юксак унумдор-лиги билан ажralиб турарди. Йигирувдаги ютуқлар механик тўқув дастгоҳлари яратилишини келтириб чиқарди. Эдмунд Картрайтнинг (1743–1823) янги дастгоҳи тўқувчилик ишлаб чиқариши унумдор-лигини 40 марта оширди.

Фабрикалар – машинали ишлаб чиқаришнинг бутун бир тизими пайдо бўла бошлади. Сув двигателларидан фойдаланиш фабрика-ларни факат дарё бўйларидағина қуришга мажбур киларди. Жеймс Уатт¹ томонидан универсал буғ машинасининг яратилиши эса бошқа ерларда ҳам фабрикалар қуриш имкониятини берди.

XVIII аср охирлари бошқа муҳим ихтиrolар билан ҳам ажralиб туради. 1784 йили металлург Корб² прокат станини³ ихтиро қилди, Модсли⁴ эса токарлик дастгоҳини яратди.

Янги техника саноатнинг янгидан ташкил этилишига олиб келди. Мануфактура ўрнини фабрика эгаллади. Саноат тўётариши меҳнат унумдорлигини улкан юксалишга олиб келган ҳақиқий са-ноат инқилоби эди.

Натижада XVIII аср охирига келиб саноат ишлаб чиқаришининг кескин даражада ўсиши юз берди. Чўян ишлаб чиқариш 1740 йил-

¹ Жеймс Уатт – 1736–1819 йиллар яшаган, шотланд иженери, ихтиорчи-механик, Қироллик жамияти, Париж фанлар академияси аъзоси. Кучланиш ўлчов бирлиги Ватт унинг номидан олинган.

² Генри Корб – 1740–1800 йиллари яшаган, инглиз инженер-ихтиорчиси.

³ Прокат стани – металлни ёйиб, шаклга солувчи қурилма.

⁴ Генри Модсли – 1771–1831 йиллари яшаган, инглиз инженери, саноатчи-тадбиркор.

ги 17350 тонна ўрнига 1796 йили 125079 тоннани ташкил қилди, кўмир қазиб олиш 1700 йили 2,6 млн тонна бўлса, 1795 йили 10 млн тоннага етди. Янги саноат районлари пайдо бўлди. Ланкашир тўқимачилик саноатининг марказига, Йоркшир, Уэльс, Шотландия – кўмир қазиб олиш марказларига айланди.

Ишчиларнинг аҳволи. Фабрика ишчилар ҳаётини ижобий томонга ўзгартиридими? Кўпинча фабрикада бутун оила – отаси, онаси, болалари бирга ишлашарди. Аёллар ип йигирувчи бўлиб ишлашарди, болаларга эса ипларнинг узилган жойларини улаш ёки чиқиндиларни чиқариш топшириларди. Эркаклар ҳам шу ернинг ўзида ишлардилар – улар йигирав ёки машиналарни созлашарди.

Фабрика оила аъзоларини бир-биридан ажратмаган ҳолда уларнинг ҳаёт тарзини ўзгартириди. Тарихда биринчи бор иш вақтининг аниқ жадвали пайдо бўлди. Душанбадан шанбагача фабрика кўнғироғининг эрталаб соат 6 ёки 7 да жаранглаши иш куни бошланганидан дарак берарди. Сув ғилдираклари ва машиналар тушгача олти соат ва тушдан кейин олти соат айланарди. Киш ва кузнинг совук кунларида эрталаб ишни кечроқ бошлиш имконияти йўқ бўлди; сешанбадан шанбагача ғайрат қилиб ишлаганлик учун бериладиган яна бир дам олиш куни – «муқаддас душанба» ҳам бекор килинди.

Ишчилар қандай шароитда яшар эдилар? Фақат баъзи бир фабрика эгалари, масалан, Ричард Аркрайт¹, ишчилар учун уйлар курдирди. Лекин бу жуда камдан-кам учрайдиган ҳол эди. Ишчилар уйларини оммавий қуриш асосан XVIII аср иккинчи чорагидан бошланди.

Кўмир шахталари яқинида қурилган янги фабрика шаҳарларида оиласалар катта эски уйлардан бир-икки хонани ижарага олишар ёки муттаҳам пудратчилар қурган юпқа деворли ва зах полли, арzon уйлардан бирига кўчуб ўтардилар. Бу уйларда шароит жуда ёмонлиги сабабли улар халқ орасида «ишчилар учун Бастилия» номини олган.

Корхона хўжайнларининг аксарияти фабрикаларда қатъи қоидалар зарурлигига сидқидилдан ишонишарди. Кўплаб жарималар бор эди – кечиккани учун, сўкиниш учун, хунук кўриниши учун. Лекин фабрикантларнинг камдан-камигина ишчиларига оғир хаётларини енгиллатишида ёрдам берарди. Ўша Аркрайтнинг худди

¹ Ричард Аркрайт –1732–1792 йиллари яшаган, тўқимачилик соҳасида йирик тадбиркор, ишчиларга ҳомийлиги билан машҳур бўлган.

ўзи ишчилариға унча катта бўлмаган ижара ҳақи эвазига ер майдонлари ажратди, энг яхши ишчилариға эса мукофот тариқасида согин сигирлар берди. Айни пайтда фабрикаларда аёллар ва болалар меҳнатидан фойдаланиш оммалашади. 1788 йили Англияning тўқимачилик саноатида 26 минг эркак, 31 минг аёл ва 35 минг болалар меҳнат қилган. Иш куни 14–17 соат давом этарди. «Ёрдамичи ишчилар» деб ҳисобланадиган болаларга одатда қўпол муомала, сифатсиз овқат ва оғир меҳнат тегарди, холос. Улар 5–8 ёшларидан ишлай бошлишарди. Ишчилар, айниқса болалар ўртасида ўлим даражаси жуда юкори эди.

Ёмғирдан кейинги қўзикориндай кўпайиб бораётган фабрикаларда ишчилар соғлиги ва меҳнатининг ҳеч қандай муҳофазаси мавжуд эмасди.

Янги ихтириолар. XVIII асрда Англияда чўян олишнинг янги усууларини, куйиш ишини, дастгоҳлар ихтиро қилишни ривожлантиришга улкан хисса қўшган фабрика эгаларининг бутун бир суолалари пайдо бўлди. Улар орасида Дарбилар ва Уилкинсонлар суолалари айниқса машҳур эди.

Абрахам Дарби (1677–1717) мураккаб шаклдаги буюмларни, масалан, тувакларни куйиш имконини берадиган чўян куйишнинг янги услубини ихтиро қилди. У тошкўмирдан кокс олиш усулини ҳам яратди. Тошкўмир уюми токи майда, ялтироқ, қаттиқ зарраларга айланмагунча секин қиздирилади. Бу худди ўша темир рудаси билан бирга домна печига киритиладиган «кокс» (коксли қолдик) эди. Кокс ёғоч кўмирга ўхшаб уқаланиб кетмас ва печга кўпроқ руда ортиш имконини берарди. Дарби печнинг ҳажмини ва ҳаво оқимини ошириди. Натижада печда юксак ҳарорат ҳосил бўлиб, чўян суюқрок бўлар ва уни мураккаб шаклларда куйиш мумкин бўларди. Дарбининг буюмлари: туваклар, дазмоллар, печка ва каминлар учун қисмлар бутун мамлакат бўйлаб тарқалди.

Абрахам Дарбининг ўлимидан сўнг иш унинг ўғли Абрахам Дарби II га (1711–1763) ўтди. У Ньюкомен машинаси¹ ёрдамида доима печнинг парракларини ҳаракатга келтирувчи сув чархи устидага жойлашган завод ҳовузига сув чиқарди. Бу ҳатто ариқлар куриб қолганда ҳам печга доимий ҳаво берилишини таъминлади. Фабрика марказий графликларда талаб катта бўлган сифатли қўйма пўлат ишлаб чиқарарди.

¹ Ньюкомен машинаси – шахталардан сувни чиқаришда ишлатиладиган буғ машинаси.

Абрахам Дарби III (1750–1791) заводни 1768 йилдан 1781 йилгача бошқарди. Унинг даврида дунёдаги биринчи чўян кўприкнинг қисмлари қуийлди. 1779 йили кўприкнинг қисмлари мурватлар билан мустаҳкамланди ва кўприк Айронбриж яқинидаги Северн дарёсининг икки кирғоғини бирлаштириди.

Жон Уилкинсон (1728–1808) чўян қуиши заводларини бошқарди. 1774 йили у чўян бўллаги марказида куролнинг ўқ чиқарадиган тешигини очиш имконини берадиган токарлик дастгоҳини ихтиро қилди. Келгуси йили Англия билан унинг Америкадаги мустамлакалари ўргасида жанг бошланиб кетганида тўпларни ана шу усулда ясай бошладилар.

1775 йили Жеймс Уатт ўзининг буғ машинасини ихтиро қилди ва бу двигателлар учун цилиндрларни Уилкинсоннинг қуиши заводларида ясай бошладилар.

Уилкинсоннинг ўзи ҳам ўз ишхонаси учун бир неча буғ машиналарини сотиб олди. 1788 йили у Парижнинг сув таъминоти учун қуийлган чўян қувурларни тайёрлаб берди (қувурларнинг узунлиги 40 миль эди).

Англияда Уилкинсонни «чўян жинниси» дейишарди, чунки у чўянни қўллайдиган янгидан-янги соҳаларни тинимсиз изларди. Уилкинсон чўян кема ясашга уриниб кўрди, унинг қиёфаси туширилган чўян тақинчоклар марказий графликларда танга сифатида қўлланарди. Уилкинсон 1808 йили вафот этди. Васиятига кўра уни чўян тобутда кўмишиди.

Луддчилик ҳаракати. Ишчилар хар доим ҳам янги турмуш тарзи ва саноат инқилоби пайтида ташкил топган меҳнат шароитини итоат билан қабул қилган эмас. Уларни хўжайинлар зулмидан химоя қиласидиган конунлар йўқ эди. Шунинг учун улар ўз кураш воситаларини қўллашга мажбур бўлди. Аҳолининг ўсиши ва ёлланма меҳнатнинг жорий қилиниши натижасида ишсизлик ортиб, ишчиларнинг сиёсий онги ҳам ўсиб борди.

Саноат тўнтариши даврида ишчиларнинг биринчи оммавий ҳаракати – машина ва дастгоҳларни бузувчилар ҳаракати пайдо бўлди. Бу йилларда маошлар қисқариб кетди, ишсизлик кўпайди. Кўпгина ишчилар ўз кулфатларига, ўзларининг ачинарли аҳволларига машиналарни айбдор деб ҳисоблардилар. Шу сабабли машиналарни бузиш ҳаракати кенг кўламда авж олди. Бу ҳаракат

иштирокчилари гўёки биринчи бўлиб дастгоҳ тузган афсонавий ишчи Нэд Лудд номи билан ўзларини луддчилар деб аташдилар.

Тобора кенг қулоч ёйиб ва авж олиб кетаётган луддчиликдан қўрқиб кетган тадбиркорлар парламентдан ҳимоя қилишини талаб қилди ва парламент 1769 йили машиналарни бузганлик учун ўлим жазоси бериш ҳақида қонун қабул қилди. 40 та луддчи қатл қилинди.

Буюк инглиз шоири Жорж Байрон бу воқеалар хусусида афсус билан ёзган эди:

*Ажабмасми, очлик меҳмонга келиб,
Қашиоқ жон ҳолатда фарёдлар урса.
Дастгоҳ синдирганнинг суяги синиб,
Ҳаёт пайпоқдан ҳам арzonроқ турса.*

Инглиз халқи учун қишлоқ хўжалиги ва саноатдаги тараққиёт, савдодаги биринчилик жуда қимматга тушди.

* * *

Шу тариқа Англияда юз берган инқилоб туфайли ҳокимият феодаллар қўлидан буржуазияга ўтди, феодал муносабатлар ва уларнинг қолдиклари йўқ қилинди. Капитализм тараққиёти учун шарт-шароитлар пайдо бўлиб, ишчиларнинг шахсий озодлиги, капиталнинг тўпланиши, ички бозорнинг ривожланганлиги, мустамлакалардан кўплаб бойликларнинг ташиб келиниши, мануфактурадан фабрика ишлаб чиқаришига ўтиш, четга капитал чиқаришнинг бошланиши кабилар жамиятнинг киёфасини тубдан ўзгартириб юборди. Янги техник ихтиrolар одамларнинг меҳнат шароитларини яхшилашга, ишлаб чиқариш самарадорлигининг ошишига олиб келди. Кишиларда бойлик йиғиш, муносиб ҳаёт кечириш ҳисси кучайди.

XVIII аср охирига келиб Англия дунёнинг биринчи саноат мамлакатига айланди.

VI боб учун саволлар

1. Инқилоб арафасида Англия тараққиётининг ўзига хос томонлари нималарда номоён бўлди?
2. Англия буржуа инқилобига қандай ижтимоий омиллар сабаб бўлди?

3. Англия буржуа инқилобининг қандай мафкуравий таянчи мавжуд эди?
4. Англияда республиканинг ўрнатилиши. Кромвель протекторати қандай бошқарув шакли эди?
5. Англияда монархия тикланишининг сабаблари нимада? Парламентли монархия қандай бошқарув шакли?
6. Англия буржуа инқилоби туфайли қишлоқ хўжалигида қандай ўзгаришлар юз берди?
7. XVIII аср Англия тараққиётининг асосий босқичлари нималарда намоён бўлади?
8. Англия буржуа инқилобининг халқаро аҳамияти нимада эди?

VII БОБ. МАЪРИФАТЧИЛИК АСРИ

Ижтимоий-сиёсий ғоялар ривожи.

XVIII аср Европа тарихига Маърифатчилик асли номи билан ҳам кирди. Илгари фақат тор доирадаги олимларнинг имтиёзи бўлган илмий билимлар университет ва лабораториялар чегарасидан чиқиб, кенг жамоатчиликнинг мулкига айланиб борди.

Энг прогрессив кайфиятдаги, маълумотли ёзувчилар, рассомлар, файласуфлар инсонни эзаётган, унинг қобилиятини чеклаётган ва қадр-қимматини оёқ ости қилаётган ҳамма ҳолатларни кескин танқид қилиб чиқдилар. Улар черков таълимоти ва умуман диннинг ўзини танқид қилишди, абсолютизмга ва барча феодал тартибларга қарши чиқдилар, феодал турмуш тарзининг умрини ўтаб бўлган барча иллатларига қарши кураш бошладилар. Маърифатпарварлар эътиқодни онг, динни эса фан фойдасига чеклашга, ахлоқни дин қобигидан озод этишга, «онгнинг табиий нури»ни жамиятни мукаммалаштиришнинг асосий воситаси деб эълон қилишга итилдилар. Улар инсоннинг онгини, фикрини уйғотиш лозим, ақлни фаол ишлашга мажбур қилиш керак, деб ҳисоблашарди. XVIII аср донишмандларини инсоннинг туганмас куч ва имкониятларига буюк ишонч, оммани кенг миқёсда маърифатли қилиш заруратини тушуниш ҳисси ажратиб турарди.

Маърифатчилик ғояларида кучайиб бораётган ва мустаҳкамланаётган буржуазиянинг руҳий изланишлари ва фалсафий қарашлари ифода этилганди. Маърифатчилик даврнинг буюк ғоявий ҳаракати эди. Унинг қатнашчилари тарихда «маърифатпарварлар»

номини олдилар. Улардан энг машҳурлари Вольтер, Монтескье, Руссо ва Смит эди.

Вольтер. Вольтер таҳаллуси билан ёзган Франсуа Жан Мари Аруэ (1694–1778) ажойиб файласуф олим, публицист, шоир, драматург ва сиёсий арбоб эди. У Париждаги ўртача амалдор оиласида дунёга келди. Ўз асарлари учун бир неча марта (1717 й. ва 1725 й.) Бастилияга қамалди, Франциядан Англияга кетишга мажбур бўлди.

Ўзининг ажойиб асарлари билан Вольтер зулмат ва феодал тартибларнинг муросасиз душмани сифатида майдонга чиқди. Донишманд энг адолатли тузумни инсоннинг эркинлиги, тенглиги ва мулк хукуки билан боғлади.

Бундай адолатли жамиятни қандай қуриш керак? Қирол ҳокимияти ўтказадиган ислоҳотлар орқали жамиятни тинч йўл билан қайта қуриш – мана «онг хукмронлиги»га олиб борадиган йўл, дер эди у. Вольтер «яхши қирол самодан ерга берилиши мумкин бўлган энг ажойиб совға» деб ҳисобларди. «Одамлар учун энг катта баҳт, – деган эди у, – хукмдорнинг файласуф эканлиги». Вольтер маърифатли монархия тарафдори эди. Маърифатли монарх фақат хоҳласа бўлди, жамиятда эркинлик, тенглик ва хусусий мулк хукмрон бўлади, деб ўйларди у. Шунинг учун ҳам Вольтер Фридрих II, Екатерина II, Швеция, Дания ва Польша қироллари билан хат ёзишар ва дўстона муносабатга эга эди. Қироллар эса унинг машҳурлигидан ва номидан ўз манфаати йўлида фойдаланишга уринишарди. Людовик XV Вольтерни ўзининг воқеанависи қилиб тайинлаган эди.

Вольтернинг черков билан муносабатлари ҳам мураккаб эди. «Алдовнинг эски биноларини вайрон қилинг!», «Лаънатини янчиб ташланг!» – деб чорларди Вольтер, католик черковини назарда тутиб. Аммо донишманд черковни фош этар экан, Худонинг мавжудлигини ва диннинг халқ учун зарурлигини тан олар эди. «Агар худо бўлмаса эди, уни ўйлаб топиш лозим бўларди», – деб ёзган эди Вольтер.

Ўлими олдидан донишманд католик одати бўйича дуо ўқиши ва тавба қилишни истади, аммо черков уни диний расм-русум билан кўмишга рухсат бермади. Дўстлари уни яширинча чекка қишлоқлардан бирида кўмишга мажбур бўлишди.

Француз инқилоби йилларида Вольтернинг хоки Франциянинг буюк кишилари кўмилган мақбара – Пантеонга кўчирилди ва қабр

тошига «Инсон онгини шарафлаган ва уни озод бўлишга ўргатган шоир, тарихчи, файласуф» – деб ёзиб қўйилди.

Вольтердан фалсафий кисса ва романлар, «Диний бағрикенглик хақида рисола», «Фалсафий лугат» асарлари мерос бўлиб қолди ва уни маърифатчиликнинг бош гоявий раҳнамосига айлантирди.

Монтескье. Шарль Луи де Секонда барон де Монтескье (1689 –1755) француз халқи фаҳрланадиган маърифатчилар қаторида ўз салоҳияти жиҳатидан энг олдинги ўринлардан бирини эгаллайди. Бой оиласдан чикқан, ўз даври учун ажойиб маълумот олган Монтескье 30 ёшга ҳам тўлмасдан Бордодаги парламент президенти бўлди.

Орадан 10 йил ўтгач у бу вазифадан истеъфога чиқди ва 3 йилни Европа бўйлаб саёҳатларда ўтказди. Ватанига қайтиб келгач, Монтескье фан билан шуғулланди ва адабий машғулотларга берилди.

Монтескье деспотизмнинг барча кўринишларига қарши муросасиз кураш олиб борди. У эркинликнинг оташин тарафдори эди. Лекин унинг фикрича, эркинлик дегани қўнгил истаганини қила олиш имконияти эмас. Эркинлик қонунда тақиқланмаган барча нарсаларни қила олиш хукуқидир. Бунинг учун эса ҳокимият қонун чиқарувчи, ижро этувчи ва суд ҳокимиятига қатъи ажратилиши зарур, деб хисоблайди Монтескье. У монархнинг асосий иши қонунлар ижросини таъминлаш, ижро ҳокимиятини амалга оширишдан иборат дейди. Қонун чиқарувчи ҳокимият эса мулкдор кишиларнинг вакилларига тегишли бўлиши керак. Суд ҳокимияти киролдан ҳам, парламентдан ҳам мустақил бўлиши шарт.

Монтескье гоялари Францияда ҳам, бошқа мамлакатларда ҳам кенг тарқалди ва сиёсий фикрнинг кейинги тараққиётига катта таъсир кўрсатди. Унинг «Форс номалари» фалсафий романи, «Қонунлар руҳи хақида» деб номланган бош асари ўша даврдаёк кўплаб тилларга таржима қилинди ва Монтескье номини дунёга машҳур қилди.

«Женева фуқароси» ва унинг асосий гоялари. Бу одамнинг ҳаёт йўли фавқулодда мураккаб бўлди. Ўсмирлик йилларидан бошлаб у қувончсиз меҳнат, муҳтожлик, хўрликни кўрди. Европа бўйлаб, кўпинча пиёда, дайдиб юрди. Касбларини алмаштириб кўрди, лекин бирортаси унга пул ҳам, шуҳрат ҳам келтирмади. Китоблар ёзди, улар хукмдорларнинг буйруғи билан ошкора ёқилди, унинг ўзи эса таъқиблардан яшириниб юрди. Бироқ сўнгги кунларигача

осудаликка эришмаган бу инсон умрининг охирларида бутун француз ёшлари фикрининг ҳукмдори бўлди. Женевалик (Швейцария) соатсоз оиласида дунёга келган бу донишманднинг номи Жан Жак Руссо (1712–1778) эди.

Бундай оммавийликнинг сабаби нима? Албатта, Руссо шунчалар мағрур ҳимоя қилган унинг ғоялари эди.

Донишманд хусусий мулкнинг пайдо бўлиши инсониятга тенгсизлик, қуллик ва бошқа кулфатлар келтирганини исбот қилди. «Жамиятнинг бундан қейинги барча ривожланиши, – дейди Руссо, қашшоқларнинг бойлар, ожизларнинг кучлилар томонидан эзилишини туғдирадиган тенгсизликнинг бундан буёнги ўсиб боришидир». Бироқ Руссо хусусий мулкни йўқотиш лозим деб ҳисобламас эди ва фақат унинг миқдорини камайтиришни истарди.

Бойлик ва камбағалликнинг чегараларини тенгглаштириш – Руссонинг фикрича қонунчининг вазифаси ана шу. «Агар сиз, – деб ёзарди у, – давлатни мустаҳкам қилмоқчи бўлсангиз, унда бойлик ва камбағаллик чегараларини имкони борича яқинлаштиринг: чексиз бойлика ҳам, чексиз камбағалликка ҳам йўл қўйманг».

Олий ҳокимият фақат ҳалқники бўлиши керак, деб ҳисобларди Руссо. Шунинг учун ҳам, донишманднинг идеали – ҳар бир оила ўзига керакли барча нарсаларни ўзи етиштирадиган майда мулқдорларнинг демократик республикаси эди.

Республикани талаб қилиш, ҳокимият бутун ҳалққа тегишли эканлиги ҳақидаги таълимот 1789–1799 йиллардаги француз инқилоби даврида ўзининг тарафдорларини топди.

Энциклопедистлар. 1715 йили Францияда машхур «Фан, санъат ва ҳунарлар энциклопедияси»нинг дастлабки томлари нашрдан чиқди. Нашрнинг бошида файласуф Дидро¹ ва математик д'Аламберлар² турардилар. «Энциклопедия»да Вольтер, Руссо ва бошқа буюк олимлар иштирок этди.

«Энциклопедия»нинг аҳамияти нимадан иборат эди? Нима учун иезуитларнинг талаби билан унинг икки томи қирол буйруғига кўра тақиқланди, 7 йилдан кейин эса бутун нашрга тақиқ тамғаси қўйилди?

¹ Дени Дидро – 1713–1784 йиллари яшаган француз ёзувчisi, маърифатпарвар-файласуф ва драматург.

² Жон Лерон д'Аламбер – 1713–1783 йиллари яшаган. Файласуф, математик ва механик.

Гап шундаки, «Энциклопедия» жанговар характерга эга эди. Дидро ва д'Аламбер XVIII аср ўрталаригача тўпланган барча билимлар йигиндисини бир тизимга келтириб, католик динига қарши муросасиз уруш эълон қилишди. Улар феодал тузумнинг ўрнатилишини аёвсиз танқид қилдилар. Замондошлари «Энциклопедия»ни бекорга қадим Францияни штурм қилиш учун курол олинадиган улкан аслаҳа омбори деб аташмаган.

Жан Мелье – феодал зулмга қарши қураичи. XVIII асрда Францияда коммунистик назарияларни яратган маърифатчилар хам бўлган. Улардан бири руҳоний Жан Мелье (1664–1729) эди.

Ота-онасининг талабига кўра руҳонийликка ўқиган бу тўки-мачининг ўғли ўзининг бутун ҳаётини қишлоқдаги ибодатхонада ўтказди. Фалсафий баҳслар ўтказаётган, маълумотли ва эркин фикрловчи кишилар тўгараги йифиладиган пойтахт ҳакида у орзу хам қилолмасди.

Бунинг ўрнига Мелье ҳар куни маросимлар ўтказиши, ўзи нафратланган динга хизмат қилиши ва ўзи ишонмайдиган эътиқодга бошқаларни даъват этиши керак эди. Бундай иккюзламачиликни енгишга ўзида етарли куч топа олмаган Мелье ўз жонига қасд қилди.

Ўлимидан сўнг Мельедан унинг «Васияти» қолди, унда ўзининг барча азоблари, гумонлари, мажбурий ёлгони учун тавбаларини ифодалаган эди. Бутун умри бўйи ёзган ижод маҳсулида у Худога, қиролга ва бойларга уруш эълон қилди. «Мен истардимки, – деб ёзади Мелье, – бу даҳшатли маҳлукни йўқ қилиш учун Геркулес кучига эга бўлсан...». Мелье барча кулфатларнинг манбай хусусий мулк деб ҳисоблар ва уни бекор қилиш тарафдори эди.

Мельенинг фикрича, дунёвий ва диний князлар кучига халқ ўзининг кучини қарши қўйиши лозим. «Бирлашсангчи ахир, халқ, agar сенда соғлом ақл бўлса..., бундай олийжаноб, дадил ва муҳим ишга бир-бирингизни чорланг, ҳаммангиз! Бир-бирингизга ўз фикр ва истакларингизни яширинча айтишдан бошланглар!», – чорларди Мелье.

Мельенинг оқибат мақсади қанақа эди? У ернинг бойликларини хусусий қилиб эгаллаб олишни билмайдиган ва ҳеч қандай ис-тиносиз барча одамларга баҳт ато этадиган янги жамият қуришдан иборат эди.

Адам Смит ва Жак Тюрголарнинг иқтисодий таълимоми. XVIII аср маърифатчиларининг юксак сафларида тенгсиз янги

иқтисодий таълимот яратган алломалар – инглиз Адам Смит (1723–1790) ва француз Жак Тюрго (1727–1781) ҳам шарафли ўрин эгаллайди.

«Маълум илмийлик ва фуқаролик жасорати». Унинг ташқи кўринишида ҳеч қандай буюклик йўқ эди: бўйи ўртачадан бироз баландроқ, текис юзли, қора-қўқимтири кўзлар, йирик тўғри бурун. Жуда оддий кийинган. Умрининг сўнгигача парикда юрган. Елкасида бамбук таёқчаси билан юришни яхши кўрган. Ўзи билан ўзи гаплашиб одати бор эди. Бир сафар кўчада савдо қилувчи аёл уни ақлдан озган деб ўйлади ва қўшнисига шундай дейди: «Эй, худо, бечорага қара! Яхшигина кийинган!» Бу одам Европанинг машҳур кишиси эканлигини у қаёқдан ҳам билсин. Лондон ва Париждан, Берлин ва Петербургдан келган саёҳатчилар у билан танишишга интилардилар. Унинг исми Адам Смит. У ўзидаги фикрлаш қобилиятини, хикоячилик маҳорати билан қомусий илмлийликни чинакам олийжаноблик ва илмий софлик билан бириктирган эди.

Смитнинг бу фазилатлари жамият аҳлида иқтисодиётга қизиқиши уйғонишига кўп жиҳатдан таъсир қилди. Смитнинг фаолияти саноат тўйнариши даврига тўғри келди. Ўзининг асосий илмий асари «Халқ бойлигининг табиати ва сабаблари ҳакида тадқиқот»да (1776 й.) капиталистик тузумни халқ фаровонлигини ва давлатнинг гуллаб-яшнашини таъминловчи «табиий тартиб» деб баҳолайди.

Смит одамларнинг ўз иқтисодий аҳволларини яхшилашга уринишлари жамиятни тўкин-сочинликка олиб келишга қодир деб ҳисобларди. «...Давлатни қолоқлиknинг энг пастки поғонасидан ободончиликнинг юксак поғонасига кўтариш учун, – деган эди Смит, – факат тинчлик, енгил солиқлар ва бошқаришда сабр-қаноат керак, холос, бошқа барчасини воқеалар табиий оқимининг ўзи ҳал қиласди. Воқеаларни мажбурий бошқа йўлга бурган ёки жамият ривожини тўхтатиб қолишга уринаётган барча ҳокимиятлар – ғайри табиийдир».

Смитнинг фикрича, жамиятни ривожлантиришда рақобат катта роль ўйнайди, уни ҳатто врачларга, университет профессорларига ва руҳонийларга ҳам қўллаш мумкин. У ерни сотиш ва сотиб олиш эркинлигини ёқларди ҳамда ер ундан иқтисодий фойда оладиган мулқдорлар қўлига ўтиши керак, деб ҳисобларди. Смит халқ ободончиликнинг асосий манбаи меҳнат деб таъкидларди. Смитнинг

асарлари ва фаолияти капиталистик иқтисод назариясининг шаклланишида катта роль ўйнади.

Янги молия вазири. XVIII аср ўрталарида Францияда ўзгаришлар зарурати ҳар қачонгидан ҳам ортиқроқ ҳис қилинди. Молия Бош назоратчиси (вазири) лавозимига амалда мамлакатнинг барча ички ишларига раҳбарликни ўз зиммасига оладиган янги одам керак эди. Бунинг устига у сарой доиралари билан боғланмаган бўлиши лозим. Шундай одам қадим норманд зодагонлари оиласидан чиқкан Жак Тюрго эди. Тюрго физиократлар (грекчадан *physis* – табиат ва *cratos* – ҳокимият дегани) мактабининг Кенэ сингари йирик номояндлари билан бир сафда туради. Унинг йўли инсоний жасорат ва дадил ислоҳотлар йўлидир. Бироқ бу йўл эски тартибдаги барча кучларнинг қатъий қаршилигига учради. Тюрго истеъфога чиқишга мажбур бўлди.

Тюрго нимага эришмоқчи эди? Энг аввало у инсоннинг табиий хукуқлари – шахсий эркинлик ва хусусий мулк хукуқларини поймол қилаётган мавжуд эски феодал тартибларни танқид қилди. Тадбиркорлик ва хўжалик ташаббуси эркинлигининг чекланишида у «табиий хукуқ»нинг ҳалокатли бузилишини кўрди. Фақат тўлиқ рақобат эркинлиги, хўжалик ҳаёти ташаббусининг чекланмаган кенглигигина, унинг нуқтаи назарида, «табиий хукуқ»ларга мос келади. Шунинг учун ҳам Тюрго нон савдоси эркинлигини сўзсиз ҳимоя қилди. Давлат назоратидан озод қилинган савдогарлар аҳолини нон билан тъминлаш масаласини энг маърифатли маъмуриятидан кўра дурустроқ ҳал этишига унинг ишончи комил эди.

Саноат соҳасида Тюрго цех тизимиға қатъян қарши чиқди. Цехлар фақатгина саноатнинг ривожланишига халақит берар, ишчининг ташаббусини сикиб кўяр, ишлаб чиқаришда майдакашликни мустаҳкамларди. Тюрго ишчиларнинг меҳнат хукуқларини цехлар томонидан чекланишининг бекор қилинишини талаб этди.

Инсон онгининг қудратига, унинг фаровонлиги учун меҳнат шароитини яратадиган фаннинг имкониятларига чексиз ишонч маърифатчилик асрининг асосий ғоясини ташкил қилади. Маърифатчилар байробига «Фан ва тараққиёт» деган шиор ёзиб қўйиш мумкин бўларди. Инсон онгининг яратувчанлик кучига доимо ишонар эканлар, аксарият маърифатчилар, феодал тартиблар билан курашнинг инқилобий усулларига салбий муносабатда бўлдилар. Улар маърифатнинг ривожланиши ўз-ўзидан мавжуд тартиблар-

нинг ўзгаришига олиб келиши мумкин, деб ҳисоблар эдилар. Эски назариялар ва ғояларга қарама-карши тарзда маърифатчилар прогрессив ва ўз даври учун инқиlobий бўлган янги ғояларни илгари сурдилар.

Маърифатчилик даври ижтимоий-сиёсий ғоялари

Табиий ҳуқук назарияси	Халқ суверенитети назарияси	Ҳокимиятнинг бўлиниши назарияси
-----------------------------------	--	--

Маърифатчилик асли бадиий адабиёти

Робинзон ва Гулливернинг гаройиб саргузаштлари. Болаликдан севимли бўлган қаҳрамон – Робинзон Крузо Маърифатчилик асирида дунёга келган. Шотландиялик денгизчи Александр Сель-крикнинг кимсасиз оролдаги 27 кунлик саргузаштлари инглиз ёзувчиси Даниэль Дефонинг (1660–1731) романида 29 йиллик гаройиб саргузаштлар баёнига айланди. Дефо кўп марталаб бошидан тақдир ўйинларини ўтказди: хавфли жанжалларга аралашди, қашшоқлашди, бойиди, яна қашшоқ бўлди, яна бойлик тўплади. У савдогар, денгизчи, журналист, жосус, сиёсий арбоб касбларини си-наб кўрди, 59 ёшида ёзувчи бўлди.

Робинзон хақидаги роман катталар учун ёзилган, лекин мутлақо уларга эрмак, кўнгил очиш учунгина эмас. Дефо ўз қаҳрамонини ишбилармон, меҳнатсевар, ўз кучига ишонувчи қилиб яратди. Робинзон кимсасиз оролда қандай тиришқоқлик ва ўжарлик билан уй қургани, идиш-товоқ тайёрлагани, мебель ясаганини, ҳайвонларни ўргатгани ва кўпайтирганини эслайлик. Ўз кунларини меҳнат билан ўтказар экан, Робинзон бошқаларни ҳам ишлашга мажбур қила олади, ўлимдан куткариб олинган ёввойи Жумавойни у ўз хизматкори қилиб олади. Робинзон қиёфасида буржуа белгиларини, учинчи табақа вакилининг уддабуронлигини ва соғлом фикрлашини осонгина билиб олиш мумкин. «Робинзон Крузонинг ҳаёти ва гаройиб саргузаштлари» романи меҳнат, аниқ инсоний фикр, тиришқоқлик ва жасорат мадхияси бўлиб қолди.

Қишлоқ руҳонийси, кейинроқ эса Ирландиядаги Дублин ибодатхонаси раҳбари Жонатан Свифт (1667–1745) маърифатчиларнинг олийжаноб ғоялари одамларни ўзгартирмаганлигини, буржуа

жамияти ҳам феодал жамият сингари мукаммаллиқдан анча йироқ эканлигини кўриб турарди.

1726 йили унинг «Гулливернинг саёхати» романи пайдо бўлди. Свифтнинг қаҳрамони билан Робинсон – замондош, Маърифатчилик асри одамлари, лекин Гулливернинг қарашлари чуқурроқ. Балки шунинг учун ҳам унинг йироқ мамлакатларга қилган саёхатлари шундай қувончсиз бўлгандир.

Лилипутлар мамлакатини «Оламнинг қувончи ва даҳшати» деб аталувчи ушоқдеккина бир маҳлук бошқаради. Лилипутия ёзувчига замондош бўлган инглиз конституцион монархиясига карикатура эканлигини ўқувчи англаб олиши қийин эмас. Улканлар мамлакатининг маърифатли монархи XVIII аср файласуфлари ўлчами билан «бичилган». Доно, сахий қирол-олим урушни қоралайди, санъатни севади, фанларга ҳомийлик қиласиди, ақлли тартиб ўрнатишга ҳаракат қиласиди. Бироқ у ҳам ўз одамларининг кўпчилигидаги аҳмоқлик, очкўзлик, сурбетликни енга олмайди.

Онгли отлар мамлакатида Гулливер кутилмаганда нафратли ўе-хуларни учратиб қолади. Бу маҳлуклар «кучли ва чаққон, лекин шу билан бирга кўркоқ ҳамки, бу уларни муттаҳам, олчоқ ва ёвуз қиласиди». Йехулар қачонлардир кема ҳалокати натижасида оролга чиқариб ташланган одамларнинг авлодлари эканини қаҳрамон даҳшат ичра билиб қолади.

Муаллиф ана шу қайгули нотада ҳикоясини тўхтатади. Лекин Свифтни аччиқ ҳақиқатни гапиришга инсон табиатини бепарво кузатиш эмас, одамларга сидқидилдан ачиниш, уларга инсонийликни сақлаб қолишида кўмаклашиш, ёввойилашиб кетишидан огоҳлантириш истаги мажбур қилган эди. «Инсон сиз ўйлагандан кўра қадрлирок». Свифтнинг ақл ёлқини ва қобилият кучи Маърифатчилик асрини сўнмас нур билан ёритиб туради. Аммо бу асрда буюклиқда ундан кам бўлмаган сиймолар ҳам анчагина эди. Улар орасида Пьер Бомарше (1732–1799) ўзига хос ўрин тутади.

Дворянлик унвонини сотиб олган, қирол саройига йўл топган бу парижлик соатсознинг ўғли «бу дунё зўрлари»нинг нархини яхши биларди. Унинг «Фигаронинг уйланиши» комедиясининг қаҳрамони – чаққон, ёқимтой хизматкор. Фигаро ҳам ўзининг яратувчиси каби «ахмоқларни масхара қилиб ҳазиллашар, жаҳлдорлар олдида кўрқмас, ўз қашшоқлигидан куларди, лекин ҳеч қачон ўз инсоний қадрини сотмас» эди. Муаллифнинг ўйлаганига кўра, Фига-

ро – «миллатнинг энг кулдирувчи одами». Бомарше қаҳрамонининг ўткир сўзларини Париж театр ишқибозлари шахар бўйлаб тарқатишиди. Улар сўзлашув нутқига кирди, улар билан аслзодаларни масхара қилдилар. Қирол Людовик XVI ғазаб билан: «Буни саҳнада қўйиш учун Бастилияни вайрон қилиш керак», – деб хитоб қилган бўлса ҳам комедия барibir саҳнада қўйилди. Бир неча йилдан кейин эса қиролнинг нафратли зиндони – Бастилия қулади.

1789 йил 14 июля Франциянинг бош қамоқхонасини штурм қилишга борган одамлар учун Фигаро умумий эркатой бўлган бўлса, у адабий қаҳрамонлар дунёсида ҳам ёлғиз эмас эди. «Фигаронинг уйланиши» билан қарийб бир пайтда Фридрих Шиллернинг (1759–1805) пьесалари ҳам дунё юзини кўрди. Чегара устунлари билан уч юзтадан ортиқ майда князликларга бўлиб ташланган Германия улардан маърифат алифбосини ўрганди. Театр немислар учун ўз тақдири ва бутун миллат тақдирининг ойнаси эди. Театр ўриндиқларини тўлдириб ўтирган одамлар ёкиб қолган қаҳрамонлари билан бирга зулмдан озод бўлишни орзу қилас, обрўли муттаҳамларнинг айёрлигидан ғазабланар, ёш севишганларнинг ҳалокатига аччик-аччик йигларди.

Пьесалардан бирида зодагон Фердинанд ва оддий мусиқачининг қизи Луиза ўз ўлимлари билан муҳаббатини химоя қиладилар, чунки ҳақиқий севги аждодларнинг беш юз йиллик имтиёзларидан юксакроқ эди. Карл Маор ўзи яшаётган дунёнинг сохта безаги ва пасткашлигига уруш эълон қиласи: «Менга худди ўзимдай бир неча жасур кишиларни беринглар ва Германия республика бўлади...». Маркиз Поза инсоннинг эрки ва қадр-қимматини қизғин химоя қиласи:

... инсон қадрлироқ сиз ўйлагандан,
Асрлик уйқунинг йўлин бузиб у
Ўзининг ҳуқуқин сўрап қайтадан.

Ўз асрини, онг ва ёруғлик асрини ифодалайдиган қаҳрамон излаб бошқа бир буюк немис шоири Иоганн Вольфганг Гёте (1749–1832) докторFaust ҳақидаги қадимиий афсонани қайта ёзди. Яратилишига 60 йил сарф қилинган фалсафий драма ўз foýлари учун Инсон курашининг буюклигини тасдиқлаш билан Маърифат асрини якунлайди. Кексайиб қолган Faust мангу ҳақиқатни англашга етиб келади:

Узоқ ҳаёт ўйлун ўтдиму босиб,
Оlam ҳикматини айладим якун:
Фақат шу муносиб ҳаёт ва эркка,
Ким ҳар кун улар-чун курашга кирса!

Тасвирий санъат. XVIII асрнинг биринчи ярмида Европа тасвирий санъатида ҳали ҳам сарой аҳлиниң нозиктаъб санъати гуллаб-яшнарди. Бу давр «қиролнинг биринчи тасвиричиси», афсона вий ва пастораль¹ саҳналарнинг ажойиб устаси Франсуа Буше даври (1703–1770) эди. Рассом томонидан оққўнгил подачи эркак ва аёллар кўринишида тасвириланган жаноблар ва хонимлар бепарво сухбатлашади, қувонишади ва рақсга тушишади. Рассом тасвирлаган табиат баҳаво ва ажойиб, кичкина ариқчанинг қирғоғи, ёғоч кўпричча, ўтқир томли бино ва бир неча одамлар («Бове атрофи пейзажи») – ҳамма нарса нозик ва мутаносиб, ҳақиқий ҳаётдан чексиз йироқда бўлган Буше суратлари аристократик саройларга ажойиб безак бўла оларди.

Антуан Ваттонинг (1684–1781) санъати анча чуқурроқ. Унинг полотнолари энг нозик хис-туйгуларни, қаҳрамонларнинг кўз илғамас кайфиятларини ифодалайди. Ватто дунёси – шоирона хаёллар, маскарад ва базмлар дунёси. Юмшоқ, тарқоқ нур нарсаларнинг сояларини яширин кўрсатаётгандай бўлади. Ўта нозик колорит гўё энг сара мусиқадай жаранглайди.

Ваттонинг машҳурлиги улкан эди. Россия қироличаси Екатерина II учун атоқли санъаткорларнинг бир нечта полотнолари сотиб олинди. Уларнинг орасида «Қийин таклиф» ҳам бор эди. Унча кўп сонли бўлмаган жамоа боғда жойлашган. Хонимлардан бири билан унинг йигити ўртасида гина-кудурат чиққан ва бу гўзал тезда кетиб қолмоқчи. Яшириб бўлмайдиган қизиқиш ва киноя билан яқин орада жойлашиб олган ўсмир уларнинг гапларига қулоқ солиб турибди. Мураккаб бўлмаган бу саҳнанинг давоми томошабиннинг ихтиёрига ҳавола этилган.

Ваттонинг бошқа бир полотноси – «Бепарво» – расмдан кўриниб турган номи шундай, ёш йигит рақс ҳаракатларини аста-секин ва чиройли қилиб бажармоқда. Бу туганмас ҳаёт байрами иштирокчи-сининг юзида бепарволик ва зерикиш ифодаланган.

¹ Пастораль – чўпон ҳаётини, табиат тасвирини ёки кишлоқ турмушини ифодаловчи опера, пантомима, балет ёки мусиқа асари.

«Учинчи табақа куйчилари». XVIII аср 50-йилларининг ўрталарида қарийб ҳар бир инглиз дўкончаси ва китоб дўконидан арзонгинага Уильям Хогартнинг (1697–1764) гравюраларини сотиб олиш мумкин эди. Хогарт ҳақида унинг антиқа автопортрети ҳар қандай биографдан яхшироқ гапириб бера оларди: бу – картина ичидаги картина. У жиддий ва улуғвор бокади, ақл тўла кўзларнинг қарашлари ўйчан. Суратда бир тўда китоб, улардан бири – Свифт асари. Ёнгинасида сурат чизиш асбоблари ётибди. Улар Хогартнинг кўлларида инглиз буржуя жамиятининг ақлга сифмайдиган томонларини фош қилувчи даҳшатли қуролга айланади. «Сайловлар» сеrijасидаги гравюраларда муаллиф парламентга сайловлар тарихини кўрсатган. Мана сайловчиларни жалб қилиш учун ташкил қилинган сайловолди базми – умумий ароқхўрликнинг жирканч манзараси. Мана айёрок фермер – сайловчининг сотилиши. Мана энди, ниҳоят, «энг муносиб» депутатнинг ғалабаси. Бундан бўён маърифатчиларнинг мамлакатни «адолатли» бошқариш ҳақидаги орзуларини у ифода этади.

Ўз-ўзидан тушунарлики, томошибинлар ва муаллифнинг ҳистойгулари сиёсий найрангбозлар ва муттаҳамлар тарафида эмас. Хогартнинг қалбига оддий одамлар ёқимлироқдир, улар қадрқиммат ҳақидаги ўз тушунчаларини тўлароқ саклаб қолганлар. Расом ўзининг энг яхши ва энг самимий асарларида уларга мурожаат қиласди.

Маърифат асрининг замондоши ва гувоҳи, француз рассоми Жан Батист Симлон Шарден (1699–1779) бўлди, у «учинчи табака куйчиси» деган ном олганди. Кундалик турмушга диққат билан боқиб, одатий предметларни қузатиб, Шарден одатийликдан юксак поэзияни кашф эта олди. «Бозордан қайтган аёл» – санъаткорнинг энг мукаммал асарларидан бири.

Шарден тасвирий санъатнинг қадим анъаналарини бузмайди, лекин унинг расмлари енгилтак сарой санъатига қарши чақириқ эди. Петербург санъат Академиясининг конференциялар зали учун яратилган «Санъат атрибуtlари билан натюроморт» ана шундай асардир.

Юмшоқ қоронғуликдан санъаткорнинг столи кўринади: марказда ҳайкалтарошлиқ рамзи бўлган Меркурий ҳайкалчаси. Меъморий чизмалар, режалар асбоблар билан, рассомлик эса – палитра ва мўйқалам билан ифодаланган. Суратлар билан тўла папка, кўза,

бир нечта китоб, ёнида эса –Муқаддас Михаил ва медаллар, санъаткорнинг мукофотлари. Шарден ҳайратга лойиқ санъаткорлик билан мармарнинг текислигини, шоҳи лентанинг ялтироқлигини, тери папкаларнинг ғижимларини бера олган. Биз рассом ва маърифатчи Шарден дунёсини ана шундай қўрамиз.

Қаҳрамон излаб. Маърифат асрини кўпинча Вольтер асри ҳам дейишади. Файласуфнинг энг ишончли образини Жан Антуан Гудон (1741–1823) яратган. Узоқ умри давомида ҳайкалтарош буюк замондошларининг 200 дан зиёд портретини ясади. Муаллифнинг ўз сўзларига кўра у «ўз халқининг шуҳрати ва баҳтини ташкил киладиган кишиларнинг ўзгармас образларини» асраб колиш ва яратишга уринган.

Вольтер 1778 йили, ўлимидан сал олдин, Парижга сўнгги бор келганида Гудонга ўз тасвирини яратиш учун туриб берган. У креслода ўтирган ҳолда тасвирланган. Рӯпарамизда кекса бир чол. Гудон ҳеч нарсани: кексалик ажинларини ҳам, тишсиз, шалвираб қолган жағларни ҳам яширмаган ва безаб кўрсатмаган. Лекин биз расмда шафқатсиз кексаликни эмас, қалбнинг буюклигини ва мўъжаз жуссадаги қувват ва кучни қўрамиз. Чуқур нигоҳида ва кинояли табасумида инсон онгининг тантанаси акс этган.

Ўз даврининг қаҳрамонини излаб Жак Луи Давид (1748–1825) антик тарихга шўнғиди, замонавий воқеаларга ҳамоҳанг мавзулар излади. 1784 йили рассом «Горацийлар қасамёди» деган улкан полотнони тугатди. Уч ака-ука бир хил жасорат билан отасига ғалаба килиш ёки республика учун жон беришга қасамёд килаяпти. Муаллиф ватан йўлидаги жасоратнинг гўзллигини оташин тасвирлаган.

Замондошларининг гувоҳлик беришларича, суратни қўриш учун юзлаб одамлар келаверган, келаверган. Шахар ҳокимияти ҳатто чиқиши мумкин бўлган тартибсизликнинг олдини олиш чораларини ҳам кўриб қўйган.

Француз инқилоби бошланиши билан рассомнинг фикрлари қадимги тарихга қаратилмади. Замонавий ҳаётда у мавжуд тартиботни ўзгартиришга уринаётган қаҳрамонларни бутун борлиги билан кўра олди. Давид ўша воқеаларнинг энг оташин иштирокчиларидан бири Марат билан таниш эди. Унинг вафотидан сўнг бу якобинчининг хотирасини абадийлаштириш рассомнинг маънавий бурчига айланди. Бу бурч «Маратнинг ўлими» сурати устида ишлаш учун туртки бўлди. Камгина предметлар: ванна, стол сифати-

да хизмат қилган ёғоч яшик, сиёҳдон, қотиллик амалга оширилган пичок – фожиани ҳаққоний қайта тиклайди. Маратнинг оқарган юзи жонсиз ва хотиржам.

Европанинг мусиқий чорраҳалари. Немис композитори Иоганн Себастьян Бах (1685–1750) ҳаёт даврида машхур эмасди. Дунёвий жамиятга унинг асарлари ўта жиддий туюларди, черков эса худодан кўркиш оҳангларининг етарли эмаслиги учун унинг мусиқаларини ёқтирилмас эди. Ҳатто мусиқачининг ўғиллари ҳам отаси ижодини умидсиз, эскириб қолган деб ҳисоблашарди. Уларга мерос бўлиб қолган Бах қўллэзмаларининг анчагина қисмини йўқотиб юборишган.

Бир сафар Бах ўзининг 55 та аждодини белгилай олган авлодлар дараҳтини тузади. Унинг катта отасининг отаси новвой бўлиб, хамир тайёр бўлгунча цитра¹ чалгани маълум. Бахлар авлодида мусиқага муҳаббат авлоддан-авлодга ўтган.

Ёшлигидан композитор Германия бўйлаб кўп саёҳат қиласи, скрипка ва орган чалади, сарой оркестрига раҳбарлик қиласи. 1723 йилдан оиласи билан Лейпцигда яшай бошлайди. Бу ерда у ўзининг энг яхши асарларини яратди. Уларнинг аксариятига Бах ҳалқ қўшиқ ва рақсларини киритишдан кўрқмаган, бу эса мураккаб мусиқани оддий одамлар учун тушунарлироқ қилишга ёрдам берган.

Хор, солистлар ва оркестр учун ёзилган улкан асари – «Матфей айтган уқубатлар» Исо Масихнинг шогирди евангелист² Матфей ҳикоя қилиб берган Исо уқубатларини, ҳис-ҳаяжонини ифодалайди. Инжил афсонасини Бах одамларни кутқариш учун ўзини курбон қилган қаҳрамон ҳақидаги ҳалқ драмаси сифатида баён қиласи.

XVIII аср мусиқа санъатининг бундан кейинги йўли Австрия-нинг чиройли қадимий шаҳарчаси Зальцбург орқали ўтади, бу ерда Фарб мусиқасининг генийларидан бири Вольфганг Амадей Моцарт (1756–1791) дунёга келади.

Замондошлари Моцартни XVIII асрнинг ҳақиқий мўъжизаси дейишади. Унинг ҳаёти қисқа, қашшоқлик, хўрлик ва ёлғизликка тўла бўлса ҳам, унда буюк қувонч, муҳаббат, баҳт, ижод ҳам мавжуд эди.

¹ Цитра – мусиқа асбоби.

² Евангелист (инжилчи) – Инжилнинг тўртта афсонавий муаллифларидан ҳар бири шундай деб аталади.

У 3 ёшидан бошлаб мусиқани ўргана бошлади, 4 ёшида ўзининг биринчи концертини ёзи, 12 ёшида ёзган операсининг премьераси Милан театрида кўйилди, 14 ёшида Моцарт Италиядаги энг обрўли мусиқа академиясининг академиги бўлди. Ҳаётининг сўнгги ўн йилини Моцарт Венада ўтказди. Композиторнинг орзулари театра қаратилган, лекин операга буюртма йўқ эди. Нихоят мос кела-диган мавзу топилди, айнан халқни жалб қиласидиганининг худди ўзи – Бомаршенинг «Фигаронинг уйланиши». Премьера 1786 йилда кўйилди. Муваффакият жуда улкан эди. Кўшиқчиларни томошибин бир неча марта саҳнага чакиради. Операнинг куйлари ҳамма ерда: кўчаларда, майдонларда, ошхоналарда жаранглайди, уни ҳатто дайдиб юрувчи мусиқачилар ҳам ижро этардилар.

Композиторнинг сўнгги асари – «Реквием»ни (лотинча геюем – «тинчлик», «ором» маъносини билдиради) черковларда мархумларнинг хотирасига бағишлиб ижро этишарди. Моцартга у аноним тарзда, бой мусиқа ихлосманди томонидан буюртма берилганди, лекин композиторга мусиқани ўзи учун ёзаётгандай туюлди. Бу ҳаёт ва ўлим ҳақидаги, инсоннинг бу дунёдаги қисмати ҳақидаги асар. Унинг биринчи ижросигача яшаш Моцартга насиб қилмади.

Ўзини буюк композиторнинг вориси деб ҳисоблаган Людвиг ван Бетховен (1770–1828) ҳақида Моцарт: «Вақти келади ва у ҳакда бутун дунё гапиради», – деган эди. Бу амалга ошди.

22 ёшидан бошлаб Бетховен Венада яшайди. У ёш, кучга тўла, машхур, ноширлар унинг асарларини жон деб нашр қилишади. Лекин даҳшатли касалликнинг хуружи тобора кўпроқ такрорланарди: «Менинг эшитиш қобилияти тобора заифлашмоқда, қулогимдаги даҳшатли шовқин на кечаси, на қундузи бир нафас ҳам тинмайди. Мен аянчли ҳаёт кечираяпман», – деб ёзганди у. Бироқ композитор таслим бўлмади. Бетховен ўзи билан ўзи шиддатли кураш олиб борган йилларида кучи ва гўзаллиги билан ҳайратга соладиган асарлар яратди.

«Фантазия йўлида соната» («Ойдин») – композиторнинг баҳтсиз муҳаббати ҳақидаги асар. «Қаҳрамонона» симфонияси эса XVIII аср охиридаги инқилобий воқеалар рухи билан йўғрилган. Унда – кўча ва майдонлар шовқини, жанг ҳаяжонлари. Даставвал симфония Бонапартга бағишлиланган эди. У ўзини император деб эълон қилинганини билиб қолган композитор асарини бундан кейин унинг номи билан боғламади ва «Қаҳрамонона» деган янги ном берди.

Симфония марказида – бўйсунмас исёнкор образи, тақдирнинг ҳеч қандай зарбалари синдира олмайдиган жасур, қўркмас инсоннинг қиёфаси намоён бўлади. «Аппассионата»да ҳам ана шу мавзу жаранглайди.

Умрининг сўнгги қунларигача Бетховен онгни, ёрқин кучлар тантанаси ва ғалабасини шарафлашга бағишлиланган асарлар яратиш орзуси билан яшади.

Маърифатчилик асири даҳолари

Фалсафа	Адабиёт	Тасвирий санъат	Мусика
Вольтер	Дефо	Буше	Бах
Монтескье	Свифт	Ватто	Моцарт
Руссо	Бомарше	Шарден	Бетховен
Смит	Шиллер	Гудон	
Дидро	Гёте	Давид	

* * *

XVIII аср тарихга Европадаги табақавий жамият асосларига, монархларнинг абсолют ҳокимиятига қарши маънавий даъват сифатида чиқкан Маърифатчилик асири сифатида кирди. Маърифатчилик ғоялари кишиларнинг онгини эгаллаб, Европа цивилизациясининг қиёфасини ўзгартириб юборган моддий кучга айланди.

Маърифатчиларнинг ғоялари факат аср охирига келиб нисбатан тўлиқ амалга ошиш имкониятига эга бўлди. Бу ғоялар Шимолий Америкада мустақиллик учун уруш йиллари, Буюк француз инқилоби даврида оммавий характер касб этди. Маърифатчилик даврининг кўплаб ғоялари XIX, айниқса XX асрда демократик мамлакатлар сиёсий амалиётининг, хукуқий нормалар базасининг асосига айланиб, жамиятнинг кенг қатламлари орасида тан олинди.

VII боб бўйича саволлар

1. Маърифатчилик асрининг асосий белгилари нимада?
2. XVIII асрда Европада ижтимоий-сиёсий ғояларнинг қандай асосий йўналишлари мавжуд эди?
3. Маърифатчилик асири бадиий адабиёти ва санъатининг қандай асосий йўналишлари ва ғояларини биласиз?

4. Маърифатчилик даврида шаклланган қандай асосий қадриятларни биласиз?
5. Маърифатли абсолютизм ғоясининг XVIII асрда Европада тарқалишини қандай изоҳлай оласиз?
6. Маърифатчилик даврининг қандай илмий кашфиётларини биласиз?
7. Маърифатчилик ғоялари Европада сиёсий тузумнинг ривожланишига қанадай таъсир кўрсатди?

VIII БОБ. XVII–XVIII АСРЛАРДА ФРАНЦИЯ

Тараққиётнинг асосий йўналишлари

XVII асрда Франциянинг иқтисодий, ижтимоий-сиёсий тараққиёти зиддиятли характерга эга эди. Капиталистик муносабатларнинг кириб келиши натижасида юз берган иқтисодий ўсиш, абсолютизмнинг мустаҳкамланиши, солиқларнинг ошиши, халқ оммаси ахволининг ёмонлашуви ва доимий халқ қўзғолонлари билан қўшилиб кетди. Янги иқтисодий муносабатлар, айниқса, қишлоқда жуда қийинчилик билан ўзига йўл очаётган эди.

XVI аср охири – XVII аср бошларида Франция иқтисодий ўсиш даврини бошдан кечиради. Бунга қирол Генрих IV даврида (1589–1610) солиқларнинг камайтирилиши, мануфактуралар учун қулай молиявий шароитнинг яратилиши, ишлаб чиқаришни рағбатлантирувчи бож солиқларининг жорий қилиниши, техник қулайликларнинг қўллаб-куватланиши орқали эришилди. Қирол билан буржуазия ўртасидаги иттифоқ мустаҳкамланиб, халқнинг норозилиги ҳам пасайди. Натижада мухолифатнинг ҳаракати учун ижтимоий асос ҳам анча қискарди.

1610 йили Генрих IV ўлдирилгандан сўнг Қирол Людовик XIII нинг ёшлиги сабабли ҳокимият унинг онаси Мария Медичи қўлига ўтди. Аслида мамлакатни бева қироличанинг маъшуки флоренциялик Кончини, кейин эса Люинъ бошқарди. Бу даврда шахзодалар ва қирол оиласининг кўп сонли бошқа аъзолари қироличага ўз ҳуқуқларини даъво қилиб 1614–1620 йиллари мамлакатда бошбошдоқликни вужудга келтиришга қаратилган ҳаракатни амалга оширди. Бу ҳаракат на буржуазия, на дехқонлар томонидан қувватланмади. Францияда абсолютизмнинг узил-кесил мустаҳкамланиши кардинал Ришельё биринчи министр бўлган йилларга (1624–1642) тўғри келади. Кардинал Ришельё ҳукумати абсо-

лютизмни янада мустаҳкамлаш сиёсатини олиб борди: гугенотларнинг сиёсий автономияси йўқ килинди, 1632 йилги феодал зодагонларнинг исёни бостирилди, маҳаллий ҳокимиятларнинг хукуқлари провинциялар интендантлари¹ фойдасига қисқартирилди.

Франциянинг ички ривожланиши ва марказий ҳокимиятнинг мустаҳкамланиши фаол ташқи сиёсат олиб бориш имкониятини яратди. Америкадаги француз мустамлакаларига асос солинди. Ўттиз йиллик урушнинг (1618–1648) охирги босқичида Франция Габбургларга қарши коалицияга бошчилик қилди ва 1648 йилги Вестфаль тинчлик сулхига биноан Эльзаснинг анчагина қисмини қўлга киритди. Аммо ҳарбий харажатларнинг оғирлигидан норози ҳалқ катор қўзғолонлар кўтарди. XVII асрдаги шундай қўзғолонлардан энг йириги Фронда (1648–1653) номини олган йирик ҳаракат бўлди. Бу ҳаракатнинг бошида қиролнинг абсолют ҳокимиятидан норози бўлган феодал-зодагонлар бўлиб, Фронда бостирилгандан сўнг улар Францияда фаол сиёсий куч сифатида барҳам топди.

XVII асрнинг иккинчи ярми, айниқса 1665–1685 йиллари Франция саноатида сезиларли ўсиш юз берди. Тошкўмир қазиб чиқариш бошланди, металлургия маҳсулотлари кўпайди, ишлаб чиқаришнинг кўплаб соҳаларида тарқоқ мануфактура ва ҳунармандчилик ўрнига марказлашган мануфактура кела бошлади. Мануфактура ташаббусини қўллаб-қувватлаш айниқса Савдо, саноат ва молия бош назоратчиси Жан Батист Кольбер (1619–1683) даврида хукуматнинг асосий иқтисодий сиёсатига айланди. Бироқ саноат ва савдодаги муваффақиятлар олдида қишлоқ хўжалигидаги тургунлик айниқса кўзга ташланарли эди. XVII асрнинг сўнгги эллик йилида ўнга яқин қургоқчилик йиллари бўлиб, очлик умуммамлакат миқёсида ростакам оғатга айланди. Очлик ва касалликдан минглаб одамларнинг қирилиши натижасида Франция аҳолиси 1650 йили 20 млн дан 1710 йили 16–17 млн кишигача камайиб кетди.

Ички зиддиятларга қарамасдан XVII асрнинг иккинчи ярми ва XVIII асрнинг бошларида Франция фаол ташқи сиёсат олиб борди. Людовик XIV даврида (у 1643 йили таҳтга келиб, 1661 йилдан 1715 йилгacha 54 йил мустақил бошқарган) француз абсолютизмининг юқори чўққига эришганлиги ҳам шундай ташқи сиёсат юргизиши учун имконият яратди. 1667–1668 ва 1672–1678 йиллари Испания

¹ Провинцилар интендантлари – (французча intendant – бошқарувчи) XVII–XVIII асрларда Францияда мавжуд бўлган, провинцияларни бошқариш учун марказдан тайинланадиган маҳсус лавозимли шахс.

ва Голландия билан бўлган урушлардаги ғалаба Францияга Франш-Конте, Фландриянинг бир қисми, Лотарингияни қўшиб олиш ва Европада сиёсий гегемонлигини ўрнатиш учун шароит тұғдирди. Бироқ Англия билан рақобатда (1701–1714 йиллари Испания тахти учун бўлган урушда) Франция енгилди.

XVI–XVII асрларда француз миллининг шаклланиши юз берди. Ички бозорнинг вужудга келиши, вилоятлараро ахолининг эркин қўчиши, матбуотнинг кенгайиши бутун мамлакат бўйлаб шимолий француз тилининг тарқалишига олиб келди. XVII асрда орфография ва синтаксисни тартибга солиш бўйича ислоҳотлар ўтказилиб, бу ислоҳотлар ҳозирги замон француз тилини яратиш бўйича муҳим қадам бўлди. 1631 йил 30 майдан мунтазам чиқа бошлаган умум-миллий газета («Газет») ҳам бу ишда муҳим роль ўйнади. Кардинал Ришельё ташаббуси билан 1635 йил 10 февраль куни ташкил қилинган Франция Фанлар академияси эса миллий-маърифий ишларнинг марказига айланди.

Ички бозорнинг кенгайиши ахолининг ўсишига олиб келди. Инқилоб арафасида Франция ахолисининг сони 20 млн кишидан кўп эди. XVIII аср ўрталаридан бошланган ташқи сиёсатдаги муваффакиятлар Франциянинг ички зиддиятлари билан қўшилиб кетди. Австрия тахти учун бўлган урушдаги (1740–1748) мағлубият ва айникса 1756–1763 йиллардаги етти йиллик уруш оқибатида Франциянинг Канададан ва Хиндистондаги асосий мустамлакаларидан ажралиши халқ олдида (айникса, буржуазия олдида) ҳукуматнинг обрўсини тушириб юборди. Бунга 1774–1776 йиллари Бош назоратчи А.Р. Тюрго ислоҳотларининг имтиёзли қатламлар қаршилиги туфайли амалга ошмай қолиши қўшилиб, сиёсий ва иқтисодий ислоҳотларнинг абсолютизм билан сифиши маслигини кўрсатди. Жамиятда ижтимоий зиддиятлар кучайиб, мамлакатни инқилобий бўхрон ёқасига олиб келди.

Франция XVIII асрда. Буюк француз буржуа инқилобининг сабаблари ва бошланиши

Сўл кучлар томонидан Буюк деб аталган бу инқилоб фақат Франциядаги эмас, балки бутун Европадаги эски тартибларни ҳам бузиб ташлади. У халқаро аҳамиятга эга бўлиб, бутун XIX аср унинг таъсири остида ўтди.

«Одамлар озод ва тенг ҳуқуқли бўлиб туғиладилар!» – бу сўзлар 1789 йили Францияда жаранглади ва қарийб икки аср бошқа қитъаларда ҳам акс садо берди.

Қишлоқ ҳўжалиги. Дехқонлар ва зодагонлар. XVIII асрнинг 70-йилларида келиб ҳам Франция аграр мамлакат бўлиб қолаверди. 25 миллионли аҳолисидан 22 миллионини дехқонлар ташкил қиласарди.

Бу пайтга келиб, дехқонларнинг асосий қисми шахсан эркин бўлсада, ҳали яна бир ярим миллион дехқонлар монастирларга қарашли эди. Дехқонлар яшаётган ва ишлаётган ерлар феодалларнинг мулки ҳисобланарди. Бунинг учун улар сеньорлар фойдасига бир қатор тўловлар (пул ёки мол билан) тўларди. Кўпинча дехқонлар ердан фойдаланганлиги учун ҳосилнинг тўртдан бир қисмини беришга мажбур эдилар. Шунингдек, яна сеньорлар фойдасига дехқондан йўл, кўприк, ярмарка тўловлари, тутун пули (уйида олов ёкиш ҳуқуқи учун) олинарди. Тегирмон, нонвойхона, узум эзувчи босқонлардан фойдаланиш ҳуқуқи ҳам фақат сеньорларга тегишли эди. Дехқонлар балиқ овлай олмас, ўрмонда ов ҳам қила олмасдилар. Сеньор суд ҳокимиятига ҳам эга эди.

Католик черковига дехқонлар ҳамон ҳосилнинг «ўндан бир»ини берарди. Улар давлатга жон боши солиғидан ташқари бошқа солиқлар ҳам тўларди.

Қишлоқларнинг камбағаллашиши одатий ҳол бўлиб қолди. Кўргина дехқонлар тиланчи ва дайдиларга айланиб кетдилар. «Нон исёнлари» ва солиқ зулмига қарши қўзғолонлар ҳам тез-тез бўлиб турарди.

Саноат ва савдо. Францияда хукмрон бўлган эски тартиб саноат ва савдонинг ривожини ҳам тўхтатиб туради. Агар дехқон камбағаллиги учун ҳеч нарса сота олмаса, унда унинг сотиб олишга ҳам пули бўлмас эди. Бу эса ички бозорни торайтиради.

Кўмир, металлургия, тўқимачилик соҳалари баъзи бир ютуқларга эришдилар. Безак буюмларини ишлаб чиқариш эса гуллаб-яшнарди, бой французларга қимматбаҳо матолар, чинновор, заргарлик буюмлари керак эди.

Францияда цех тизими қисқарган, лекин мамлакатнинг муҳим шаҳарларида у ҳали сақланиб қолганди. Қирол ҳокимияти йирик мануфактуралар қурилишини қувватларди.

Мамлакатнинг энг йирик молиявий ва саноат маркази Париж эди. XVIII аср 80-йилларига келиб у ерда 60 та банк очилди. Мануфактураларни ишчи кучи билан таъминлаш мақсадида ҳукумат маҳсус ишчилар уйи ёки госпиталлар ташкил қилди. Иш куни қуёш чиққундан то ботгунга қадар давом этарди, жарималар, ойликдан ушлаб қолиш одатий ҳол эди. Мануфактураларнинг ишчилари корхонанинг ўзида яшашарди, уларга фақат якшанба куни дуо ўқиб келиши учунгина дарвозадан чиқишига рухсат бериларди. Аёлларга эркакларга тўланган ҳақнинг ярми бериларди, холос. Болалар меҳнати ундан ҳам арzon турарди.

XVIII аср охирида Франция ҳали саноат тўнтаришини бошидан кечирмаган, машиналар камдан-кам қўлланиларди. Масалан, 1789 йили Франция тўқимачилик саноатида 900 та «женни» типидаги машиналар мавжуд бўлса, шу пайтда Англияда улар сони 20 мингдан зиёд эди. Турли хил тўсиқларнинг мавжудлигига қарамасдан XVIII асрда Францияда ишлаб чиқаришнинг ўсиши кузатилади. Имтиёзли (киролга қарашли) мануфактуралар сони 1715 йилги 135 та ўрнига 1789 йили 532 тага етди. 1722 йили суюқ чўян олиш усули ўзлаштирилди. 1720 йили Анзен яқинида кўмир конлари очилиб, 1734 йили уни қазиб олиш бошланди. Шу йили Францияда биринчи буғ машинасидан фойдаланилди. Аср ўрталарига келиб такомиллаштирилган тўқув станокларини ясаш йўлга қўйилди (1747, Вокансон).

Ички савдони божхона чегаралари сиқувга оларди. Бир вилоятдан бошқасига маҳсулот ўтказилганда ҳам бож олинарди. Сеньорлар уларнинг ер мулкларидан ўтаётган савдогарлардан йўл солиги талаб қиласиди. Шунга қарамасдан ички йўлларнинг қурилишига катта эътибор берилади. 1789 йилга келиб мамлакатда 12 минг лье янги йўллар қурилади.

XVIII асрда Франция йирик денгиз ва мустамлакачилик давлати бўлиб, катта ҳарбий ва савдо флотига эга эди. Айниқса денгиз савдосининг кенгайиши янги географик кашфиётлар ва техник мукаммалликларни талаб қиласиди: 1734 йили Бугер ўзининг кемасозлик назариясини эълон қиласиди, 1748 йили Леруа очиқ денгизда аниқ кузатувлар учун зарур бўлган хронометрни яратади. Француз денгиз саёҳатчиларининг кашфиётлари олимларни Ернинг юзасини ўлчаш фикрига олиб келади. Бунинг натижасида 1735–1745 йиллари эк-

ваторга, Лакондамин ва Лапландияга Мопертюи¹ (1734–1737) экспедициялари уюштирилиб, ўз даврида астрономик билимларнинг ривожланишига катта туртки бўлди.

Бутун XVIII аср давомида ташки савдо тўхтовсиз ўсиб борди. Савдогарлар Янги Дунё билан, Шимолий Африка, Ўрта денгизи давлатлари билан савдо юргизар эди. Француз савдогарлари мустамлакаларда плантацияларга, қулларга, заводларга эгалик қилишарди, қул савдоси билан шуғулланарди. Қисқа вақт ичидаги улкан бойлик тўпларди. Аммо мавжуд эски тартиблар янги, капиталистик муносабатларнинг ривожланишига тўқсинган қилаётган эди. Барча – буржуазиянинг кенг қатламлари ҳам, ҳунармандлар ҳам, ёлланма ишчилар ҳам, илғор зодагонлар ҳам, дехқонлар ҳам ўзгаришларни кутаётган ва улардан манфаатдор эди.

Шаҳарлар тез ўсиб борди. XVIII аср ўрталарига келиб пойтахт Парижнинг аҳолиси 1 миллион кишидан ошиб кетди. Айниқса, Париж XVIII аср иккинчи ярмида тез кенгайди ва қайта қурилди.

Аҳоли сонининг ошиб боришига қарамасдан XIX аср ўрталарига қадар Парижда туғилиш ўлимдан ортиқ эмасди. XVIII аср 80-йилларида ҳар йили ўртача 20 минг одам ўларди. Айниқса, чақалоқлар ўлими юқори бўлиб, туғилган ҳар 1000 та чақалоқдан 273 таси ўларди². Бунинг устига 1870 – йиллари Парижда 30 минг чақалоқдан 7 ёки 8 минги ташлаб кетилган болалар бўларди. Бундай болаларни касалхонага олиб келишининг ўзи бир хунар бўлиб қолди.

Табақа тизими. Ўрта асрлардаги каби монархия жамиятнинг уч табақага: биринчиси – рухонийлар, иккинчиси – зодагонлар, учинчиси – аҳолининг қолган барча қатламлари – бўлинишини ўрнатган эди.

Қадимий бир формула ҳар бир табақанинг ҳаётдаги ўрнини аниқ белгилаб берарди: «Рухонийлар қиролга дуолари билан хизмат қиласди, зодагонлар – қиличи билан, учинчи табақа – мол-мулки билан». Биринчи ва иккинчи табақалар имтиёзли ҳисобланарди. Улар солиқ тўламасди ва ерга эгалик қилишарди. Рухонийлар ва зодагонлар биргаликда мамлакат аҳолисининг 4 фоизини ташкил қиласди (130 минг рухонийлар ва 350 минг зодагонлар). Черковнинг олий

¹ Мопертюи, Пьер Луи Моро – 1698–1759 йиллари яшаган француз олимни, Париж Фанлар академияси аъзоси, математик, геодезист.

² Ливи Баччи М. Демографическая история Европы / Серия «Становление Европы» / Пер. с итал. А. Миролюбовой. – С Пб.: «Александрия», 2010. С. 165.

манасбларига фақат зодагонлар, одатда, олий насаб оиланинг кенжадарини тайинланарди. Кўпинча епископ ва архиепископлар дунёвий турмуш тарзида яшардилар, улар ўзларини хашамлар билан ўраб олардилар.

Зодагонларнинг юқори унвондагиларини 4 минг оила ташкил киларди. Бу одамлар қиролнинг совға ва нафақалари хисобига кун кўёрардилар. Масалан, Маркиз де Отишан тўртта нафака оларди: биринчиси, ёзувда кўрсатилишича, «марҳум отасининг хизматлари учун, иккинчиси, ўшанинг ўзи учун, учинчиси худди яна шу асосда, тўртинчиси худди шу сабабларга кўра».

Офицерлик лавозимига ҳам факат зодагонлар тайинланар эди. 1781 йилги Низомга кўра офицерлар ўз аждодларининг тўрт поғонаси зодагонлар бўлганлигини хужжатлар билан исботлашлари керак эди. Саройда турмайдиганлар ва муҳим лавозимларни эгаллаганлари эса тобора камбағаллашиб борарди.

Энг оғир тақдир учинчи табақанинг чекига тушганди. Унинг таркиби олақуроқ дехқонлар, оддий шаҳарликлар, хунармандлар, савдо-гарлар, саноатчилардан иборат бўлиб, ана шулар барча солиқларни тўлар, лекин мамлакатни бошқаришга яқинлаштирилмас эди.

Буржуазия орасида бой кишилар жуда кўп эди, улар миллионлаб маблағга эга эдилар. Улардан баъзи бирлари ҳатто қироллик саройига ҳам қарз берарди. Лекин улар сиёсий хуқуқларга эга эмасдилар.

Имтиёзларни йўқотишга, шахс эркинлигига интилиш абсолют монархияни йўқотиш заруратига олиб келди. Илгаригидек XVIII асрда ҳам француз қироллари абсолют ҳокимиятга эга эдилар. «... Миллатнинг хуқуқ ва манфаатлари – бари шу ерда, менинг қўлимда, қироллик ҳокимияти эса факат менинг шахсимда мужассамлашган», – деган эди 1776 йили Людовик XVI Париж парламентида.

Людовик XIV нинг вафотидан кейин унинг 5 ёшли чевараси Людовик XV (1715–1774) қирол бўлди. У вояга етгунга қадар герцог Филипп Орлеанский регент деб эълон қилинди, мамлакатни у 8 йил бошқарди, қирол эса рақс тушди ва ов қилди. Қирол саройи яна ҳам байрамона мўл-кўлчиликда бўлди, хазина эса тобора бўм-бўш бўлиб борарди. Людовикнинг ташвиши битта эди – мамлакатдан сарой ҳашаматлари учун маблағ ундириб олиш. У «Биздан кейин не бўлса бўлар» қабилида яшар ва мамлакатни бошқарап эди, шунинг учун ҳам давлатни тўла хонавайронликка олиб келди. Барча огоҳлантиришларга у «Менинг давримга етади, ўрнимга келадиган

ворисим эса ўзи билганича иложини қилсин», – деб жавоб берарди. Унинг ташки сиёсати ҳам мамлакат учун ҳалокатли бўлди. У сулола манфаатлари учун аралашган барча урушлар бой берилди.

Халқаро майдонда Франциянинг обўйи тушиб кетди. Уруш ва солиқлардан қийналиб кетган халқнинг ахволи тобора оғирлашмоқда эди. Буржуазия ва зодагонларнинг бир қисми қиролнинг сиёсатидан ғазабланардилар. Франция инқилобга яқинлашарди.

1774 йилнинг май ойида Людовик XV вафот этди ва унинг на-бираси, ёш, тажрибасиз, қатъяксиз, ов қилишни ва чилангарлик ишини севадиган Людовик XVI (1774–1793) қирол бўлди. Касал-манд, инжик ёш қирол давлат масалаларини ҳал қилишга ожизлик қиласди. Унинг хотини Мария Антуанетта Австрия императори-нинг қизи эди. Қувноқ, гўзал, дадил бу аёл ўз эрига катта таъсир ўтказарди. Мария Антуанетта сарой қўнгил-хушликларининг таш-килотчиси ва қалби эди.

Франция эса ўзгаришлар кутарди ва қирол ҳам уларни ўтказишга мойил эди: у тахтга ўтириш маросимида совға сифатида келтирилган 24 млн ливр пулдан воз кечди; барчанинг лаънатига учраган канцлер Мопа билан аббат Террени ишдан бўшатиб, Париждан сур-гун қилди; Париж парламентини тиклади; молия бош назоратчиси лавозимига иқтисодчи олим Робер Тюргони тайинлади. Тюрго бу лавозимга тайинланганлиги учун Людовик XVIга миннатдорчилик билдираётib, шундай деди: «Мен ўзимни қиролнинг қўлига эмас, соғдил инсоннинг қўлига топшираётиман». Бунга Людовик XVI: «Ва сиз адашмайсиз», – деб жавоб берди. Бироқ орадан йигирма ой ўтгандан кейин вазир истеъфога чиқди.

Тюргонинг дастури мамлакатни ислоҳот йўли билан инқироздан чиқаришга қаратилган эди. У қўшимча солиқларни киритмаслик-ни таклиф қилди, донга қатъи нархни бекор қилди, цехли тизими-ни йўқота бошлади, зодагонлар ва черковнинг феодал хукуқларини тугатмоқчи эди. Афсуски, 1774 йил ҳосилсиз бўлди, доннинг нархи кескин кўтарилиб кетди. Бу «ун уруши»ни келтириб чиқарди.

Парижда, уйларнинг қурумдан қорайиб кетган деворларида қўлда ёзилган афишалар пайдо бўлди: «Агар нон арzonлашмаса, вазирни алмаштирмаса биз қиролни ва бутун Бурбонлар авлодини қириб ташлаймиз». Тюрго истеъфога жўнатилди, унинг қарорлари бекор қилинди. Ислоҳот қилишга биринчи уриниш ана шундай муваффақиятсизликка учради.

Мамлакатда тартибсизликлар давом этарди. Хазинага пул керак эди, парижлик банкирлар эса энди карз беришмасди. Шунда молия бош назоратчиси лавозимига женевалик бой банкир Жак Неккер (1732–1804) тайинланди, у ислоҳотлар тарафдори эди. Лекин Неккернинг ҳам истеъфога чиқишига тўғри келди, ҳар қандай ақлли сиёсат сарой аслзодаларининг қаршилигига дуч келарди. Франция боши берк кўчага кириб қолди. Мамлакат бўйлаб дехқонларнинг норозилик чиқишлиари бўлиб турарди.

Шахарларда ишчилар иқтисодий талабларни олға сурардилар, қиролга петициялар билан мурожаат қилишар, иш ташлашлар ўтказишар, машиналарни бузишарди. Корхоналар ёпилар, ишсизлар сони ошиб бораарди. Булар ҳам етмаганидек, мамлакатга курғоқчилик ва совуқ ҳам хужум қилди. Очлик авжга чиқдики, бунақаси ҳеч бўлмаганди.

Людовик XVI ўз ожизлигини намойиш қилаётган бир пайтда, унинг хотини бошчилигидаги сарой ахли тўхтовсиз ўйнаб-куларди ва пулларни совуарарди. Франциянинг қарзлари 140 миллион ливрга етди, бошқа қарз олишнинг эса иложи йўқ эди. Бундай ахволдан вақтинча бўлсада чиқишининг йўли битта – имтиёзли табақаларга солиқ солиш эди. Шунда Людовик XVI 1694 йилдан буён йигилмаган Генерал Штатларни чақиришга қарор қилди.

Киролнинг қарорини билиб бутун Франция ҳаяжонга тушди. Учинчи табақага эски тартиблар ўзгаришидан умид қилиш имкони туғилди. Барча табақалардан Генерал Штатларга сайловлар пайтида уларга талаблар қўйиш ва топшириклар беришга рухсат этилди. Шахарликлар ва дехқонлар биринчи марта ўз шикоятларини ёзма тарзда баён қилиш хуқуқига эга бўлдилар.

1789 йил 5 май куни Версаль саройида қирол Генерал Штатларни очди. Руҳонийлар ва зодагонлар саройга олтин ва қумуш иплар билан тикилган шоҳи ва баҳмал либосларда кириб келдилар. Зодагонлардан 270 депутат, руҳонийлар вакилларидан 291 депутат ва қора кийим кийиб олган, учинчи табақадан сайланган 600 депутат ўз ўринларини эгалладилар. Қирол таҳтга ўтириб шляпасини кийганида руҳоний ва зодагон депутатлар ҳам одат бўйича шляпаларини кийдилар, бироқ шу пайт кутилмаган воқеа рўй берди, учинчи табақа депутатлари монархнинг сўзини тинглашганда бош кийимсиз, тиззалири букилган ҳолда туриш ўрнига, улар ҳам шляпаларини кийдилар ва тиз чўқдилар.

Людовик XVI янги солиқларни тасдиқлашни буюрди. Қиролнинг нутқи учинчи табақа вакиллари – буржуазия, олимлар, юристларнинг газабини кўзгатди. Табақалар ўртасида депутатлар қандай овоз беришлари керак, умумийми ёки ҳар бир табақа алоҳидами? – деган баҳс қизиб кетди. Учинчи табақа депутатлари имтиёзли табақалар ўз иродасини ўтказиши мумкин бўлган овоз бериш тартибига кўнмадилар.

Бу орада парижликлар тўдалари депутатлардан қатъи қарорлар талаб қилиб, Версаль томон кела бошладилар. 17 июнь куни учинчи табақа депутатлари ўзларини бутун миллат вакиллари, қарорларини ҳатто қирол ҳам бекор қила олмайдиган Миллий мажлис деб эълон қилдилар. Биринчи ва иккинчи табақа депутатларидан ислоҳот тарафдорлари бўлганлари халқ депутатларига кўшилдилар. Улар абсолютизмни тугатишга тайёр эдилар.

Ғазабланган қирол мажлислар залини ёпиб қўйиши буюрди. Шунда учинчи табақа депутатлари тўп ўйналадиган залда тўпландилар ва Франция учун Конституция тузмагунларича кетмаслик ҳақида машхур қасамёдларини қабул қилдилар.

Учинчи табақа қарашларининг ифодачиси Габриэль де Мирабо (1749–1791) бўлди. У бой ва машҳур оиладан чиқсан, тажрибали ҳамда доно сиёsat арбоби эди. Хали инқилоб арафасидаёқ бутун мамлакат бўйлаб унинг золимликни йўқотиш ҳақидаги талаблари маълум бўлди. Мирабо учинчи табақани бирликка чақирди.

Бу қорачадан келган, калласи катта, куюқ қора сочли, мағрур юришли одам ўзига одамларнинг нигоҳларини тортар, кўзларида газаб чақнар, юзида куч уфуриб турарди. Унинг нотиқлик санъати мисли кўрилмаган эди.

Ўша пайтда ҳеч ким Мирабо каби шундай ишонарли қилиб ва куч билан Франция олдида турган вазифаларни баён қилиб бера олмасди. Мирабо мувваффакиятларининг сири ана шунда эди. Унинг ҳар бир нутқи мисли кўрилмаган олқишиларга кўмилиб кетарди. Ёшлар унинг экипажидан отларини ечиб олишар ва уни кўлда кўтариб кетишарди. «Яшасин, Мирабо – Ватан отаси!» деб қичқиришарди, улар.

1789 йил 9 июлда Миллий Кенгаш ўзини Таъсис мажлиси деб эълон қилди. Париж газеталари, инқилоб бир томчи ҳам қон тўкилмасдан яқунланди, деб ёздилар. Аммо Париж хотиржам эмасди.

Бастилияning олинини – инқилобнинг бошланиши. Шу пайтда қирол саройи қўшинларни Парижга яқин олиб кела бошлади, Людовик XVI эса Миллий кенгаш талабларига мойиллик билдирган вазирларни истеъфога чиқарди.

Хукумат қўшинлари Бастилияга тўплланган ва унинг тўплари шаҳарга қаратилган, деган миш-мислар Париж бўйлаб тарқала бошлади. Ҳамма жойда митинглар бошланиб кетди. 1789 йил 12 июнь куни туш пайтида одамлар уларни қуролланишга чорловчи нотиқларни тинглашарди. Санкюлотлар¹ қирол дўконларига бостириб кирдилар, халқ қуроллана бошлади. Бутун тун бўйи шаҳар тўла ёритилган, кўчада патруллар юришарди, улар қуролланган фуқаролардан тузилган эди.

Қирол омборларини эгаллаб олган парижликлар Бастилияни штурм қилишга тайёрланардилар. Барча табақалар қирол зулмининг рамзи бўлган Бастилияга нафрат билан қарашарди.

1789 йил 14 июля қуролланган тўдалар қамоқхонани қамал қилдилар. Гарнizonга таслим бўлишни таклиф қилишди. Аммо гарнizonдагилар парламентёларни тўп ўқлари билан кутиб олдилар. Шунда ғазабга келган халқ, кўтариб қўйиладиган қўприкларнинг занжирларини узиб, қалъага бостириб кирди. Гарнizonнинг таслим бўлишига тўғри келди, қалъа коменданти Маркиз де Лонени ўзлари суд қилишди. Инқилоб биринчи кунданоқ оддий халқнинг ана шундай шафқатсиз террори² билан ривожлана бошлади.

14 июлдан 15 июлга ўтар кечаси Людовик XVIни уйғотиб, Бастилияning олинганлигини хабар қилдилар. «Ахир бу исёнку!», – деб хитоб қилди у. «Йўқ жаноб, бу инқилоб!», – деб жавоб беришди қиролга.

Людовик XVI қўзғолончиларга «бир томчи ҳам халқ қони тўкилмаслиги учун» ён беришга қарор қилди.

Қирол Таъсис мажлисининг қонунийлигини тан олди. Пойтахтда ҳокимият шаҳар кенгашига (Париж Коммунаси) ўтди.

Инқилоб Францияning янги байроғини ўрнатди. Учинчи табақанинг қизил ва кўкиш рангларига бурбонларнинг оқ ранги қўшилди. Бу уч ранг учинчи табақанинг қирол билан ярашганлигини англатарди.

¹ Сандюлотлар – Буюк француз инқилоби давридаги ватанпарварлар, инқилобчиларнинг номлари, калта иштон (кюлот) кийган шаҳар кашшокларининг масхаромуз лакабидан келиб чиқкан.

² Террор – кўркитиши чораси.

Қирол шахсан Парижга келди ва ўз шляпасига унинг уч рангли рамзини қадаб қўйди. Унга тантанали қабул уюштиришди. Бир неча ой ичидаги парижликлар ўзлари ёмон кўрадиган қалъани бутунлай вайрон қилишди, ҳосил бўлган майдонда эса «Бу ерда рақс тушадилар» деган сўзлар ёзилган хотира ёдгорлиги ўрнатилди. Ҳар йили Францияда 14 июль куни француз халқининг миллий байрами сифатида нишонланади.

Хукмрон доираларнинг эски феодал тартиблар келтириб чиқарган зиддиятларни ўз вақтида ҳал қила олмаганлиги ёки ҳал қилишни хоҳламаганлиги шу тарзда инқилобга олиб келди. Абсолют монархия қулади.

Буюк француз инқилобининг асосий сабалари

Феодал уклад билан ривожланаётган капитализм ўртасидаги зиддиятлар
Табакалар ўртасидаги зиддиятлар
Мамлакатда сарой сиёсатидан норозилик

Буржуазия ҳокимият тепасида

Инқилоб бутун мамлакатни қамраб олди. Париждаги ғалаба бутун мамлакат бўйлаб инқилобнинг тарқалишига туртки бўлди. Бастилияning олинишидан кейин икки-уч ҳафта ичидаги қиролнинг эски маъмурияти чеккага чиқариб қўйилди. Йирик буржуазия Париж коммунасини ўз қўлида саклаб турарди. Бошқа шаҳарларда ҳам худди шу ахвол эди. Ўзига тўқ фуқаролардан Миллий гвардия тузилди. Маркиз Жильбер де Лафайет (1757–1834) унинг бошлиги бўлди.

Лафайет йирик аристократик оиласида дунёга келди. 17 ёшида у кавалерия капитани унвонига эга эди. Ҳали коллежда эканлигига ёқ у Руссо, Монтескье, Рабле асарлари билан танишган, «инсоннинг табиий ҳуқуқлари» ҳаётга татбиқ этилган жамиятни орзу қиларди. Англияning Шимолий Америкадаги мустамлакаларида мустақиллик учун кураш бошланганида адолат туйғуси уни мустақиллик учун курашаётганларга мойилликка ундинди. Кейинроқ Лафайет шундай деб ёзади: «Менинг олдимда «Америка» сўзи айтилиши биланок уни севиб қолдим: у ўз озодлиги учун курашаётганлигини билганим заҳотиёқ менда унинг учун қонимни тўкиш истаги пайдо бўлди...».

Ёш офицер Лафайет ўзининг жасурлиги ва қўрқмаслиги туфайли Вашингтоннинг ҳурмати, конгресснинг ишончи ва аскарларнинг мухаббатини қозонди. У ўз пулларига унга ишониб топширилган дивизияни кийинтирди ва қуроллантириди. Унинг жасорати Францияда машхур бўлди ва Лафайетни Вольтер «Янги Дунё қаҳрамони» деб атади. Парижга қайтиб келиш бекиёс тантанавор бўлди: қирол унга фельдмаршал унвонини инъом қилди (бу пайтда Лафайет 24 ёшда эди). У Америка инқилобининг тирик рамзи, миллий қаҳрамон бўлиб қолди.

Хавотирли кунларда Лафайет Парижда тартиб ўрнатди. Уни оқ от минганд ҳолда Парижнинг барча жойларида учратиш мумкин эди.

Абсолютизмнинг қулаши билан мамлакатда тинчлик ўрнатилмади. Бутун мамлакатни дехқонлар қўзғолонлари қамраб олди. Қуролланган дехқонлар мажбуриятларини бажаришдан бош тортди, озиқ-овқат омборларини эгаллаб олдилар, қасрларга ўт қўйдилар.

Айниқса, июлнинг охири ва августда тўполонлар жуда қучайди. Таъсис мажлиси «имтиёзларни йўқотиш ҳақида декрет»¹ қабул қилишига тўғри келди. Иккинчи даражали феодал мажбуриятлар ҳеч кандай тўловсиз бекор қилинди. Асосий мажбуриятларни сотиб олишлари керак эди. Амалда дехқонлар ўрнатилган бу тўловларни ҳеч қачон тўламаганлар.

Декретнинг биринчи қаторида шундай ёзилганди: «Таъсис мажлиси феодал тартибларни тўлиқ бекор қиласди» ва шундан кейин дехқонлар сенъорлардан ҳеч нарса қарз эмасмиз, деган қарорга келдилар.

«Озодлик, Тенглик, Биродарлик!». «Барча одамлар озод ва тенг ҳуқуқли бўлиб туғиладилар», – дейилади 1789 йил 26 августда Таъсис мажлиси томонидан қабул қилинган «Инсон ва фуқаро ҳуқуқлари Декларацияси»да. Ҳокимиятнинг ягона манбаи халқ деб эълон қилинди. Феодал ва табақа имтиёзлари бекор қилинди. Декларация сўз, матбуот, қонун қабул қилишда иштирок этиш эркинликларини ҳамда хусусий мулк ҳуқуқининг «бузилмас ва муқаддас»лигини эълон қилди.

Декларация Францияда ҳуқуқий давлат қурилишига асос солди. Мажлисда депутатлар ўз қарорларига кўра иккига бўлиндилар. Келишув ва тартиб тарафдорлари ўнгда ўтирилар – уларни «ўнглар» деб атадилар. Чап томонда ўзгаришлар тарафдорлари – «сўллар»

¹ Декрет – конун.

ўтиридилар. Ўшандан буён «ўнглар» ва «сўллар» терминлари ана шундай маънода қўлланилади.

Бирок бу пайт Парижда очлик хукмрон эди. Нон қимматлашар ва етишмасди. Нон дўкончаларида навбат катта, баъзан муштлашувлар бўлиб турарди. Ишсизлар сони ошиб борарди, ёпилган мануфактураларнинг ишчилари, Париждан кетиб қолган аристократларнинг хизматкорлари, ишсизлар қаторини тўлдиради. Навбатларда туришдан ҳаммадан кўп азият чеккан аёллар орасида қиролни Парижга қайтариш учун Версалга юриш қилиш гояси пайдо бўлди. Бунинг устига Людовик XVI қочмоқчи эмиш, деган гап тарқалди. «Сахий қирол»га болаларча ишониш Людовик Парижга қайтса, озиқ-овқатлар ҳам пайдо бўлади, деган умид туғдиради.

5 октябрь куни эрталаб хотинларнинг катта тўдалари бутун тун бўйи дўконлар олдида бекорга навбатда турверишдан ғазаби жунбушга келиб, Ратушани «Нонберинг! Версалга!» деган қичқириқлари билан ўраб олишди. Ноғоралар чалинди. Тушга яқин асосан хотинлардан иборат бўлган 6–7 минг кишилик оломон милтиқ, найза, тўппонча ва ҳатто иккита тўп билан қуролланиб, Версал йўлига тушишди. Уларнинг изидан Коммуна Кенгашининг буйруги билан Лафайет бошчилигидаги Миллий гвардия ҳам Версалга қараб юрди. Унинг вазифаси қиролни ҳимоя қилиш эди. Кундуз соат 16.00 га яқин оломон «Яшасин қирол!» деган қичқириқ билан Версалга кирди. Людовик XVI аёллар делегациясини қабул қилди ва нон таъминотини яхшилашга ваъда берди. Унинг пойтахтга қайтиб келишига тўғри келди, Таъсис мажлиси ҳам ўша ёққа кўчиб ўтди. Шу воқеалардан кейин зодагонларнинг чет элларга қочиб кетишлиари кўпайди.

Қиролнинг қочиши. Таъсис мажлисидаги овозларнинг кўпчилиги бой буржуазияга тегишли эди. Улар Оттон епископи Ш. Талейран ишлаб чиққан ҳужжат асосида черков ерларини «миллий мулк» деб эълон қилишди ва сотувга қўйишиди. Иш ташлашларни тақиқлаш ҳақида қарор қабул қилинди, қиролнинг ҳуқуқлари чекланди.

Кўпгина зодагонлар чет элларга «оқ байроқни асраб қолиш» учун (Бурбонларнинг байроғи) қочишли, шунинг учун эмиграцияни «оқ эмиграция» деб атадилар. Улар қирол ўзларига қўшилади, деб умид қиласарди. 1791 йил 20 июнда у оиласи билан хизматкор кийимини кийиб олиб, саройни яширин тарқ этади. Бегона ҳужжатлар

билан қирол оиласи каретада шарқий чегаралар томон йўл оладилар. Лекин икки кундан кейин монархни таниб қолдилар ва ушлаб Парижга жўнатдилар.

1791 йилги Конституция. Қонун чиқарувчи мажлис. Инқилобий урушиларнинг бошланиши. 1791 йилнинг сентяброда Кенгаш Франция тарихида биринчи марта Конституция қабул қилди. 25 ёшга етган 4,3 миллион эркаклар сайлаш ҳукуқига эга бўлдилар. Овоз ҳукуқи камбағалларга берилмади. Бож солиги бекор қилинди, цех тизими, провинцияларга (мамлакатни 83 департаментга бўлгандилар) бўлишлар ҳам бекор қилинди. Феодал мажбуриятларни бекор қилиш масаласи ҳал қилинди. Конституцияни қабул килган Таъсис мажлиси тарқалди.

1791 йилнинг 1 октябрида янги қонун чиқарувчи мажлис ўз ишини бошлади. Унда Жиронда департаментидан депутатлар кўп эди – уларни «Жирондачилар» деб аташди ва улар аввалги Кенгаш раҳбарларидан кўра қатъироқ эдилар. Жирондачилар ўз таъсирини мустаҳкамлашни истар ва бу ишда уларга Франция инқилоби душманларига қарши ғолибона уруш ёрдам бериши мумкин деб хисобларди.

1792 йил 20 апрелда қирол ва Қонун чиқарувчи Мажлис Австрияга уруш эълон қилди. Бироқ фронтда французларни муваффакиятсизликлар кутарди. Француз қўшинлари Бельгия ҳудудига кирди, бунга жавобан австрияликлар ва прусслар Францияга бостириб кирдилар ҳамда бир неча қалъаларни эгалладилар. Франция душманларига Англия ҳам қўшилди.

Парижликлар орасида қиролнинг қатъиятсизлигидан норозилик ошиб борарди. 1792 йил 20 июнда ҳалқ тўдаси Тюильри қасрига ёпирилиб кирди. Людовик XVI қизил фригий (чўққили) қалпоғини кийди ва деразага яқинлашди. У нима учун бундай қилди? Қизил қалпоқни Қадимги Римда озод қилинган қулнинг бошига кийдиришган ва қирол бу билан ҳалққа у озодлик тарафдори эканлигини кўрсатмоқчи эди.

1792 йилнинг июлида Қонун чиқарувчи Мажлис ҳалққа «Ватан хавф остида» чақириғи билан мурожаат қилди.

Халқ ўз бошидан кечираётган ватанпарварлик ҳисси машхур «Марсельеза»да («Марселиклар мадхияси») ўз ифодасини топди. Унинг сўзи ва мусиқасини ҳарбий муҳандис, шоир ва композитор Клод Жозеф Руже де Лиль (1760–1836) ёзган. «Олга, Фран-

ция! Гўзал юрт ўғлонлари, шуҳрат онлари келди!», деб куйларди бутун Франция. Парижга эса бу сўзларни Марсель батальонининг кўнгиллилари олиб келди.

1792 йил 10 августдаги қўзғолон. Монархиянинг ағдарилиши. Оғир ҳарбий аҳвол халқда қирол ва бойлар томонидан сотқинлик қилинганлиги хақида фикрни туғдирди. 10 августда Миллий гвардия ва кўнгиллилар батальонлари йифила бошлади. 20 мингга яқин кўнгиллилар қирол саройини куршаб олдилар. Қирол оиласи билан Тюильрини тарқ этди ва Қонун чиқарувчи мажлис биносида яширинди. Мажлислар залига кирибօк Людовик XVI: «Мен бу ерга оғир жиноят – инқилоб рўй берилмаслиги учун келдим ва мен ҳамма вақт миллат вакиллари орасида ўзимни ва оиласида яхфисизликда деб хисоблайман», – деди.

Бу пайтда эса саройни штурм қилиш давом этарди. Жанг қисқа, лекин қонли бўлди. Ғалаба қилган халқ вакиллари, Миллий кенгашни қиролни ҳокимиятдан маҳрум қилиш ва янги олий ҳукумат органи – Миллий конвент (кенгаш) чақириш ҳақида қарор қабул қилишга мажбур қилди. Людовик XVI қўлга олинди ва Темпль қамоқхонасига жойлаширилди.

Монархия ағдариб ташланди ва инқилобнинг янги даври бошланди.

Ҳокимиятдагилар Конституцияни қайта кўриб чиқиши лозим бўлган Конвентга сайлов тайинладилар. Париж кўчаларида эса халқ қиролнинг бюст ва ҳайкалларини ағдариб ташлади.

Кўпгина монархистик газеталар ёпиб қўйилди, собиқ вазирлар қамоққа олинди. Мулкий ценз бекор қилинди ва 21 ёшга тўлган барча эркакларга сайлаш ҳукуки берилди. Кенгаш француз мустамлакаларига Франциянинг Қонун чиқарувчи органида вакиллик ҳукукини тан олди.

Якобинчиларнинг инқилобий клуби. Инқилоб пайтида партиялар ўрнини босган сиёсий клублар мамлакатда пайдо бўлди. Уларнинг орасида Якобинчилар клуби муҳим ўрин тутарди. Унинг аъзолари ўз мажлисларини Мукаддас Яков (Якоб) монастирининг кутубхонасида ўтказарди ва шунинг учун уларни якобинчилар деб аташарди.

Улар асосан буржуа табақасининг вакиллари эдилар, чунки юксак аъзолик бадаллари унга оддий одамлар учун киришнинг йўлини ёпиб қўйганди.

Клубда Максимильен Робеспьер (1753–1794) катта таъсир қучига эга эди. У адвокатлар оиласидан чиқсан бўлиб, ўз ватанида, Appace шахрида адвокатлик иши билан шугуулланарди. Бу иш унга бойлик келтирмади, аммо Робеспьер ўз камбағаллиги билан ғуурланаради. У ўзи меҳнат қиладиган барча одамларни камбағал ҳисобларди. Робеспьер одамнинг келиб чиқиши ва пуллари инсон ҳукуқлари учун ўлчов бўла олмайди, деб ҳисобларди.

Клуб аъзолари орасида, шунингдек, Жан Поль Марат (1743–1793) ва Жорж Дантон (1759–1794) ҳам ажралиб турадилар. Марат Париждаги санклюотлар орасида жуда машҳур эди. Маълумоти бўйича врач бўлган Марат ўзини инқилобга бағишлади. Мамлакатдаги аристократия ва феодал тартибларни танқид қиласкан, шу билан бирга у: «жамиятни адвокат ҳам, судья ҳам бўлган диктатор бошқариши керак», – дерди. Диктаторга ҳокимият вақтинча берилиши керак. Парламентдаги баҳсларни у йўқотилган вақт дер ва ҳалқ ўз душманларини шунчаки қириб ташлаши керак, деб ҳисобларди. Парижда «Халқ дўсти» газетасини нашр этаётгани унга катта шуҳрат келтириди. Уни ана шундай, Халқ Дўсти деб атай бошладилар. Марат одамлар қобилияти, меҳнатга муносабати, фаоллиги, кучи жиҳатидан ҳар хил бўлиб тугиладилар деб ҳисоблаб, мулкий тенглик ғоясини тан олмас эди.

Мудофаанинг ташкил қилининиши. Вальми яқинидаги галаба. Франциядан австрияликлар ва прусслар қўшинларини қувиб чиқариш лозим эди. Кўнгиллиларнинг оммавий сафарбарлиги эълон қилинди. Ҳамма ерда «Фуқаролар, куролланинг!», – деган чақириқ жарангларди. Якобинчи Дантон: «Халққа у ўзининг бутун қудрати билан душманга ташланиши кераклигини айтиш вақти келди... Душманни енгиш учун бизга жасурлик ва яна жасурлик керак», – дейди. 1792 йили 20 сентябрда Вальми қишлоғи яқинидаги жангда француз қўшинлари прусс армияси ҳужумларини қайтарди, у чекинишга мажбур бўлди. Бу мамлакатни босқинчилардан озод қилишнинг бошланиши эди.

Республиканинг эълон қилининиши. Конвентга 750 нафар депутат сайланди ва 1792 йил 21 сентябрда ўз ишини бошлади. «Ўнглар» – жирондачилар Конвентнинг пастки ўриндиқларида ўтириди-лар. «Сўллар» – якобинчилар юкоридаги ўриндиқларни эгалладилар ва уларни «Тоғ» деб аташди. Бироқ депутатларнинг аксарияти, 500 га яқини «ўнглар»га ҳам «сўллар»га ҳам тегишли эмасди. Улар-

ни масхара қилишиб «текислик» ёки «ботқоқлик» деб, депутатларнинг ўзларини эса «ботқоқлик бақалари» деб атадилар.

Конвентда якобинчилар билан жирондистлар ўртасида қизгин кураш кетарди. Якобинчилар қиролни дарҳол суд ва қатл қилишни, республика эълон қилинишини, қишлоқда феодал қарамликни тугатишни, чет эл босқинчилари билан курашишни талаб қиласдилар, Париж санклюотлари таъсири остида улар ноннинг эркин савдоши бекор қилиш зарурлиги ҳақида ҳам айтдилар.

Жирондачилар эса инқилоб тугади деб хисоблардилар. Улар Франциянинг республика деб эълон қилинишига рози эдилар, лекин қиролни қатл этишга кўнмасдилар. Савдо эркинлигини ёқласалар ҳам жирондачилар нонга қатъи нарх қўйишга қарши эдилар.

Барча баҳсларга қарамасдан, Конвент депутатлари бир овоздан иккита декретни қабул қиласдилар: хусусий мулкнинг дахлсизлиги ва республиканинг ўрнатилиши.

Людовик XVI нинг қатл этилиши. Париж Коммунасининг нафояндлари орасида қиролни суд қилиш ва қатл этиш тарафдорлари кўпроқ эди. Конвент аъзоларини ўта шафқатсизликдан сақлаб қолишига америкалик гуманист ва мустақиллик учун уруш иштирокчиси Томас Пейн¹ уриниб кўрди. Парижда халқ тўпланиб, «Капетни гильотинага!»² деб митингларда қичқираётган бир пайтда Пейн Конвентда сўзга чиқиб, «Менинг монархиядан нафратланишим ва жирканишим кўпчиликка маълум... Бироқ бошига кулфат тушиб қолган одамга у хоҳ дўст бўлсин, хоҳ душман, менинг ачинишим ҳам шундай жонли ва чин дилдандир...» деди. Пейн ўлим жазосини, монархия тузумининг бу шафқатсиз қолдигини бекор қилишни тақлиф этди. У Конвент кимни бўлмасин, ўлдиришга ҳаққи йўқлигини айтиб ўтди. Пейннинг сўzlари чин дилдан ва ишонарли эди. Аммо кўпчилик овоз билан Людовик XVI га ўлим жазоси белгиланди (овоз бериш очиқ ва номма-ном бўлди). 1793 йилнинг январида Людовик XVI қатл қилинди.

Бу воқеаларни француз тарихчиси Жан Жорес мана бундай тасвирлайди: «Париж хотиржам ва бирмунча қайғули эди. Одамлар унча кўп тўпланмади, ҳаракат катта эмасди... Эшафот Миллий гвар-

¹ Томас Пейн (1737–1809) – инглиз-америка ёзувчisi, файласуф, публицист, АҚШнинг «оталаридан» бири.

² Гильотина – бошни кесадиган машина. Францияда 1792 йили врач Ж. Гильотен тақлифи билан жорий қилинган.

диянинг бир неча батальони билан қуршаб олинганди. Халқ занжирларнинг ортида турарди... Людовик чакмонини ва ёқасини ўзи ечди... Бирдан у эшафотнинг чап томонига юрди ва қип-қизариб кетиб, халққа қараб гапира бошлади... «Мен бегуноҳ ўляяпман, – деди у қаттиқ ва аниқ овозда, – мен ўз душманларимни кечираман ва истайманки, менинг қоним французлар фойдасига тўкилсин ва Худонинг ғазабини тинчлантирусин...».

Бироқ... ноғоралар гумбурлади ва унинг сўзларини босиб кетди. Соат 10 дан 10 дақиқа ўтганда унинг боши узилди. Қиролнинг жасадини Мадлен қабристонига олиб боришидни сўндирилмаган оҳак катламига кўмишди».

Киролни қатл қилганлар монархия билан республика ўртасида абадий девор ўрнатишни ўйлагандилар. Лекин қироллар ҳали қайтиб келади. Қатл эса Людовик Капетга ачиниш хиссини туғдириди.

Инқилоб шундай ривожланди. Франция республика деб эълон қилинди. Феодал табақавий тенгсизлик бекор қилинди. Мамлакат шиори «Эркинлик, Тенглик, Биродарлик!» бўлиб қолди.

Якобинчилар диктатурасининг туғилиши ва ҳалокати

Республика хавф остида. Людовик XVI нинг қатл қилиниши Англия ва Испанияни Францияга қарши урушга чорлади. 1793 йили баҳорда Австрия армияси хужумга ўтди. Француз қўшинлари мағлубиятларга учрай бошлади. Якобинчилар ва оддий халқ бунда жирондачиларни айблардилар.

Уруш, солиқларнинг ошиши, хўжалик алоқаларининг бузилиши французларнинг ахволини ёмонлаштириди. Якобинчилар нархларни чеклаш ҳақидаги талаблари билан оддий халқнинг ихлосини қозонганди.

Жирондачилар судсиз жазолашларни тўхтатишига уриндилар. Улар ҳатто Маратни ва яна бир ашаддий якобинчи – Жак Эберни (1757–1794) қамоққа олишга қарор қилдилар. Уларнинг ҳар иккаласи нафрат оловини ёқишарди.

Эбер халқ учун чиқариладиган «Le pure Duchesne» («Отахон Дюшен») газетасининг муҳаррири эди. Газетанинг ҳар бир сонида Эбер жирондачиларни фош қиласи ва қатл қилишга чакиради.

Норозилик тўлқинлари ичра жирондачилардан «кутурган» деган номни олган ташвиқотчилар гурухи ҳам кўриниб қолди. Уларнинг

раҳномаси руҳоний Жак Ру эди. «Қизил руҳоний» (Руни шундай аташарди) чайқовчилик учун ўлим жазоси қўлланишини талаб қилди. «Кутурганлар»нинг идеали – ҳар бир киши ўз даласи, дўкони, устахонасига эга бўлган майда хунармандлар жамияти эди.

Айни шу пайт Франциянинг жанубида аксилинқилобий исёнлар авж олди. Исёчниларнинг асосий қисмини ерларни шаҳар буржуазияси сотиб олаётганидан норози бўлган дехқонлар ташкил қиласади. Бунинг устига, дехқонлар художўй эдилар ва Худонинг ердаги сояси бўлган қиролнинг қатл қилинишини жиноят деб хисоблашарди. Қўзғолонлар айниқса Нормандия ва Вандейда кучли бўлди. Саводсиз ва мутаасиб бўлган ҳалқ ўз ғазабини шаҳар аҳолисига қаратди. Паншаха, найза, қилич, милтиқлар билан қуролланиб олиб, улар шаҳарларга ёпирилиб киришар ва Миллий гвардияни тумтарақай қиласар, бой шаҳарликларнинг уйларини талар, амалдорларни ўлдиришарди.

1793 йил 31 май – 2 июнь қўзғолони. Парижда «кутурганлар» ва якобинчиларнинг фаоллари Конвентга петиция туздилар, унда шундай дейилганди: «Барча шубҳалилар қўлга олиниши керак... Биз ҳар бир шаҳарда инқилобий қўшин тузилишини талаб қиласиз... Халқни очликдан қирмоқчи бўлаётганларнинг даҳшатли фитналари мавжуд...».

2 июнга ўтар кечаси Миллий гвардия Конвентни ўраб олди. Тўпларнинг оғзи бинога қаратилган эди. Ўққа тутилиш хавфи остида Конвент ўз таркибидан жирондачиларни ҳайдаш ҳақида қарор қабул қилди. Уларнинг бир қисми қамоққа олинди.

Францияда ҳокимият якобинчиларга ва уларнинг доҳийлари – Робеспьер, Марат, Дантонларга ўтди.

Якобинчилар диктатурасининг ўрнатилиши. Якобинчилар инқилобий бошқарув эълон қилдилар. Унинг мақсади қандай қилиб бўлмасин инқилобни сақлаб қолиш эди. Бунинг учун улар инқилобий террор (инқилобий диктатуранинг фавқулодда кўриниши) ўрнатдилар.

Конвент олий қонун чиқарувчи орган бўлиб қолаверди. Унга 11 кишидан иборат ҳукумат – Робеспьер бошчилигидаги жамоат кутқарув кўмитаси бўйсунар эди.

Фавқулодда судлар – инқилобий трибуналлар янги куч билан ишлай бошлашди. Янги ҳукуматнинг ахволи оғир эди. 83 департаментдан 60 тасини исёнлар қамраб олганди.

1793 йилнинг ёзида ёш зодагон аёл Шарлотта Корде Маратни ўлдирди. Судда, нима учун ўлдирганлиги ҳақидаги саволга Шарлотта: «Мен юз минглаб бошқаларни сақлаб қолиш учун бир одамни ўлдирдим, бегуноҳларни сақлаб қолиш ва ўз Ватанимга дам бериш учун мен ярамасни, кутурган ёввойи ҳайвонни ўлдирдим», – дейди. Уни ўлимга хукм этдилар.

Якобинчиларнинг энг муҳим тадбирлари. 1793 йилда Конвент Францияни республика деб эълон қилувчи ва кенг демократик эркинликлар берувчи янги Конституцияни қабул қилишига қарамай, мамлакатда фавқулодда ҳолат хукм сурарди. Бироқ энг муҳими – Конвент феодал қарамлик ва тўловларнинг барчасини бекор қилиш ҳақидаги машҳур декретни қабул қилди. Дехқонлар ўз ерларининг озод эгалари бўлиб қолдилар. Уч ойлик муҳлат ичидаги собиқ сеньорларнинг феодал ҳуқуқларини тасдиқловчи ҳужжатлар ёкиб юборилиши шарт эди. Уларни гулханга отганларида дехқонлар «Марсельеза»ни куйлашар ва «Яшасин, республика!», «Яшасин, Тоғ!» деб қичқирадилар. Бу декрет француз инқилобининг агарар конунчиллик соҳасидаги чўққиси бўлди.

Чет элларга кетиб қолганларнинг ерлари майда бўлакларга бўлиниб, сотиб юборилди. Дехқонлар энди тўловни 10 йилга кечиктирган ҳолда ўзларига шахсий ер майдони сотиб олишлари мумкин эди.

Қишлоқ жамоасининг маҳсус декрети билан дехқонларга помешчик сеньорлар инқилоб арафасида тортиб олган ерларини қайтариб берди. Янги ҳокимиятга қишлоқдаги эски тартибни йўқ қилиш учун ҳаммаси бўлиб икки ой кифоя эди. Лекин барibir ҳамма дехқонлар ҳам ер олишган эмас. Кўпгина оиласлар шунчалар қашшоқ эдиларки, ер олишнинг мутлақо иложи йўқ эди.

Санклюлотларнинг таъсири остида якобинчилар биринчи зарурат буюмларига қатъи нархлар ўрнатди. Париж атрофи тантана қиласади. Полиция назоратчиси шундай ахборот беради: «Бутун санклюлот ҳалқи савдогарлик ва хасисликка тўсиқ қўйилганидан жуда миннатдор». Бироқ қатъи нархлар қўйилган заҳотиёқ дўконларнинг пештоқлари бўм-бўш бўлиб қолди. Савдогарлар ўз молларини яширинча ва уч баробар қимматга сота бошладилар. Ҳаёт учун энг керакли маҳсулотларни энди факат «қора бозор»дангина олиш мумкин эди. Бунинг орқасидан ойлик маошнинг энг кўп микдорини ўрнатувчи декрет қабул қилинди. Бунга жавобан ишчи-

ларнинг иш ташлашлари бошланди, уларни яқобинчилар қатъилик билан бостириши. Ҳали ҳам 1791 йилги ишчи ташкилотлари ва бирлашмаларини тақиқловчи қонун ўз кучида эди.

Фронтларда ва ичкарида ахвол кескинлашган сари санклюотлар сафида қатъи террор ўрнатиш foяси мустаҳкамлана борди. 1793 йил 17 сентябрда Конвент шубҳали кишилар хақида қонун қабул қилди. У барча «шубҳалилар»ни то тинчлик ўрнатилгунча қамоққа олиш ва сақлашни кўзда тутарди. Ўзининг қирол тарафдори эканлигини сездиришган, Конвент комиссарлиги лавозимидан олиб ташлашган, чет элга кетганларнинг қариндошлари ана шундай хисобланарди.

Конвентда қолган 73 та жирондачилар қамоққа олинди. 9 октябрь куни биринчи депутат қатл этилди. Қамоққа олинган жирондачилардан бири суд ҳукмидан кейин: «Халқ ухлаб ётгани учун бизлар ўляяпмиз, сизлар эса у уйғонгани учун ўласизлар!», – дея хитоб қиласди. Қатл пайтида ҳукм қилинганлар «Марсельеза»ни куйлашайди.

Жойлардаги инқилобий қўмиталар бу қонунни бажаришга жонжадлари билан киришдилар. Қамоқхоналар «шубҳалилар» билан тўлиб кетди. Шов-шувли сиёсий жараёнлар бирин-кетин бўлиб турарди. 14 октябрда собиқ қироличани суд қилишди, 16 октябрда эса Мария Антуанетта қатл қилинди. Кейин жирондачиларнинг раҳбарларини қатл этишди. Гильотинани шарафловчи мақолалар чоп қилинди.

Жамоат кутқаруви қўмитасининг раҳбари Робеспьер инқилобни қўллаб-қувватламаганларнинг ҳаммасини душманлар сафига қўшарди ва уларнинг ўлдирилишини оқларди. Ўзини эса, Робеспьер, ким «соф» фуқаро, ким эса йўқ эканлигини ҳал қилиш хуқуқига эга бўлган судья деб ҳисобларди.

Конвентнинг вакиллари бўлган комиссарлар Франция шаҳарларида «тартиб ўрнатишарди».

Оммавий инқилобий армиянинг тузилиши. Конвент армияни мустаҳкамлади. У армияда интизомни мустаҳкамлаш ва исёнчилар билан курашиш учун комиссарларни жўнатди. Кўпгина аскарлар юпун кийинган ва ялангоёқ эдилар. Шундай факт маълумки, депутат Сен-Жюст Страсбург шаҳри аслзодаларидан 10 минг жуфт этикни мусодара қилишни ва уларни армияга жўнатишни буюрган.

Кўпчилиги дэҳқонлар бўлган республика аскарлари фақат душманнинг тор-мор этилишигина уларнинг феодал қарамликдан озод этилганлигини мустахкамлаши мумкинлигини тушунишарди. «Галаба ёки ўлим!» уларнинг шиори бўлиб қолди.

1794 йилнинг бошларида уруш душман худудларига ўтказилди. Марсель олинди. Инглизлар босиб олган Тулонни қамал қилиш бошланди. Ёш артиллерия капитани Наполеон Бонапарт душманга кучли артиллерия зарбасини берди ва республика армиясига шаҳарни олишда ёрдамлашди. Вандейдаги кўзголон ҳам бостирилди.

Ниҳоят, 9 октябрда исёңчилар узоқ вақт хўжайинлик қилган Франциянинг катталиги жиҳатдан иккинчи шаҳри Лион олинди. Бироқ Лиондаги ўч олишлар Конвентга обрў келтирмади. Конвентнинг бу ҳақда қабул қилган қарорида шундай дейилганди: «... 3. Лион шаҳри вайрон қилинади, бойларнинг барча турар жойлари бузилади, фақат камбағалларнинг уйларигина қолади... 4. «Лион» номи республика шаҳарлари рўйхатидан ўчирилади. 5. Омон қолган уйларнинг умумий номи бундан буён «Озод қилинган коммуна» деб аталади. 6. Лион вайроналари устида бу шаҳарда роялистларнинг жиноятлари ва жазоларидан авлодларга ҳикоя қилиб берувчи минора ўрнатилади ва унда : «Лион озодликка қарши курашди – Лион энди йўқ» дея ёзиб кўйилади».

Яхиси камбағалларни яхши уйларга кўчириб ўтказиш кераклиги уларнинг хаёлига ҳам келмади.

Шаҳарни суд қилишга юборилган Кутон (у майиб эди) ўзини майдондаги бинолардан бирига олиб боришни буюрди, уни болға билан уриб, деди: «Сени қонун жазолайди». Бинолар бузилмай қолди, Кутон ўз номини булғашни истамади ва ишчи кучи етиш-маслигини баҳона қилди. Террор тарафдорлари ғазабландилар ва Кутонни чақириб олиб, Лионга бошқа якобинчиларни жўнатди. Шаҳарни варварларча ва маъносиз бузиш бошланди. Энг яхши биноларни миналаштирилар ва портлатдилар. Аксилинқилобчиларни эса қамоқлардан шаҳар ташқарисига олиб чиқдилар ва отиб ташладилар. Инқилобчиларнинг шафқатсизлиги чегарасиз, аёвсиз ва маъносиз эди.

Дехристианлаштириши. Янги тақвим. 1793 йилнинг октябрiddа Конвент «Инқилобий тақвим»ни киритди. «Жаҳолат ва ёлғон билан булғанган» йил ҳисоби республика йили ҳисоби билан алмаштирилди. Янги даврнинг бошланиши деб 1792 йилнинг 22 сен-

тябри (республика ўрнатилган биринчи кун) эълон қилинди. Ой учта декадага бўлинди, ойлар қишлоқ хўжалик ишлари ва об-ҳаво шароитига қараб ном олди (мессидор – хосил ўриш ойи, мивоз – қор ойи ва ҳоказо). Францияда инқилобий йил ҳисоби 12 йил давом этди.

1793 йилнинг октябрида хукумат черков ҳудудидан ташқарида барча диний маросимларни тақиқлади, мотам маросимларига дунёвий тус берди. Қабристонларнинг кираверишига «Ўлим бу – абадий уйқу» деган ёзув қўйилиши буюрилди. Кейин Конвент ҳар бир алоҳида коммуна католик маросимларга риоя қилишдан воз ке-чиш хукукига эгалиги ҳақида қарор чиқарди. Шу пайтдан бошлаб дехристианлаштириш жараёни тезлашиб кетди.

1793 йилнинг нояброда Париждаги барча динларнинг черков ва ибодатхоналарини ёпиш ҳақида Париж Коммунаси қонун чиқарди ҳамда ниҳоят, хукумат руҳонийларга маош тўлашни тўхтатди. Черков амалда давлатдан ажратилган эди.

Энди бир йилда бешта байрам мавжуд бўлиб, булар Даҳо куни, Мехнат, Ҳаракат, Мукофотлаш ва Фикр, кабиса йилида эса яна бир байрам – Инқилоб куни мавжуд эди.

Республикада Онгга сифиниш кенг тарқалди, бироқ тезда уни Озодлик жафокашларига сажда қилиш билан алмаштирилдилар. Ибодатхонадаги файласуфларнинг бюстлари ўрнига аксилинқилобчилар кўлида ҳалок бўлган инқилоб арбобларининг бюстлари ўрнатилди.

Якобинчилар ўртасидаги ажратилиши. Якобинчилар атрофида аҳолининг турли қатламлари жипслашдилар. Бу иттифоқ ташки душманларга ва ички исёнларга қарши биргаликда кураш зарурати туфайли сақланиб турарди. Фронтдаги ғалабалардан ва исёнлар бостирилгандан кейин аксилинқилобий хавф камайди ва дарҳол якобинчилар ўртасида келишмовчиликлар бошланиб кетди. Ҳалқнинг пастки табақалари ислоҳотни янада чукурлаштиришни талаб қиласарди. Буржуазияга, ҳатто инқилобий буржуазияга ҳам бунинг кераги йўқ эди.

Энди якобинчилар «санклюот демократияси»ни бостира бошлидилар. «Қутурганлар» биринчи қурбон бўлди. 1793 йил 5 сентябрда Жак Ру якобинчилар клубига келиб, хусусий мулкка қарши навбатдаги нутки билан чиқди ва «талончилик»ка чақираётган «шубҳали» шахс сифатида қамоқقا олинди. Иш инқилобий трибуналга берилди. Қамоқхонада Ру ўзини ўзи ўлдирди.

1794 йилга келиб Конвентга «бойлар синфи»нинг зулмини тугатиш талаблари қўйилган жуда кўп халқ петициялари келиб турди.

Судья Клемансо шундай деб ёзади: «Менинг принципим – саройларга уруш, капаларга тинчлик, барча ҳақиқий санклюлотларни ерга эга қилиш, демакки, барча собиқ зодагонларнинг ерларини бўлиб беришдир». Клемансо «эмигрантларнинг барча ерларини кичик фермаларга бўлишни» ва «ҳар бир республикачи учун ана шундай кичик фермаларнинг биттасидан зиёд ерга мулкдор ёки ижарачи бўлишни» тақиқлашни маслаҳат берганди.

Бошқа бир петицияда бундай ёзилганди: «... ҳеч ким ўта бой ҳам, ўта камбағал ҳам бўлмаслиги, ҳамма-ҳамма нарсага етарлича эга бўлиши керак».

Бу foяларни Париж Коммунаси кенгашида ва инқилобий клубларда «ўта» якобинчилар – Эбер ва Шоммет ташвиқот қиласарди. 1794 йилнинг мартауда улар ва кўпгина уларнинг тарафдорлари қамоққа олинди. Суд уларни француз халқининг эркинлигига қарши фитна уюштиришда, монархияни қайта тиклашга уринишда айбдор деб топди ва ўлим жазосига ҳукм қилди.

«Ашаддий» якобинчилар қатл қилингандан ва Париж Коммунаси заифлашгандан кейин, Робеспьер бошлигидаги жамият кутқарув қўмитаси Конвентда лидери бўлган «юовошлар» ёки «шафқатлилар» деб аталмиш гурухнинг таъсири ошиб кетишидан хавотирда эди. Дантон қобилиятли юрист ва ажойиб нотик эди. У жуда кўп вақт мамлакатда конституцион монархияни сақлаб қолиш керак, деган фикрда эди, лекин аста-секин бу қарашлардан йироқлашди, якобинчиларга яқинлашди ва 1792 йил 10 августдаги қўзғолонни маъкуллади.

Ички сиёсат соҳасида Дантон ўзаро кураш олиб бораётган партияларнинг келишиш тарафдори эди. У барча партиялардаги яхши ниятли кишиларнинг иттифоқини тузиш йўли билан келишмовчиликларни тугатиш ва кучли ҳукмрон партия тузиш лозим деб хисобларди. У пулнинг, олтиннинг кучига ишонар ва инқилоб йилларида ўзига катта бойлик тўплаган эди. Озодлик ва мулк унинг идеаллари эди.

1793 йилнинг кузидан бошлаб Дантон ва унинг тарафдорлари инқилобий диктатурани тўхтатишиди. Конституцион тартибга қайтишни, террор сиёсатидан воз кечишни ва шу кабиларни талаб

қила бошладилар. Амалда бу демократия ўрнатишга, ҳукуқий давлат тузишга интилиш эди.

Робеспьер ва унинг атрофидагилар «шафқатлилар»ни тугатишга қарор қилдилар. 30 марта ўтар кечаси хавотирли хабар тарқалди. Эрталаб Дантон ва унинг тарафдорлари қамоққа олингандиги маълум бўлди.

Қамоқхонада Дантон афсусланиб қамоқдагиларга деди: «Жаноблар! Мен тез орада сизнинг ҳаммангизни бу ердан озод қиласман деб умид боғлагандим, бироқ мана мен ўзим ҳам шу ердаман ва бунинг бари нима билан тугаши номаълум».

Суд жараёнида Дантоннинг овози ҳамманикини босиб кетарди. Унинг нутқи самимийлиги билан барчани ларзага соларди. Суд ташкилотчилари шошардилар. Ҳатто қамоққа олингандан сўнг ҳам Дантон хавфли эди. Ҳукмда шу куниёқ қатл қилинсин дейилганди. Қатл пайтида Дантон ўзини мағрур тутди, сафдошларини тинчлантириди. Унинг сўнгги сўзлари жаллодга қаратилган эди: «Сен менинг бошимни халққа кўрсат, у шунга муносиб».

Бу қатллар якобинчилар диктатураси тарихидаги сўнгги, фожиали даврни очиб берди.

«Халқсиз якобинчи» – Робеспьер фожиаси. Якобинчилар диктатураси халқнинг қувватлашидан тобора айрилиб бораарди. «Ўта» якобинчиларнинг қатл қилиниши халқнинг паст табақасини улардан узоклаштириди, «шафқатлилар»нинг ўлдирилиши эса юмшокроқ сиёсат позициясида турган буржуазияни ҳушёр тортириди ва якобинчилардан узоклаштириди.

Робеспьерчиларга қарши «янги бойлар» (инқилоб пайтида пайдо бўлган, аввал аристократларга ва черковга қарашли бўлган ерларни сотиб олган, савдогарликдан ва армияни таъминлашдан бойиб кетган буржуазия) чиқдилар. Авваллари ҳимояга муҳтожлиги учун «янги бойлар» Робеспьер ва унинг тарафдорларига бўлган муносабатларини яшириб келишарди. 1794 йилги ҳарбий ғалабалар уларнинг аҳволини мустаҳкамлади. Улар орасида Робеспьернинг ёвузлиги ҳақида тез-тез гапирила бошланди.

Ер олган деҳқонлар инқилоб якунланди деб ҳисоблар, ер ололмаганларининг эса якобинчилардан ҳафсаласи пир бўлганди. Санқлюлотлар энг юқори ойлик маош ҳақидаги қонундан норози эдилар. Нихоят, якобинчилар террорининг даҳшатларидан ҳамма чарчади.

Сиёсий курашда Робеспьер қонли усуулардан фойдаланди. Ўз душманларини йўқотар экан, у ўз шахсий ҳалокатини тайёрлади. Халқ республикани ёмон кўриб қолди. Унинг барча душманлари битта иттифоққа бирлашдилар.

9-термидор тўнтарииши. Конвентда Робеспьер ва унинг тарафдорларига қарши фитна етилиб бораради. 1794 йил 27 июлда (инқилобий тақвим бўйича республиканинг 11 йили термидор ойининг 9-куни) Робеспьер Конвентда нутқ сўзламоқчи бўлганида, уни гапиртирмадилар. Конвент «янги золимлар»га бундан буён тоқат килишни истамайди, деб қичқирдилар. Гулдурос қарсаклар остида Робеспьерга қарши айблов декрети қабул қилинди ва у қамоққа олинди.

Конвентдаги воқеалардан хабар топган Коммуна раҳбарлари Париждаги маҳаллаларда кўзғолон ташкил қилишга уриниб кўрдилар. Лекин 48 маҳалладан факат 16 таси ратушага Миллий гвардия отрядларини юбордилар. Қолганлари Конвентга қўшилдилар. Коммуна раҳбарлари Конвентга ҳужум бошлишга журъат қилолмай турар ва вақтни йўқотардилар. Якобинчилар клуби ҳам ўзини орқага тортиб турарди. Кечкурун Конвент Робеспьер ва унинг тарафдорларини қонундан ташқари деб эълон қилди, бу эса судсиз қатл деган гап эди.

«Ҳали ҳеч қачон Париж кўчалари ана шу куннинг тўрт соати каби одамга тўлган эмасди. Суд биносидан инқилоб майдонига қадар тўлиқ халқ девори турарди. Барча деразалардан, туйнук ва айвонлардан қизиқувчан ва ҳайратли кўзлар қувонч билан боқиб турарди. Барча нигоҳлар Робеспьернинг аравасига қаратилганди, у эса яқин қолган қасосни кутиб ўтиради. Жандармлар халқ Робеспьери билсин деб, калта қиличлар билан унга ишора қилардилар. Эшафот олдида навбат кутиб, уни ерга туширишади. Уни кўтаришганда яна кўзларини очди ва нигоҳлари қонга ботган тўнкага тушди. Самсон (жаллоднинг исми) унинг камзулини ечиб олди. Шунда Робеспьернинг кўксидан бир қичқириқ... ана шу томошанинг ўзидай даҳшатли қичқириқ отилиб чиқди». Бир дақиқадан сўнг оломоннинг майдон узра «Яласин республика!» деган ҳайқириғ янгради.

Ҳаммаси бўлиб юзга яқин киши қатл қилинди, улар асосан Париж Коммунаси аъзолари эдилар. Коммунанинг ўзини шу ердаёқ бекор қилдилар.

Инқилобнинг яна бир даври ана шундай якунланди. Феодал тартиблар йўқотилди. Дехқонлар ер олди. Лекин халқ мухтожлик, уруш ва террордан чарчаганди. Якобинчилар диктатураси қулади.

Инқилобнинг тугатилиши. Буюк француз буржуа инқилобининг тарихий аҳамияти

Термидорчилар реакцияси. Термидорчилар – 9-термидор ойида ҳокимият тепасига келганларни ана шундай деб атай бошладилар. Улар мулкни ва эркинликни, тадбиркорликни ҳимоя қиласиган республика тарафдорлари эдилар. Оддий халқнинг қўллаб-кувватлашига эришиш учун аввал террор сиёсатини юргизганларни энди улар ҳам қамай бошладилар. «Шубҳалилар»ни қамоқлардан чиқардилар. Террор йўқ бўлиб кетмади, факат уни энди якобинчиларга қарши қаратдилар. Кўпларни қамоққа ташладилар, аксариятни қатл қиласидар.

Кўчаларда «олтин ёшлар» тўдалари, безорилик қилаётган роялистлар бандалари пайдо бўлди. Калтаклар билан қуролланиб олиб, улар якобинчиларни ҳақиқий ов қиласидар, уларни калтакладилар, якобинчиларга қарашли қаҳвахоналарни буздилар. Тирик қолган жирондачилар Конвентга қайтдилар. Якобинчилар клубини, халқ жамиятларини ёпдилар ва Париж Коммунасини тарқатиб юбордилар.

Термидорчилар савдодаги чеклашларни бекор қиласидар. Савдо эркинлиги бошланди, нархлар бир неча бор кўтарилиб кетди. Пул қадрини йўқотди, дехқонлар ва савдогарлар жарангдор тангаларни талаб қилишар ва қоғоз пулларни олишмасдилар.

Ахлоқнинг ўзгариши. Мехнаткаш халқ оч қолаётган бўлса, «янги бойлар» ниҳоят ўтаётган вақтни бой бермасликка ва ҳаёт кайфини суришга ошикарди. Агар кўтаринкилик йилларида кўплар ўз бойлигини яширишга мажбур бўлишган бўлса, энди уни бемалол намойиш қила бошладилар. Буржуа жамиятининг юқори қатламида аслзодалар ахлоқи қайта туғила бошлади. «Террор қувиб юборган гўзаллик ва кулги Парижга қайтиб келди», – деб ёзган эди буржуа газеталаридан бири.

Санкюлотларнинг кийимлари калта иштонлар, блуза (яктаксимон уст кийим) ва қизил қалпок модадан чиқди. Энди чиройли, дид билан кийина бошладилар. Банкирлар, савдогарларнинг хотинлари

ярим ялтироқ матолардан тикилган қисқа грекча туникани модага киритдилар. Грекча сандаллар кийган оёқларининг бармоқлари очик қолар, уларни такинчоқлар билан безатишарди.

Париж ўзгариб кетди, у супурилган ва ёритилган эди. Кўчаларда экипажлар, ясаниб олган извошлилар пайдо бўлди. Зеб-зийнат чанқоғи ҳаммани қамраб олди. Ажойиб қабул маросимлари, зиёфатлар, баллар уюштириларди. «Қурбонлар хотираси»га балл уюштириш урф бўлди, уларга фақат эшафотда ўлдирилган кишиларнинг қариндошлари, яқинларигина киритиларди. Бу балларга худди жаллод учун тайёрлангандек энсаси очиб қўйилган маҳсус соч турмаклаш расм бўлди. Бўйинларига қизил ипча такиб олишарди. Бирбирига «сен» деб мурожаат қилиш тақиқланди. «Месье» ва «мадам» деган мурожаатни «гражданин» ёки «гражданин хоним» билан алмаштиришди.

1795 йилнинг баҳоридаги ҳалқ қўзғолонлари. Инқилобий ўзгаришлар тугади. Конвент депутатларини энди ҳалқнинг ахволи кизиқтирмас эди. 1795 йили парижликлар икки марта Конвент ишига таъсир кўрсатишга уриниб кўрдилар.

Париж атрофида норозилик кучайиб борарди. Уйларнинг деворларида «Халқ, уйгон! Пайт келди!», – деган ёзувлар пайдо бўлди.

Конвентга очликдан ва «ватанпарвар»ларнинг қувгин қилинаётганидан газабга келган одамлар тўдаси келиб турарди. Қўзғолон 1795 йилнинг апрелида бошланди. Уни ҳеч ким тайёрлаган эмасди. Шу куни эрталаб Париж чеккаларида яшовчи ҳалқ тўплана бошлади. Аёллар кўп эди. «Нон беринг! 1793 йилги Конституцияни беринг!», – деган хитоблар эшитилиб турарди.

Тезда Конвентни 10 мингта қуролсиз санқюлотлар ўраб олдилар, қўрикчиларни қувиб юбордилар ва бинони эгалладилар. Улар депутатлардан нон ва 1793 йилги конституцияни талаб қиласдилар, лекин ҳеч нарса ололмасдилар.

Кечга бориб, Конвент Миллий гвардия билан ўраб олинди, ҳалқни эса қувиб юборди. Париж қамал ҳолатида деб эълон қилинди. Май ойида бу воқеалар такрорланди. Сент-Антуан атрофидаги барча аҳоли қўзғалди. Оломон «Нон ва 1793 йил Конституцияси!», – деб кичкирарди. Кўпчиликнинг шляпаларига, кўкракларига, енгларига ана шу шиорлар бўй билан ёзиб қўйилганди. Санқюлотлар қўлларида найза ва милтиқлар, байроқ ва шиорлар ушлаб олган эдилар. Заставалар ёпиқ эди. Кундуз соат 15⁰⁰ да қўзғолончилар Конвентни эгал-

ладилар. Одамлар оқими барча биноларни тўлдириб юборди. Икки кун давомида ғазаб алангаси авж олди. Иккинчи кун охирига келиб, санқюлотлар тор-мор қилинди ва қуролсизлантирилди, уларнинг йўлбошчилари – сўнгги якобинчилар ўзларини ўлдирдилар, кимлар шундай қила олмаган бўлса, гильотинага борди. Кўплар қамоқقا ташланди, сургун қилинди.

Бу қўзголон Буюк француз инқилоби давридаги санқюлотларнинг сўнгги оммавий чиқишилари эди.

1795 йилги Конституция ва биринчи Директория. 1795 йилнинг августида Конвент янги Конституция қабул қилди, у Францияда республика тузумини мустахкамлади, лекин умумий сайлов ҳукуқини бекор қилди. Энди қонунчилик ҳокимияти икки палатадан – Беш юзлар кенгаши ва Оқсоқоллар кенгашидан иборат бўлган қонунчилик корпусига берилди. Ижро ҳокимияти Оқсоқоллар кенгаши тайинлайдиган, беш кишидан иборат Директорияга топширилди. Шу билан бирга 1795 йилги Конституция инқилобнинг барча антифеодал ютуқларини, энг муҳими эса эмигрантларнинг, черковнинг ва таҳтга қарашли ерларнинг сотилиши қонунийлигини тасдиқлади.

Янги Конституция монархия тарафдорларини қутуртириб юборди ва улар Конвентни тарқатиб юборишга уриниб кўрдилар, лекин муваффақиятсизликка учрадилар. Артиллерия ёрдамида исёнчиларни тор-мор қилган генерал Бонапарт Конвентнинг халоскорига айланди.

Наполеон Бонапарт Тулонни олгани учун ҳам якобинчилар ундан қарздор эдилар. Бу воқеалардан кейин уни бирданига дивизия генерали даражасига кўтаришди ва «Франциянинг ички ҳарбий кучлари қўмондони» этиб тайинладилар.

Тенглик йўлида фитна. Янги ҳокимиятнинг сиёсатини банкирлар ва «янги буржуазия» белгилаб берди. Тўғри, Парижда ва бошқа йирик шаҳарларда ҳали ҳам оддий ҳалққа арzonлаштирилган нон беришарди, лекин бу оч қоладиган даражада кам эди. Бойлар бойирдилар, камбағаллар ахволи эса тобора оғирлашиб борарди.

Ана шу шароитда ташкилотчиси Гракх Бабёф (1760–1797) бўлган «тенглик йўлида фитна» пайдо бўлди. Бабёф ва унинг дўйстлари тўлиқ тенглик ҳақида орзу қиласидилар. Бунинг учун улар хусусий мулкни йўқотиш ва мол-мулкнинг умумийлигини ўрнатиш, биргаликда меҳнат қилиш ва меҳнат маҳсулини тенг бўлиб олиш

керак, деб ҳисобларди. Бироқ фитна фош этилди, унинг раҳбарлари эса қатл қилинди.

Директориянинг урушлари. Генерал Бонапарт. Ҳокимият тепасига келган йирик буржуазия ўзга юртларни босиб олишдан манфаатдор эди ва Директория давридаги Франциянинг урушлари босқинчилик характерига эга бўлди. Рейннинг сўл кирғоги ва Бельгия аллақачон Францияга қўшиб олинганди, Голландия эса қарам республикага айлантирилганди. Босиб олинганд ерларда француздар феодал тартибларни йўқ қилдилар. Бироқ Парижга ҳарбий ўлжа сифатида озиқ-овқатлар ва санъат асарлари юклangan карvonлар келиб турарди.

Санкюлотларнинг ва армиянинг обрўси ошиб борар, айниқса Наполеон Бонапартнинг обрўси жуда катта эди. Наполеон Бона-парт 1769 йили 15 августда Корсика оролида майдада мулкдор бўлган зодагон оиласида, француздар Корсикани эгаллаганларидан сўнг уч ой ўтгач дунёга келганди. Оилада болалар кўп, пул эса оз эди. Отаси Наполеонни ҳарбий билим юритига ўқишига беради. Ўқиши даврида Наполеон математика, тарих ва географиядан ажойиб муваффакиятларга эришди. 1785 йили у кичик лейтенант унвони билан артиллерияга жўнатилди. Инқилоб бошланганда у 20 ёшда, ватанпарвар, республикачи, якобинчиларнинг ва Конвентнинг тарафдори эди.

Тулон ёnidаги муваффакият уни машҳур қилди ва тезда бригада генерали бўлди. Термидор унинг ҳаётини кескин ўзгартириб юборди. Ҳарбий лавозими ҳам хавф остида қолди, уни вазифасидан озод қилдилар ва якобинчилар билан алоқаси учун қамоқقا олдилар (тўғри, 15 кундан кейин озод қилинди ва унвони қайта тикланди). Бир қанча вақт Бонапарт омади чопмай юрди, лекин 1795 йилда Конвентнинг топшириги билан пойтахтдаги роялистлар қўзголонини бостириди ва генерал ҳамда армиянинг қўмондони бўлди.

Австрия қўшинлари эгаллаб турган Шимолий Италияга юриш килиш учун қўмондон лавозимига номзод керак бўлганда, Директория ўз нигоҳини яна Бонапартга қаратди.

Ўз армияси билан учрашар экан, Наполеон тартибга тушириши лозим бўлган бир гала жулдирвоқиларни кўрди. Бунинг устига армияда ҳаммаси бўлиб 30 минг одам ва 30 та тўп бўлиб, бу душманницидан 7 марта кам эди. Армия инқилоб йилларида тузилган бўлса ҳам, унда демократик тартиблар йилдан-йилга камайиб бора-

ётганди. Аллақачон офицерларни, ҳарбий судларни сайлаш бекор қилинганди. Аскарларнинг инқилобий кайфияти ҳам сўниб борарди.

26 ёшдаги генерал ана шу армияни жанговар, қобилиятли қилиши керак эди. Наполеон бу вазифанинг уддасидан чиқди. Наполеон авлиё эмасди, у аскарларнинг ўлжа олиш иштиёқидан ҳам унумли фойдаланди. Директория замонида бойиб қолиш иштиёқи ҳаммани, шу жумладан, аскарларни ҳам қамраб олганди.

Шимолий Италияга юриш олдидан Наполеон қўшинга шундай деб мурожаат қилди: «Аскарлар, сизлар яланғочсизлар ва қорнингиз ҳам тўқ эмас. Мен сизни дунёнинг энг хосилдор текисликларига олиб бораман. Бой вилоятлар ва катта шаҳарлар сизнинг ҳукмингизда бўлади, сиз у ерларда хурмат, шон-шараф ва бойлик топасиз». У урушда армия ўзини ўзи боқиши керак, деб хисобларди. Лекин бойиб кетиш иштиёқидан ҳам кўра кўпроқ барчани – бош қўмондон ва генераллардан тортиб то энг сўнгги ногора чалувчи болага қадар – инқилобий туйғулар қамраб олганди. Айни шу пайтда Австрия ва Пъемонт қўшинларининг руҳий ахволи паст эди, аскарлар уришишни хоҳламас, маҳаллий аҳоли уларни ёмон кўрарди. Бутун Шимолий Италияни инқилоб руҳи қамраб олган, Наполеон эса «халоскор» деб ном чиқарганди. Бунинг устига у италияликларга шундай мурожаат қиласди: «Италия халқлари! Француз армияси, сизнинг занжирларингизни узгани келди. Француз халқи барча халқларнинг дўсти! Унга пешвоз чиқинглар. Сизнинг мулкингиз, сизнинг одатларингиз ва сизнинг динингиз дахлсиз бўлиб қолаверади. Биз олийжаноблик билан ва фақат сизларни қулликда ушлаб турган золимларга қарши жанг қиласмиз».

Биринчи тўқнашувларнинг ўзиёқ француз қўшинларига ажойиб ғалабалар келтирди, аскарларнинг руҳини кўтарди ва Бонапартнинг обрўйини ошириди. Офицерлар ва генераллар унинг устунлигини тан олишар, авваллари ёшлиги учун бош қўмондонларига унча ишонқирамаган аскарлар, энди уни тантанавор олқишлар эди. 1796 йил 10 майда Лоди яқинидаги жангда Австрия армияси устидан қозонилган йирик ғалабадан кейин энг жасур аскарлар кенгаши Наполеон Бонапартга капрал унвонини берди (унинг аскарлар орасида узоқ вақт сақланиб қолган лақаби «кичкина капрал» ана шундан эди) ва хар бир янги ғалабадан кейин аскарлар унга навбатдаги унвонни бериб борди.

Наполеон 1796 йил 28 апрелда Пьемонтни эгаллаб, Миланга қараб юриш бошлади. Бир қатор герцогликлар Бонапартга бўйсунишларини изхор қилдилар.

Тўртта армия тор-мор қилинди ва 1797 йил 17 октябрда Бонапарт Кампо-Формио деган жойда Австрияни Франциянинг ғалабасини тан олишга ва сулҳ тузишга мажбур қилди. Кейинчалик Италия худудида Францияга қарам бўлган бир нечта республикалар ташкил қилинди. Швейцарияга ҳам худди шундай тақдир насиб этди.

Рус саркардаси А.В. Суворов бу Италия юришининг таъсири остида дунёнинг учта энг буюк қўмондонлари деб Цезарни, Ганибални ва Наполеонни атади. «О, бу ёшгина Бонапартнинг қадам ташлашини кўринг! У қаҳрамон, у мўъжизавий баҳодир, у афсунгар!», – дея қойил қолганди унга Суворов.

Бонапартнинг жасурлиги афсонавий эди. Италия учун жангларда у мингандан 19 та от ўлдирилди, Арколь ёнидаги жангда эса, қўлида байроқ билан австрияликлар ўки остида аскарлари олдига тушиб Арколь кўприги томон ташланганди.

Босиб олинган ерларда Наполеон феодал қарамликни йўқ қилди, черков ва ибодатхоналарни баъзи бир йифимлардан маҳрум этди, қайсиdir даражада инсон ҳуқуқларини мустаҳкамлайдиган янги конунлар киритди. Шимолий Италиядан босқинчиларча контрибуция олар экан, унинг бутун оғирлиги бойларга тушишини талаб қилди. Шу йўл билан контрибуция ҳисобига ва ундан ошириб ҳам у банкларнинг, музейлар, сарой ва черковларнинг қимматбаҳо буюмларини олар ва «Франция халқи ва ҳукуматига» совгалар сифатида аравалар билан Парижга жўнатарди. Шу билан бирга Бонапарт ва унинг генераллари ўз манфаатларини ҳам унутмасди. Унинг бир ярим йил Италиядা бўлиши Наполеон Бонапартни тирик афсонага айлантириди.

1797 йил 7 декабрда Бонапарт Италиядан Парижга триумфатор сифатида кириб келди. Директория уни Люксембург саройида кутуб олди, сарой атрофида эса қаёққа назар ташлама, охири йўқ олон мон етиб келаётганди.

Наполеоннинг ғалабалари энди қўпчилик ички сиёсий масалаларни ҳал қилиш қобилиятига эга бўлган куч сифатида қараётган армиянинг обрўсини ошириди. Ўзининг айтган сўзларига қараганда, айнан Италиядা у ўзини шунчаки генерал деб эмас, ҳалқнинг тақдирига таъсир ўтказишга қодир одам деб ҳис қилган.

Кейин Мисрга қилинган фантастик юришнинг навбати келди. Ҳали 1797 йилнинг ёзида Бонапарт Италиядан Директорияга ёзган хатидаёқ: «Биз Англияни енгиш учун Мисрга эга бўлишимиз кераклигини тушунадиган вақтимиз узоқ эмас», – деб айтганди. Энди у юришнинг режасини тақдим қилди ва ҳукумат уни тасдиқлади. Юриш катта ҳафсала билан тайёрланди. Бонапарт Шарқни ўрганиш учун ўзи билан бирга юзта олимни олиб кетишни ҳам мўлжаллади.

1798 йил 19 майда Наполеоннинг 38 минглик қўшини 350 кема ва баркаларда (юк ташийдиган ясси дарё кемаси) Тулондан Мисрга қараб сузди.

Миср расмий равищда Туркияning мулки эди, аммо амалда уни маҳаллий ҳарбий-феодал мулқдорлар бошқарап эди.

Франция армияси Александрия яқинидаги қирғоққа тушди ва бу бой шаҳарни эгаллади. Кейин Француз армияси Нил бўйлаб юқорига, Қохирага қараб юриш бошлади. Эҳромлар олдида Наполеон ўзининг машхур сўзларини айтди: «Аскарлар! Сизларга бугун бу эҳромлар юксаклигидан қирқ аср қараб турибди!». Кейин Бонапартнинг армияси Қохирани эгаллади.

Наполеон ғалабани тантана қилаётган бир пайтда инглиз флоти қўмондони адмирал Нельсон Бонапартнинг флотилиясини Абукир кўлтиғида йўқ қилди. Наполеон ва унинг армияси Франциядан ажралиб қолди. Лекин бу вақтдан ҳам мамлакатни бошқаришнинг илгор тизимини ташкил қилиш учун фойдаланилди, олимлар эса Мисрнинг 24 томлик тавсифини тузишди.

Ўзининг Мисрдаги ҳокимиyatини мустаҳкам деб ҳисоблаб, Наполеон яна Шарққа қараб, Сурияга йўл олди. Яффа ва Хайфа ёнида турклар француздарни тўхтатишига уриниб кўрдилар, лекин қалъалар жанг билан олинди. 10 минглик қўшин билан Наполеон Акко кўрғонига – Сурия подшоси пойтахтига яқинлашди. Француздар кун сайин ҳужумини кучайтиришга қарамасдан ҳали салбчилар томонидан қурилган қалъани осонликча эгаллай олмадилар. Бунинг устига қалъадагилар денгиз томондан инглизлар ёрдамини олиб турарди. Наполеон қўшинини яна Қохирага олиб кетди. Кейин ғаройиб бир тарзда Абукир олинди. Шундай қилиб, бутун Миср эгалланди ва Наполеон шон-шуҳратга бурканди.

Шундай бир пайтда Наполеон тўсатдан Францияга қайтишига қарор қиласди. Бунинг сабаби Францияга қарши янги иттифоқ ту-

зилганлиги ва А.В. Суворов қўмондонлигидаги рус қўшинлари Шимолий Италияда эришаётган ғалаба ҳақидаги хабарнинг Бонапартга етиб келганлиги эди. Халқ орасида обрўси тушиб кетган Директория ҳукуматини алмаштириш, ҳокимиятни эгаллаш учун фурсат етганлигини англаган бўлса ҳам ажаб эмас, чунки Наполеоннинг Францияга қайтиш сабаблари ичida шундай тахмин ҳам йўқ эмас. Хуллас, 1799 йилнинг августида Париж голиб қўмондонни олқишилар билан кутиб олди.

18-брюмер давлат тўнтариши (1799 йил 9 ноябрь). Айтиб ўтилгандек, Директория ҳокимияти халқ орасида обрўга эга эмасди, «янги бойлар» ҳам Директорияни ёқтиришмас эди. Газеталар «Кучли ҳокимият ўрнатиш!» талабини биринчи сахифаларида ёрита бошлади. Шундай шароитда ҳокимиятга қарши фитна пишиб етилди. Фитначилар Мисрдан қайтган Наполеондан асосий куч сифатида фойдаланишга қарор қилдилар, Бонапарт ҳам бунга розилик билдириди. 18 брюмерда (9 ноябрь) ҳарбийлар тазиёки остида хукумат бошлиғи истеъфога чиқди. Эртаси куни, 19 брюмерда Париж яқинидаги Сен-Клу деган жойда йиғилиш ўтказаётган Оқсоқоллар кенгаши ва Бешюзлар кенгаши 4–5 минг қўшин томонидан ўраб олинди. Қўрқиб кетган Оқсоқоллар кенгаши таклиф қилинган идора усули – Консулликни¹ дархол тасдиқлашди. Бешюзлар кенгашидан залда қолган 25–30 депутат ҳам (қолганларини гренадёрлар қувиб чиқарган эди) бу қарорни тасдиқлади. Консуллик уч кишидан иборат ижроия ҳокимияти бўлиб, улардан ҳар бири «Француз республикасининг консули» увонига эга бўлдилар. Сайланган уч консулдан² бири Наполеон Бонапарт эди.

Консуллар республикага садоқат тўғрисида қасамёд қабул қилдилар.

«Биз инқилоб романини охиригача олиб бордик, энди унда реал нима борлигини кўриш керак», – деган эди Наполеон 18 брюмер тўнтариши ҳақида.

¹ Консуллик – консуллар ҳукмронлиги даври.

² Консуллар – Қадимги Римда бир йилга сайланувчи олий лавозимидаги иккита шахс, улар олий фуқаролик ва ҳарбий ҳокимиятга эга бўлган.

Буюк француз буржуа инқилобининг босқичлари

1-босқич	1789–1792 йиллар	Конституцион монархистлар ҳокимияти даври
2-босиқч	1792–1793 йиллар	Жирондачилар демократик республикаси даври
3-босиқч	1793–1794 йиллар	Якобинчилар террори даври
4-босқич	1794–1795 йиллар	Термидорчилар реакцияси даври
5-босқич	1795–1799 йиллар	Директория даври
6-босқич	1799–1804 йиллар	Консуллик даври

* * *

Шундай қилиб, Франциядаги буржуа инқилоби ниҳоясига етди. Инқилоб эски тартибларни йўқ қилиб ташлади: феодал қоидалар ва абсолютизм тугатилди; Франция республика деб эълон қилинди. Агар Англиядаги инқилоб буржуазия ва зодагонларнинг келишуви билан якунланган бўлса, Францияда буржуазия зодагонларни енгди, эски жамият ва давлат тузумини тўлиқ бузиб ташлади. Сиёсий ва иқтисодий ҳокимият буржуазияга ўтди. Ҳукукий давлат ва фуқаролик жамияти шаклланиши учун асос солинди. Буржуа мулкчилиги ўрнатилди ва саноат тўнтариши учун шароит яратилди.

Қишлоқда йирик ер эгалиги мустаҳкамланиб, феодал табака қолдиклари йўқотилди. Лекин дехқонларнинг кўпчилиги ерсиз ва оғир аҳволда қолаверди.

Буюк француз инқилоби бутун дунё тарихи учун ҳам маълум маънода бурилиш нуқтаси бўлди. У олга сурган ғоялар – Озодлик, Тенглик, Биродарлик фақат Европанинг эмас, балки бошқа қитъалар халқларининг ҳам кейинги ривожига арзигулик таъсир кўрсатди.

Шунингдек, инқилоб тарихи кўплаб халқлар учун катта сабоқ ҳам бўлди. Унинг аёвсиз қирғинлари, барча муаммоларни ҳал этишнинг воситаси сифатида террорнинг қўлланилиши, сиёсий муҳолифларнинг жисмоний йўқ қилиниши кабилар ҳам инқилоб келтирган даҳшатли реаллик бўлди.

VIII боб бўйича саволлар

1. Буюк француз инқилобининг асосий босқичлари ва уларнинг характерли томонлари нимада?

2. «Инсон ва фуқаро хуқуқлари декларацияси»нинг қабул қилиниши қандай аҳамиятга эга бўлди? Декларациянинг асосини қандай ғоялар ташкил қилди?
3. Қандай ички ва ташқи факторлар инқилобий жараёнларнинг чукурлашишига кўмаклашди?
4. Инқилоб туфайли қишлоқ хўжалиги ва саноатда қандай ўзгаришлар юз берди?
5. Инқилоб олдинга сурган қайси ғоялар барча халқлар курашининг мазмунига айланди?
6. Якобинчилар диктатураси сиёсатидаги қайси жиҳатлар уларнинг ҳалокатига олиб келди?
7. Якобинчилар ҳалокатининг тарихий ўгитлари нимада?
8. Буюк француз инқилобининг оламшумул тарихий аҳамияти нимада?

III БЎЛИМ

ЯНГИ ДАВРДА ЕВРОПА МАМЛАҚАТЛАРИ

IX БОБ. XVI–XVIII АСРЛАРДА ГЕРМАНИЯ

Иқтисодий тузум. XVI аср бошларида Германия¹ аҳолисининг асосий қисмини қарам дехқонлар ташкил қиласр эди. Уларнинг ҳақ-хукуклари тўлиқ хўжайинларининг иродасига боғлиқ ҳисобланарди. Шаҳарларда, жумладан йирик шаҳарларда ҳам, цех ишлаб чиқариши хунармандчиликнинг асосини ташкил қиласрди. Цех магистратлари-га патрицийлар хонадонининг аъзолари ва бой бюргерларнинг вакиллари кирав эди.

XVI аср охири – XVII аср бошларида ишлаб чиқарувчи кучлар ривожланиши ва меҳнат тақсимоти ҳалқаро савдо алоқаларининг сезиларли ривожланишига олиб келди. Савдо йўлларида жойлашган Германия жаҳон савдосида марказий ўринни эгаллаб туради. Тўғри, голланд ва инглиз савдогарлари рақобатига бардош бера олмаган шимолий герман ерлари, хусусан Ганза XV аср охирларидан таназзулни бошидан кечиради, Буюк географик қашфиётлар эса жаҳон савдосининг тез орада Атлантик океани қирғоқларига силжишидан далолат берарди. Шунга қарамасдан, XVI аср ўрталаригача Шимолий Италияning ва унинг воситачилигида бутун Шарқнинг Фарбий Европа бозорлари билан алоқалари герман ерлари орқали ўтарди. Немис шаҳарлари, айниқса Аугсбург, Нюрнберг ва Рейн бўйи ҳамда юқори Дунайдаги бошқа баъзи шаҳарлар Европа савдосининг йирик марказлари бўлиб қолаверди. Немис савдогарлари Европанинг савдо портларида имтиёзга эгалигидан ва жаҳон савдосининг янги йўналишидан ҳам яхшигина фойда олишарди. Германиянинг ҳалқаро иқтисодий роли шунда ифодаланарди, ўша пайтда у мис қазиб чиқариш бўйича дунёда биринчи ўринда туради, мис эса савдодаги асосий восита ҳисобланарди. Америка олтини ва кумушининг Европага оқиб келиши факат XVI аср ўрталаридан сезила бошлайди.

¹ Германия – Буюк Карл империясига кирган шаркий ерларнинг шартли номи.

Савдо йўлларидағи қулай жойлашув хунармандчилик маҳсулотларини ишлаб чиқаришнинг ошиши ва қишлоқ хўжалик маҳсулотлари етиштиришнинг ўсишига олиб келди. Бу ҳол айниқса XVI аср бошларида яққол кўзга ташланади. Шимолий немис шаҳарлари гуллайди, бойлик ва зеб-зийнатлар мужассамлигининг ифодасига айланади. Аугсберглик Фуггерлар хонадони тўгрисида, улар уруш ва тинчлик тақдирини ўз қўлларида ушлаб турганлиги хақида олдинги бобларда сўз юритган эдик. Фуггерлар, Вельзерлар ва бошқа шу каби хонадонлар ўша давр ўлчами бўйича ҳақиқий жаҳон савдосини олиб боришар, кўплаб мамлакатларда ўзларининг доимий идораларига эга эдилар. Йирик жанубий герман фирмалариға эга мамлакатда ва бошқа мамлакатларда бой тоғ-конлари уларга тегишли эди.

Кўплаб немис шаҳарлари қулай алоқалари билан машхур эди. Машхур немис гуманисти Яков Вимпфелинг ўша пайтдаги Кёльн ҳақида шундай деб ёзади: «Бу шаҳар ўзининг кенг савдоси ва беҳисоб бойликлари билан Рейн шаҳарларининг шохи саналади». Нюрнберг – металлга ишлов бериш саноатининг йирик маркази – XVI асрда 20 мингга яқин аҳолига эга эди. Эльзас шаҳарлари ичida Страсбург ўзининг савдо алоқалари билан, Майн бўйидаги Франкфурт эса Голландия, Фландрия, Англия, Польша, Чехия, Италия ва Франциядан савдогарларни йигадиган ярмаркаси билан машхур эди. XV аср охирида Германия шарқидаги Лейпциг ярмаркаси катта аҳамият касб эта бошлайди. Кичикроқ шаҳарлар – Ульм, Констанц, Ревесбур ва Аугсбурглар тўқимачилик марказлари ҳисобланар, ўз маҳсулотларини фақат маҳаллий бозор эмас, балки Италия ва Испания бозорларига ҳам олиб чиқар эди. Дунай бўйида жойлашган немис шаҳарлари орқали Жануби-Шарқий Европа билан савдо олиб бориларди.

Ишлаб чиқариш ва савдонинг ўсиши, катта бойликларнинг тўпланиши XV аср охирлариданоқ герман шаҳарларида бозор муносабатларининг шаклланишига олиб келди, тарқоқ мануфактура ривожланди. Айни пайтда кўп куч ва маблағ талаб қилинадиган соҳаларда (масалан, типография) марказлашган мануфактура ҳам ривожланди. Айниқса тоғ-кон саноати, хусусан қимматбаҳо металлар қазиб олиш тез тараққий этди.

XVI аср биринчи ўн йиллигига Германия тоғ-кон саноатида камиди юз минг киши банд эди. Германияда Европанинг қолган

қисмидан кўпроқ мис қазиб олинарди. 1670–1730 йиллари Германия иқтисодий жиҳатдан Европанинг энг илғор мамлакатига айланади ва Реформация деб аталган диний инқилобнинг маркази бўлиб қолади. Реформация ва ундан кейинги Дехқонлар уруши Германия тарқоқлигини янада авж олдирди.

XVI–XVII аср биринчи ярмида Германия. Дехқонлар уруши мағлубиятга учраган бўлсада, мамлакатда бир қатор ўзгаришларга олиб келди. Жанубий Германияда феодалларнинг дехқон хўжаликларини тортиб олиш ҳоллари тўхтади. Кўзголоннинг қайтарилиш хавфи остида бир қатор йифимлар ва қарамлик турлари бекор қилинди. Рицарларнинг юзлаб қасрлари ва монастирлар йўқ қилингани ҳам дехқонларнинг аҳволини бироз яхшилади. Аммо умуман Дехқонлар урушидан кейинги ахвол, Германиянинг халқаро сиёсий ва иқтисодий мавқеининг ўзгариши мамлакат хўжалик тараққиёти суръатларининг сусайишига олиб келди. Бунинг устига XVI аср иккинчи ярмидан бошлаб Буюк географик кашфиётларнинг таъсири сезила бошлади. Шимолий Италия ва Германия шаҳарлари орқали ўтган савдо йўли илгариги мавқеини йўқотди. Шимолий герман шаҳарларининг Ганза иттифоқи ҳам халқаро савдонинг Атлантик океани қирғоқларига кўчганлигидан таназзуулга юз тута бошлади. Нидерландиядаги инқилоб туфайли испан ҳукмронлигидан озод бўлган голланд савдогарлари немисларни Болтиқ бўйи савдосидан ҳам сиқиб чиқара бошлади. Бу пайтга келиб Голландия ташки савдо бўйича дунёда биринчи ўринга чиқиб олган эди.

XVI аср бошларида Германияда вужудга келган мануфактура ишлаб чиқариши ва эркин бозор муносабатлари ривож топмай қолди. Илгари жадал ривожланган Саксония, Гарц ва Тюрингиядаги тоғ-кон саноати оғир тушкунликка учради. Немис шаҳарларининг оғир аҳволи қишлоқ хўжалиги маҳсулотлари учун ички бозорни қисқартирди. Энди қишлоқ хўжалигининг фақат чет элларга чиқариладиган маҳсулотларигина харидоргир бўлиб қолди. Булар асосан дон ва чорвачилик маҳсулотлари эди.

XVI аср иккинчи ярмидан Германияда бошланган иқтисодий инқирознинг сабаби фақат савдо йўлларининг Атлантик океани қирғоқларига кўчиши ва унинг оқибатида бозорларнинг йўқтилиши, немис савдосининг турғунлиги эмасди, Дехқонлар уруши бостирилгандан сўнг немис саноати бошқа мамлакатлар саноати билан рақобатга бардош бера олмаганлигига ҳам эди.

Мануфактуранинг муваффақиятли ривожланиши учун унинг шаҳар доирасидан чиқиб, қишлоққа ҳам ёйилиши лозим эди. Аммо Германия шароитида бу деярли мумкин бўлмади.

Германия тоғ-кон саноатидаги инқизот ҳам асосан Дехқонлар урушининг мағлубияти билан боғлиқ эди. Князь ҳокимиятининг кучайиши, бу соҳадаги тадбиркорлик фаоллигини тўхтатиб кўйди.

Герман империясида Австрияning ҳолати. Сиёсий кураши. Империянинг энг йирик князлари австриялик Габсбурглар эди. Уларга XVI асрда Юқори ва Қуий Австрия, Тироль, Жануби-Гарбий Германиянинг қатор худудлари, Штирия, Кариндия ва Крайна каби славян ерлари қарашли эди. Шу даврда ёқ Чехия ва Венгриянинг бир қисми қўшиб олиниб, кўпмиллатли Австрия монархиясига асос солинди. Аммо 1564 йили монархия ерлари таҳтга даъвогарлар, Фердинанд I нинг ворислари ўртасида бўлинганлиги сабабли Австрия анча кучсизланиб қолди. Империя таҳти расман Максимилиан II (Фердинанднинг катта ўғли) да сақланиб қолган бўлсада, энди айрим немис князликлари, айниқса XVII аср бошларида кучайган Бавария Габсбурглар билан рақобат қила бошлади.

Ўттиз ишлек уруши. XVII аср бошларида Германияда Реформацияга қарши бўлган кучларнинг фаоллиги кучайди. Улар айниқса мамлакатнинг шимоли-гарбий ва жанубий қисмларида муваффақият қозондилар. Бир қатор герцоглик, графлик ва шаҳарларда қайтадан католик черковининг хукмронлиги ўрнатилди. Протестантларнинг ўз мавқеларини ўйқотиши фақат Германияда эмас, бутун Европада норозиликка сабаб бўлди. Айниқса 1607 йили империянинг Донаувёрте шаҳрида протестантлар билан католиклар ўртасида бўлиб ўтган тўқнашув ва унинг оқибатида Максимилиан Баварский қўшинлари томонидан шаҳарнинг забт этилиши ҳамда Баварияга қўшиб олиниши протестантларнинг ғазабини келтирди.

Рейхстагдаги протестантлар 1608 йили Аугсбург диний сулҳига – Германиядаги католиклар билан протестантлар ўртасида 1555 йили имзоланган келишувга тўлиқ ҳажмда риоя қилинишини талаб қилдилар. Католиклар ўз навбатида 1555 йили олиб қўйилган (секуляризация қилинган) черков ерларининг қайтарилишини талаб қилдилар. Келишувнинг иложи бўлмади, бир қисм протестантлар рейхстагни ташлаб чиқиб кетдилар. 1608–1609 йиллари иккала томон ҳам ўзларининг ҳарбийлашган ташкилотларини – Евангелие унияси ва Католик лигасини туздилар. Ҳар иккала томон ҳам чет

эллардаги маслақдошларидан ёрдам олиб турди. Натижада Германиядаги иккала лагерь ўртасида ҳарбий можаро ва Германия ишларига бошқа Европа давлатларининг фаол аралашуви хавфи туғилди.

Германиядаги диний-сиёсий ҳолатнинг кескинлашувиға факат ички сабаблар эмас, Габсбурглар билан Франция ўртасида Европада гегемонлик учун рақобатнинг кучайиши ҳам сабаб бўлди. Германиядаги воқеалар Европадаги кучлар нисбатининг ўзгаришига олиб келиши мумкин эди. Шу сабабли бир томондан Франция, иккинчи томондан Габсбурглар, учинчи томондан Голландия, Дания, Швеция ва позицияси охиригача номаълум бўлган Англияning ташкиси сиёсатида муҳим ўзгаришлар юз берди. Хуллас, етилиб келаётган можаро диний сабабга эга бўлсада, ундан ҳар бир давлат ўзининг сиёсий ва иқтисодий манфаатини кўзлаб сиёsat юргизаётган эди.

Урушга бевосита баҳона 1618 йил май ойидаги Прага воқеалари бўлди. Чехларнинг XVI асрдаёқ кафолатланган ва XVII асрда императорнинг маҳсус ёрлиги билан тасдиқланган диний ва сиёсий ҳуқуқларини поймол қилиб, Габсбурглар ҳукумати протестантлар ва миллий мустақиллик тарафдорларини қувғин қила бошладилар. Бунга жавобан қуролланган оломон Прагадаги эски қирол саройига бостириб кириб, Габсбурглар томонидан тайинланган икки ҳукумат аъзосини ва котибни деразадан улоқтириб ташлади. Бу акт Чехия билан Австрия ўртасидаги сиёсий узилиш деб қабул қилинди. Фердинанд ҳокимиятига қарши «ўз фуқароларининг» ҳаракати урушга турткি бўлди.

Урушнинг биринчи (чех) босқичи (1618–1624). Чехлар сейми томонидан сайланган янги ҳукумат мамлакат ҳарбий кучларини мустаҳкамлади, ундан иезуитларни ҳайдаб чикарди, Моравия ва бошқа яқин ҳудудлар билан Нидерландия Қўшма провинциялари типидаги федерация тузиш борасида музокаралар бошлади. Бир томондан иттифоқчи Трансильвания князлигининг қўшинлари Вена томон юриб, Габсбурглар армиясига қатор зарбалар беришди. Фердинанднинг чех таҳтига ҳуқуқини тан олмасдан сейм Евангелие униясининг раҳбари Фридрих Пфальцскийни (1596–1632) қирол қилиб сайдади. Қўзғолон раҳбарлари шундай қилсак немис протестантларидан қуролли ёрдам оламиз, деб ўйлашган эдилар. Аммо Ф. Пфальцскийнинг құдрати ёлғон бўлиб чиқди: у на катта маблағ ва на катта қўшинга эга эмасди. Императорга эса Католик лига катта

маблағ билан ёрдам кўрсатди. Бу маблағ ҳисобига Австрияга ёрдам учун испан қўшинлари ёлланди.

Натижада, 1620 йил 8 ноябрь куни Прагага юриш бошлаган империянинг бирлашган қўшинлари Оқ Тоғ ёнидаги жангда чех қўшинларини тор-мор келтирди. Чехия, Моравия ва қиролликнинг бошқа худудлари империя қўшинлари томонидан эгалланди. Мамлакатда даҳшатли қирғин бошланди. Ўн минглаб протестантлар ўз ерларидан қувилиб, уларнинг мулклари немис ва маҳаллий католикларга берилди. 1627 йилги «Дафн қилиш» деб аталган сейм Чехия ўз миллий мустақиллигини йўқотганлигини тасдиқлади. Энди Чехия барча илгариги имтиёзларидан маҳрум қилинди.

Урушдан кейин ҳарбий ҳолат факат Чехияда эмас, балки бутун Марказий Европада Габсбурглар фойдасига ўзгарди. Урушнинг биринчи босқичи якунланди, аммо унинг кенгайиш хавфи етилган эди.

Урушнинг иккинчи (Дания) босқичи (1625–1629). Урушнинг янги иштирокчиси Дания қироли Кристиан IV бўлди. У ўз ерларининг хавфсизлигидан хавотирланиб ҳамда ғолиб чиқса уларни кенгайтириш мақсадида Англия ва Голландиядан катта микдорда олинган пулга армия ёллаб, Эльба ва Везер дарёлари оралиғида жойлашган, Тила қўмондонлигидаги Габсбурглар армиясига қарши ҳужум бошлади. Шимолий герман князлари ҳам Кристиан IV ни қўллашди. Оғир ахволда қолган Фридрих II ни император хизматидаги ёлланма қўшин қўмондони, тажрибали саркарда Альбрехт Валленштейн (1583–1634) бу ҳолатдан кутқарди. У ўзига ва императорга қарашли худудлардан ёлланма қўшин тузди. 1630 йили А. Валленштейн қўшинларининг сони 100 минг кишига етган эди. Муваффакиятли уруш ҳаракатларидан сўнг 1629 йили Любек тинчлик сулҳи имзоланди. Дания худудий йўқотишларсиз Германия ишларига аралашмаслик шарти билан сулҳи имзолади. Император протестантларга яна бир кучли зарба берди. А. Валленштейн эса бутун бошли князлик – Мекленбург герцоглигини императордан совға сифатида олди. Аммо кўп ўтмасдан Валленштейннинг кучайиб кетаётганлигидан хавфсираган император уни истеъфога чиқариб, қўшинларини тарқатиб юборди.

Урушнинг иккинчи босқичида протестантлар мағлубиятининг энг асосий натижаси шу бўлдики, император 1629 йили Любек сулҳидан салгина олдин Реституцион эдикт деб номланган ҳужжат қабул қилди. Бу ҳужжат 1552 йилдан бери протестантлар томонидан

эгалланган (секуляризация қилинган) ерларга католик черковининг хукукини тиклашни кўзда тутарди. Императорнинг бу қарори империяда умумий норозиликни көлтириб чиқарди.

Урушининг учинчи (швед) босқичи (1630–1635). 1630 йил ёзида Польшани тинчлик сулҳи тузишга мажбур қилиб, Франциянинг ёрдамига таянган швед қироли, жасур саркарда Густав II-Адольф (1594–1632) ўз қўшинлари билан Померанияга тушиб, Германияга карши уруш бошлади. Унинг армияси жуда катта бўлмасада жангларда чиниккан ва қатор янгиликларни жорий қилган армия эди. Густав II-Адольф Германияга протестантларни зулмдан ҳалос қилиш шиори остида келди. Протестантлар яшайдиган немис ерларининг қувватлашига эришган Густав II-Адольф 1631 йил сентябрьда Лейпциг яқинидаги Брейтенфельд қишлоғида бўлган жангда Тилли армиясига ҳалокатли талафот етказди. 1632 йил баҳорида Аугсбург ёнидаги жангда эса император қўшинларини тор-мор қилди. Шу жангда яродор бўлган Тилли ҳалок бўлди. 1632 йил май ойида Густав II-Адольф қўшинлари Бавариянинг пойтахти Мюнхенни эгаллади. Урушдаги бундай бурилишдан қўрқиб кетган Фердинанд II Валленштейнга мурожаат қилиб, армия қўмондонлигини таклиф қилди. Маълум шартлар асосида таклифи қабул қилган Валленштейн армияни мустаҳкамлашга муваффак бўлди.

Бу пайтга келиб швед армиясининг ҳам таркиби ўзгариб, илгарига жанговарлигини йўқотган эди. Шунга қарамасдан 1632 йил ноябрь ойида Лейпциг яқинидаги Люцен шахри остонасида шведлар ғалаба қозонишди, Валленштейн Чехияга чекинишга мажбур бўлди. Аммо жангда Густав II-Адольф ҳалок бўлди. Валленштейн императорни огоҳлантирмасдан Швеция, Франция ва Саксония билан музокаралар олиб борди. Уни сотқинликда гумон қилган Фердинанд II қўмондонликдан четлатди. 1634 йили Валленштейн императорга содиқ офицерлар томонидан ўлдирилди.

1634 йил кузида жанговарлигини йўқотган швед армияси Нердлинген ёнидаги жангда қаттиқ мағлубиятга учради. Айни пайтда император Саксония курфюрсти билан ҳам шартнома тузиш учун музокаралар олиб борди. Шартнома 1635 йил Прагада имзоланди. Унга кўра император Саксония худудида Реституцион эдиктнинг жорий қилинмаслигини эълон қилди. Натижада шимолий протестант князликлари ҳам тинчлик сулҳига қўшилишди. Бу яна Габсбурглар учун қулай сиёсий ҳолатни вужудга келтирди.

Урушнинг тўртинчи (франко-швед) даври (1636–1648). Барча қўшимча имкониятлар тугаганини сезган Франция урушга ўзи киришга қарор қилди. У Швеция билан иттифоқни тиклаб, барча йўналишлар бўйича фаол дипломатик ҳаракатларни бошлаб юборди. Бирлашган Провинциялар республикаси Испанияга қарши ўзининг халоскорлик урушини давом эттири ва қатор муваффакиятларга эришди. Мантуя, Савойя, Венеция ва Трансильвания князлиги франко-швед иттифоқини қувватлади. Польша нейтрал, аммо Францияга дўстона позицияни эгаллади. Россия имтиёзли шартлар билан Швецияни арпа, селитра (порох тайёрлаш учун), каноп пояси ва кема қуриладиган ёғоч билан таъминлаб турди.

Урушнинг охирги даврида томонларнинг кучлари, ҳам молия, ҳам одам ресурслари тугаб бораётгани сезила бошлади. 40-йилларга келиб французлар ва шведларнинг устунлиги кўриниб қолди. Аммо Швеция билан Дания ракобати натижасида улар ўртасида бошланган уруш (1643–1645) иттифоқчиларнинг шароитини оғирлаштириди. Вафот этган Ришельё ўрнига келган Жулио Мазарини (1602–1661) Швеция билан Дания ўртасидаги можарони ҳал этиш учун анча куч сарфлади.

Айни пайтда, 1646 йили иттифоқчилар қўшинлари Жанубий Чехиядаги Янкове яқинидаги жангда император ва Бавария қўшинларини тор-мор қилиб, Прага ва Венага хавф сола бошлади. Император Фердинанд III (1637–1657) урушнинг бой берилганлигини тушунди.

Ўттиз йиллик урушнинг бориши

1618–1624 йиллар Чех босқичи	1618 йил 1620 йил 1621 йил	Прага аҳолиси империянинг католик-ноибини ўлдирди. Католиклар Чехияга бостириб кирдилар. Император Пфальцни бошқаришни католик-князга топширди, уруш маҳаллий мажародан умумимперия тўқнашувига айланди.
1625–1629 йиллар Дания босқичи	1625 йил 1629 йил	Дания протестантлар томонда урушга кирди. Шимолий Германияда католиклар протестантларни тор-мор қилдилар, Дания урушдан чикарилди.

1630–1635 йиллар Швед босқичи	1630 йил	Швеция протестантлар томонда урушга кирди.
	1632 йил	Швед кўшинлари католикларни тор-мор қилиб, Германиянинг катта худудини эгаллади.
	1634 йил	Шведлар Жанубий Германиядан кувиб чиқарилди.
	1635 йил	Протестантларнинг асосий қисми католиклар билан Прага тинчлик сулхини имзоладилар
1635–1648 йиллар Франко-швед босқичи	1636 йил	Шведлар католикларга катта зарба бердилар.
	1637 йил	Прага тинчлик сулхига деярли барча католиклар қўшилдилар.
	1638 йил	Франция Швеция тарафда урушга киришди.
	1645 йил	Протестантлар католикларни тор-мор қилиб, Венага яқинлашдилар.
	1648 йил	Католиклар армияси тўлиқ йўқ қилинди.

1644 йили Мюнстерда конгресс бошланиб унда император билан Франция ўртасида музокаралар олиб борилди.

1645 йил Вестфалияning яна бир шахри – Оsnабрюкда Германия – Швеция музокаралари бошланди. Айни пайтда борган сари мақсадсиз бўлиб бораётган уруш давом эттирилди.

Вестфаль тинчлик сулҳи. Чехияда бошланган уруш бутун Марказий Европани қамраб олиб ўттиз йил давом этди. 1648 йил Вестфалияning Мюнстер ва Оsnабрюк шаҳарларида имзолangan тинчлик шартномаси фақат ўн уч йиллик урушга сиёсий якун ясамасдан, Реформация кучлари билан уларнинг душманлари ўртасидаги қарама-қаршиликнинг бутун бир даврини ҳам якунлади. Тинчлик сулҳи иккала томоннинг ҳам мажбурий келишувининг маҳсули бўлиб, Европа давлатлари тизимига ва Германиядаги ҳолатга анчагина ўзгартишлар киритди.

Вестфаль сулҳига биноан Швеция бутун Ғарбий Померанияни (Штеттин порти билан), Шарқий Померанияning кичик қисмини, Рюген ва Волин оролларини, шунингдек, Померан бўғозини атроф-қирғоқдаги шаҳарлар билан қўшиб олди. Швед кироли Померан герцоги сифатида империя ишларига тўғридан-тўғри аралашиб имкониятини ҳам қўлга киритди. Империядан товоң тариқасида Бремен архиепископлиги ва Ферден, Мекленбургдаги Висмар шахри ва

катта миқдордаги пул ҳам Швецияга берилди, Шимолий Германиянинг йирик дарёлари Везер, Эльба ва Одер Швеция назорати остига тушди. Швеция Европанинг буюк давлатига айланди ва Болтиқ денизизда хукмрон бўлишдек мақсадини амалга ошириди.

Франция мамлакатда парламент фрондасининг бошланганлиги сабабли урушнинг умумий сиёсий натижаси билан қаноатланиб, империя ерларидан бир қисмини қўшиб олиш билан чекланди, Унга Эльзас (Страсбургдан ташқари), Зундгау, Хагенау ерлари қўшилди, учта Лотарингия епископликлари – Мең, Туль ва Верден устидан ўз хукуқини яна бир марта таъкидлади. Империянинг 10 та шахри Франция ҳомийлиги остида қолди.

Кўшма Провинциялар Республикаси ўз мустақиллигининг халқаро эътирофини қўлга киритди. Мюнстер шартномасига биноан унинг суверенитети, ҳудуди ва Антверпен шахри мақоми ҳал этилди.

Швейцария иттифоқи ҳам ўз суверенитетининг эътирофига эришди. Германиянинг майда князликлари ҳисобига ўз ерларини кенгайтириб ҳам олди. Вестфаль сулҳи яна икки юз йилга Германиянинг сиёсий тарқоқлигини белгилаб берди.

1648 йил 24 октябрда Мюнстерда имзоланган тинчлик шартномаси Германия тарихида энг узоқ давом этган ўттиз йиллик урушга якун ясади.

Уруш Германия учун ҳақиқий миллий ҳалокат бўлди. У халқнинг силласини қуритди ва ривожланишини узоқ вақт ортга суриб кўйди. Уруш ҳали 1525 йили дехқонларнинг мағлубияти билан ва савдо йўлларининг ғарбга силжиши туфайли бошланган Германиянинг иқтисодий, сиёсий ва маданий таназзулини чукирлаштириди ва тезлаштириди. Уруш оқибатида мамлакат вайронага айлантирилган, бутун бошли вилоятлар мутлақо аҳолисиз қолган, бошқалари эса аҳолисининг ярмини ва ҳатто ундан ҳам кўпроғини йўқотган эди. Иқтисодий инқироз маданиятнинг умумий пасайишига, ахлоқнинг кўпollaшувига олиб келди. Ҳаммадан кўпроқ қишлоқ аҳолиси зарар кўрди. Шимолий ва Шимоли-Шарқий Германияда ҳайдаладиган ерларнинг ярмидан кўпроғи ташландик бўлиб қолди.

Эльба дарёсидан шарқда экин экилаётган ерларда дехқонлар крепостнойликка маҳкум қилинди. Дехқонлар кўплаб мажбуриятларни бажаришар, энг оғири эса ҳафтасига беш-олти кунгача етаетган баршчина, яъни хўжайиннинг ерида ишлаб бериш эди.

Германиянинг ғарбий худудларида дехқонлар помешчикнинг мулкига айлантирилмади. Бу ерларда рентанинг асосий шакли пул билан тўланадиган оброк эди. Дехқонларнинг кўпчилиги маълум ерга эга бўлиб қолаверди.

Ўттиз йиллик уруш мобайнида саноат ва савдонинг кескин пасайиши немис шаҳарларининг сиёсий мавқенини ҳам тушириб юборди. Урушдан сўнг муҳим дарёлар – Одер, Везер ва Эльба устидан хукмронликнинг Швецияга ўтиши мамлакатнинг иқтисодий ахволига салбий таъсир кўрсатди. Шаҳарлар ўртасида савдо алоқалари қийинлашди. Чет эл товарларининг Германияга кўплаб келтирилиши эса саноатнинг ўсишига катта путур етказди. Немис савдогарлари инглиз ва голланд савдогарларининг воситачисига айланиб қолди. Кўпчилик шаҳарлар князларнинг мулки бўлиб қолди ва ўз эгаларининг мавқеига мос тарзда ривожланди. Янги типдаги шаҳарлар – князларнинг қароргоҳлари пайдо бўлди. Улар ичida Берлин (Бранденбург), Мюнхен (Бавария), Дрезден (Саксония) қабилар бошқа шаҳарларга нисбатан тез ривожланди. Ўттиз йиллик урушнинг оқибатлари то XVIII асрдаги сезилиб турди.

XVII аср иккинчи ярмида Германиянинг сиёсий ҳолати. Вестфаль тинчлик сулҳидан кейинги Германиянинг сиёсий харитаси жудаям ранг-баранг эди: дунёвий ва диний хукмдорларнинг ерлари, озод шаҳарлар ва империя рицарларининг сони Ўттиз йиллик урушдан олдингига нисбатан анча кўпайди. Ўша пайтда, йилда қанча кун бўлса Германияда шунча давлат бор дейишарди. Ҳақиқатда эса давлатлар сони бундан ҳам кўп эди. Уч юздан зиёд князликлардан ташқари яна юзлаб рицарларнинг майда мустақил ёки яrim мустақил ерлари мавжуд эди.

Германиянинг бирлиги номигагина эди, холос. «Герман миллатининг муқаддас Рим империяси» деб аталувчи бу давлат, Вольтер сўзлари билан айтганда муқаддас ҳам эмас, империя ҳам эмасди ва герман миллатини бирлаштирунади ҳам. Бу фуқароларсиз империя эди. Саксония, Бавария ва Франкфуртнинг фуқаролари бўлган бир пайтда герман империясининг фуқаролари йўқ эди. Бу ҳокимиятсиз империя эди, Габсбурглар хонадонидан бўлган император ўзининг Австриядаги ерларидан ташқарида ҳеч қандай реал ҳокимиятга эга эмасди. Бу империянинг давлат ташкилотлари ҳам йўқ эди. Империя сейми ёки рейхстаг ҳеч қандай яқуний қарорлар қабул қилас, қабул қилганда ҳам унинг қарорлари мажбурий эмасди.

Император Венада, рейхстаг – Регенсбургда, империя суди эса Вецларда жойлашган эди. Бундай шароитда майда князликлар нафакат ички, балки ташки сиёсатда ҳам мустақилликка интилишарди. Улар ўз иқтисодий мустақилликларини мустаҳкамлаш учун ҳар қандай усулни лойиқ ҳисоблашарди. Масалан, XVII аср охиригээллик йилида немис князликлари Англияга 46,5 млн фунт стерлингга, Францияга 137 млн ливрга аскарлар сотишган. Немис тарихчи-си Франц Мерингнинг ёзишича, ўша пайтдаги немис князларининг маънавий қашшоқлиги ва мислсиз пасткашлигига жаҳон тарихидан бошқа мисол топиш қийин.

Германиянинг ҳалқаро аҳволи. Ички бошбошдоқлик XVII аср иккинчи ярмида Германияни Европанинг йирик давлатлари қўлида қўғирчоққа айлантириб қўйди.

Германияга душманлик кайфиятида бўлган энг хавфли давлатлар – шимолда Швеция, гарбда – Франция ва жанубий-шарқда – Туркия эди.

Ўттиз йиллик урушдан сўнг ҳам Германияда тинчлик ўрнатилмади. Унинг худуди қўплаб қирғинбарот тўқнашувлар майдонига айланди. 1648 йилдан кейинги ўтган етмиш йилдан зиёд вақт давомида Германия ўнта урушда қатнашиб, бу урушлар 65 йил давом этди. Бундан ташқари, Герман давлатлари қатнашмаган бошқа бир қатор урушларда ҳам немис ерлари урушаётган томонларнинг жанг майдонига айлантирилди. Кучли давлатлар, энг аввалио Франция империяга қарашли ерларни турли йўллар билан босиб ола бошлади.

1667–1668 йиллари Франция билан Голландия, Англия ва Швеция ўртасидаги уруш Аахен сулҳи билан якунланди. Бу сулҳга кўра империя таркибиға киравчи Фландриядаги қатор шаҳарлар Франция таркибиға қўшиб олинди.

1672 йили Франция ва Голландия ўртасида бошланган уруш ҳам 1679 йили Нимвеген сулҳи билан якунланди. Бу сулҳга биноан ҳам Франция Рейндаги ўз позициясини мустаҳкамлади. Унинг тазиёки остида Бранденбург князлиги Помераниянинг бир қисмини ва Одер дарёсининг юқори оқимидағи ерларни Швецияга берди. 1681 йилги Регенсбург келишувига биноан бу аннексия тан олинди.

Европада Франция гегемонлигига барҳам бериш мақсадида унга қарши Голландия, Испания, Швеция, қатор немис давлатлари (Бавария, Пфальц, Саксония) ва Англиядан иборат коалиция тузилди.

Улар ўртасидаги 1687 йили бошланган уруш ўн йил давом этди. Урушнинг асосий оғирлиги яна Германия халқлари гарданига тушди, чунки уруш харакатлари Германия худудида олиб борилди.

1697 йилги Рисвик сулхига биноан Страсбург ва Рейн дарёсинг чап қирғоги Франция қўлида қолди. Аммо Франция Рейннинг ўнг қирғогидаги империя шаҳарлари – Фрейбург ва Брейзагдан воз кечишга мажбур бўлди. Туркия ҳам шу йиллари асосан Австрия ерларига хавф solaётган бўлса-да, Германия учун ҳам реал хавф мавжуд эди.

Франция томонидан қўллаб-куватланган Туркия қўшинлари 1683 йили Венани қамал қилдилар. Герман рейхстаги туркларга қарши курашиш лозимлиги тўғрисида ўз тарихида ягона яқдил қарор қабул қилди ва миллий-озодлик армияси тузилди. Герман давлатлари, Австрия ва поляк қўшинлари Польша қироли Ян Собеский (1629–1696) қўмондонлигига 1683 йил сентябрда Вена остонаярида турк қўшинларини тор-мор қилди. Бу ғалаба факат Марказий Европани турклар хавфидан халос қилиб қолмасдан, бошқа босиб олинган ерлардан ҳам туркларни аста-секин сиқиб чиқариш жараёнини бошлаб берди.

1699 йилги Карловица тинчлик сулхига кўра Туркия деярли бутун Венгрияни, Трансильванияни, Хорватиянинг катта қисмини ва бошқа бир қатор худудларни тарқ этди.

Туркия устидан қозонилган бу ғалаба Германияни хавфли душмандан халос қилиб қолмасдан, венгер ва славян халқларини ҳам турклар зулмидан озод қилди. Бироқ улар шу даврдан бошлаб қарийб икки юз йил Габсбурглар монархияси зулми остида қолди.

XVII–XVIII асрларда Бранденбург-Пруссия. XVII–XVIII асрларда Германия тарқоқлик оқибатида империя ерларига хукмронлик қилиш учун курашаётган иккита кучли давлат – Австрия ва Бранденбург курфюрстлиги (1240 йилдан пойтахти Берлин шаҳри) ажralиб чиқди.

Гогенцоллернларнинг Бранденбург курфюрстлиги XVII аср бошларида Польша қиролидан Пруссия герцоглигини (собиқ Тевтон ордени ерлари) олди ва Прусс герцоги бўлиб Польшага вассалликни қабул қилди. Кейинчалик Бранденбург Германиянинг ғарбидаги ерларни (Рейн вилоятида) қўлга киритди ҳамда ўттиз йиллик урушдан сўнг эса Шарқий Помераниянинг бир қисмини ва бошқа худудларни ҳам эгаллади.

Аммо Бранденбург давлатининг худуди учта алоҳида, бир-бири билан туташ бўлмаган ерлардан ташкил топган эди. Бранденбург – Германиянинг марказида, Пруссия герцоглиги – шарқда ва Рейн ерлари ғарбда жойлашган эди. Гогенцоллернларнинг сиёсати шу худудий тарқоқликни бартараф қилишга қаратилди.

Бранденбургнинг мавқеини мустаҳкамлаш учун муҳим қадамлар Фридрих-Вильгельм хукмронлик қилган йиллари (1640–1688) кўйилди.

XVII аср 60-йилларидаги халқаро низолар пайтида Фридрих-Вильгельм даставвал Швеция томонида бўлади ва Болтиқ денгизидаги савдода бир қатор имтиёзларга эришгач, Польша томонига ўтади ва бунинг учун Польша қироли уни вассалликдан озод этади. 1657 йили Польша Пруссиянинг суверенитетини тан олди.

Оқилона ташки сиёсат юргизган Фридрих III (1688–1713) испан тахти учун бўлган уруш (1701–1714) ва Шимолий уруш (1700–1721) йилларидаги шароитдан фойдаланиб Пруссияни қиролликка айлантириш учун император рухсатини олди. 1701 йилдан бошлаб Бранденбург курфюрстлиги Пруссия қироллиги бўлиб, курфюрст Фридрих III Пруссия қироли Фридрих I бўлиб олди.

Пруссиянинг юксалишига фақат қулай халқаро шароит эмас, балки немис давлатларининг кучсизлиги ҳам сабаб бўлди.

Мамлакат иқтисодиёти ҳам юксалиб борди. Пруссияда катта ер эгалиги ва крепостной тузум ҳукмрон бўлиб, катта ер эгалари Европанинг илфор мамлакатларига қишлоқ хўжалик маҳсулотларини сотиш билан шуғулланар эди. Юнкерлар (катта ер эгалари шундай аталган) прусс қиролларининг асосий таянчи бўлганлиги сабабли қатор имтиёзларга эга эди. Улар ғалладан олинадиган солик ва бошқа йиғимлардан озод қилинган, мамлакатдан ғалла, жун ва бошқа маҳсулотлар олиб чиқишида имтиёзга эга эдилар. Бундан ташқари қатор тоифавий имтиёзлар ҳам мавжуд эди.

Прусс давлатида армия алоҳида роль ўйнайди. Армия фақат ташки сиёсат қуролигина бўлиб қолмасдан, ички крепостной тузумни ушлаб туришда ҳам муҳим восита бўлиб қолди.

Армия нуфузининг ошиб бориши натижасида Пруссия милитаристик давлатга айланди. XVIII аср охирида у худуди жиҳатидан Европада учинчи ўринни, аҳоли сони бўйича – ўн иккинчи ўринни эгалласа, армиянинг сони жиҳатидан тўртинчи ўринда туради.

Пруссия саноати жуда секинлик билан ривожланди. Асосан армияга хизмат кўрсатувчи соҳаларгина ўсиб борди.

Пруссиянинг ички – солиқ, божхона ва агар сиёсати ҳам ягона мақсадга – мамлакатни милитаризациялашга, унинг ҳарбий кудратини оширишга қаратилган эди. Аммо кучли армия тузган Фридрих-Вильгельм I ундан ўз мақсадида фойдаланмади.

1740 йили таҳтга келган қирол Фридрих II ҳукмронлик қилган йиллари (1740–1786) Пруссияда абсолютизм ўзининг энг юқори чўққисига етди. Милитаризм ҳам ўзининг яқунланган кўринишига эга бўлиб, прусс армияси сон жиҳатидан Европанинг энг катта армиясига айланди.

Ўзини маърифатчилик тарафдори хисоблаган Фридрих II маърифатли абсолютизм руҳидаги қатор ислоҳотларни ўтказишга жазм қилди. Бироқ бу ислоҳотларнинг аксарияти қофзодагина қолиб кетди.

Фридрих II ҳукмронлик қилган даврда Пруссия бир қатор урушларда иштирок этди. Дастлаб 1740–1748 йиллари Австрия таҳти учун бўлган урушда иштироки Пруссиянинг Австрия, Франция ва Буюк Британия билан муносабатларини мураккаблаштириди.

Фридрих II нинг Марказий Европада Австрия билан ракобатлашуви уни Карл VI нинг қизи Мария Терезани Австрия таҳтининг вориси деб тан олишга берган ваъдасидан воз кечишга олиб келди.

Танаффуслар билан давом этган уруш 1748 йили Аахен сулҳи билан яқунланди. Унга кўра Габсбурглар ўзларининг қўплаб ерларини сақлаб қолди, аммо деярли бутун Силезия Пруссия таркибига ўтди. Бу эса Пруссиянинг Европадаги мавқеини янада мустаҳкамлади.

1756 йили бошланган Етти йиллик урушда қатнашиш Пруссияга катта муваффакият келтирмади. У Буюк Британия ва Португалия билан биргаликда Франция, Австрия, Швеция, Россия, Саксония ва Испанияга қарши курашиб, 1757 йил ноябрь ва декабрь ойларида Австрия ва Франция қўшинларини мағлуб этган бўлса-да, 1759 йили Кунерсдорф ёнида рус қўшинларига мағлуб бўлди, 1760 йили руслар маълум муддатга ҳатто Берлинни ҳам эгаллашди. Фақат иттифоқчилар орасидаги келишмовчилик ва рус таҳтига келган Петр III нинг сиёсатигина Пруссияни батамом ҳалокатдан сақлаб қолди.

Етти йиллик уруш натижасига кўра, 1763 йилги Губертсбург сулҳига биноан Пруссия фақат Силезиянигина ўзида сақлаб қолди.

1772 йили Польшанинг биринчи тақсимланишидан сўнг Висла дарёсининг қуий оқимидағи ерларга (Гданьск шаҳридан ташқари) эга бўлиб, ўз мавқеини янада мустаҳкамлади.

Фридрих II ҳукмронлигининг охирига келиб Пруссия ерлари 118,9 минг кв² дан 194,8 минг кв².га кенгайди, аҳолиси эса икки баробардан ҳам ошиб, 2 млн 240 минг кишидан 5 млн 430 минг кишига етди. Пруссия Европанинг қудратли давлатларидан бирига айланди.

* * *

Шундай қилиб, ушбу даврда Германияда миллий-сиёсий бирлик ҳали шаклланмаган эди. У ўрта асрлардагидек «Герман миллатининг Муқаддас Рим империяси», яъни юзлаб мустақил князликларнинг жуда омонат бирикмаси бўлиб қолаётган эди. Бундан ташқари, империяга гегемонлик қилаётган Австрия таркибига кирувчи бошқа миллатлар ўзларининг Германиянидан фарқли бўлган тарихий тақдири, алоҳида миллий маданиятлари, иқтисодий ва сиёсий тараққиёт йўлига эга эдилар.

Шунга қарамасдан, XVIII асрда, жуда секинлик билан бўлсада, немис миллатининг шаклланиш жараёни давом этди. Мамлакат сиёсий жиҳатдан ҳали ҳам тарқоқ бўлиб, XVIII асрнинг биринчи ярмида унинг турли ҳудулари орасида иқтисодий алоқалар ҳам жуда суст эди. Кейинчалик, иқтисодий ҳаётнинг жонланиши билан ягона миллий бозор шаклланиб борди, аммо Германиянинг тарқоқлиги бунга ҳамон тўсиқ бўлиб қолаверди.

IX боб бўйича саволлар

1. Германиядаги сиёсий тарқоқликнинг асосий сабаблари нимада эди?
2. Xалқаро савдо йўлларининг Атлантик океанига кўчиши нима учун Ганза иттифоки шаҳарларининг инқирозига олиб келди?
3. Ўттиз йиллик урушнинг бошланишига нималар сабаб бўлди? Уруш Германия иқтисодини қандай оқибатларга олиб келди?
4. Вестфаль тинчлик сулҳи Ўттиз йиллик урушнинг қандай муҳим натижаларини тасдиқлади?
5. Уруш Германиянинг кейинги икки юз йиллик тақдирида қандай роль ўйнади?
6. Герман давлатлари орасида Австрия ва Пруссиянинг роли иқтисодий ва сиёсий тараққиётга қандай таъсир кўрсатди?
7. Польшанинг биринчи тақсимланишида Пруссиянинг роли қандай бўлди?

Х Б О Б. XVII–XVIII АСРЛАРДА ГАБСБУРГЛАР ИМПЕРИЯСИ

XVII–XVIII асрларда Габсбурглар суоласига қарашли ерлар деярли тинимсиз кенгайиб борди ва Габсбурглар давлати Европанинг энг катта давлатларидан бирiga айланди. Ўттиз йиллик уруш бу жарайённи тўхтатган бўлсада, Габсбурглар нафақат «Герман миллити-нинг муқаддас Рим империяси императори» деган формал унвонни, балки майда давлатлардан иборат Германиянинг ички ишларига аралashiш хукуки ва шу минтақадаги сиёсий таъсирини ҳам сақлаб қолди. Империя худудининг жуда катталигига қарамасдан унинг маркази ва суолола қудратининг манбаи Австрия ерлари, Чехия ва Силезия эди.

Австриянинг юксалиш сабабларидан бири шундаки, у яқин кўшниларидан олдинроқ абсолют монархияга асосланган марказлашган давлатни ташкил қила олди. Бу давлатга ҳали XVI асрдаёқ Максимилиан I (1459–1519) ўтказган ислоҳотлар туфайли асос солинган ва XVII асрда Фердинанд II ва унинг ворислари томонидан мустаҳкамланган эди. Марказлашган давлатнинг ташкил топиши ва Австриянинг кучайишига яна бир сабаб, то XVII асрнинг охиригача сақланиб турган Туркия босқини хавфи эди.

Бутун XVII аср давомида юз берган кирғинбарот урушлар ҳамда савдо йўлларининг Ўрта Ер денгизи ҳавзасидан Атлантик океани томон силжиши Австриянинг иқтисодий ҳётига салбий таъсир кўрсатди. Ҳунармандчиликдан мануфактура ишлаб чиқаришига ўтишнинг жуда секинлиги оқибатида саноатнинг бир пайтлар ўта ривожланган тармоқлари ҳам деярли тўхтаб қолди. Фақат қуролсозлик, тоғ-кон ва металлга ишлов бериш соҳалари ўз маҳсулотларини Голландия, Англия ва Россияга сотганлиги туфайли ривожланиш суръатини сақлаб қолдилар.

XVI асрдаги дехқонларнинг кўзғолонлари бостирилгандан сўнг зодагонлар дехқонлардан олинадиган солиқлар ва бошқа мажбуриятларнинг микдорини ошириш сиёsatини олиб борди. Аммо мамлакатнинг гарбий худудларида дехқонларни қайтадан қарам қилишга зодагонларнинг курби етмади. Улар озод ҳисобланар, бир қисмининг эса авлоддан-авлодга мерос қолувчи ерлари ҳам бор эди. Бундан ташқари ижарачи дехқонлар, қирғоқ бўйларида жойлашган эргаш дехқонлар ҳам мавжуд эди. Австриядаги дехқончиликнинг Венгрия,

Силезия ва Чехиядагидан фарқи шунда эдики, бу ерда йирик помешчик хўжаликлари эмас, асосан дехқонларнинг майда хўжаликлари ривожланган, помешчиклар эса улардан пул ва маҳсулот шаклида солиқ олар эди. Дехқонлар давлат фойдасига фавқулодда деб атальувчи солиқ ҳам тўлашар, бу солиқнинг миқдори ҳар йили тоифавий йигин томонидан белгиланарди. XVII асрда ҳукумат доимий ва аниқ миқдорда тўланадиган янги солиқ – «контрибуция»ни жорий қиласди. Бу даврда ҳам ҳар хил солиқлар ва мажбуриятларга қарши ов қилиш ва балиқ тутиш ҳамда ўрмонлар ва бошқа жамоа ерларидан фойдаланиш ҳуқуқларини тиклаш учун дехқонларнинг қўзғолонлари бўлиб турди.

XVII аср охири – XVIII аср бошларидағи урушилар. Ўттиз йиллик уруш ва Вестфаль тинчлик сулҳи Австрияning ташки сиёсати ва ҳалқаро обрўсига катта ўзгаришлар киритди. Фарбий Европада янги ерларни босиб олишнинг мумкин эмаслиги яққол кўриниб қолди. Ўзининг асрий рақиби Франция билан ракобат кун тартибидан олиб ташланмаса-да, энди Австрия Шарққа, хукмронлиги борган сари қучсизланиб бораётган Усмонийлар империяси эгаллаб турган ерларга ўз нигоҳини қаратди. 1664 йили Монтекукколи қўмондонлигидаги австрияликлар армияси турк қўшинлари устидан дастлабки йирик ғалабани қўлга киритди. Аммо Сен-Готард ёнидаги бу ғалаба ривожлантирилмади ва мустаҳкамланмади. Император Леопольд I (1640–1705) тинчлик сулҳини тузишга шошилди. Натижада вужудга келган имкониятдан турклар янги урушга тайёргарлик қўриш учун фойдаланди. Французлар томонидан гиж-гижлатилган Туркия 1683 йили уруш ҳаракатларини янгидан бошлаб, ёмон қуролланган ва тайёргарлик қўрмаган Австрия қўшинларини мағлубиятга учратди ва 10 июль куни Венани қамал қилдилар. Австрия ҳалокат ёқасига келиб қолди. Польша қироли Ян Собеский қўшинларининг ёрдами Австрияни муқаррар ҳалокатдан қутқарибгина қолмасдан, турклар босқини хавфидан бутунлай холос қилди. «Муқаддас лига» (Ватикан, Венеция, Польша) томонидан қўллаб-қувватланган Австрия энди бирин-кетин ғалabalарга эришиб, 1685 йили Буда ҳудудини ва Венгрияning катта қисмини эгаллади, икки йилдан сўнг эса Трансильвания ва Сербия ҳудудига кириб борди. Туркия билан уруш қарийб 10 йил давом этди. 1697 йил ёш шаҳзода ва ўз даврининг қобилиятли саркардаси Евгений

Савойский¹ Зента (Венгрия) ёнидаги жангда ҳал қилувчи ғалабага эришди. 1699 йилнинг бошида Карловица тинчлик сулхи имзоланиб, унга кўра бутун Венгрия, Трансильвания ва Хорватия Габсбурглар хукмронлиги остига ўтди

XVIII аср бошларида Австрия бутун Европани қамраб олган испан тахти учун бўлган урушда (1701–1714) қатнашди. Бу уруш Габсбурглар учун шуниси билан қийинлашди, у венгер халқининг Австрия истибодига қарши Ракоци II бошчилигидаги қўзголони (1703–1711) билан бир пайтга тўғри келди. Уруш бошланганидан икки йил кейин Бавария билан Франциянинг бирлашган қўшинлари Венгрия қўшинлари билан қўшилиш мақсадида Австриянинг Тироль провинциясига бостириб кирди. Факат Тироль халқининг қаршилиги француз-бавар армиясини тўхтатиб қолди ва бу Австрия ҳамда Англия армиясига хужумга ўтиш имкониятини берди. 1704 йил 13 август куни шаҳзода Евгений ва герцог Мальборо қўмондонлигидаги Австрия-Англия қўшинлари француз-бавар армиясини тор-мор келтириди. Шу тариқа урушнинг боришида бурилиш ясалди. 1713–1714 йиллари Утрехт ва Раштадтда тинчлик шартномалари имзоланиб, Италиянинг катта қисми (Неаполь, Милан, Сардиния), Бельгия ва Рейннинг баъзи худудлари (Фрейбург) Габсбурглар империясига қўшиб олинди.

Орадан икки йил ўтгач австрияликлар туркларга қарши янги уруш бошлади ва ўзлари учун ниҳоятда фойдали бўлган Пожаревец сулхини имзолашга туркларни мажбур қилди. Австрия Босния ва Сербиянинг бир қисмини (Белград шаҳри билан), Словения ва Валахиянинг катта қисмини, шунингдек, Банатни (Темешвар шаҳри билан) ўз таркибига қўшиб олди. Энг муҳими эса, Усмонийлар империясининг ҳамма худудида божсиз савдо қилиш ва Дунай дарёси, Қора ва Ўрта Ер денгизларида Австрия кемаларининг эркин сузиш ҳуқуқини кўлга киритди. Шундай қилиб, XVIII асрнинг дастлабки ўн йиллигига Австрия ўз қудратининг чўққисига эришди.

Саноат, қишлоқ ҳўжалиги ва савдо. Ислоҳотларнинг бошлиниши. XVIII асрга келиб жуда катта худудни эгаллаган империянинг турли жойларида иқтисодий ва маданий ривожланиш даражаси ҳар хил эди. Феодал ер эгаларининг хукмронлиги ҳам мамлакат иқтисодининг ривожига тўскинлик қилаётган эди. Тўхтовсиз олиб

¹ Евгений Савойский – (1663–1736) шахзода, немис саркардаси, генралиссимус, келиб чиқиши француз.

борилган урушлар туфайли давлат бюджетидаги камомад ҳам йил сайин ўсиб борди. Давлат хазинасини тўлдириш мақсадида XVIII аср бошларидан хукумат Чехия, Моравия, Силезия, кейин эса Венгрияни талаш сиёсатини олиб борди. Бу худудлар хазинага Австрия-нинг ўзига қараганда анча қўп солик тўлашга мажбур эдилар. Аммо на солиқларнинг оширилиши, на қўшимча пул чиқариш ва на сарой харажатларини чеклаш кутилган натижани бермади.

XVII асрнинг 80-йилларидан Австрияда меркантилизм¹ ғоялари тарқала бошлайди. Меркантилизмнинг Австрия мактаби намояндалари (улар камералистлар деб аталган) иқтисодий ислоҳотларнинг бутун дастурини олға сурдилар.

Ислоҳотлар дастури Иосиф I (1705–1711) ва Карл VI (1711–1740) даврида амалга оширилди. XVIII аср бошида янги ташкил килинган мануфактураларни молиялаш мақсадида Давлат банки ташкил қилинди. 1719 йили хукумат Фиум ва Триест портларини очик портлар деб эълон қилди ҳамда уларни мамлакатнинг ички худудлари билан боғлайдиган йўллар курилишини бошлади. Шу йиллари Адриатика денгизидаги Австрия флотига асос солинди. Ислоҳотлар саноатнинг ривожланишига ижобий таъсир кўрсатди. Эски мануфактуралар билан бир қаторда фабрика типидаги янги иирик мануфактуралар пайдо бўлди. Цех тузилишига қарши ҳам бир қатор тадбирлар амалга оширилди. 1725 йили император шоғирдларнинг дипломсиз ва цехлардан ташқарида ҳунармандчилик билан шуғулланишига рухсат берувчи декрет эълон қилди. 1731 йили Карл VI томонидан чиқарилган декрет эса барча цехларнинг саноат фаолиятини маҳаллий ҳокимиятлар назорати қўйди.

XVIII асрдаги иқтисодий юксалиш секинлик билан бўлса-да, қишлоқ хўжалигига ҳам юз берди. Кartoшка, беда, маккажўхори сингари янги экинларнинг пайдо бўлиши, ўғитларнинг қўлланилиши, уч далали экиш тизимидан воз кечилиши хўжаликнинг интенсив ривожланишига олиб келди. Айни пайтда қишлоқда табақаланиш кучайиб, бой дехқонлар ва мутлақо мулксиз камбағалларнинг сони

¹ Меркантилизм (*французча mercantilisme, лотинча mercante* – сотувчи, савдогар) – феодализмнинг инкорози ва капитализмнинг шаклланиши даврида савдо буржуазисининг манфаатларини акс эттирувчи иқтисодий таълимот ва иқтисодий сиёсат. Меркантилистлар бойликнинг асосий манбай ишлаб чиқариш эмас, айланма капиталнинг кўплиги деб хисоблаганлар ва бойликни пул капиталининг кўплигига деб билганлар. Шу сабабли четга товар чиқариб, мамлакатда пулни (олтин ва кумуш) кўпайтириш фаровонликка хизмат килади деган принципга асосланганлар.

ортиб борди. Ерсиз қолган камбағаллар ҳисобига қишлоқда ёлланма ишчилар сони ошди.

Австрия таҳти учун уруши. 1740 йили Карл VI нинг вафотидан сўнг Габсбурглар сулоласида эркак киши қолмади. Буни олдиндан ҳисобга олган Габсбурглар 1723 йили Прагматик санкция деб аталаувчи хужжат қабул қиласи. Унга биноан таҳт ворислиги жинсидан қатъи назар сулоланинг ёши катта вакилига ўтар эди. Бу хужжат шунингдек, Габсбурглар давлати чегараларининг дахлсизлиги ва биринчи навбатда Австрия, Чехия ва Венгриядан иборат худуднинг бўлинмаслигини ҳам эълон қилди. Аммо бу хужжатни қўшни давлатлар, айниқса Габсбургларнинг асосий ракиблари бўлган Пруссия ва Франциянинг дипломатик тан олиши оғир кечди.

1740 йили 23 ёшли Мария Тереза таҳтга келганда Австрияга қарши Франция, Испания, Бавария, Савой ва Пруссиядан иборат коалиция ташкил қилиниб, улар Австрия таҳтига Бавария курфюрстини ўтқазиш ва империянинг асосий ерларини бўлиб олиш ҳақида келишиб олган эдилар. Шу тариқа Европада Австрия таҳти учун уруш бошланди. Австриянинг иттифоқчилари бўлган Россия ва Буюк Британия деярли ёрдам кўрсата олмадилар (Россия Швеция билан урушаётган эди). Фақат 40 минг кишилик венгерлар армиясини Мария Тerezани ва бутун империяни ҳалокатдан саклаб қолди. 1748 йилги Аахен сулҳига кўра Мария Тереза таҳтни ўзида саклаб қолди, Бельгияни қайтариб олди, аммо Парма ва Италиянинг бошқа бир қатор худудларини Испанияга, энг оғири эса Силезияни Пруссиага беришга мажбур бўлди.

«Маърифатли абсолютизм». *Мария Тереза ислоҳотлари.* Мария Тереза (1740–1780) ва Иосиф II (1780–1790) хукмронлик йиллари Австрия тарихида «Маърифатли абсолютизм» деб аталади. Бу даврда бир қатор ислоҳотлар ўтказилиб, улардан асосий мақсад абсолют монархияни ривожланиб бораётган бозор муносабатлари манфаатларига мослаштириш ва янги ижтимоий муносабатларга кенг йўл очиш, айни пайтда зодагонларнинг етакчилик ролини сақлаб қолиш эди. Ислоҳотларни ўтказишда француз маърифатпарварлари, айниқса Вольтернинг ғоявий меросидан унумли фойдаланилди.

Ўтказилган ҳарбий ислоҳотлар натижасида марказлаштирилган рекрут йўли билан доимий тўлдирилиб борувчи мунтазам армия шаклланди. Молия ислоҳотидаги асосий йўналиш солиқ соҳасидаги

эски феодал имтиёзларни бекор қилиш ва умуман солиқ хуқуқини шаклланиб келаётган бозор муносабатларига мослаштиришдан иборат бўлди. Зодагон ва рухонийларнинг солиқ соҳасидаги имтиёзлари бекор қилинди, янги меросдан олинадиган солиқ ва жон бош солиғи жорий қилинди. Меросдан олинадиган соликдан тушган маблағ мактаблар қурилишига сарфланадиган бўлди.

Капиталистик муносабатларнинг ривожланишида 1775 йили ички божхона чегараларининг, турли-туман божларнинг бекор қилиниши катта аҳамиятга эга бўлди. Янги қонунга биноан мамлакатга киритиладиган хом-ашёга жуда паст, зеб-зийнат маҳсулотларига эса анча юқори бож тўлови ўрнатилди. Ароқ ва винонинг зеб-зийнат қаторига киритилиши Мария Терезанинг халқ орасидаги обрусига путур етказди.

Ҳарбий ва молиявий ислоҳотларнинг амалга оширилиши давлат аппаратида ҳам ўзгаришлар бўлишига, бюрократик марказлашувнинг кучайишига, ҳисоб ва назорат тизимининг такомиллашувига олиб келди. Мария Тереза даврида Австрия тарихида биринчи марта ерларнинг тўлиқ рўйхатга олиниши ўтказилиб, бу аҳоли сони ҳақида аниқ маълумотга эга бўлиш имконини берди. Унга кўра Габсбурглар империясида 25 миллион киши, шундан 13 миллиони Австрияда ва Чехияда яшар эди.

Кишлoқ хўжалигида ўтказилган ислоҳотлар натижасида кишлoқда ҳам капиталистик муносабатлар шаклана бошлади. Айниқса ернинг товар сифатида сотилишига рухсат берадиган фармоннинг эълон қилиниши бу жараённи тезлаштириди. Абсолют давлат фақат саноат ва савдони рағбатлантириш билан чекланиб қолмади. Мария Тереза даврида маориф ва таълим соҳасида ҳам муҳим ўзгаришлар юз берди. Унинг ислоҳотлари натижасида Австрия Европада биринчилардан бўлиб давлат субсидияси ҳисобига бутун бошли мактаблар тизимини қуришга киришди, савдо ва саноат учун мутахассислар тайёрлайдиган маҳсус техник билим юртлари пайдо бўлди. Табиий фанлар, айниқса тиббиёт соҳасида катта муваффакиятларга эришилди. Бу даврда Австрия жаҳон маданиятига фақат йирик олимлари билангина эмас, Вольфганг Амадей Моцарт ва Йозеф Гайдн сингари буюк композиторлари билан ҳам хисса кўшди.

Йосиф II ислоҳотлари. Мария Терезанинг ислоҳотларини унинг ўғли Йосиф II (1780–1790) муваффакият билан давом эттириди.

1781 йил 1 ноябрда Иосиф II Чехия, Моравия, Силезия ва Галицияда крепостной хукуқни бекор қилиш ҳақида ўзининг биринчи фармонини («Фуқаролар ҳақида патент») қабул қиласди. Кейинги йиллари бу қонун Штирия, Каринтия, Крайна ва Венгрияга ҳам жорий қилинди. Бу қонун қишлоқда капиталистик муносабатларнинг янада ривожланиши учун катта турткы бўлди.

Маъмурий-худудий соҳада ўтказилган ислоҳотлар ўлкаларнинг мухториятига чек қўйишга қаратилган эди. Шу мақсадда бутун мамлакат 13 та вилоятга бўлиниб, уларни марказдан тайинланадиган амалдорлар бошқарадиган бўлди. Марказлаштириш сиёсати Венгрия, Трансильвания, Галиция ва бошқа худудларни колониялаштириш билан қўшиб олиб борилди. Минглаб жанубий германиялик ва австриялик немислар бу худудларга қўчирилди. 1784 йили барча маъмурий органларда немис тилини кўллашнинг мажбурийлиги тўғрисида фармон чиқарилди.

Императорнинг диний бағрикенглик тўғрисидаги декрети анча прогрессив характерга эга эди. Бу декрет протестант ва грек-православ черковига нисбатан қўлланилиб келинган барча камсишиларни бекор қилди. Шунингдек, яхудийларни хукуқ жиҳатидан тенглаштириш, маълум қасбларни эгаллашга бўлган чеклашни бекор қилиш ва геттоларни¹ тақиқлаш тўғрисидаги қонун ҳам катта ижобий ҳодиса бўлди.

Маданият ва маърифатни ривожлантириш учун Иосиф томонидан амалга оширилган тадбирлар, хусусан: князлар ва католик черковидан цензура хуқуқининг олиниши; тақиқланган адабиётлар рўйхатининг қисқартирилиши; ноширларга ҳомийлик қилиш; кутубхона ва ўқув заллари ташкил қилиш; 6–12 ёшли болаларнинг умумий мажбурий таълимими жорий қилишга ҳаракат катта аҳамиятга эга бўлди. Бироқ Иосиф ислоҳотларининг кўпчилиги кейинчалик, айниқса француз инқилобининг қўрқуви остида, бекор қилинди.

XVII аср 2-ярми – XVIII асрларда Венгрия. Габсбурглар империяси таркибига кирган Венгрияда XVII асрда товар ишлаб чиқариш ва товар-пул муносабатлари янада ривожланди. Бу Европа мамлакатларида қишлоқ хўжалик маҳсулотларига бўлган талабнинг ошиши билан боғлиқ эди. Бироқ қишлоқ хўжалигидаги бу ўсиш илғор ишлаб чиқариш усуllibарини жорий қилиш эвазига

¹ Гетто-яхудийларнинг бошқалардан ажралган холда яшашлари учун маҳсус ташкил қилинган худуд.

эмас, асосан дехқонларни эксплуатация қилиш эвазига юз берди. Кўплаб пул ва маҳсулот тарзидаги йиғимлардан ташқари дехқонлар иилига 102 кунгача ер эгаси фойдасига ишлаб беришлари ҳам лозим эди. Бу қийинчиликлар Венгрияда протестантликнинг ҳар хил кўринишлари тарқалишига сабаб бўлди. Натижада лотин тили сикиб чиқарилиб венгер тили ва маданияти ривожлана бошлади. Католиклар Австриясининг бу жараёнга қаршилик кўрсатганлиги сабабли Трансильвания ва Шаркий Венгриядаги миллий-озодлик харакати католицизмга қарши харакат билан уйғунлашиб кетди. Бу айниқса мафкура, маданият ва маърифат соҳаларида кескин намоён бўлди.

Венгрия миллий-озодлик харакати XVII асрдаги Ўттиз йиллик уруш даврида анчагина муваффақиятларга эришди. Бу даврда Трансильванияга ҳукмдорлик қилган иқтидорли саркарда ва мохир давлат арбоби князь Габор Бетлен (1613–1629) Габсбургларнинг Farbdagi қийинчиликларидан фойдаланиб ва Франция, Швеция ҳамда Габсбургларнинг бошқа душманлари билан шартнома тузиб, австриялик генераллар устидан қатор ғалабалар қозонишга ва мамлакатнинг анча қисмини озод қилишга муваффақ бўлди. Аммо Г. Бетленнинг ворислари олиб борган кучсиз сиёsat натижасида ҳамда Австрия билан Усмонийлар империяси ўртасида имзоланган Варшава шартномасига (1663) биноан Венгрия яна 30 йил турклар кўл остида қолди.

1670 йили мамлакатнинг шаркий ҳудудлари ва Словакияда бошланган қўзғолон ҳам миллий-озодлик характеристида эди. 1678 йили бу харакат ташкилий тус олиб, унга Имре Тёкёли бошчилик қилгандан сўнг икки йил ичida Шаркий Венгриянинг катта қисми ва Словакия озод килинди. Габсбурглар императори Леопольд Інинг қарори билан 1681 йили Шопронда сейм чакирилди, губернаторлик бекор қилиниб, маҳаллий бошқарув органи сайланадиган бўлди, шаҳарларнинг ўз-ўзини бошқариши тан олинди ва протестантлик динига эркинлик берилди. Венгрия халқининг туркларга қарши миллий-озодлик харакати охирги босқичга етди. Венгер, словак ва бошқа халқлар вакиллари кўмагида Австрия армияси мамлакатни озод қилишга киришди. Австрия-Туркия уруши Венгриянинг тўлиқ озод қилиниши (Тисса ва Марош дарёлари оралиғидаги ерлар ва Тимешваридан ташқари) ва 1699 йили Карловицада тинчлик сулҳи имзоланиши билан якунланди. Айни пайтда Венгрияда Габсбурглар

хукмронлиги мустаҳкамланди. 1686 йили йигилган Давлат кенгаши (сейм) Габсбурглар сулоласи эркак вакилларининг Венгрия тахтига хуқуқини тасдикловчи қонун қабул қилди. Қирол конституцияни бузган ҳолларда унга қарши қуролли қаршилик кўрсатиш хуқуқини берувчи «Олтин булла» деб аталувчи параграфдан венгер зодагонлари ўз ихтиёрлари билан воз кечдилар. Трансильвания дастлаб вассал князлилка, 1690 йилдан эса Габсбургларнинг мулкига айлантирилди. Турклар зулмидан озод бўлган венгерлар яна узоқ вақт Габсбурглар хукмронлиги остида қолди.

Венгер халқининг миллий-озодлик ҳаракати XVII аср охири – XVIII аср бошларида ҳам тўхтамади. Кўплаб ташки ва ички урушлар натижасида Венгрия ахолиси 150 йил ичидаги 1 миллион кишига камайиб кетди ва XVIII аср 1-чорагида 3–3,5 миллион кишини ташкил қилди.

XVIII аср бошларида, 1703–1711 йиллари, Ракоци II (Ференц) (1676–1735) бошчилигидаги озодлик ҳаракати бир қатор муваффақиятларга эришган бўлсада, оқибат натижада мағлуб бўлди. 1711 йилги Сатмар тинчлик сулҳи Венгрияда Габсбурглар хукмронлигини яна узоқ йилларга расмийлаштириди.

Мария Тереза ва Иосиф II нинг «Маърифатли абсолютизм» йилларида Венгрияда олиб борилган сиёsat венгерларнинг миллий давлатчилиги ва маданиятини йўқ қилишга, ягона марказлашган Австрия давлатини тузишга қаратилган эди. Иосиф II даврида Давлат кенгаши чақирилмай қўйди, маҳаллий зодагонлар ҳокимиятдан четлаштирилди, мамлакат 10 та округга бўлиниб, бюрократик аппарат ёрдамида бошқариладиган бўлди, немис тили давлат тили деб эълон қилинди. Буларнинг ҳаммаси венгер жамиятини fazabga келтириди.

* * *

Шундай қилиб, XVIII аср охирига келиб Габсбурглар империясида олиб борилган ислоҳотлар натижасида крепостной хукуқ бекор қилинган, кишиларнинг ахволини яхшилашга қаратилган бошка бир қатор ишлар амалга оширилган бўлсада, тўхтовсиз урушлар ва миллий озодлик ҳаракатлари империянинг қудратига путур етказди. Айниқса Буюк Француз буржуа инқилобидан сўнг унинг таъсиридан кўрқсан хукумат бир қатор ижобий ислоҳотларни бекор қилишга мажбур бўлди.

XI боб бўйича саволлар

1. Ўттиз йиллик уруш ва Вестфаль тинчлик сулҳи Габсбурглар давлатининг ташқи сиёсатига қандай ўзгаришлар киритди?
2. Аахен сулҳи Австрияниң кейинги тараққиётига қандай таъсир қилди?
3. Австрия таҳти учун кечган урушнинг асосий сабаби нимада эди ва уруш натижаси Габсбурглар империясининг кейинги ривожига қандай таъсир кўрсатди?
4. Иосиф I ва Карл VI давридаги ислоҳотларнинг моҳияти нимадан иборат эди? Мария Тереза ва Иосиф II давридаги ислоҳотларчи?
5. Меркантилизм сиёсатининг Австрия иқтисодиётига таъсири қандай бўлди?
6. Венгрия ва Словакияда миллий-озодлик ҳаракатларининг бошланишига нима сабаб бўлди?

XI БОБ. XVI–XVIII АСРЛАРДА РОССИЯ

Марказлашган давлатнинг ташкил топиши

1480 йили қарийб 250 йил давом этган мўғул истибододига барҳам берилиб, рус ерларининг бирлашиш жараёни бошланди¹. Мўғуллар зулмидан озод бўлиш мустақил князликларни бўйсундириш билан бирга олиб борилди. 1478 йили Новгород, 1485 йили Тверь, 1510 йили Псков, 1520 йили Рязань ерлари Москвага бўйсундирилиб, рус ерларининг сиёсий бирлашуви асосан якунланди. Марказлаштириш жараёнида кўп миллатли давлат шаклланди. Москва давлати таркибига кареллар, ижорлар, водилар, вепслар, саамлар, коми ва ненецларнинг ерлари ҳам бирлашди. Кейинчалик, Волга бўйи забт этилгандан сўнг у ердаги татарлар, марилар, мордовалар ва чувашлар ҳам шу давлат таркибига кирди.

XVI аср бошларида – 1503 йили Северск ерлари: Чернигов, Стадоруб, Рильск, Путивль, Гомель, Новгород Северский ва бошқалар, ҳаммаси бўлиб 25 та шаҳар ва 70 та волость, 1514 йили Смоленск ерлари бирлаштирилди.

Марказлашган давлат ташкил топиши жараёнида Россияда самодержавие² бошқарув усули шаклланди. XV аср охиридаги хужжатларда биринчи марта мамлакат Россия деб атала бошланди.

¹ Ҳозирда рус тарихчиларининг ҳам тан олиб ёзишларича, рус ерларининг мўғуллар истибододидан озод бўлишида 1399 йил Ворскла дарёси ёнидаги жангда Литва ва Олтин Ўрда бирлашган кўшинлари устидан Амир Темур кўшинларининг галабаси катта роль ўйнаган.

² Самодержавие – монархия давлат тузумининг Россияга хос шакли.

Аста-секин марказий бошқарув тизими шаклланди. Боярлар думаси фаолиятини давом эттириди. Марказий давлатнинг хукумат идоралари – приказлар вужудга келади.

1497 йили Судебник (қонунлар мажмуи) ишлаб чиқилди ва унга биноан мавжуд мулкчилик шакли ҳамда аҳолининг табақавий мақоми расмийлаштирилди. Судебник крепостной дехқонларнинг бир ер эгасидан бошқасига ўтишини йилига бир кун – Юрьев куни (26 ноябрь) билан чеклаб кўйди.

Кўшиннинг характеристи ўзгарди. Илгари феодалларнинг алоҳида дружиналаридан ташкил топган қўшинда энди бош ролни зодагон лашкарлари ўйнай бошлади.

XVI аср 30–40-йилларидаги боярлар гурухлари – Шуйскийлар, Бельскийлар ва Глинскийлар ўртасидаги ҳокимият учун кураш мамлакатни оғир ахволга олиб келди. Натижада кучайиб бораётган дворянлар талабига кўра бир қатор ислоҳотлар бошланди. Ислоҳотлар бошида Адашев, Сильвестер, Курлябев кабилар турди. 1550 йили янги Судебник қабул қилинди. 1549 йилдан эса Земский соборларнинг чақирилиши бошланган бўлиб, унда дворянлар ҳал қилувчи овозга эга эди. Ислоҳотлар натижасида Россия самодержавиеси табақали вакиллик монархиясининг бир қанча кўринишларига эга бўлди.

Шунга қарамай, 50-йиллардаги ислоҳотлар боярларнинг қудратини бироз сусайтирган бўлсада, уларнинг қаршиликларига барҳам бермади. Улар томонидан фитналар давом эттирилди. Натижада 1564 йили подшо Иван IV (Грозний) томонидан муҳим сиёсий тадбир ўтказилиб, бу тадбир тарихда опричнина номини олган.

Опричнина сиёсатининг моҳияти нимада эди?

Иван IV марказлашган давлат тизимида умумий ерлардан катта қисмини ажратиб олади. Бу ерлар подшо ерлари ёки опричнина деб аталади. Опричинага муҳим савдо йўллари, стратегик жиҳатдан аҳамиятли бўлган чегара ҳудудлари киритилди. Барча шаҳар ва уездлардан кўнгилли бўлиб опричинага ёзилмаган князлар, боярлар, дворянлар ва ҳукумат одамлари зўрлик билан кўчирилди.

Опричнина князъ ва боярларнинг хукмронлигига қарши қаратилган, уларни бўйсиндиришга йўналтирилган сиёсат бўлиб, у ўта шафқатсизлик билан олиб борилди. Ўн минглаб оддий одамлар ҳам қурбон бўлди. Опричнина подшо қўлидаги кучли ҳарбий жазо ташкилотига айланди. Иван IV олиб борган опричнина сиёсати на-

тижасида феодал ер эгаларининг ижтимоий таркиби ўзгарди, холос. Ерларнинг дворянлар фойдасига қайта тақсиланиши юз берди.

1572 йил кузида опричнина бекор қилинди.

1584 йили подшо Иван Грозний вафот этди. Тахтга ворис бўлиб унинг Фёдор ва Дмитрий исмли ўғиллари келди. Фёдорнинг хокимиятга келиши билан унинг ақлий лаёқатсизлиги туфайли бояларнинг таъсири кучаяди. 1591 йили шаҳзода Дмитрий вафот этади. 1598 йили эса Фёдор ҳам оламдан ўтади. Фёдорнинг ўлими билан Россияда 700 йил хукмронлик қилган Рюиковлар сулоласи тугайди.

Мураккаб сиёсий курашлар ва фитналар натижасида Земский собор Борис Годуновни (1598–1605) подшо қилиб сайлайди. У тахтни мерос қилиб эмас, сайлаш йўли билан олган дастлабки рус подшохи эди. Борис Годунов руҳонийларни ўзига оғдириш мақсадида Москва митрополитига патриарх мақомини беради. Унгача Русда патриархлар бўлмаган.

Шунга қарамасдан халқ орасида Иван IV нинг ўғли Дмитрий тириклиги ва у тахтни эгаллаши лозимлиги тўғрисида миш-миш тарқалади. 1605 йили Борис Годунов тўсатдан вафот этади ва ўз қўшинлари билан 1604 йили ёк Москва остонасига келган сохта Дмитрий I тахтни эгаллади. Кўп ўтмасдан сохта Дмитрий I ҳам ўлдирилади ва боярлар подшо қилиб Василий Шуйскийни (1552–1612) сайлашади. Аммо бу билан Рус давлатидаги бошбошдоқлик даври тугамайди. Тез орада Польшада бошқа Дмитрий пайдо бўлади ва у ҳам Россия тахтига даъво қиласди.

Рус тахти учун даъвогарлар кўпайиб бораётган бир пайтда шведлар ҳам шимолдан бостириб киради. Смоленск ва Новгород ерлари шведлар кўл остида қолади.

1611 йили Нижний Новгородлик қишлоқ оқсоқоли Кузьма Минин (?–1616) ташаббуси билан халқ лашкари (ополчение) тузилиб унга ватанпарвар князь Д.М. Пожарский (1578–1642) қўмондонлик қиласди, бир неча ой давом этган шиддатли жангларда К. Минин ва Д.М. Пожарскийлар юксак ҳарбий маҳорат намойиш қилишиб, 1612 йил 26 сентябрда Москвани поляк ва литва қўшинларидан батамом озод қилдилар. Шведларга қарши олиб борилган жанглар ҳам муваффакиятли бўлиб, 1617 йили Столбово (Тихвин яқинида) сулхи билан якунланди. Сулҳга кўра, Швеция Новгород ерларини Россияга қайтариб берди. Аммо Фин кўрфази қирғоқлари, Карел қўлтиғи,

Нева дарёсининг қуи оқими ва Ям шахри, Копорье, Иван-город, Карела ва Орешек шведлар қўлида қолди. 1617–1618 йиллари поляк-литва қўшинлари Москвага янги юриш бошлади, аммо Москва ни ололмади. Уруш Деулина қишлоғида тўрт ярим йилга тузилган сулҳ билан якунланди. Сулҳга кўра Смоленск ерлари ва Северск Украинаси ерларининг катта қисми Польша ихтиёрига ўтди.

1612 йили Москва озод қилингандан сўнг 1613 йилнинг январида Земский собор йифилиб, янги подшо сайдади. Номзод этиб Иван Грознийнинг биринчи хотинининг қариндоши 16 ёшли Михаил Романов (1596–1645) кўрсатилади. Собор 1613 йил 21 февраль куни Михаил Романовни Руснинг янги подшоси қилиб сайлади. Шу кундан Романовлар сулоласининг ҳукмронлиги бошланиб, то 1917 йил февралигача давом этди.

XVII аср давомида Россия тарихида катта ўзгаришлар юз берди. Россия давлатининг чегаралари анча кенгайди. Ҳали аср бошларида йўқотилган ерлар қайтариб олинди. Чап қирғоқ Украина Киев шахри билан ва Запорожье вилояти Россияга кўшиб олинди. Сибирни ўзлаштириш давом этиб, рус ер очувчилари Тинч океанигача бордилар. Умуман XVII аср охирида чегаралар Крим хонлиги, Шимолий Кавказ ва Қозогистонга туташди. Аҳоли сони ошиб, 10,5 млн кишига етди.

Пётр I нинг ислоҳотлари. Россия империясининг шаклланиши

XVII аср охирги чораги Россия сиёсий тузумида абсолютизмга бурилиш йиллари бўлди. Самодержавиенинг чекланмаган ҳокимияти 1649 йилги Қонун билан расмийлаштирилган эди. Шу қонун билан мустақил сиёсий ролга интилаётган черков устидан ҳам самодержавие ҳукмронлиги ўрнатилди.

Шу билан бирга ҳаётнинг ҳамма жабҳаларида юз бераётган ўзгаришлар XVIII аср биринчи чорагида яққол тус олди ва ўрта асрчилик Москва Руси Россия империясига айлана бошлади.

Россиянинг абсолютизмга ўтиши мамлакат сиёсий ҳаётининг турли жабҳаларида намоён бўлди: подшо мақоми ўзгарди; тоифавий вакиллик монархиясининг белгиси бўлган Земский собор барҳам топди; приказлар тизими такомиллашиб, боярлар думасининг таркиби ўзгарди; давлат аппаратида аҳоли турли қатлами вакиллари-

нинг роли ортди ва ниҳоят, чор ҳукумати черков билан рақобатда ғолиб чиқди.

Абсолютизмнинг ўрнатилишига черков, хусусан патриарх Никон ўз ҳаракатлари билан жиддий гов бўлаётган эди. Саккиз йиллик ҳаракатлардан сўнг, 1666 йили бўлган черков йигини подшога маъқул қарор қабул қилди –Никон оддий монах қилиб монастирга жўнатилди.

XVII аср ўрталарида бўлиб ўтган шаҳар қўзғолонлари ҳам мамлакатдаги ички барқарорликка жиддий путур етказди. 1648 йили Москвада, 1650 йили Псков ва Новгородда ноннинг нархи ошганлиги муносабати билан қўзғолонлар бўлиб ўтди. 1662 йили Москвада бўлиб ўтган қўзғолон эса Мис қўзғолони номи билан маълум бўлиб, чўзилиб кетган Россия-Польша уруши оқибатида келиб чиқкан оммавий қийинчиликлар сабабли юз берди. Умуман шу даврдаги қўзғолонларнинг энг кенг қамровлиси ва ҳалқ норозилигининг энг даҳшатли ифодаси Степан Разин (1630–1671) бошчилигидаги қўзғолон бўлди. Қўзғолон 1667 йили Волга бўйида бошланиб, унда казаклардан ташқари Волга бўйи ҳалқлари – мордвалар, татарлар, чувашлар ҳам иштирок этди. С. Разин бошчилигидаги қўзғолонни ҳам бошқалари сингари чор ҳукумати шафқатсизларча бостириди. 1671 йили С.Разин Москвада, Қизил майдонда осиб ўлдирилди.

Деҳқонлар урушларидан кейин давлат миқёсида бир қатор тадбирлар амалга оширилди: армияда қатор ўзгаришлар қилинди; маҳаллий бошқарув тизими такомиллаштирилди ва бошқалар. Россия тарихида узок даврни қамраб олган давлатнинг марказлашуви жараёни натижасида XVII асрнинг охирги чорагига келиб мамлакат ўз тараққиётининг шундай босқичига етди, энди абсолютизмга ўтиш учун имконият яратилди.

Россияда абсолютизмнинг ўрнатилиши, империянинг ташкил топиши бевосита Пётр I (1689–1725) фаолияти билан боғлиқ. Пётр I нинг барча ислоҳотлари ичida марказий ўринни давлат бошқарувининг ислоҳоти эгаллайди. Шимолий урушга тайёргарлик, янги армия ва флотнинг тузилиши давлат аппаратининг ҳажмини кенгайтириб, унинг кескин фаоллашувига олиб келди. Эски аппарат эса бундай катта иш ҳажми ва кескин бурилишни уddyalай олмасди. Ислоҳотларнинг асосий масади Шимолий урушда (1700–1721) ғолиб чикишга қаратилган бўлиб, армия ва флотни таъминлаш бош масала эди. Шу мақсадда Пётр I 1708 йили маҳаллий бошқарув

ислохотини ўтказади. Янги маъмурий бўлинмалар –губерниялар жорий қилинади. Шу иили Москва, Петербург, Киев, Азов, Сибирь, Смоленск, Архангелск ва Қозон, сал кейин эса Астрахан, Нижний Новгород ва Рига губерниялари ташкил қилиниб, армия билан губерниялар ўртасида бевосита алоқа ўрнатилади. Бунда бюрократик аппарат кенгайиб, илгариги «Приказ-уезд» тизими ўрнига «приказ (канцелярия) – губерния-провинция-уезд» тизими вужудга келди. Пётр I бюрократик аппарат ёрдамида давлат муаммоларини ҳал қилишга интилади.

Худди шу ғоя Сенатнинг тузилишида ҳам ўз ифодасини топади. XVIII аср бошларига келиб боярлар думаси амалда ўз фаолиятини тугатади. 1711 иили Боярлар думаси ўрнига Сенат – Олий давлат органи ташкил қилинади. Сенат молия ва савдони бошқаради, ташкилотлар ва амалдорлар фаолиятини назорат қиласиди, судлов жараёнини кузатади ҳамда янги қонунлар лойиҳасини тайёрлаш билан шуғулланади.

Пётр I қонун қабул қилиш ва уни амалга оширишга алоҳида эътибор беради. У қабул қилинган ва татбиқ этилган қонун ҳамма соҳада ўзгариш ясами мумкин деб ҳисоблайди. Шунинг учун Пётр I давридаги қонунчилик умумий тартибга солиш, одамларнинг шахсий ҳаётига кўпол аралашиб тенденциясига эга.

Армияда ҳам жиддий ўзгаришлар амалга оширилди. Унга 1699 иили қабул қилинган ҳарбий хизматни ўташ тўғрисидаги фармон асос бўлди. Фармонга биноан маълум сонли ҳовли битта аскар бериши лозим эди. 1705 йилдан улар «рекрут» деб атала бошланди. Ҳарбий хизматга олиш ҳар иили амалга оширилади. Шу асосда доимий рус армияси шаклланди. Армия ва флотга маълумотли офицерлар тайёрлаш учун ҳарбий мактаблар ва академия ташкил қилинади. Умуман Пётр I армияни мустаҳкамлашга шунчалар катта эътибор бердики, рус ҳарбий тарихчиси В.В.Лапиннинг образли қилиб айтишича, натижада армия давлат таркибида эмас, давлат армия таркибида бўлиб қолди. Пётр I ҳарбий қурилма ва интизомни барча фуқароларнинг ҳаётига жорий қилишга интилади. Подшо учун оддий ҳол бўлиб қолган урушлар (Пётр I 36 йиллик ҳукмронлигининг 28 йилини тўхтовсиз урушларда ўтказди) Пётр I ни армия энг мукаммал ижтимоий тузилма ва ҳаётнинг ҳамма жабҳаларида татбиқ қилишга лойиқ, деган фикрга олиб келди. Шу сабабли ҳарбийлар давлат бошқарувида ҳам фаол иштирок этади.

Пётр I бир қатор полициячилик тадбирларини ҳам амалга оширади. Масалан, у ўрнатган паспорт тизимиға қўра биронта дехқон ёки шаҳарлик ўрнатилган паспортсиз ўз яшаб турган жойини тарк этиши мумкин эмасди. Бу тизимни бузган шахс ўз-ўзидан жиноятчига айланади.

Шу даврда черков ислоҳоти ўтказилиб, патриархлик бошқаруви ўрнига коллегиал бошқарув усули – Синод жорий қилинади. Пётр I ўзини черковнинг ҳам бошлиғи деб эълон қилиб, унинг мустакиллигини йўқ қилди. Бундан ташқари, фуқаролар доимий черковга қатнашлари, ўzlари қилган гуноҳларни кечирилишини сўраб, черков хизматчисига мурожаат қилишлари лозим эди. Тавбанинг сир сақланишига қарамасдан черков хизматчилари тавба қилганинг жинояти ҳақида давлат органларига хабар беришга мажбур эди. Давлатнинг черков ва виждан ишларига бундай қўпол аралашуви жамиятнинг маънавий ривожига ҳалокатли таъсир кўрсатди. Хўрланган ва ҳақоратланганларни давлат зулмидан ҳимоя қилишнинг минг йиллик анъаналарига эга бўлган черков самодержавие манфаатларини ҳимоя қилувчи давлат қўлидаги қўғирчокқа айланди.

Умуман, рус тарихчиларининг ёзишича, Пётр I зўравонликни Россия шароити учун бошқаришнинг ягона маъқул усули деб хисоблаган. Шундан баъзи олимлар Россияда тоталитар тузум шаклланишини Пётр I фаолияти билан боғлашади.

Шуларга қарамасдан, Пётр I нинг ислоҳотлари даҳшатли қаттиқўллик билан ўтказилган бўлса-да, улар Россиянинг тарихий тақдираиди муҳим роль ўйнади. У тузган ҳокимият органлари юз йиллаб фаолият кўрсатди. Масалан, Сенат 1711 йилдан 1917 йил де-кабргача, черковнинг синодли тузилиши 1721 йилдан 1918 йилгача, 1724 йили жорий қилинган жон солиги тизими 1887 йилгача мавжуд бўлди. Пётр I нинг бошқа ислоҳотлари ҳам шундай тақдирга эга.

Петр I вафотидан кейин қатор сарой тўнтаришлари амалга оширилиб, улар натижасида Екатерина I (1725–1727), Петр II (1727–1730), Анна Иоановна (1730–1740), Иван Антонович (1740–1741), Елизавета Петровна (1741–1761), Пётр III (1761–1762), Екатерина II (1762–1796) ва Павел I (1796–1801)лар таҳтга келишиди ва ҳукмонлик қилишди.

Бу даврга умумий тавсиф берадиган бўлсак, уни ислоҳотларнинг давом эттирилиши, Россия давлатининг мустаҳкамланиш даври деб аташимиз мумкин. Тўғри, ислоҳотлар ҳам, Россия давлати

обрўсининг ошиши ҳам турли императорлар даврида ҳар хил суръат ва қатъилик билан олиб борилди. Бироқ аср охирига келиб саноат ишлаб чиқаришнинг баъзи кўрсаткичлари бўйича Россия Европанинг Франция, Голландия, Пруссия каби мамлакатларидан олдинга чиқиб олди. 1767 йили мамлакатда 481 та мануфактура (асосан тўқимачилик) ва 182 та темир ва мис эритувчи заводлар ишлётган эди.

XVIII аср 60-йилларида саноат ишчиларининг сони 220 минг киши бўлса, аср охирига келиб улар сони 400 минг кишидан ошади. Россияда ишчи кучи бозори шакланади. Аммо халқнинг, айникса дехқонларнинг аҳволи оғирлигича қолаверди. Шу йиллари бир қанча қўзғолонлар бўлиб, улар ичидаги энг машхури Емельян Пугачев (1742–1775) бошчилигидаги қўзғолондир (1773–1775). Қўзғолон жуда катта ҳудудга ёйилиши ва унда Россия таркибига кирган кўплаб халқларнинг қатнашишига қарамасдан, чор ҳукумати томонидан шафқатсизларча бостирилди. Бутун XVIII аср Россияда крепостной тузум ҳукмрон бўлиб қолаверди.

Ташқи сиёsat

XVI асрдан бошлаб Россия ташқи сиёsatининг асосини унга туташ бўлган ерлар ҳисобига мамлакатни кенгайтириш учун кураш ташкил қиласди. Farбда Болтик денгизидан, шарқда Тинч океанига бўлган жуда катта ҳудудни бўйсундириш, кучли давлатни барпо қилиш учун Россия икки ярим асрдан кўпроқ тўхтовсиз урушлар олиб борди.

Ҳали XVI аср ўрталарида ёк шу ташқи сиёsat изчил амалга оширила бошланди. Бу даврда асосий диққат Шарққа қаратилди. Бунинг учун қулай шароит вужудга келган эди. Бир пайтлар Олтин Ўрда таркибига кирган, энди мустақил хонликлар якка-якка ҳолда рус қўшинлари ҳужумига бардош беролмасди. Дастлаб Қозон хонлигини бўйсундиришга ҳаракат қилинди. Қозонга қилинган биринчи юришлар (1547–1548 ва 1549–1550) муваффақиятсиз якунланди. 1552 йилги учинчи юришда Қозон олинди. Охирги Қозон хони Ёдигар Магамел асир тушди ва тез орада христианликни қабул қилиб Россиянинг гарбдаги урушларида фаол иштирок этди.

1556 йили Астрахан хонлиги босиб олинди. Ўз даврида Олтин Ўрдадан ажralиб чиқсан яна бир хонлик – Нўғай хонлиги Россияга вассалликни тан олди.

1557 йили Бошқирдистонни Россия таркибига бирлаштириш якунланди. Бошқирларнинг факат Сибирь хонлиги таркибидаги кисми Россиядан ташқариди қолди. Волга бўйининг бирлаштирилиши хунармандчилик, қишлоқ хўжалиги ва савдонинг ривожланиши учун яхши имконият яратди. Бундан ташқари Россиянинг сиёсий мавқеи мустаҳкамланиб, салоҳияти ортди. 50-йиллари черкеслар, кабардинлар ва дөғистонлик князлардан баъзилари ҳам Россия таркибига кирди.

50-йилларнинг 2-ярмидан бошлаб Россия ташки сиёсатининг асосий йўналиши Болтиқ денгизига чиқиш бўлди. Бусиз Фарбий Европа билан савдо муносабатларини кенгайтиришнинг иложи йўқ эди.

1558–1560 йиллари шу мақсадда Ливон орденига қарши олиб борилган урушнинг асосий натижаси шу бўлдики, Ливон ордени йўқ килинди. Аммо шимолий Эстонияни шведлар, Эзель оролини данияликлар эгаллаб олди. Энди Литва, Польша, Швеция ва Дания биргаликда Ливониянинг Россия хукмронлиги остига тушмаслиги учун ҳаракат қилишди. Бу ҳаракат Ливония ерлари учун олиб борилган урушнинг кейинги тақдирини белгилади.

1582 йили Речь Посполиты билан (1569 йилги Литва князлиги билан Польша қироллиги бирлашиб, Речь Посполиты деб атала бошланди), 1583 йили эса Швеция билан сулҳ имзоланиб, бу сулҳлар шартига биноан Россия уруш давомида эгаллаган барча ерларидан маҳрум бўлди.

1590–1593 йиллари Швеция билан бўлган уруш 1595 йили тинчлик сулҳи билан якунланди ва унга биноан Россия Иван-город, Ям, Опорье ва Карелни қайтариб олди.

Бутун XVII аср давомидаги фаол ташки сиёsat учта мақсадга қаратилган эди: украин ва белорус халқлари билан бирлашиш; Болтиқ денгизи ва Қора денгизга чиқиш ва Россиянинг жанубий чегараларини Усмонийлар империясининг вассали – Крим хони босқинларидан муҳофаза қилиш. Аммо бу муаммоларни бирданига ҳал этиш учун Россиянинг XVII асрда имконияти етарли эмасди.

1654 йили Украина ва Шарқий Белоруссия Россияга қўшиб олинди. Аммо Украина ва Белоруссия ерлари учун уруш бутун XVII асрда давом этди.

XVI асрдаёт бошланган Сибирни ўзлаштириш сиёsatи XVII асрда давом эттирилди. XVI асрнинг 80–90-йилларида Фарбий Сибирь

Россия таркибиға кирганды. XVII аср давомида руслар Фарбий Сибирдан Тинч океани қирғоқларыга, Камчатка ва Курил оролларынан қараб салжышни давом эттиреди. Шарққа қараб юриш янги ерлар очиш ва олтин ҳамда кумуш қидириш билан кишиларни ўзига жалб қиласы.

1648 йили Семен Дежнёв (так. 1605–1673) Осиё билан Шимолий Американи ажратып турувчи бүгозни очди. Шарққа қараб қилинган бошқа йұналишда Василий Поярков (так. 1610–1667) рахбарлығынан экспедиция Сибирнинг жанубий чегарасынан бўйлаб Амур дарёси орқали 1645 йили Охота дengизига чиқди, унинг қирғоқлари бўйлаб сузил, кейинги йили Якутскга қайтиб келди. XVII аср ўрталарида Ерофей Хабаров (так. 1603–1671) Амур бўйлаб Даурияга чиқди. Бу пайтда Сибирнинг маҳаллий аҳолиси уруғчилик тузумининг турли босқичларынан өтті. Этник гурухлар ичида энг катталари ёқутлар ва буряtlар бўлиб, уларда феодал тартиблар шаклланади. Амур хавзасининг ўтрок аҳолиси даурлар, дюгерлар ва бошқалар ҳам деҳқончилик маданиятидан хабардор эдилар.

Шарққа қараб харакат қилиш чоғида руслар қалъалар, таянч нұқталарни барпо қилдилар. 1619 йили Енисейск, 1628 йили Красноярск ва бошқа Сибир шаҳарларынан шундай асос солинди.

Маҳаллий аҳолидан олинадиган солиқ (ясок) натура шаклида бўлиб, айниқса мўйна яхши баҳоланаради.

XVII аср охирига келиб Сибирнинг рус аҳолиси 150 минг кишига етади. Уларнинг кўпчилигини ҳукумат томонидан мажбурий кўчирилган деҳқонлар ташкил қиласы. Улар аср охирида аҳолининг дон маҳсулотларынан бўлган талабини тўлиқ қондирадиган ҳосил етишириш бошладилар. Айнан шу йиллари Сибирни жадал ўзлаштириш бошланди ва бу худуд келажакда Россиянинг ғалла етиширувчи ўлкаларидан бирига айланishi учун асос яратилди.

XVII аср охири – XVIII аср бошлари Россия тарихида, хусусан ташқи сиёсатда муҳим давр хисобланади. Мамлакатнинг халқаро обрўсини мустаҳкамлаш мақсадида XVII аср охиридан Россияни кучли дengиз давлатига айлантириш учун харакат бошланди. Бу мақсадни амалга ошириш борасидаги дастлабки ҳаракат Пётр I бошчилигидаги Азов юришлари бўлди. 1695 йил ёзида бошланган бу ҳаракат 1696 йил 18 июль куни Азов кальясининг рус қўшинлари томонидан эгалланиши билан яқунланди. Аммо бу муваффақият Россияга дengизга чиқиши имконини бермади. Қора дengиз турклар

кўлида қолаверди. Азов юришларидан Россия олган фойда шу бўлдики, уруш тажрибаларидан келиб чиқиб, у йирик денгиз флотини қуришга киришди.

1697 йили Россия, Австрия ва Венеция ўртасида Туркияга қарши иттифоқ тузилади. Аммо бу иттифоқка Голландия ва Англиянинг қўшилмаганлиги туфайли Австрия билан Венеция ҳам турклар билан сепарат сулҳ тузишга интилди. Натижада Россия Польша ва Саксония билан Швецияга қарши иттифоқка бирлашди. Бу келишувга кейинчалик Дания ҳам қўшилиб, Шимолий иттифоқ вужудга келди. Шимолий иттифоқнинг тузилиши Россия ташки сиёсатида туб бурилиш бўлди – жанубдан денгиззага йўл очиш режаси Болтик денгизига чиқиши режаси билан алмаштирилди. Европада кучлар нисбати ҳам бунга қулай шароит яратди. Испан тахти муаммоси билан банд бўлган кучли давлатлар Швецияга ёрдам кўрсатиш имкониятига эга эмасдилар.

1700 йил августида Россия жанубий чегараларини хавфсизлантириш мақсадида Туркия билан 30 йиллик яраш сулхини имзолади. Бу сулҳ шимолда фаол уруш ҳаракатлари олиб бориши имкониятини түғдирди ва Пётр I Швецияга қарши «Шимолий уруш» деб ном олган урушни бошлади. Уруш 21 йил давом этиб, 1721 йил май ойида Ништадт сулхини имзолаш билан якунланади. Сулхга кўра Лифландия, Эстландия, Нидруж ҳамда Эдель ва Даго ороллари Россияга ўтди. Швецияга Финляндия қайтарилди ва эгалланган ерлар учун Россия ҳақ тўлаш мажбуриятини одди. Бундан ташқари, уруш давомида рус армиясининг тажрибаси ортди, 1703 йил май ойида Нева дарёси қирғофида янги пойтахт – Санкт-Петербургга асос солинди, 1709 йил Полтава ёнида шведлар устидан қозонилган ғалабадан сўнг Россиянинг халқаро обрўси ортди. Энг асосийси – Россия Болтик денгизига чиқди ва унда мустаҳкам ўрнашиб олди. Энди у катта халқаро майдонга чиқиб, йирик Европа давлатига айланди.

Шимолий уруш якунлангандан сўнг Россия Кавказ ортидаги сиёсатини фаоллаштира бошлади. Пётр I нинг Каспий юришлари деб ном олган Кавказ ва Эронга юришлар 1722 йил бошлиниб, 1723 йил Санкт-Петербургда имзоланган шартнома билан якунланади. Унга кўра Эроннинг Каспий бўйидаги ерлари бир неча шаҳарлари билан, шу жумладан Дербент Россияга ўтди. 1724 йили Туркия билан Константинополь шартномаси имзоланиб, унга кўра турк султони Россиянинг Каспий бўйида эгаллаган ерларини,

Россия эса султоннинг ғарбий Кавказ орти ерларига ҳукуқини тан олди. Умуман юриш Россиянинг шу региондаги сиёсий мавқеини мустаҳкамлади.

XVIII аср 2-чорагида Россия ташқи сиёсатида Пётр I анъана-ларини давом эттирди. Усмонийлар империяси билан Қора денгиз учун кураш олиб борилди, украин ва белорус муаммоларини ўз фойдасига ҳал қилиш учун ва Шимолий уруш натижасида Болтик бўйида эришилган муваффакиятларни давом эттириш учун харакат қилинди. Айтиш лозимки, Россиянинг иқтисодий ва маданий қолоқлиги туфайли бу даврда янада фаолроқ ташқи сиёсат юритиш имконияти бўлмади. Бундан ташқари Пётрдан кейинги даврда давлат аппаратида, энг аввало армияда чет элликларнинг, асосан не-мисларнинг таъсири кучайиб кетди.

1735–1739 йиллардаги Россия-Туркия уруши натижасида Азов қўргони, Ўнг қирғоқ Украинадаги кичик худуд, Шимолий Кавказда-ги Кабардин ерлари Россияга ўтди, 1711 йилги Прут сулҳи қисман бекор қилинди. Аммо Россия аввалгидай Азов ва Қора денгизларда флот сақлаш ҳукуқини кўлга кирита олмади.

Шу даврдаги яна бир можаро – 1741–1743 йиллардаги рус-швед уруши эди. Уруш Або тинчлик сулҳи билан якунланиб, Финлян-диянинг кичик бир қисми Россия ихтиёрига ўтди. Асосийси эса Швеция Россиянинг Болтик бўйида эгаллаган ерларини яна бир марта тан олди.

XVIII аср иккинчи чорагидан Россиянинг Қозоғистонга таъсири кучаяди. Бунда Россия Туркистон хонликлари ва Ҳиндистон ерларидан ўтган савдо йўлларини эгаллашни мақсад қилиб қўйган эди. 1731 йили рус императори Анна Иоанновна Қозоғистоннинг бир қисмини Россияга қабул қилиш ҳақида фармонни имзолайди. 1740–1743 йиллари Қозоғистоннинг марказий қисми ҳам Россия ихтиёрига ўтади.

XVIII аср 2-ярмида Россиянинг фаол ташқи сиёсати унинг 1756–1763 йиллардаги Етти йиллик урушда қатнашиши билан боғлиқ. Урушга Россия 1757 йили қўшилди ва шу йили 19 август куни Грос-Егерсдорф қишлоғи яқинида прусс қўшинларига катта талофат етказди.

1758 йилнинг бошларида рус қўшинлари Шарқий Пруссиянинг маркази Кёнигсберг (ҳозирги Калининград) шаҳрини ишғол қилишди.

1760 йилги ҳарбий кампаниянинг энг катта муваффақияти 27 сентябрь куни рус қўшинлари томонидан Берлиннинг олиниши бўлди. Фридрих II халокат ёқасида турганди. Уни факат Россия тахтига келган Пётр III нинг ҳаракатлари – Австрия билан иттифоқнинг бузилиши, Пруссияда ҳарбий ҳаракатларнинг тўхтатилиши саклаб қолди.

Етти йиллик урушда қатнашиш Россияга ҳудудий фойда келтирмаган бўлсада, Европада энг кучли ҳисобланган Пруссия армиясини мағлуб қилганлиги унинг сиёсий обрўсини, армиянинг эса ҳарбий маҳоратини оширди.

Етти йиллик урушдан кейин Россиянинг Европадаги асосий рақиби Франция бўлиб қолди. У Швеция, Речь Посполитата ва Туркия иштирокида Россияга қарши «Шарқий тўсик» ташкил қиласди. Асосий муаммо Речь Посполитата ерлари бўлиб, бу давлатларнинг ҳар бири унда ўз манфаатини кўзлаб иш тутади.

Шундай мураккаб шароитда Россия Пруссия билан иттифоқ тузишга муваффақ бўлди. Екатерина II Речь Посполитанинг яхлитлигидан, Фридрих II эса уни бўлиб олишдан манфаатдор эканлиги бу иттифоқнинг тузилишига монелик қилмайди.

1764 йили Россия ва Пруссия томонидан қўллаб-қувватланган С. Понятовский Польша қироли қилиб сайланди. Католик бўлмаганларнинг ҳуқуки масаласи ҳам иттифоқчилар фойдасига ҳал қилинди: энди католик бўлмаганлар ҳам Польшада давлат лавозимларини эгаллаш ҳуқуқига эга бўлди.

Речь Посполитадаги воқеаларни дикқат билан кузатаётган Усмонийлар империяси у ердан Россия қўшинларининг олиб чиқиб кетилишини талаб қилди ва 1768 йили Россияга уруш эълон қилди. Урушнинг дастлабки йили турк қўшинлари Хотий, Ясси, Бухарест, Измаил ва Дунайдаги бошқа бир қанча қўрғонларни ташлаб кетишга мажбур бўлди. Денгизда талантли саркарда П.А. Румянцев (1725–1796) қўмондонлигидаги рус қўшинлари туркларга катта талофат етказди. Аммо Франция ва Австрия томонидан Туркиянинг қўлланиши Россияни музокара бошлишга ва Речь Посполитанинг бўлинишига розилик беришга мажбур қилди.

1772 йилги Конвенция Речь Посполитанинг биринчи бўлинишини расмийлаштириди. Унга биноан Галиция Австрияга, Поморье ва Буюк Польшанинг бир қисми Пруссияга, Шарқий Белоруссия Россияга ўтди.

Шу йили Туркия билан ҳам тинчлик музокаралари бошланди. Келишмовчиликларнинг асосий сабаби Крим муаммоси эди. Россия Кримга мустақиллик берилишини талаб килар, Туркия эса буни рад этарди.

Шундай ҳолатда иккала мамлакат ўртасида уруш ҳаракатлари бошланди. 1774 йил июнида А. Суворов¹ қўмондонлигидаги рус қўшиналари Козлуж яқинида турк қўшиналарини мағлубиятга учратгандан сўнг музокаралар қайта бошланди. 1774 йил 10 июль куни Болгариянинг Кучукқайнаржи қишлоғида тинчлик шартномаси имзоланиб, унга биноан Керчь, Ёнқалъя ва Кабарда Россияга ўтди. Айни пайтда Россия Кора денгизда ҳарбий флот куриш хукукини олди. Энди Россиянинг савдо кемалари бўғозлардан қаршиликсиз ўтадиган бўлди.

Бироқ 1775 йили ёк икки давлат ўртасида Крим хони масаласида яна келишмовчилик вужудга келади. Туркия Давлат-Гирейни, Россия эса Шагин-Гирейнинг номзодини қўллайди. Икки давлат ўртасидаги Крим учун олиб борилган рақобат 1783 йил 8 апрель куни император Екатерина II нинг Кримни Россия таркибиغا қўшиб олиш тўғрисидаги фармони эълон қилиниши билан яқунланди.

Туркия Кримнинг Россияга қўшилганлигини тан олса-да, урушга жиддий тайёргарлик кўра бошлади. Англия, Франция ва Пруссия унинг бу ҳаракатини кувватлади.

1787 йил июлда Туркия султони дипломатик йўл орқали ўзининг Грузия ва Кримга хукукини Россиядан талаб қилади. Талабга жавоб олинмагач, ҳаракатлар бошлайди. Аммо бирон бир мувваффакиятга эриша олмайди.

Рус қўшиналари қуруқлиқда А.В. Суворов, денгизда Ф. Ушаков (1745–1817) қўмондонлигига бир қатор ғалабаларни қўлга кирилади. 1790 йил 2 декабрь куни рус қўшиналари мустаҳкам қалъа – Измаил қалъасини эгаллашади. 1792 йил январда (эски хисоб билан 1791 йил декабрда) имзоланганди Ясси сулҳига биноан Кримнинг Россия таркибиға кирганлиги, Грузия устидан эса Россия протекторати ўрнатилганлиги расмийлаштирилди.

Бу давр Россия ташқи сиёсатида Польша катта ўрин эгаллайди. Айтиб ўтганимиздек, Речь Посполитанинг кучсизлиги уни биринчи марта бўлиб олиш имконини яратган эди.

¹ Суворов Александр Васильевич (1730–1800) – рус саркардаси ва миллий қаҳрамони, генерал-фельдмаршал, рус ҳарбий санъати асосчиларидан бири.

Айни пайтда Польшанинг қучайиши Пруссия, Австрия ва Россия манфаатларига мос келмасди. Речь Посполитанинг ички ишларига аралашиш учун уларда баҳона ҳам бор эди. Гап шундаки, аввалги шартномаларга биноан Польшага конституциясини ўзгартириш хукуки берилмаган эди. Шунга қарамасдан у 1791 йил 3 май куни янги конституция қабул қиласди. Бу Речь Посполитага рус ва прусс қўшинлари киритилиши учун, кейинчалик эса уни иккинчи бор бўлиш учун баҳона бўлиб хизмат қиласди.

1793 йил январда имзоланган рус-prusс шартномасига биноан поляк ерлари – Гданьск, Торунь, Познань Пруссияга, Ўнг қирғоқ Украина билан Белоруссиянинг марказий қисми Россияга ўтди.

Речь Посполитанинг кейинги тақсимланиши у ерда миллий-озодлик ҳаракатининг авж олишига сабаб бўлди. Генерал Тадеуш Костюшко¹ бошчилигидаги бу ҳаракат 1794 йил кузида А.В. Суворов бошчилигидаги рус қўшинлари томонидан шафқатсизларча бостирилди.

Шундан сўнг, 1795 йили Речь Посполитата учинчи бор бўлинди. Сандомир, Люблин ва Хелмин ерлари Австрияга, Krakov Пруссияга ўтди. Белоруссиянинг фарбий қисми, Фарбий Волинь ерлари, Литва ва Курляндия герцоглиги Россияга қўшиб берилди. Речь Посполитанинг охирги қироли таҳтдан воз кечиб, 1798 йил вафотигача Россияда яшади.

Речь Посполитадаги миллий-озодлик ҳаракати бостирилгандан кейин, 1795 йил охирида Россия, Англия ва Австрия ўртасида уч томонлама иттифоқ тузилди.

XVIII аср охирида Россия Европадаги урушларда фаол иштирок этди. 1797 йил Шимолий Италиядаги ҳарбий ҳаракатларда А.В. Суворов бошчилигидаги армия муваффакиятли қатнашди. Шу йили у армияси билан Сен-Готард довони орқали Альп тоғидан ошиб ўтиб, катта ҳарбий маҳорат намойиш қиласди. Аммо Европада рус қўшинларига иттифоқчилар ёрдам кўрсатмаганлиги туфайли 1800 йили Павел I қўшинларни Россияга чақириб олди. Шу йили юқоридаги сабабга кўра Англия билан ҳам дипломатик муносабатлар узилди.

Юқоридагилардан хulosса қилиб шуни айтиш мумкинки, XVIII аср охирида, Павел I императорлик қилган йиллари Россия ташки

¹ Костюшко, Анжей Тадеуш Бонавентура (1746–1817) – Речь Посполитата ва АҚШнинг давлат ва ҳарбий арбоби, АҚШ мустакиллиги учун уруш қатнашчиси.

сиёсатида кескин бурилиш юз берди: у Франция билан сулҳ тузиб, Англия ва Австрияга қарши иттифоққа бирлашади.

Рус миллатининг шаклланиши. Маданият

Рус ерларининг бирлаштирилиши натижасида маданий алоқалар мустаҳкамланди ва рус маданиятининг ўсиши бошланди. Маданиятнинг ривожланиши иқтисодий юксалиш билан бирга рус миллатининг шаклланишига олиб келди.

Ҳали XV–XVI асрларда ёрларнинг кенгайиши, ҳарбий соҳадаги эҳтиёжлар математика, асосан геометрияниң ривожланишига турткি бўлди. Соат механизмлари, сув филдираклар ва бошқалар кенг тарқалди. Рус кишисининг географик билимлари кенгайди. Тверлик савдогар Афанасий Никитин Ҳиндистонга саёҳат уюштириди. Рус дипломати Дмитрий Герасимов Ғарбий Европа олимларини Шимолий Двинадан Хитойга денгиз йўли борлиги тўғрисида огоҳ қилди. Руслар Америка, Молукк ороллари, Ҳиндихитой ва бошқалар тўғрисида маълумотга эга эдилар.

1564 йили Иван Фёдоров Русда китоб чоп этишга асос солди. Чўян қўйиш такомиллашди. Андрей Чохов томонидан қўйилган «Царь-пушка» бунинг ёрқин намунаси бўлди. Москвада Василий Блаженний ибодатхонасининг маҳобатли биноси қурилди, Буюк Иван кўнғирокҳонаси бунёд этилди. Архитектор Федор Конь Москвада Белий Городнинг деворларини қурди.

XVII асрга келиб рус миллатининг шаклланиши учун имконият вужудга келди. Бунда асосий ва ҳал қилувчи омил мамлакатнинг иқтисодий юксалиши бўлиб, бу миллий алоқаларнинг кучайишига олиб келди.

Аста-секин маҳаллий диалектлар барҳам топиб, рус миллатининг тил бирлиги вужудга келди, ягона маданият шаклланди. Руснинг маданий бирлиги фольклорда, меъморчиликда, мусаввирик санъатида, адабиёт ва илмий билимларнинг тарқалишида ўз ифодасини топди. Математика, механика, баллистика ва бошқа соҳалардаги билимлар кенгайди. Руслар Коперник астрономияси билан танишдилар.

Рус усталари биринчи бўлиб снаряд билан ўқланувчи тўпни, Кремль минорасига ўрнатилган катта кўнғироқли соатни яратдилар.

Руслар айниқса география фани ривожига катта ҳисса қўшдилар. Улар фанда Сибирни, Узок Шарқни, Амурни, Беринг бўғозини очадилар¹, Россиянинг дастлабки хариталарини яратдилар.

Умуман маданиятнинг юксалишига қарамасдан аҳолининг асосий қисми илмсизлик ва жаҳолат ботқоғида қолаётган эди. Шу сабабли XVIII асрдан бошлаб, Пётр I ислоҳотлари йилларида бир қатор мактаблар очилади. Москвадаги математика ва навигация фанлари мактаби, 1701 йили очилган артиллерия мактаби, 1707 йили очилган медицина мактаби шулар жумласидандир. Москвадан ташқари Петербургда жарроҳлик билим юрти, Олонца ва Уралда тоғ-кон ишлари билим юртлари ташкил қилинди. Ҳамма гарнizonлар қошида солдат болалари учун мактаблар мавжуд эди. Maxsus «ҳар хил тил» мактабларида таржимонлар тайёрлаш йўлга кўйилди. Барча қатлам вакилларининг болалари ўқийдиган (крепостнойлардан ташқари) 42 «цифри» деб аталувчи мактаблар ташкил қилиниб, уларда ёзиш ва ўқиш билан бир қаторда арифметика, география, тригонометрия каби фанлар ўқитилади. Бу мактабларда диний фанлар ўқитилмас, черков деярли ҳеч қандай таъсирга эга эмасди. Аммо барча ҳаракатларга қарамасдан техник саводли кишиларни тайёрлайдиган бошланғич мактабни ташкил қилиш ҳаракати муваффакият қозонмади.

Шунга қарамасдан фан ва маданият ривожи давом этди. 1724 йили Пётр I Россия Фанлар академиясининг низомини тасдиқлади. Академия Пётр I нинг ўлимидан сўнг очилди. Академия қошида гимназия ва университет ташкил қилинди. Университет таркибида учта факультет – ҳуқуқшунослик, тиббиёт (анатомия, химия, ботаника) ва фалсафа (аниқ ва экспериментал фанлар, тарих, археология) мавжуд эди. Петербург университети XVIII аср 60-йилларигача фаолият кўрсатди. Шу даврдан унинг ўрнини М.В. Ломоносов²нинг ҳаракатлари билан 1755 йили ташкил қилинган Москва университети эгаллайди. Россия фанидаги қатор муваффакиятлар Москва университети ва М.В. Ломоносов фаолияти билан боғлиқ.

¹ Беринг Витус Ионассен (1681–1741) – денгиз сайёхи, рус флоти офицери; асли да ниялик. 1703 йили Россиянга флот хизматига таклиф қилинган. Петр I нинги топшириги билан Сибирь ва Узок Шарқнинг шимоли-шарқий соҳилларини ўрганиш максадида тузилган илмий экспедицияларнинг (1725–1741) бошлиги. Америка билан Осий ўртасидаги бўғозни (Беринг бўғози) очган.

² Ломоносов Михаил Васильевич (1711–1765) – машҳур рус олими, энциклопедист, химия ва физика соҳасида қатор кашфиётлар килган.

М.В. Ломоносов табиий ва гуманитар фанларнинг кўпгина соҳаларида асарлар яратган қомусий олим эди. Унинг минералогия, геология, физика, астрономия, фалсафа, тиббиёт, тарих ва бошка бир қатор соҳаларга бағишланган асарлари мавжуд.

Шу йиллари рус география фани катта муваффакиятларга эришади. 1733–1743 йиллари В.Беринг ва денгизчи-лейтенант А.И. Чириков (1703–1748) бошчилигида ташкил қилинган экспедиция Америка қирғоқларига етди ва С.И. Дежнёв (?–1673) томонидан очилган Осиё билан Америка ўртасида бўғоз борлигини тасдиқлади. Этнограф С.П. Крашенинников (1711–1755) экспедицияси Камчаткани ўрганди, С.Г. Малигин (?–1764) ва Лаптевлар¹ экспедициялари Шимолий Муз океанини Мурманскдан то Чукоткагача ўрганиб чиқдилар.

1742 йили С.И. Челюскин (1700–1764) Осиёнинг энг шимолий чеккасини кашф этди. Ҳозир бу ер Челюскин бурни деб аталади. 1764 йили П.К. Креницин (1728–1770) экспедицияси Аляска қирғоқларига етиб борди. 80–90-йиллари савдогар Г.И. Шелехов (1747–1795) ташаббуси билан Аляска, Алеут ороллари ва бутун Американинг гарбий қирғоқларини ўрганиш ва ўзлаштириш бошланди.

Шунингдек, тиббиёт, агрономия соҳаларида ҳам тадқиқотлар олиб борилди. XVIII асрнинг иккинчи ярмида Россия Фанлар академиясида машхур математик, физик ва астроном швейцариялик Леонард Эйлер (1707–1783) ва унинг ҳамюрти Даниил Бернулли (1700–1783) ҳам фаолият кўрсатиб, Россияда фан тараққиётига катта хисса кўшдилар.

Шу даврда техника тараққиётида ҳам катта муваффакиятларга эришилди. 1763–1766 йиллари И.И. Ползунов (1728–1766) универсал буг машинасини яратди. Унинг замондоши И.П. Кулибин (1735–1818) эса оптик телеграф, мутлақо янги тузилишдаги протез, прожектор («кулибин фонари»), ўзиорар кема, уч ғилдиракли велосипед, олтин ювишда қўлланиладиган машина ва илмий академик лабораториялар учун бир қатор приборлар яратди. У Нева дарёси устидан қуриладиган ёғоч, кейин эса металл кўприкларнинг лойиҳаларини ҳам яратди. Мухандис К.Д. Фролов (1775–1839) шахталардан сувни тортиб чиқарадиган гидравлик қурилма ясади.

¹ Дмитрий Яковлевич (1701–1767) ва Харитон Прокофьевич (1700–1763) Лаптевлар – рус гарбий флоти офицерлари, (улар амакилар бўлишган), Шимолий Муз океанидаги Лаптевлар денгизи улар шарафига шундай аталган.

Калугалик савдогар ва ихтирочи Р.А. Глинков (1729–1789) инглиз Айркрайтдан тўқиз йил олдин кўп ғалтакли тўқув машинасини яратди.

Россиялик олимлар ва қашфиётчилар томонидан яратилган машиналар жаҳон фани ва техникаси ютуқларининг олдинги қаторида турарди. Аммо қолоқ, крепостной Россияда бу машиналарга талаб йўқ, улар деярли қўлланилмас эди.

Адабиёт. XVIII аср рус адабиётида ҳукмрон йўналиш классицизм эди. Агар XVIII асрнинг биринчи ярмидаги классицизм учун ватанпарварлик ва маърифатчилик ғоялари хос бўлса, кейинчалик у дворян поэзиясининг расмий йўналишига айланади. XVIII асрнинг иккинчи ярмидаги классицизм вакилларининг энг ёрқин намояндаси шоир Г.Д. Державиндир (1743–1816).

Д.И.Фонвизин (1745–1792) рус адабиётида янги, фош этувчи – реалистик йўналишга асос солди. У ёзган «Бригадир», «Думбулбоявачча» пьесалари ижтимоий мавзудаги дастлабки комедиялар эди. Машхур масалчи И.А.Крилов (1769–1844) ижодининг бошланиши ҳам шу йилларга тўғри келади. У сатирик публицистика жанрида ижодини бошлаган эди.

Россия томонидан босиб олинган халқлар ижодида бош мавзу – миллий озодлик мавзуси эди. Литвалик К. Донелайтис (1714–1780), грузин шоирлари Д. Гурамишвили (1705–1792) ва С. Орбелиани (1658–1725), озарбайжон М.П. Вожар ва бошқалар ижоди асосан шу мавзуга қаратилган. Е.Пугачев қўзғолонининг раҳбарларидан бири бошқирд Салават Юлаев (1752–1800) ҳам талантли шоир бўлган.

Санъат. Пётр I давридан бошлаб Петербург ва Москвада жуда катта қурилиш ишлари олиб борилди. Шу йиллари рус мъеморчилигига Европа ва рус миллий анъаналарини уйғунлаштирган йўналиш шаклланди.

Рус мъемори Д.В. Ухтомский (1719–1774) 1749 йили Москвада архитектура мактабини ташкил қилди. Шу йиллари талантли архитектор В.И. Баженов (1737–1799) ҳам бир қатор лойиҳалар яратди. Улар ичida Пащковлар уйи, Кремлни қайта қуриш лойиҳаси (амалга ошмай қолган) ва Царицин саройи лойиҳаси уйғунлиги ва маҳобати билан замондошларини қойил қолдиради.

Бошқа бир машхур архитектор М.Ф. Казаков (1738–1813) Москва университетининг биносини ва Дворянлар йиғини биносини қуриб, рус мъеморчилик санъатига катта ҳисса қўшди.

П.И. Аргунов, Г.Е. Дикушин, А.Ф. Миронов (Останкинодаги Шереметьевлар саройини қуришган) сингари рус архитекторлари билан бир каторда XVIII асрда чет эллик архитекторлар – француз Э.М. Фальконе, шотланд Ч. Камерон, итальянлар Д. Кварени ва В.В. Растрелли (Қишки сарой ва Петергоф ансамблини яратган) ҳам ижод қилишиб, рус мөйморчилиги тарихида арзигулик ном қолдиришиди.

XVIII асрда рассомлик санъати ҳам яхши ривожланди. Портрет жанрида ижод қилган И.П. Аргунов, Ф.С. Рокотов, Д.Г. Левицкий, В.А. Боровиковский ижоди ҳам шу даврга тўғри келади.

1757 йили Москва университети ташаббуси билан унинг бадиий синфи базасида Бадиий академия ташкил қилинди. Биринчи академик А.П. Лосенко бўлиб, унинг «Владимир ва Рожеда» картинаси ҳамда Г.И. Угрюмовнинг «Александр Невскийнинг Псковга кириб келиши» картинаси рус рассомчилигига тарихий жанрни бошлаб бердилар. Ҳайкалтарошлардан М.И. Козловский, Ф.Ф. Шчедрин, Ф.И. Шубин ижодида ҳам классицизм бош йўналиш ҳисобланади. Петербург ва Москвадаги биноларни безаш учун улар томонидан яратилган ҳайкалтарошлик санъати намуналари, А.В. Суворов, М.В. Ломоносов каби машҳур тарихий шахсларнинг ҳайкал ва буюстлари ҳайкалтарошлик санъатининг гўзал намуналари сифатида ҳамон кишиларга завқ бағишлайди.

XVIII асрда мусиқа санъати ҳам катта муваффақиятларга эришди. Е.И. Фомин 30 дан зиёд мусиқа асарлари яратган бўлса, И.Е. Хандошkin эса ажойиб ижрочи ва камер мусиқасининг муаллифи ҳисобланади.

Шу даврда рус миллий театри ҳам шаклланди. Унинг асосчи-си савдогар Ф.Г. Волков эди. 1750 йили Ярославлда унинг ташаббуси билан биринчи спектакль – Ж. Расиннинг «Эсфири» драмаси қўйилади. Кейинчалик махсус қурилган ва «Большой театр» номини олган бинода рус драматурги А.П. Сумароковнинг «Хорев» пьесаси намойиш қилинди. Ф.Г. Волков асос соглан театр биринчи рус миллий театри эди. Рус актёрларининг бутун бир авлодини тарбиялашда ҳам Ф.Г. Волковнинг хизматлари катта. Унинг шогирдларидан машҳур И.А. Дмитриевский ҳатто Россия Фанлар академиясининг аъзолигига ҳам сайланган.

Ф.Г. Волков таъсири остида рус мусиқашуноси Г.С. Лебедев Хиндистонда биринчи Европа типидаги театрга асос солади. 1801

йили Ҳиндистондан қайтгандан кейин эса ҳозирги замон хинд тилларининг грамматикасини яратади.

XVIII аср охирида Россияда 10 дан зиёд театрлар фаолият кўрсатарди. Уларнинг артистлари орасида ўз даврининг йирик опера қўшиқчиси П.И. Жемчугова-Ковалева ва саҳнада реализмнинг асосчиси, машхур актёр И.С. Шчепкинлар бор эди.

Ижтимоий-сиёсий фикр. XVIII аср рус маърифатпарварларининг асосий ғояси илфор билимларни кенг халқ оммасига ёйиш бўлди. Худди шу маърифатчилик ғоялари М.В. Ломоносов, профессор С.Е. Десницкий, А.Я. Полянов каби жамиятнинг илфор вакиллари фаолиятига хосдир. Айниқса крепостнойликка қарши йўналишдаги журнallар – «Трутень» ва «Живописец»ларнинг ностири Н.И. Новиков ва А.А. Радищевларнинг ижоди рус маърифатчилигининг илфор кўриниши бўлди. А.А. Радищевнинг «Петербургдан Москвага саёҳат» асари аччиқ рус воқелиги акс эттирилган, крепостной тузум ва самодержавиега қарши қаратилган ўз даврининг энг дадил асари эди.

* * *

Ўтган уч асрдан кўпроқ вақт мабойнида Шарқда илгари Олтин Ўрдага қарашли бўлган жуда катта ерлар забт этилиб, мамлакат худуди бир неча марта кенгайтирилди. Ғарбда Россия ўз ерларини кенгайтириш учун тинимсиз урушлар олиб борди ва натижада Крим, Каспий бўйи, Польша ерларининг бир қисми, Болтиқ бўйи ерлари кўшиб олинди. Жанубда ҳам олиб борилган урушлар туфайли Кавказ орти, Грузия ва Қозогистон ерларининг бир қисми забт этилди. Мамлакат аҳолиси кўпайиб, фақат XVIII аср давомида 15,6 млн кишидан 37,3 млн кишига етди. Бу Англия ва Франциянинг умумий аҳолисидан ҳам кўп эди. Россия мануфактура ишлаб чиқаришини ташкил қилиш бўйича ҳам Европанинг бошқа давлатлари билан мувафақиятли рақобатлашди. XVIII асрга келиб Уралда металлургия корхоналари ташкил қилингандан сўнг Россия чўян ва темир ишлаб чиқариш бўйича Англиядан ҳам ўтиб кетди.

Петр I ислоҳотлари натижасида давлатни бошқариш ва солик тизими мустаҳкамланди. Екатерина II хукмонлигининг охирида, у жорий қилган эркин рақобат принципи натижасида, Россияда 2000 дан ошиқ саноат корхоналари ишлаётган эди. Ушбу даврининг асосий яқуни шундан иборат бўлдики, XVIII асрларга келиб Россия буюк давлат сифатида шаклланди.

XI боб бўйича саволлар

1. Рус ерларининг марказлашган давлатга бирлашишида қандай ички ва ташки факторлар асосий роль ўйнади?
2. XVI–XVII асрларда Рус давлати ташки сиёсатининг асосий йўналишлари қандай мақсадга қаратилган эди?
3. XVII–XVIII асрларда Россия тараққиётининг характерли томонлари нимада эди?
4. Россияда мустабитлик анъаналарининг кучайишини қанадай изоҳлаш мумкин? Маъмурӣ бошқарув аппаратининг кучайиши бу жараёнга қандай таъсир кўрсатди?
5. XVIII асрнинг биринчи яримидағи сарой тўнтаришлари Россия жамиятининг ривожланишида қандай роль ўйнади?
6. XVIII асрда Россия ташки сиёсатининг асосий мақсади нималарга қаратилган эди?
7. Рус миллатининг шаклланишида қандай факторлар асосий роль ўйнади?
8. XVIII асрда Россия адабиёти ва санъатидаги асосий мавзу жамиятдаги қандай муаммога қаратилган эди?

XII Б О Б. XVI–XVIII АСРЛАРДА ИТАЛИЯ

Уйғониш ва Гуманизмнинг ватани, Данте ва Петrarка севиб куйлаган ўлка, Леонардо да Винчи, Рафаэль, Микеланжело, Тициан каби буюклар алқаган Италия янги давр бошларида сиёсий тарқоқлик ва иқтисодий инқизорни бошидан кечираётган эди.

Сиёсий тарқоқлик. XVI асрда ёк Италиянинг сиёсий таназзуудан фойдаланган Франция ва Испания бу ерда босқинчилек урушларини олиб борди. Узоқ давом этган (1494–1559) бу урушлар мамлакатнинг сиёсий тарқоқлигини ва иқтисодий таназзуунин янада кучайтирги. 1559 йилги Като-Камбрезия сулхи Италиянинг сиёсий тарқоқлигини ва Испанияга қарамлигини мустаҳкамлади. Жанубий Италия, Сицилия, Сардиния, Милан герцоглиги Испания таркибиغا кирди. Венеция, Савойя герцоглиги, Пьемонт ва Папа вилоятидан ташқари бошқа Итальян давлатлари ҳам Испанияга қарамликини тан олишиди.

Бу даврда чет эл босқинчиларига қарши халқ ҳаракатлари ҳам тўхтамайди. 1559 йилги Жанубий Италияда Кампанелла томонидан тайёрланган кўзголон фош қилинади. 1647 йилги Палермода Жузеппе д'Алесси кўзголонга бошчилик қилиб, бу ерда республика тузишга ҳаракат қиласи.

Европанинг кучли давлатлари Италия ҳудудини тўхтовсиз урушлар аренасига айлантиради. 1701–1714 йиллари Испания тахти учун олиб борилган урушлар ҳам айнан Италия ҳудудида бўлиб ўтди. 1714 йилги Раштат тинчлик сулҳига биноан Италиянинг Испанияга қарашли бўлган ерлари тўлиғича Австрия ихтиёрига ўтди. Туркия билан олиб борилган урушлар оқибатида кучсизланиб қолган Венеция 1718 йили Ўрта Ер денгизининг шарқий қисмидаги ҳамма ерларидан маҳрум бўлди. Фақат Савойя ўзининг қулай географик жойлашуви ва дипломатик устамонлиги туфайли ўз ҳудудини ғарбда Франция ҳисобига, шарқда эса Милан давлати ерлари ҳисобига кенгайтиришга муваффақ бўлди.

Бой берилган ерларни қайтариш максадида 1720 йили Испания бошлаган уруш унга муваффақият келтирмади. Австрия энди Сицилияни ҳам эгаллади, Савойя давлати Сардиния қироллиги деб атадиган бўлди.

Польша тахти учун 1733–1735 йиллари олиб борилган уруш ҳам асосан Италия ҳудудида бўлиб ўтди. Уруш Вена тинчлик сулҳига билан якунланди. Унга кўра Сардиния қироллиги яна ўз ерларини кенгайтиришга эришди, Сицилия ва Неаполитан қироллигида эса австрияликлар ўрнига яна испанлар келди.

1740–1748 йиллари Италия бу сафар ҳам яна Австрия тахти учун олиб борилган урушга жалб этилади. 1748 йилги Аахен сулҳига биноан Италия жанубда Испанияга, шимолда Австрияга қарам бўлган майда давлатлар конгломератидан иборат бўлиб қолаверди.

1755 йили австрияликларга қарши қўзғолон кўтарган Корсикада 1769 йилдан французлар ўрнашиб олди.

Иқтисодий аҳвол. Сиёсий тарқоқлик ва қарамлик натижасида мамлакатнинг иқтисодий инқирози ҳам кучайиб борди. Кўплаб йигимлар, четга товар чиқаришга қўйилган чеклашлар саноат ва савдонинг ривожланишига йўл қўймади. Флоренция матолари ва Милан қуролларини ишлаб чиқариш деярли тўхтади.

XVI–XVII аср биринчи ярмида Италия иқтисодида ички алоқаларнинг кенгайиш жараёни юз берди. Аммо ягона бозорнинг шаклланишига фақат мамлакатнинг сиёсий тарқоқлиги эмас, савдо ва саноатнинг кўпроқ ташки бозорга йўналтирилганлиги, у ерда йирик давлатлар билан ракобат ҳам тўсик бўлаётган эди.

Европани Осиё, Африка ва Америка билан боғлайдиган янги савдо йўлларининг очилиши Ўрта Ер денгизи савдосининг аҳамиятини

пасайтирган бўлсада, Италия ҳамон савдода муҳим ўрин эгаллаб турган эди. Бундан ташқари, Италия урушлари (1494–1559) туфайли Испания ва Португалия билан муносабатларнинг мустаҳкамланиши ҳам Италия учун янги савдо бозорларига йўл очди.

Италия иқтисодининг муҳим тармоғи бўлган тўқимачилик француз, немис ва инглиз тўқимачиларининг рақобати туфайли маълум инқирозни бошдан кечираётган эди. Италия саноатининг ривожланишига Италия урушлари даврида кўплаб маблағларнинг ер сотиб олишга ва кредит операцияларига йўналтирилганлиги ҳам салбий таъсир кўрсатди. Тўғри, маблағлар савдо соҳасидан бутунлай олиб кўйилмади, фақат йирик савдо-банк компанияларининг фаолияти XVI асрдан бошлаб Италиядан ташқарида авж олди.

Итальян урушлари даврида мамлакат иқтисоди янги шаротга мослашишга мажбур бўлди: вайронагарчилик, анъанавий алоқаларнинг узилишига қарамасдан иқтисодий ривожланиш имкониятлари барҳам топмади ва XVI асрдан бошлаб баъзи соҳаларда ўсиш кузатилди. Бунга 1559 йилги шартномадан кейин (1559 йилги Като-Камбрезия сулхи Апеннин ярим оролининг катта қисмида Испаниянинг хукмронлигини ўрнатди) мамлакатда ўрнатилган тинчлик билан бирга рақобатчи мамлакатлар ахволининг ўзгариши ҳам сабаб бўлди: Францияда фуқаролар уруши бошланди, Нидерландияда – инқилоб ва Испания зулмидан озод бўлиш учун кураш бошланди. XVI аср иккинчи ярмидан бошлаб Пьемонт, Бергамо, Венеция каби шаҳарларда тўқимачиликнинг ҳажми кенгайди. Айниқса Венецияда ишлаб чиқаришнинг кескин ўсиши кузатилади: 1521 йили бу ерда 3500 той мато тўқилган бўлса, 1569 йили – 26 500, 1602 йили эса – 29 000 той ишлаб чиқарилади. Мато ишлаб чиқариш унинг анъанавий маркази бўлган Флоренцияда ҳам кенгайди. Йигирма йил ичida (1553–1572) маҳаллий компаниялар томонидан мато ишлаб чиқариш икки баробарга ошди. Аммо ингичка толали қиммат жуннинг ўрнига, арzon қўпол жундан матолар тўқиши кўпайди.

Генуя, Венеция, Милан, Павия, Комо, Мантуя, Болонья, Флоренция шаҳарларида ипак газламалар тўқиши янада жадал суръатлар билан ўсди. Европада урф бўлган харидоргир газламалар Англия, Франция, Германия, Польша ва Венгрия каби мамлакатларга чиқариларди. Тўқувчиларнинг маҳаллий ипак хомашёси билан ишлаши бу соҳанинг ривожланишида бош сабаб бўлди. Асосий ипак этиштирувчи ўлка Неаполитан қироллиги эди. Ипакчилик саноати-

нинг ривожланишига бозордаги талаб билан бирга (энди қиммат-баҳо газламалар ташқи бозорда катта талабга эга эди) соҳадаги техник янгиликлар ва кашфиётлар ҳам асосий сабаб бўлди.

Бироқ тўқимачилиқдаги муваффақиятлар Италия иқтисодининг асосий тармоги бўлган бу соҳада туб ўзгаришларга олиб келмади. Шаклана бошлаган капиталистик муносабатлар ривож топмади. Савдо капиталига қарам бўлган тарқоқ мануфактура ишлаб чиқаришнинг асосий шакли бўлиб қолаверди. Ишлаб чиқаришнинг ташаббускори илгаригидек цехлар доирасида фаолият кўрсатувчи компаниялар эди. Улар қаттиқ регламентация тизимини сақлаб колишга, анъанавий технологиялардан фойдаланишга тиришарди, эркин тадбиркорликка йўл қўйишини хоҳлашмас эди. Олдинги даврлардаги сингари бевосита ишлаб чиқарувчилар цех ва компанияларга қарам бўлган уста ҳунармандлар ва ёлланма ишчилар эди.

Юқоридаги сабаблар туфайли Италиядаги иқтисодий ўсиш вақтинчалик характерга эга бўлди. XVII аср биринчи чорагидаги иқтисодий турғунлик аср ўрталарига келиб инқирозга айланди.

XVII асрга келиб чуқур иқтисодий инқироз бошланди. Масалан, Миланда тўқимачилик корхоналарининг сони беш марта, мато тўқийдиган устахоналарнинг сони 70 тадан 15 тага камайди. 1682 йили улар сони 5 та эди, холос. Факат Тоскания герцоглигига саноат ва савдо маълум даражада ривожланди, Венеция ва Ливорно нисбатан кенг кўламда савдо билан шуғулланди.

Аммо саноатдаги инқироз Италиядаги савдо ва банк ишларига ҳам таъсир этмасдан қолмади. XVI аср бошларида ҳали Венеция, Генуя, Флоренция халқаро савдо ва молия ишларининг йирик марказлари хисобланарди. Йирик Итальян давлатлари Испания, Англия ва Франция билан савдо балансида активларга эга эдилар. Туркия томонидан ўрнатилган тўсиқларга қарамасдан Венеция Ўрта Ер денгизи савдосида ўз мавқенини сақлаб қолишга эришди. Яқин Шарқ мамлакатларидан Европага келтириладиган ширинликларга бўлган Венеция монополиясини Португалия рақобати йўқ қила олмади. Агар Венеция Шарқ билан савдодаги анъанавий алоқаларини сақлашга кўп куч сарфласа, Генуя ўз эътиборини Фарбга қаратди, Испания ва Португалия билан савдога фаол киришди. XVI аср ўрталарига келиб Генуя импортигининг ярми Испания орқали ўтарди. Генуяning Англия, Голландия ва Германия билан савдо алоқалари ҳам кенгайди. Фарб мамлакатлари билан Генуя банклари катта пул

операциялари орқали ҳам бирлашган эди: улар Сан Жоржонинг курдатли банкига бирлашиб халқаро молия ярмаркаларида етакчи ўринни эгаллаб турарди. Генуяликларнинг таъсири фақат Европада эмас Левант, Африка ва Америка мамлакатларида ҳам қучли эди. Флоренция ҳам Ғарб билан, ҳам Шарқ билан савдо алоқаларини ривожлантиради: унинг савдогарлари Жанубий Америка қирғоқларига етиб борган, Данцигдан (Гданьск) ва Москвадан ғалла олиб келарди. Уларга қарашли Ливорно порти XVI аср охирларида йирик халқаро портга айланди.

Аммо XVII аср биринчи ярмида Италия савдосининг ҳолати ўзгаради: энди тайёр маҳсулот эмас, хомашё, қишлоқ хўжалик маҳсулотларини четга олиб чиқиш ривожланди. Денгиз савдо йўлларидан генуялик ва венециялик савдогарлар энди Англия ва Голландия савдогарлари томонидан сикиб чиқарилади.

XVII аср ўрталарида Италия иқтисодида юз берган инқирознинг бир қатор ички ва ташқи сабаблари бор эди. Бу, биринчи навбатда, саноатнинг бозор муносабатларига асосланган юқорироқ шаклига кўтарила олмаганлиги, тадбиркорликнинг ривож топмаганлигига эди. Иккинчидан, цехлар тизимининг сақланиб қолганлиги, нисбатан арzon ишчи кучига эга бўлган қишлоққа капиталнинг секин кириб борганлиги, сиёсий тарқоқлик, ўта кучсиз маҳаллий протекционизм сиёсати ва ниҳоят, капиталнинг ер эгалигига ҳамда кредит тизимига кўплаб чиқиб кетишида эди. Италия саноати ва банк ишлари учун Испаниядаги молиявий инқироз ва Испаниядан Италияга олиб келинадиган жуннинг камайиши катта салбий таъсир кўрсатди. Бунинг устига, протекционизм сиёсати юргизилаётган Англия, Голландия, Франция каби мамлакатлар саноати билан рақобат қилиш ҳам борган сари қийинлашди.

Италиядаги иқтисодий тушкунликнинг асосий сабабларидан бири қишлоқ хўжалигини ташкил қилишдаги эски, феодал усувларнинг тўлиқ сақланиб қолаётганлигига эди.

Урушлар ва сиёсий тарқоқлик эски тартибларнинг консервациялашувига олиб келди ва янги, капиталистик муносабатларнинг ҳамда саноат таракқиётининг ривожланишига тўқсинглик қилди.

Қишлоқ хўжалиги. Итальян дехконларининг аксарияти шахсан озод бўлсалар-да, ҳали янги давр бошларидаёқ ерларидан ажралиб, қашшоқ изжарачиларга ва батракларга айланган эдилар.

Италияда черков ва давлат солиқларидан руҳонийлар ва зодагонлар тўлиқ озод этилган бўлиб, бу солиқларнинг барча оғирликлари дехконлар зиммасида эди.

Шунга қарамасдан, Италия қишлоқ хўжалигида, айниқса XVI асрнинг иккинчи ярмида катта муваффақиятларга эришилди. Бўш ётган ерларни тозалаш ҳисобига ҳайдаладиган ерлар майдони кенгайди, Тоскана ва Ломбардияда кенг миқёсда мелиорация ва ирригация ишлари олиб борилди, ҳамма жойда донли ва ҳашакли экинлар кўплаб экилди. Янги жорий қилинган маккажўхори тезда оммавийлашиб кетди, шоли, каноп экиш, цитрусли дараҳтлар ўтқазиш ва шакарқамиш етишириш кўпайди. Пилла курти боқишида фойдаланиладиган тут дараҳтини ўстиришга айниқса катта эътибор берилади. Чорвачилиқда ҳам маълум муваффақиятларга эришилди: молларни пода қилиб боқиш жорий қилинди, Жанубий Италияда қўйчилик яхши ривожланди.

Қишлоқ хўжалигидаги ривожланиш ҳам худди саноатдаги сингари, XVII аср бошларидан турғунлик билан, асрнинг иккинчи ярмидан эса инқироз билан алмашди. XVII аср ўрталарига келиб кўплаб ўзлаштирилган ерлар яна ташландик бўлиб қолди. Яйловлар ва овчиликка мўлжалланган қўриқхоналар кўпайиб борди.

Қишлоқ хўжалигидаги тушкунликнинг ҳам асосий сабаби шаклланган муносабатларнинг эскириб қолганлиги, янги капиталистик муносабатларнинг эса жуда секинлик билан кириб келаётганлигига эди. XVII асрда шаҳарликлар томонидан қишлоқ хўжалигига сарфланган катта маблағ ҳам бу соҳада кескин ўзгаришларга олиб келмади. Дехқонларнинг хонавайрон бўлиши, дайдилик, қароқчилик XVII аср Италия ҳаётининг ажралмас қисмига айланди.

Сиёсий тарқоқлик ягона миллий бозорнинг шаклланишига ҳам тўсқинлик қилаётган, дехқонларнинг қашшоқлиги эса саноат молларининг бозорини ҳам чеклаб қўяётган эди.

XVIII аср биринчи ярмида Италиянинг иқтисодий инқирози ва сиёсий қарамлиги янада кучайди. Саноат ишлаб чиқариши кескин пасайди: тўқимачилик Флоренцияда 20 марта, Венецияда эса 30 марта камайди. Саноат ривожланиши учун муҳим тўсиқлар шаҳардавлатларнинг ҳукуматлари томонидан ўрнатилган регламентация, капиталнинг йўқлиги, ички бозорнинг нихоятда торлиги ва чет эл рақобати эди. Ички ва ташқи савдонинг сусайиши бу ерда Австрия ва бошқа давлатлар савдогарларининг ҳукмронлигига олиб келди.

Шунга қарамасдан сиёсий қарам ва тарқоқ Италияда XVIII аср иккинчи ярмидан сезиларли иқтисодий юксалиш бошланади. Ахолининг кўпайиши натижасида қишлоқ хўжалик маҳсулотларига бўлган талаб ошади, қишлоқ хўжалиги ва саноатга капиталистик муносабатлар кириб бора бошлади. Шимолий Италияда дастлабки марказлашган мануфактуралар пайдо бўлади. Бироқ тарқоқ мануфактура хўжалиги саноат ишлаб чиқаришининг асосий шакли бўлиб қолаверди.

Халқ қўзғолонлари. Ўз ахволларининг чидаб бўлмас даражада оғирлашганидан норози бўлган халқ босқинчиларга қарши бир неча марта қўзғолон кўтарди. Шундай қўзғолонлардан бири 1746 йили, Австрия тахти учун уруш йилларида бўлиб ўтди. Ўшанда Австрия қўшинлари Генуя остонасида туарди. Маҳаллий патрицийлар ва ҳукмдорлар душманга шаҳар дарвозаларини очиб беради. Ривоят қилишларича 12 ёшли бола – Балиланинг австриялик офицерга қаратса отган тоши қўзғолонга чақириқ бўлади. Порт ҳаммоллари, этикдўзлар, савдогарлар, устахона шогирдлари болта ва бошқа анжомлар билан қуролланиб олади. Шаҳар баррикадаларга тўлиб кетади. Қўзғолончилар қурол-аслаҳа омборини эгаллаб, жангга киришадилар. Олти кун давом этган шиддатли жанглар оқибатида австрияликлар шаҳардан қувиб чиқарилади ва Генуя республикаси қутқариб колинади. Бу қўзғолон австриялик офицерга тош отган афсонавий бола шарафиға «Балила қўзғолони» номи билан тарихда қолган.

XVIII аср иккинчи ярмида иқтисод ва маданиятнинг юксалиши. XVIII аср биринчи ярмида Франция билан курашда мағлубиятга учраган испан бурбонлари ўзларининг Италиядаги ерларидан маҳрум бўлишди. Аммо бурбонларнинг мағлубиятидан фойдаланиб ўз мустақиллигини қўлга киритиш учун Италия жуда ҳам кучсиз эди. Тўғри, жанубда ғолиблар мустақил Неаполитан давлатини ташкил қилдилар, аммо шимолдаги энг бой ва иқтисодий ривожланган вилоят – Ломбардия 1748 йилги Аахен тинчлик сулҳига биноан Австрия таркибиға қўшиб олинди. Марказий Италияда эса австриялик габсбурглар хонадони вакили Тоскананинг буюк герцоги бўлди. Бир чет эл зулми бошқаси билан алмашди, мамлакат босқинлар ва сарой найранглари олдида ҳимоясизлигича қолаверди.

XVIII аср иккинчи ярмида Италия бир неча ўн йил тинч тараққиёт даврини бошидан кечирди ва кўп йиллик вайронгарчи-

лиқдан аста-секин ўзини ўнглай бошлади, иқтисод ва маданиятнинг тикланиши юз берди. Аҳоли сонининг ўсиши ва қишлоқ хўжалик маҳсулотларига бўлган талабнинг ошиши натижасида ҳайдаладиган ер майдонлари кўпайиб, аграр маданият ривожланди, серҳосил По водийсида мамлакатда биринчи капиталистик типдаги хўжалик пайдо бўлди. Зодагонларнинг буржуалашув жараёни бошланди. Шаҳарларда, айниқса Шимолий Италияда, марказлашган мануфактуралар сони ортиб борди. Қолган худудларда эса тарқоқ ма-нуфактура саноат ишлаб чиқаришининг асосий шаклига айланиб қолди.

Мамлакат ҳаётида юз бераётган ўзгаришлар маданий ҳаётда ҳам ўз аксини топди. Шакланаётган буржуача ҳаёт тарзининг кўплаб жиҳатлари Паринининг шеърларида, Гольдонининг пьесаларида кулги остига олинди. Мусиқада классик опералар ўрнига шўх ва кулгили, қаҳрамонлари оддий ҳалқ ичидан чиқкан оперетталар келди.

* * *

Шу давр Италия маърифатпарварлари ҳам мамлакатнинг иқтисодий қолоқлиги ва сиёсий кучсизлиги сабабларини аниқлашга, уларни бартараф этишга ҳаракат қилдилар. Италия давлатларининг бошлиқларини сиёсий бирлашишга чақириб, Неаполитан университети профессори, таникли маърифатпарвар А. Женавезе: «Бугун тарқоқ ва шу сабабли жуда кучсиз Италия бирлашганда, ривожланган ва қудратли давлатга айланар эди», – деб ёзган эди. 70–80-йилларда маърифатпарварларнинг орзулари ушаладигандай туюлади. Баъзи Италиян давлатлари уларнинг маслаҳатлари туфайли бир қатор буржуа ислоҳотларини амалга оширди. Аммо улар жуда чекланган бўлиб, оқибат натижада мамлакатнинг аҳволига айтарли таъсир кўрсатмади.

Шундай бўлсада, Италияning сиёсий ва иқтисодий қолоқлиги унинг хукмдорларини ҳам мамлакатни бирлаштиришга ундаётган эди. XVIII аср 90-йилларидан Италияни чет эл босқинчиларидан озод қилиш ва мамлакатни бирлаштириш учун ҳаракат бошланиб, бу ҳаракат Рисоржименто (италянча Уйғониш) номини олган.

ХII боб бўйича саволлар

1. Италиядаги сиёсий тарқоқликнинг сабаблари нимада эди?
2. Тарқоқлик мамлакатнинг иқтисодий тарақкиётiga қандай таъсир кўрсатди?
3. Сиёсий тарқоқлик йилларида савдо, саноат ва қишлоқ хўжалигининг ривожланиши қандай даражада эди?
4. Аахен сулҳи мамлакатнинг сиёсий ривожланишига қандай таъсир кўрсатди?
5. XVIII асрдаги ҳалқ қўзғолонлари нима мақсадга қаратилган эди?
6. XVIII асрдаги иқтисодий ва маданий юксалишнинг сабаблари нимада?

XIII Б О Б. XVI–XVIII АСРЛАРДА ИСПАНИЯ

Мамлакатдаги аҳвол. Сиёсий ва иқтисодий тушқунликнинг бошлиниши. 1516 йили Фердинанд вафотидан сўнг Испания таҳтига Карл I (1516–1555) келди. У она томондан буюк қироллар Фердинанд ва Изабелланинг, ота томондан эса император Максимилиан I Габсбургнинг набираси эди. Карл I отаси ва бобосидан габсбургларнинг Германия, Нидерландия ва Жанубий Америкадаги ер мулкларини мерос қилиб олганди. 1519 йили герман миллатининг Муқаддас Рим империяси таҳтига Карл V номи билан ўтиради. Бироқ жуда катта ҳудудни испан таҳти ҳокимияти остида жамлаш бу ҳудудларнинг иқтисодий ва сиёсий бирлашишга олиб келмади.Faқат сулоловий келишувлар орқалигина боғланган Арагон ва Кастилия қироллеклари бутун аср давомида сиёсий тарқоқлигича қолаверди (айниқса Кастилияning сиёсий мустақиллиги катта аҳамиятга эга, чунки унда Пиреней ярим ороли аҳолисининг $\frac{3}{4}$ қисми яшар эди). Улар ўзларининг тоифавий вакиллик органи – кортесларни, мустақил қонун чиқарувчи ва суд тизимини сақлаб қолдилар. Кастилия қўшинлари Арагон ҳудудига кира олмасди, Арагон қўшинлари эса уруш чиққан тақдирда ҳам Кастилияни ҳимоя қилишга мажбур эмасди. Арагон қироллигининг ўзида ҳам унинг асосий қисмлари, айниқса Арагон, Каталония, Валенсия ва Наварра анчагина сиёсий мустақилликни сақлаб қолган эди. Испан қироллигининг тарқоқлиги яна шунда намоён бўлардики, 1564 йилгача ягона сиёсий марказ мавжуд эмасди, қирол саройи ҳам мамлакат бўйлаб кўчиб юрар, кўпинча Вальядолидда жойлашар эди. Faқат 1605 йили Мадрид шаҳри Испаниянинг расмий пойтахти бўлди.

Аммо бундан ҳам муҳими мамлакатнинг иқтисодий тарқоқлиги эди. Мамлакат ҳудудлари ижтимоий-иқтисодий тараккиёт даражаси бўйича бир-биридан кескин фарқ қилас ва ўзаро боғланиши ҳам заиф эди. Бундай ҳолатга Испаниянинг географик ландшафти ҳам салбий таъсир қўрсатаётган эди. Шимолий вилоятлар – Галиция, Астурия, Басклар ерлари баланд тоғ тизмалари орқали марказ билан боғланишнинг имконияти камлиги сабабли Англия, Франция ва Нидерландия билан қизғин савдо олиб борарди. Мамлакатнинг жануби-шарқи, айниқса Каталония ва Валенсия Ўрта Ер денгизи савдоси билан қаттиқ боғланган эди.

Карл V даврида бошланган марказий ҳокимиятни мустахкамлаш тенденцияси Филипп II (1556–1598) томонидан ҳам давом эттирилган бўлса-да, бу даврда иқтисодий инқироз аниқ қўзга ташланиб колган эди. Бунга қиролнинг узокни кўзламай олиб борган сиёсати, ички ва ташқи омиллардан ташқари инквизициянинг фаолияти ҳам сабаб бўлаётган эди. Айнан инквизициянинг фаолияти мамлакат жанубида савдо ва саноатни ўз қўлида ушлаб турган морискларнинг 1568–1571 йиллардаги кўзғолонига олиб келди. Кўзғолон бостирилди, аммо бу билан муаммо ҳал бўлмади. Испан абсолютизмининг реакцион характеристи унинг ҳаракатларида, айниқса қирол Филипп III (1598–1621) фаолиятида яққол намоён бўлади. Бунга ёркин мисоллардан бири морискларнинг¹ Испаниядан қувилишидир. 1609 йили қирол эдикти эълон қилиниб, унга биноан барча морисклар мамлакатдан чиқариб юборилиши зарур эди. Бир неча кун ичida ўн минглаб одамлар яшаб турган жойларидан қувғин қилинди, таланди, кўпчилиги ўлдирилди. 1610 йили Валенсиянинг ўзидан 100 мингдан ошиқ, бутун Испанияда эса ҳаммаси бўлиб 500 мингга яқин киши Берберияга (Шимолий Африка) ҳайдалди. Кўпчилик инквизициянинг курбони бўлиб, ҳайдаш пайтида ҳалок бўлди. Фақат қиролга бўйсунадиган инквизиция қирол ички сиёсатининг бош куролига айланди.

Испания ташқи сиёсатидаги катта муваффақиятсизликлар ҳам айнан шу даврга тўғри келади: 1588 йили Англия билан бўлган урушда «Енгилмас Армада» деб аталувчи испан флотининг тор-мор қилиниши, Франциядаги диний урушларга аралashiшнинг барбод бўлиши ва бошқалар шулар жумласидандир. 1566 йили Нидерлан-

¹ Морисклар – 1492 йили Гранада амирлиги кулаганидан сўнг Пиреней ярим оролида колган ва мажбуран христианлаштирилган мусулмон ахолиси.

дияда бошланган буржуа инқилоби 1581 йили Шимолий Нидерландиянинг Испаниядан ажралиб чиқишига олиб келди. Мамлакатнинг сиёсий заиф ва иқтисодий тушкун ахволига қарамасдан, испан қироллари Европада гегемонликни ўзларига мерос қолган деб ҳисоблаб, бу даъволарини сақлаб қолаётган эдилар.

Америкадаги мустамлакалардан қимматбаҳо металларнинг оқиб келишига қарамасдан испан қироли унинг кўплаб урушларини молиялаштирган генуялик ва немис банкирларидан қарздор бўлиб қолди. Филипп II бир неча бор давлатни банкрот деб эълон қилишга мажбур бўлди.

XVII аср бошларига келиб мамлакатда иқтисодий инқироз яна-да чуқурлашди. Ҳунармандчилик устахоналари ва мануфактуралар кўплаб ёпилди. Агар 1556 йили Севильяда тўқимачилик устахоналарининг сони 3600 та бўлган бўлса, 1700 йилга келиб уларнинг сони 60 та эди холос.

Испаниянинг табиий бойликларидан ҳам деярли фойдаланилмади: мамлакатда юқори сифатли темир ва мис рудалари бўла туриб, пўлат Италиядан, мис эса Голландия ва Германиядан келтирилар эди. Провинциялар ўртасида божхона тўсиқларининг мавжудлиги ягона ички бозорнинг шаклланишига тўсқинлик қилаётган эди.

Иқтисодий инқироз айниқса қишлоқ хўжалигига салбий таъсир кўрсатди. Хонавайрон бўлган дехқонлар қашшоқлар, дайдилар ва ёлланма аскарлар сонини тўлдиради. Инқироз хўжаликнинг нисбатан фойдали ва имтиёзли ҳисобланган қўйчилик тармоғига ҳам тарқалди. Очлик, эмиграция ва эпидемия оқибатида қишлоқ аҳолисининг сони камайиб кетди.

1609–1610 йиллари морискларнинг ҳайдаб юборилиши мамлакат иқтисоди учун янги зарба бўлди. Бундан ташқари Филипп III (1598–1621), Филипп IV (1621–1665) ва Карл II (1665–1700) даврида Испания Голландияга, Франция ва Англияга қарши кўплаб урушлар олиб борди. Бу муваффакиятсиз урушлар натижасида Испания Голландиянинг мустақиллигини тан олди ва унинг фойдасига Фландрининг бир қисми, Брабант ва Лимбургдан воз кечишга мажбур бўлди. (1648), Францияга Руссильон, Люксембургнинг бир қисми, Артуа, Фландрининг қатор шаҳарлари (1659–1668) ва Франш-Контени (1678) бой берди ҳамда Ямайканинг Англия томонидан босиб олинишини иложсиз тан олди. 1640 йили Португалия ҳам Испания таркибидан ажралиб чиқди.

Испания халқаро муносабатларда муҳим роль ўйнайдиган мамлакатдан XVII аср охирига келиб кучли давлатларнинг рақобат объектига айланиб қолди. Чунки Испания Европада бой берилган ерларидан ташқари ҳамон жуда катта мустамлакаларга эгалик қиласади. Бразилиядан бошқа бутун Жанубий Америка, Мексика (Калифорния ва Техас унинг таркибига кирарди), Флорида, Куба, Сан-Доминго, Европада Италияning катта қисми – Милан, Неаполь, Сицилия, Сардиния ҳамда Нидерландияning қатор районлари, Тинч океанида Филиппин ва Каролин ороллари Испанияга қарашли эди.

Испания тахти учун уруши. Испания қироли Карл II нинг фарзанди ҳам, ака-укалари ҳам йўклиги сабабли унинг вафотидан сўнг испан тахтига ким эгалик қилиши Англия ва Франция саройларида катта қизиқиш уйғотаётган эди. Франция Людовик XIV нинг набираси, Карл II нинг жияни Филипп Анжуийскийнинг номзодини, Англия эса Карл II нинг бошқа жияни, император Леопольд I нинг ўғли эрцгерцог Карлнинг номзодини қўяётган эдилар. Рақобатда Франциянинг таъсири кучлилик қилди ва Карл II Филиппни ўзининг вориси деб эълон қилди. 1701 йили Мадридга келган Филипп Анжуийский Филипп V номи билан Испания тахтига ўтирди. Шундай қилиб, Испанияда Габсбурглар ўрнига Бурбонлар сулоласи тахтга келди.

Французча тарбия топган, испан тилида сўзлашишни ҳам билмайдиган Филипп V қудратли бобоси, Франция қироли Людовик XIV нинг тўлиқ таъсири остида эди. Вице-қироллар ва испан мустамлакаларининг бошқа амалдорларига француз қиролининг топшириқларини сўзсиз бажариш, чет давлатлардаги испан элчилирига эса Франция манфаатларига зид иш кўрмаслик, Людовик XIV нинг барча ҳаракатларини қўллаб-куватлаш топширилди. Француз товарлари учун божхона тўловлари тўлиқ бекор қилинди, Людовик XIV қўшинлари Нидерландиядаги қатор қалъаларни эгаллади. Шу тариқа Испания Францияга қарам бўлиб қолди. Вужудга келган бу шароит Англияни хавотирлантириб қўйди. Чунки Франциянинг янги мақомини тан олиш, дунё биринчилиги учун Англия мағлубиятини тан олиш билан баробар эди. Англия тез орада Францияга қарши кучли иттифоқ тузишга муваффақ бўлди. 1701 йили Гаагада тузилган «Буюк иттифоқ»ка Англия, Австрия ва Голландия кирди, кейинроқ эса Португалия, Савойя ҳамда Пруссия ва бошқа герман давлатлари ҳам бу иттифоққа қўшилишди. «Буюк иттифоқ»

қатнашчилари эрцгерцог Карлни Испаниянинг қонуний қироли деб эълон қилди ва Филипп V ва Людовик XIV га қарши уруш эълон қилдилар. Шу тариқа испан тахти учун уруш бошланди.

Уруш иккала томоннинг кетма-кет устунлиги билан узоқ давом этди. 1711 йили бўшаб қолган Австрия тахтига эрцгерцог Карлнинг (император Карл VI номи билан) келиши иттифоқчилар учун кейинги уруш харакатларини мақсадсиз қилиб қўйди. Бундан ташқари уруш натижасида Франциянинг сезиларли кучсизланиб қолганлигидан Англия ҳам қаноат ҳосил қилди. Натижада уруш Англия ва Франция ўртасида 1713 йил марта имзолангандан Утрехт сулҳи билан якунланди. Сулҳга биноан Филипп V Испания қироли деб тан олинди, аммо Франция ва Испаниянинг битта монарх қўл остида бирлашиши тақиқланди. Гибралтар ва Менорка оролидаги Маон порти Англиянинг базалари деб эълон қилинди, Тоскананинг бир қисми, Милан, Неаполь, Сардиния ва Нидерландиянинг Испанияга қарашли қисми Австрия назорати остига ўтди, Сицилия Савойяга берилди. Филипп V уруш давомида эрцгерцог Карлни кўллаб-куватлаган каталонияликларни авф этиш мажбуриятини олди ҳамда англияликларга Испаниянинг Америкадаги мустамлакалари билан савдо қилиш хуқуки ва у ерга негр-кулларни олиб бориши монопол хуқуки (асьементо) берилди.

Шундай қилиб, уруш Испаниянинг янада сусайишига олиб келди. У ўзининг Европадаги катта ҳудудларидан, стратегик жиҳатдан муҳим аҳамиятга эга бўлган Гибралтар қўргонидан ажралди.

Испаниянинг XVIII асрдаги ички ва ташқи сиёсати. Урушдан сўнг Филипп V саройида французлар эмас, италияликларнинг роли кучаяди. Қиролнинг ишончини қозонган рухоний Жулио Алберони Испания сиёсатини белгилашда катта ўрин эгаллайди. Қироличанинг вафотидан сўнг Ж. Алберони қистови билан қирол Филипп V Парма герцогининг кизи Изабеллага уйланади. Ҳаракатчан ва қатъиятли янги қиролича саройдан французларни сиқиб чикарди. Алберони кардиналлик унвонини олиб, Испаниянинг биринчи вазири бўлди. Янги қиролича ва Алберони Испаниянинг Италиядаги ерларини қайтариш учун фаол ҳаракатлар олиб борди. Бир қатор урушлардан сўнг Изабелла ўз режасини амалга оширишга муваффак бўлди: унинг катта ўғли Карл Неаполитан қироли бўлди, кичик ўғли эса Парма ва Пьяченца тахтини эгаллади.

Филипп V ҳукмронлигининг охирги йилларида министрлик ла-возимлари испанларга берилди, улар мамлакатдаги тушкунликни тўхтатишга уриндилар. Молия вазири Хосе Патиньо ва унинг ўрнига келган Маркиз де Энсенада Испания иқтисодини кўтаришга ва мудо-фаа қудратини оширишга харакат килдилар, тўқимачилик товарла-рини мамлакатга олиб кириш учун бож тўловларининг оширилиши миллий тўқимачилик саноатининг жонланишига олиб келди, дав-лат ва хусусий мануфактуралар ташкил қилиш рағбатлантирилди, хунармандлар фуқаролик ҳукуқларига эга бўлдилар, соликлар йиғиш давлат амалдорларига берилиб, бу ишдаги воситачилар ҳукуқларидан маҳрум этилди. Дехқончиликни кўтариш максадида «поситос» деб аталувчи, дехқонларни уруғлик билан таъминловчи қарз бериш кассалари ташкил қилинди.

Хукумат ташлаб қўйилган қалъаларни тиклашга киришди, ҳарбий флот учун янги базалар ташкил қилинди, ҳарбий билим юртлари очилди, янги верфъ ва арсеналлар қурилди. Испан йигит-ларини ҳарбий флот ишларига ўкиш учун Англияга жўнатишиди, Астурияда дастлабки ҳарбий заводларга асос солинди.

Миллий маданият ҳам рағбатлантирилди ва ривожланди: Мадридда Миллий кутубхона ва тарих, тил, тиббиёт соҳаларида қирол академиялари очилди. Карл III ҳукмронлиги даврида (1759–1788) «маърифатли абсолютизм»нинг характерига мос ислоҳотлар ўтказилди.

1766 йили ҳукумат бошлиғи бўлган Педро Абарца де Болла – граф Аранда француз маърифатпарварларининг ғоялари тарафдори, Испаниянинг энг маърифатли кишиларидан саналар эди. Аранда олиб борган ислоҳотлар сиёсати зодагонларнинг асосий имтиёзла-рига таҳдид қиласада, уларнинг кескин норозилигига сабаб бўлди. Натижада у истеъфога чиқишга мажбур бўлди.

1777 йили Аранданинг ўрнига келган граф Флоридабланка ҳам ислоҳотлар йўлини давом эттириди: Америкадаги мустамлакалар билан эркин савдо ўрнатди, бу товар айирбошлишнинг сезиларли ўсишига олиб келди, чўл ерларни ўзлаштиришни бошлади, денгиз-чиликни кўллаб-кувватлади.

Бошқа бир маърифатпарвар ва ислоҳотчи Кампоманес¹ 1763 йил-дан 1791 йилгача молия вазири бўлиб турди. Иқтисодий билимлар-

¹ Кампоманес, Родригес Педро (1723–1803) испан давлат арбоби, граф, иқтисодчи, тарихчи. Испанияда «маърифатли абсолютизм» сиёсатининг атоқли номояндаси.

нинг ёйилиши учун у кўп ишларни амалга оширди. Жумладан, шу мақсадда Мадрид, Барселона, Овьедо ва бошқа шаҳарларда саноатнинг ривожланишини қўлловчи қонунлар жорий қилинишига эришиди. Кампоманеснинг ташаббуси билан саноат ва ҳунармандчилик ривожини молиялаш мақсадида маҳсус банк ташкил қилинди. Англиядан машиналар сотиб олинди, чет эллардан тажрибали усталар таклиф қилинди, дастлабки техника билим юртлари ташкил қилинди. Цехларнинг имтиёzlари бекор бўлди, саноатчиларга ишлаб чиқаришда ўсишга эришганлик учун мукофотлар тўланди. Тўқимачиликнинг ривожланиши учун испанларга чет эл матоларидан кийим кийиб юришни тақиқловчи декрет катта аҳамиятга эга бўлди.

Кампоманес мамлакатни тез-тез айланар, Испанияни, унинг иқтисодини ва халқнинг ахволини яхши биларди. У янги йўллар, каналлар қурилишининг фаол ташаббускори, транспортни тартибга солишнинг тарафдори, қишлоқ хўжалигига капитал сарфлашни амалга оширишнинг жонкуяри эди. Кампоманес бир қанча черковларнинг ёпилишига, мактабларда факат дунёвий фанларнинг ўқитилишига эришди. Мамлакатдаги энг илгор ўқув юртларидан бири – Овьедодаги Астуроя институтини ташкил қилиш ҳам Кампоманеснинг хизматидир. Унинг ўзи ҳам тарих, иқтисод ва филологияга оид бир қатор асарларини эълон қилди. Кампоманес ва Флоридабланка томонидан инквизиция судларини бекор қилиш борасидаги ҳаракатлар қирол томонидан маъқулланмади. Уларнинг ўзи гайридинлиқда айбланди. Бироқ бу пайтга келиб уларни жазолаш учун инквизициянинг кучи энди етарли эмасди.

1788 йил таҳтга Карл III нинг ўғли Карл IV келди. У иродаси бўш, қаъиятсиз киши бўлиб, хотини Мария Луизанинг тўлиқ таъсирiga тушиб қолди. 1792 йили Флоридабланка ўрнига Мария Луизанинг 25 ёшли жазмани Мануэль Годой (1767–1851) биринчи вазир этиб тайинланади. Қироличага жазманликдан бошқа ҳеч қандай сифат ёки хизматга эга бўлмаган Годойнинг гвардия оддий аскарлигидан давлатнинг биринчи вазири лавозимига кўтарилиши Испанияда абсолютизм инқирози бошланганлигидан далолат беради. Годой мамлакатни Францияга қарши урушга жалб қилди. Уруш икки йил (1793–1795) давом этиб, Шимолий Испаниянинг французлар томонидан босиб олинишидан сўнг испан ҳукумати сулҳ тузишга мажбур бўлди. Ажабланарлиси шундаки, Годой факат қироличанинг

муҳаббатини сақлаб қолмасдан, киролнинг ҳам ҳурматига сазовар бўлди ва унга «тинчлик князи» деган унвон инъом этилди.

Наполеон эса Годойни инглизларга қарши қаолицияга жалб этди ва Англияниң иттифоқчиси бўлган Португалияга қарши уруш бошлишга мажбур қилди (1801). Испанлар Португалияни босиб олгандан сўнг Годой генералиссимус унвонини олди.

* * *

XVIII асрдаги исплоҳотлар натижасида иқтисодда буржуазиянинг роли ошди, аммо сиёсатда улар ҳамон хукуксизлигича қолаверди.

Карл III даврида абсолютизм ўзининг энг юқори чўққисига етди. 1700 йилдан 1788 йилгача кортеслар (парламент) бор-йўғи беш марта чақирилди, унда ҳам фақат байрам маросимлари учун, холос.

Иқтисодни кўтариш мақсадида 1783 йили хукумат зодагонларга меҳнат қилиш хукуқини берувчи декрет эълон қилди. Декрет зодагонларни меҳнатга жалб қила олмаган бўлсада, меҳнат ахлиниң обрўсини озгина бўлса-да кўтарди. Аср охирига келиб ерни аренданга олиш шартлари бир оз юмшади, дон савдосига эркинлик берилиши миллий бозорнинг шаклланишида муҳим воқеа бўлди.

Каталония, Астурия ва Баскония иқтисодий жиҳатдан энг ривожланган ўлкаларга айланди. Аҳоли сони ошиб борди. Масалан, 1759 йилдан 1789 йилгача Барселона аҳолиси икки баробарга кўпайди. Шунга қарамасдан XVIII аср охирига келиб Испания экстенсив кишлоқ хўжалигига ва ўта кам тарақкий этган саноатга эга колок агарар мамлакат бўлиб қолаверди.

XIII боб бўйича саволлар

1. Испанияда сиёсий ва иқтисодий тушкунликнинг бошланиш сабаблари нимада эди?
2. Испаниядаги инқироз унинг мустамлакаларидағи холатга қандай таъсир кўрсатди?
2. XVIII асрдаги испан тахти учун кураш мамлакатнинг кейинги тараққиётига қандай таъсир кўрсатди?
4. Испан тахтига габсбурглар ўрнига бурбонларнинг келиши Австрия-Франция муносабатларига қандай таъсир кўрсатди?
5. XVIII аср Испания ички ва ташки сиёсатида қандай асосий босқичлар мавжуд?

XIV БОБ. XVI–XVIII АСРЛАРДА ПОЛЬША

Польша бутун XVII–XVIII асрлар давомида қолоқ қишлоқ хўжалигига асосланган, арзигулик саноати йўқ агарар мамлакат эди. Польшанинг халқаро аҳволи ёмонлашуви мамлакатдаги иқтисодий инкирозни чуқурлаштириди.

Речь Посполиты ва унинг сиёсати. Ливония уруши даврида (1558–1583) Литва князлигининг кучсизланиб қолганлиги уни Польша билан шартнома тузишга мажбур қилди. 1569 йили тузилган бу шартнома Люблин унияси деб аталиб, унга биноан Польша ва Литва битта давлат – Речь Посполитага бирлаштилар.

1573 йили Сейм француз шахзодаси Генрих Валуани (1573–1574) маълум шартлар асосида қирол қилиб сайдади. Бу шартлар асосан Польша конституциясида ўз ифодасини топган бўлиб, Либериум вето¹да мужассамлашди. 1574 йил Генрих Валуа қочиб кетгандан сўнг Сейм воевода Стефан Баторийни янги қирол қилиб сайдади (1574–1587). С.Баторий Ливония урушдида қатнашиб, анча муваффақиятларга эришди. 1582 йилги Ям-Запольск тинчлик сулхи Ливония устидан Польша хукумронлигини ўрнатди.

Швед шахзодаси Сигизмунд III Вазанинг Польша қироли қилиб сайданиши (1587–1632) Швеция билан Польша ўртасида Россияяга қарши коалициянинг тузилишига олиб келди. 1609 йили Сигизмунд Россияяга қарши уруш бошлайди. Аммо Россияни забт этиш режаси амалга ошмади ва уруш 1618 йили 1 декабрь куни Троице-Сергиев монастири (хозирги Загорск шаҳри) якинидаги Деулин кишлоғида Россия билан Польша ўртасида ўн тўрт ярим йилга имзоланган сулҳ билан яқунланди. Сулҳга кўра Россия Смоленск, Чернигов, Новгород-Северск ерлари, 29 та шаҳар, жумладан Смоленск шаҳридан воз кечишга мажбур бўлди.

Польшанинг шарқда Россия билан урушда бандлигидан фойдаланиб Швеция ва Туркия унга қарши юриш бошлади. Швеция урушни ўзи учун фойдали Алтмарк яраш сулҳи (1629) билан якунлади. Туркия Польша таркибига кирувчи украин ва волин ерлари учун 1620–1621, 1672–1676, 1683–1699 йиллари урушни давом эттириди. Натижада, 1698–1699 йиллардаги Карловица конгрессининг

¹ *Liberium veto* – унга биноан Сеймда қарор қабул қилинмаслиги учун битта қарши овоз етарли эди.

қарорига биноан Польша ўз ерларидан ташқари Туркия таркибида-
ги ўнг кирғоқ Украина ва Подолия ерларига ҳам эга бўлди.

Аммо 1618 йили Бранденбург билан Пруссиянинг бирлашиши
Польшанинг ғарбдаги позициясини сусайтирди. Қирол Владислав
IV даврида Польшанинг ҳалқаро мавқеи ҳам анча тушиб кетди.
1632–1634 йиллардаги рус-поляк урушидан сўнг Полянов тинчлик
сулҳига (1634) кўра Владислав IV рус тахтига бўлган даъвосидан
воз кечди. Ўттиз йиллик уруш даврида (1618–1648) Габсбурглар-
нинг кучсизланиб қолганлигидан Силезияни Польша таркибиغا
қайтариб олишда фойдаланилмади.

Мамлакат худуди икки марта – XVII асрнинг 50-йилларида ва
Шимолий уруш даврида шведлар томонидан босиб олинди.

XVII аср охири – XVIII аср бошларида тўхтовсиз давом этган
урушлар мамлакат иқтисодини вайрон қилиб, давлатнинг ҳалқаро
мавқеини янада тушириб юборди. Польшанинг ички ишларига чет
давлатларнинг аралашуви кучайди.

Польшага ўзининг сиёсий таъсирини кучайтиришга харакат
килаётган чор Россияси 1764 йили Екатерина II нинг арзандаси Станислав
Август Понятовскийнинг Польша қироли қилиб сайлани-
шига эришди. Янги қирол ва унинг қариндошлари князь Чарторий-
скийларнинг чекланган ислоҳотлар орқали марказий ҳокимиятни
мустаҳкамлаш сари қилган харакатлари Пруссия ва Россиянинг
норозилигига сабаб бўлди. Диссидентлар (протестантлар ва право-
славлар) масаласини баҳона қилиб, Россия Польшанинг ички иш-
ларига кўпол аралашувни бошлайди. Натижада, 1768 йили Россия
билан Польша ўртасида имзоланган Варшава шартномасига биноан
протестантлар ва православларнинг сиёсий хукуқлари кенгайтири-
либ, католикларники билан тенглаштирилди, Россия протекторати
ўрнатилди.

Польша давлатининг тугатилиши. Поляк ҳалқининг турли
қатламлари орасида Россия сиёсатига қарши норозилик кучайди.
1768 йили католик рухонийлар ташабbusи билан норози қатламлар
ва ватанпарвар шляхта вакиллари Бар шаҳрига ўзларининг съез-
дига тўпланишди. Улар Бар конференцияси деб аталувчи муҳоли-
фатни туздилар. Муҳолифатчилар миллатнинг топталган ғурури,
давлатнинг суверенитетини тиклашга аҳд қилдилар. Бунда улар
Франция ва Туркиянинг мададига таянаётган эди. Оқибатда қирол
Станислав Понятовский ёрдам сўраб Россияга мурожаат қилди.

Россия қўшинлари Польшага кириб, конференциячиларни тор-мор қилди.

Россиянинг Польша устидан якка ҳукмронлигидан хавотирланган Пруссия уни бўлиш режасини таклиф қила бошлади. Дастрраб, Россия ўз таъсири остида Польшанинг ҳудудий яхлитлигини сақлаб қолиш ва бу ерда мустаҳкамроқ ўрнашиш мақсадида Пруссиянинг Польшани бўлиб олиш ҳақидаги таклифни рад этди. Аммо Россия-Туркия урушининг (1768–1774) чўзилиб кетиши ва Пруссиянинг Австрия билан яқинлашуви Екатерина II ни улар билан муроса қилишга мажбур қилди.

1772 йили 25 июль куни Петербургда Россия, Пруссия ва Австрия ўртасида конвенция имзоланиб, Польшани биринчи тақсимлаш амалга оширилди. Конвенцияга биноан Шарқий Белоруссия, Польцк ва Ливониянинг Польшага қарашли қисми Россияга, Галициянинг бир қисми Австрияга, Поморъенинг ва Буюк Польшанинг бир қисми Пруссияга ўтди. Ушбу давлатларнинг қаттиқ тазиики остида сейм ва кейин қирол мазкур шартномани ратификация қилишга мажбур бўлиши.

1772 йили Польшанинг тақсимланиши унинг миллий мустақиллигига катта путур етказди. Шу билан бирга поляк ҳалқининг илгор вакилларини ғазабга келтирди. Улар Польшани мустаҳкамлаш ва ҳалокатдан сақлаб қолиш йўлларини ахтара бошладилар. Шундай ҳолатда, 1778 йили тарихда тўрт йиллик деб ном олган сейм йиғилди. Сейм қироллик шаҳарлари аҳолисининг ҳукуқларини кенгайтириш тўғрисида қонун қабул қилди. Илгари фақат шляхта эга бўлган ҳукуқлар: ерга эгалик қилиш ҳукуқи, давлат лавозимларини эгаллаш, унвонлар олиш, шахс дахлизлигидан фойдаланиш кабилар энди шаҳар аҳолисига ҳам берилди. Сейм қабул қилган энг муҳим ҳужжат 1791 йил 3 майдаги Конституция бўлди. Унда қатор илгор ғоялар илгари сурилди. Қиролнинг сайланиши ва «liberum veto» – сеймда қарор қабул қилинmasлиги учун битта қарши овознинг етарли бўлиш қоидаси бекор қилинди. Бу мамлакатда бошбошдоқлик ҳолатини сақлаб туриш учун магнатларга кенг имкониятлар яратди. Қироллик шаҳарлари сеймда вакиллик ва маслаҳат овозига эга бўлдилар.

Француз инқилобининг таъсири остида Польша ватанпарварларининг фаолияти кучайди. Бундай ҳолатдан ва 1791 йил 3 майдаги конституциядан норози бўлган поляк магнатлари 1792 йили Тарго-

во конференциясини туздилар. Конференциянинг мурожаатига жавобан Екатерина II рус қўшинларини Польшага киритди ва поляк армиясининг қаршилигини енгиди, ватанпарвар хукуматни ағдариб ташлади.

Фридрих Вильгельм II 1790 йили Польша билан иттифоқ тўғрисидаги шартномадан воз кечди. Пруссия шартномани 3 май конституциясидан кейин вужудга келган ҳокимият билан эмас, аввалгиси билан тузганлигини баҳона қилиб кўрсатди. 3 май конституциясининг кафолати бўлган Австрия ҳам ўз кафолатидан воз кечди. Бунинг устига Фридрих Вильгельм II Францияга қарши уруш харажатлари Польша ҳисобидан қопланмаса, бундай урушда қатнашмаслигини эълон қилди. Бу ҳол Польшанинг иккинчи марта тақсимланишини тезлаштириди.

1793 йил 12 январь куни Россия билан Пруссия ўртасида Польшани иккинчи бор тақсимлаш тўғрисида шартнома имзоланди. Пруссия қўшинлари ҳам Польшага киритилди. Шартномага биноан белорус ва украин ерларининг катта қисми Россияга ўтди. Пруссия Гданьск, Торунь ва Буюк Польшанинг қолган қисмини Познань шаҳри билан қўшиб эгаллаб олди. Австрия Польшанинг иккинчи тақсимланишида қатнашмади. У инқилобий Франция билан урушда банд эди. Бундан ташқари Россия ва Пруссия Австриянинг Бельгияни Баварияга алмаштириш режасини қувватлашларини ваъда қилдилар.

Бундай зўравонлик актига қарши поляк ҳалқи миллий-озодлик харакатини бошлаб юборди. Қўзғолонга талантли поляк сиёsatчisi, Америка мустақиллиги учун уруш қатнашчisi, инқилобий Франциянинг фахрий фуқароси, маҳсус ҳарбий маълумот олган офицер Тадеуш Костюшко (1746–1817) бошчилик қилди. Қўзғолон 1794 йил март ойида бошланиб, унда шаҳарликлар, шляхта ва қисман дехқонлар иштирок этдилар. Шу йили «Поменецк университетали» деб аталувчи ҳужжат қабул қилиниб, унда дехқонларнинг шахсий озодлиги, бир жойдан иккинчи жойга тўсиқсиз ўтиш ҳуқуқи эълон қилинди. Универсал феодал-крепостной тартибларнинг асоси бўлган шляхтанинг ерга эгалик ҳуқуқининг дахлсизлигини ҳимоя қилган бўлсада, шляхта ундан норозилигини билдириди. Бундан норози бўлган дехқонлар эса қўзғолонда иштирок этмай қўйдилар. Натижада қўзғолоннинг тақдири ҳал бўлди. Польшага киритилган рус ва прусс қўшинлари қўзғолонни бостиришиди.

1795 йил 3 январда Петербургда Россия билан Австрия ўртасида Польшани учинчи бор ва батамом тақсимлаш тўғрисида декларация имзоланди. Кейинчалик бу декларацияга Пруссия хам қўшилди.

Фарбий Белоруссия, Волинь ерлари ва Литва – Россияга, Марказий Польша Варшава шахри билан – Пруссияга ва Кичик Польша – Австрияга ўтди.

1797 йил Россия, Пруссия ва Австрия ўртасида имзоланган Петербург конвенцияси Речь Посполитанинг давлат сифатида барҳам топишига олиб келди. Польша фуқаролиги ва Польша давлати билан боғлиқ барча юридик тушунчалар бекор қилинди. 1797 йилги Петербург конвенциясида Польша қироли Станислав-Августнинг таҳтдан воз кечганлиги тўғрисидаги 1795 йилги акт илова қилинди.

Шундай қилиб, учта кучли давлатлар ўртасида тақсимланиш оқибатида поляк халқи қаттиқ сиёсий ва миллий зулм остида қолди. Бу Польшанинг иқтисодий, сиёсий ва маданий ривожланишига узок йиллар салбий таъсир кўрсатди.

Польша давлатининг тугатилиш босқичлари

1772 йили Россия, Пруссия, Австрия ўртасида Петербург сулҳи имзоланди.	Шарқий Белоруссия, Полоцк ва Ливониянинг Польшага қарашли қисми – Россияга, Галициянинг бир қисми – Австрияга, Поморъенинг ва Буюк Польшанинг бир қисми – Пруссияга ўтди.
1793 йили Россия Пруссия сулҳи имзоланди.	Белорус ва украин ерларининг катта қисми – Россияга, Гданьск, Торунь ва Буюк Польшанинг қолган қисми – Пруссияга ўтди.
1795 йил Петербургда Россия Австрия Пруссия декларацияси имзоланди.	Фарбий Белоруссия, Волинь ерлари ва Литва – Россияга, Марказий Польша Варшава шахри билан – Пруссияга, Кичик Польша – Австрияга ўтди.
1797 йил Россия Пруссия Австрия Петербург конвенциясини имзолади.	Речь Посполити давлат сифатида барҳам топди.

Иқтисодий ривожланиши. Ишлаб чиқарувчи кучларнинг заифлиги Польшада баршчинанинг ўсишига олиб келди. XVIII аср биринчи ярмидан поляк шаҳарларининг аграрлашув жараёни бошланди. Аммо тўхтовсиз давом этган урушлар Польша иқтисодини

бутунлай издан чиқарди. Фақат XVIII аср иккинчи ярмига келиб, иқтисодга капиталистик муносабатларнинг кириб келиши натижасида унда жонланиш юз берди. Ёлланма меҳнатга асосланган мануфактуралар борган сари салмоқли ўрин эгаллаб борди. Қишлоқ билан шаҳар ҳамда турли ҳудудлар ўртасидаги иқтисодий муносабатларнинг кучайиши Польшада умуммиллий бозорнинг шаклланишига олиб келди. Бир қисм магнатлар ва шляхта ерга ишлов беришнинг такомиллашган усулларини қўллаш, қишлоқ хўжалик ускуналарини сотиб олиш, ёлланма меҳнатни қўллаш эвазига шаклланаётган капиталистик муносабатларга мослашиш учун харакат килдилар. Иқтисоднинг жонланиши ва мамлакатда хўжаликнинг тикланиши халқнинг илғор вакиллари ўртасида қолоқ давлат тузумини ислоҳ қилиш ва шу орқали Польшани унга хавф солаётган халокатдан сақлаб қолиш хақида гояларни туғдирди.

Аммо XVIII асрда ҳам феодал-крестостной тузум ўз кучини сақлаб қолди. Фақат 1768 йили феодаллар ўз дехконларига нисбатан ўлим жазосини қўллаш хуқуқидан маҳрум қилинди.

XVIII аср 60–80-йилларида шаҳарлар ва ишлаб чиқаришнинг юксалиши бошланди, катор мануфактуралар пайдо бўлди. Айниқса тўқимачилик саноати, ойна ишлаб чиқариш, безак буюмлари ясашда сезиларли ўсиш юз берди, банклар ва кредит ташкилотлари пайдо бўлди.

Маданият. Польшадаги сиёсий ва иқтисодий инқироз маданиятга ҳам таъсир этмасдан қолмади. Маданий ҳаётда борган сари иезуитларнинг роли ошиб борди. Станислав Конарский ва бошқа илғор жамоат арбобларининг жамиятни ислоҳ қилиш борасидаги харакатлари руҳонийлар ва зодагонларнинг қаршилигига учради. Ҳукмрон қатлам орасида диний фанатизмнинг ўсиши Польша таркибиға кирган бошқа халқлар устидан иқтисодий зулм билан бирга диний-маданий зулмнинг ҳам ўрнатилишига олиб келди.

XVIII аср иккинчи ярмидан бошлаб маданиятда сезиларли юксалиш юз берди. Илгари иезуитлар ордени бошқаруви остида бўлган мактаблар, орден тарқатилгандан сўнг 1773 йилдан бошлаб эдукацион комиссия – Европада биринчи маориф вазирлиги ихтиёрига ўтди. Ушбу комиссия 1773–1775 йиллари таълим соҳасида ислохотни ошириб, уни диний таъсирдан озод қилди, унга дунёвий характер берди ва поляк тилини таълим бериш тили сифатида ўрнатди. Г. Коллонтай томонидан амалга оширилган Краков универ-

ситетининг ислоҳоти ҳам шу йўналишда бўлди. Ижтимоий фикрда, адабиётда ва санъатда маърифатчилик ғоялари қарор топди. Поляк маърифатпарварлари чет эл, аввало француз маърифатпарварларининг ғояларини поляк жамиятининг ҳолатидан келиб чиқиб татбиқ қилиш ғоясини илгари сурдилар.

* * *

Польша давлатининг йўқ қилиниши Европадаги реакцион кучларнинг миллий-озодлик ҳаракатига карши қурашида бир босқич бўлди. Поляк помешчиклари Польшанинг мустақиллигини йўқотиш эвазига ўзларининг ерларини сақлаб қолдилар. Польшанинг бўлинниши аслида уни бўлишда қатнашган учта давлат билан польяк йирик феодаллари ўртасидаги келишувнинг маҳсули бўлди. Бу акт польяк феодаллари учун инқилобдан сақланиб қолишнинг охирги имконияти эди. Сиёсий ва миллий зулм узоқ давом этди. Аммо польяк халқи ўз мустақиллиги учун қурашни тўхтатмади.

XIV боб бўйича саволлар

1. Речь Посполитанинг ташқи сиёсати қандай мақсадларга қаратилган эди?
2. XVII–XVIIIасрларда олиб борилган урушлар Польшанинг халқаро мавқеига қандай таъсир кўрсатди?
3. XVIII асрдан бошлаб Польшанинг ички ишларига Россия аралашувининг кучайишини қандай изоҳлаш мумкин?
4. XVIII асрдан бошлаб Польша маданий тараққиётида қандай ижобий ўзгаришлар кузатилади?
5. Қандай ички ва ташқи сабаблар Польша давлатининг тугатилишига олиб келди?

XV Б О Б. XVI–XVIII АСРЛАРДА БОЛҶОН ХАЛҚЛАРИ

Болҷон халқлари Усмонийлар империяси таркибида. Усмоний туркларнинг XIV–XV асрларда Европада олиб борган истилолари натижасида XV аср охири – XVI аср бошларида Болҷон ярим оролининг қарийб барча худудлари, Осиё ва Африканинг кўпгина ерлари турклар зулми остида қолди. Кўплаб халқларни бўйсундирган Усмонийлар империяси ўз даврининг илғор давлатларидан бири, ўтара асрларнинг ягона асл ҳарбий давлатига айланди.

Усмонийлар давлатининг географик қулай, яъни Европа ва Осиё китъалари ҳамда мусулмон ва христиан олами туташган ерда жойлашуви, уларнинг Европада олиб борган истилолари учун муҳим стратегик шароит яратди. Шундай истилочилик урушлари натижасида Усмонийлар қўшинлари 1501 йили Дуррес шаҳрини (Альбания), 1522 йили Родос шаҳрини (Греция), кейинчалик эса Эгей денгизидаги бир неча оролларни ва қалъаларни, 1571 йили Кипр оролини забт этдилар. XVI аср охирида венецияликлар Далмациядаги денгизбўйи худудларини, Ионна ва Крит оролларини ўзларида сақлаб қолишга муваффақ бўлдилар, хорват ва словения ерлари Габсбурглар хукмронлиги остида қолди. Усмоний сultonларнинг олий хукмронлигини тан олган мустақил шаҳар-республика Дубровник ҳамда Валахия ва Молдавия Усмонийларга йиллик товоң тўлаб турадиган бўлдилар. Усмонийлар империясининг Болқондаги ҳарбий-сиёсий устунлиги, мунтазам кучли армиянинг мавжудлигига, Европада ўз истилоларини давом эттириш, кенгайтириш ва бўйсундирилган халқларни қаттиқ итоатда ушлаб туриш мақсадига қаратилган сиёsatни олиб борувчи ҳарбий-маъмурий аппаратнинг катъи марказлаштирилганлигига асосланган эди.

Румели Усмонийлар давлатининг асосий худудларидан бирiga айланди. Чунки айнан шу ерда империя пойтахти Стамбул шаҳри, Усмоний сultonларнинг эски қароргоҳи Эдирне (Адрианополь) ҳамда савдо марказлари ҳисобланган кўпгина бошқа йирик шаҳарлар – Салоники, Дуррес, Скопье, София, Сараево жойлашган эди.

Туркиянинг Болқон ярим оролида олиб борган сиёsatида болқон халқларини исломлаштириш муҳим ўрин эгаллайди. XVII асргача сақланиб келинган «қон билан тўланадиган солик», яъни бўйсундирилган халқлардан ўсмирларни саралаб олиш, ислом динига ўтказиш, кейинчалик сulton мулкининг ҳимоячиларига айлантириш ҳамда улар ичидан сарой аёнлари, яничарлар тайёрлаш болқон халқлари ҳаётида оғир из қолдирди. Бундан ташқари шаҳар ҳунармандлари ва савдогарлар орасидан кўплаб болқонликлар ўз мулклари, баъзан эса ҳатто ҳаётларини сақлаб қолиш учун исломни қабул қилганлар ҳам кўп эди. Бошқа диндагиларнинг (христианлар, яхудийлар) мусулмонлар билан тенг ҳуқуқка эга эмаслиги ҳам исломнинг зўрлик билан сингдирилиши учун шароит яратарди. Мулкка эгалик ҳуқуқи ва соликлар тизими ҳам шу мақсадга

йўналтирилган бўлиб, исломни қабул қилмаган аҳоли бундан жуда катта жабр тортарди.

Ерга эгалик шакллари. Босиб олинган ерларда усмонийлар ерга эгалик қилишнинг Болқондаги илгариги шаклларидан тубдан фарқ қиласидаги ўз тизимини ўрнатдилар. Босиб олинган мамлакатлардаги аксарият ерлар ҳарбий хизматлари учун сипохийларга тарқатилди, қолган ерлар эса усмоний амалдорларга ва саркардларга фойдаланиб туриш учун берилди. Шу ерларнинг бир қисми султон ҳамда сулола аъзоларининг мерос мулки сифатида сарой ихтиёрига ўтди.

Христиан динига мансуб ер эгаларининг баъзилари ислом динига ўтиш шарти билан ўз ерларини сақлаб қолдилар, бошқалари эса ҳарбий-ленчи (мамлакатдаги ерларнинг катта қисми ҳарбий ленларга айлантирилган эди) сифатида ерлардан фойдалана бошладилар. Аммо христиан сипохийларга унумсиз ерлардан кам миқдорда ажратилгандилиги сабабли сипохийларнинг бу тоифаси XVI аср давомида йўқ бўлиб кетди. Христиан черкови ҳам Болқондаги ўз ерлари ва қарам дехқонларидан деярли бутунлай маҳрум бўлди.

Шаҳарлар. Савдо ва саноат. XV аср охири ва XVI асрларда бир қатор Болқон шаҳарларида иқтисодий ўсиш кузатилади, шаҳарларнинг ташқи кўриниши сезиларли даражада ўзгарди, мусулмон меъморчилиги намуналари кўпайиб борди. XVII асрга келиб мусулмон-шаҳарларнинг салмоғи умуман Болқон шаҳарларининг ярмидан ошиб кетди. Бу жадал турк мустамлакачилиги ва исломлаштиришнинг натижаси эди.

Болқон мамлакатларида анъанавий шаҳар ҳунармандчилиги ва савдонинг ривожланиши усмонийлар ўрнатган феодал тузум шароитида ўта зиддиятли эди. Бунинг устига диний чеклашлар ҳам ўрнатилган бўлиб, христиан динига мансуб ҳунарманд ва савдогарлар фаолиятнинг маълум турлари билангина шуғулланиши мумкин эди. Шу сабабли турклар ҳукмронлиги бўйсундирилган халқларнинг иқтисодий ўсишини тўхтатиб қўймоқда эди. Бундан ташқари буржуача тадбиркорликнинг асосий шарти бўлган мулкнинг ва савдогар шахсининг дахлсизлиги ҳам кафолатланмаган эди.

Шунга қарамасдан Европада, айниқса католик мазҳаби ҳукмрон ҳисобланган мамлакатларда инквизиция авж олган, ўзга мазҳаб ва диндагилар қувғинга учраган пайтда Испания ва Португалиядан яхудийларнинг Болқонга кўчиб келиши кўпайди. Булар асосан сав-

догарлар бўлиб, Дубровник ва Ғарбий Европа савдогарлари билан яхши алока ўрнатган эди. Шу сабабли улар Болқон ва бутун Усмонийлар империясининг Англия, Франция, Италия, Голландия ва бошқа Марказий Европа давлатлари билан ташки савдосида воситачилик қиласи ва умуман усмонийларнинг бошқа давлатлар билан бўладиган савдосида муҳим ўрин тутарди.

Савдонинг бир томонлама ривожланиши, яъни Ғарбий Европада ишлаб чиқарилган арzon молларнинг Болқон мамлакатлари ва умуман Усмонийлар империясига қарашли ерларга оқиб келиши натижасида маҳаллий ҳунармандчилик турғун ҳолатга тушиб қолди. Аста-секин Болқон мамлакатлари ва бутун Усмонийлар империяси саноати ривожланган Ғарбий Европа мамлакатларининг агарар хомашё базасига айланиб борди.

Жанубий славянларда капиталистик муносабатларнинг шаклланиши. Ҳали XVII асрда ёқ сипоҳийлар султонга қарамликтан қутулиш ва шартли равишда эгалик қилаётган ерлари – сипоҳийликни мерос мулк – чифликка айлантириш учун харакат килдилар. Бунинг учун сипоҳийлар ҳарбий хизматдан товланиб, ўз ўринларига бошқа одамларни ёллашарди. Бу жараён айниқса XVIII асрда кенг қулоч ёйиб, дастлаб Македония, Босния ва Болгарияни, кейин эса Сербияни ҳам қамраб олди. Шу тариқа сипоҳийлик ерлари чифлик (Болгарияда) ёки читлук (Сербияда) ерларига айланиб борди. Феодал муносабатларнинг барҳам топиш жараёнида чифлик ерлари бозор билан узвий боғланган бўлиб, маҳсулотларнинг анчагина қисми сотиш учун олиб чиқилар эди. Бу шароитда аста-секин бозор муносабатларининг шаклланиши учун шароит туғилади. Айни пайтда чифлик феодал ер эгалигига хос томонларни ҳам ўзида саклаб қолган эди. Чифлик факат турклар ёки турклашган аҳолининг мулки бўлиб, бу ерларда уларга биринтирилган славян дехқонлари ишларди. Бу дастлаб баршчина – ишлаб бериш кўринишида бўлган бўлса, кейинчалик дехқонлар ерни ижарага олиб ҳосилнинг бир қисмини, одатда ярмигачасини ер эгасига тўлайдиган бўлди. Чифликнинг кенг тарқалиши кўплаб дехқонларни ерларидан маҳрум қилиб, ишсизлар сонининг ошиб кетишига олиб келди. Ишсизларнинг бир қисми турклар бориши қийин бўлган тоғли ҳудудларга кетиб у ерда ўз кишлоқларини ташкил қиласи ва ҳунармандчилик билан шуғулланарди. Қолган қисм дехқонлар эса чифлик ерларда ёлланиб ишларди.

Жанубий славян қишлоқларининг аҳолиси «задруга» деб аталаувчи катта-катта оиласларга бирлашиб яшарди. Бундай оиласларда 100–150 тагача киши бўлиб, ер умумий мулк ҳисобланар ва унга биргалашиб ишлов бериларди. Жанубий славянларда задруга хўжалигининг узоқ сақланиб қолганлигига сабаб, товар-пул муносабатларининг суст тараққий этганлигига эди. XVIII аср охири–XIX аср бошларидан капиталистик муносабатлар ривожланган сари задруга хўжалиги ҳам барҳам топиб борди.

Товар-пул муносабатларининг ривожланиши аста-секин бўлсада қишлоқ хўжалигининг маълум экинларга мутахассислашуви ва хунармандчиликнинг тараққиётига олиб келди. Асосий экинлар пахта ва тамаки бўлиб, улар кўплаб экиладиган бўлди. Чорвачилик ҳам шу тариқа ривожланиб, Сербияда чўчқачилик, Болгарияда эса кўйчилик асосий соҳага айланди. XVII аср ва айниқса, XVIII асрда Дунай ва Сава дарёларининг савдо йўллари бўйларида хунармандчилик кенг ривожланади. Белград, Сараево, Мостар шаҳарлари хунармандчиликнинг муҳим марказларига айланади.

Болгариянинг турклардан тоғлар билан ажратилган янги қишлоқларида ҳам аста-секин хунармандчилик ва савдо марказлари таркиб топади. XVIII аср иккинчи ярмидан Сливено, Габрово, Калефера, Карлово ва бошқа болгар шаҳарларида ҳам хунармандчилик ишлаб чиқариши жонланади. София ва Пловдив шаҳарларида болгар аҳолисининг сони ошиб, хунармандчилик ривожлана бошлади.

Болкон ерларининг Габсбурглар империяси таркибига кирган қисмида XVIII аср 60–80-йилларида Мария-Тереза ва айниқса Иосиф II томонидан ўtkазилган «маърифатли абсолютизм» ислохотлари помешчиклар зулмининг бир оз юмшashi, товар-пул муносабатларининг ва ижтимоий-иктисодий муносабатларнинг ривожига ижобий таъсир кўрсатди. Жанубий славян халқлари миллий уйғонишининг бошланиши ҳам шу даврга тўғри келади.

Хорватияда бозор муносабатларининг шаклланиши жадал суратларда юз берди. Ёғоч ишлаб чиқариш ва кемасозлик саноати айниқса тез ривожланди. 1779 йили Венгрия таркибига қўшилган Риска шаҳрида қоғоз фабрикаси ишлай бошлади, мануфактуралар вужудга келди. Сербия, Словения ва Босния билан савдо алоқалари мустаҳкамланди, чорва моллари, ёғоч ва дон сотиш кенг йўлга қўйилди.

Словенияда капиталистик муносабатлар Хорватиядан олдинроқ шакллана бошлади. Триест ва Любляна шаҳарлари мухим савдо-саноат марказларига айланиб, капиталистик муносабатларнинг шаклланишида катта роль ўйнади. Янги муносабатлар қишлоқ хўжалигига ҳам дадил кириб борди: маккажӯҳори ва узум етиштириладиган майдонлар кенгайди, чорвачилик ривожланди.

Болқон ҳалқларининг миллий-озодлик кураши. Усмоний турклар томонидан забт этилган ҳалқлар орасида ўзга дин, тил ва маданият ҳукмронлигидан озод бўлиш учун интилиш ҳеч қаочон сўнмади. Усмонийлар империясининг Фарбий ва Марказий Европа давлатлари билан ҳарбий ҳаракатларга тортилиши унинг Болкон мамлакатларидағи ҳарбий устунлик даражасига таъсир кўрсатди. Миллий-озодлик ҳаракатларининг кўламига қўп сонли мусулмон аҳолисининг мавжудлиги ва тўхтовсиз олиб борилган исломлаштириш сиёсати ҳам таъсир этмай қолмади.

XV–XVI асрларда усмонийларнинг сўзсиз ҳарбий устунлиги уларга қарши ҳалқлар кураш тактикасида ўзгариш пайдо бўлишига олиб келди. Серб гайдуклари, грек клефтлари, хорват успоклари, болгар «қароқчилари»нинг алоҳида отрядлари шу тариқа пайдо бўлди. Кейинчалик мустамлака зулмининг кучайиши, зўрлик билан исломлаштириш, маҳаллий ҳукмдорларнинг ўзбошимчалиги ва христиан аҳолиси баъзи қатламларининг илгариги имтиёзлардан маҳрум этилиши ҳалқ оммасининг қаршилигига, айрим вилоятлар аҳолисининг усмонийларга душман бўлган давлатлар томонига ўтиб кетишига олиб келди. 1537–1540 йиллардаги уруш даврида ёк Венеция ва унинг иттифоқчилари бўлган давлатларнинг туркларга қарши курашга чорловчи даъватлари славян, альбан, грек ва бошқа ҳалқлар орасида ўз аксини топди. Айниқса, Химара Альбанларининг шиддатли курашлари усмонийларнинг Италияга бостириб кириш режасини йўққа чиқарди. Химара турклар томонидан забт этилмай қолди, венецияликлар ва испанларнинг бирлашган кучлари черногорияликлар кўмагида дengiz бўйидаги Херцегнови ва Рисан шаҳарларини эгалладилар.

Турк-венеция уруши ва усмонийлар флотининг 1571 йили Лепанто ёнидаги мағлубияти билан Болқон ҳалқлари озодлик ҳаракатининг янги, юксалиш даври бошланади. Морея греклари, Химара ва Дукагина альбанлари, черногорияликлар ва бошқа болқон вилоятлари аҳолиси туркларга қарши иттифоқ тузилганли-

ги ҳақидаги хабарни ўшанда зўр завқ билан кутиб олдилар. Венеция қўшинларига кўпгина кўнгиллилар келиб қўшилди, тажрибали болқон дengизчилари усмонийлар флотини яксон қилинган Лепанто ёнидаги дengиз жангида иштирок этдилар. Аммо туркларга қарши иттифоқ иштирокчиларининг ўзаро келишмовчиликлари ва Венециянинг кейинчалик бу иттифоқдан чиқиб кетиши уруш бошларида эришилган галабаларни ривожлантириш имконини бермади. Шунга қарамасдан усмонийларнинг Болқондаги мавқеи XVI аср 70-йилларидан бошлаб омонатлашиб қолган эди.

Гайдукларнинг сони ва фаоллиги сезиларли даражада ўсиб, усмонийларнинг Европадаги мулкларида доимий равишда галаёнлар кўтарилиб турди. Болқон ҳалқларининг XVI аср охири – XVII аср бошларида усмонийларга қарши курашининг кенг қулоч ёйиши Муқаддас иттифоқ (Австрия, Испания ва Рим папалиги) нинг туркларга қарши ўн беш йиллик Узоқ уруши йилларига (1592–1606) ҳамда бутун Усмонийлар империясининг жиддий инқирозга юз тутиши даврига тўғри келади. Озодлик курашининг бу юксалиш даврида Банатдаги сербларнинг куролли чиқишилари (1594), Тирново шахрида янги шох Шишман III ни таҳтга ўтқазган (1598) болгарлар ва альбанларнинг кўзғолонлари (1594–1596), Жанубий Сербия ва Герцеговина аҳолисининг кўзғолонлари (1597–1598) муҳим воқеалар бўлди. Ўшанда гайдуклар йирик аҳоли пунктларини ҳам эгаллашганди. 1595 йили улар Софияни ишғол қилишди, 1596 йилда эса успоклар усмонийларнинг Далмациядаги муҳим таянч пунктни бўлган Клис шаҳрини бирмунча вақт эгаллаб турдилар. Барча ҳалқ ҳаракатларининг умумий белгиси шу эдики, Болқондаги усмонийлар ҳокимиятини шу пайтгача маълум даражада кўллаб келган, унга қарши чиқищдан ўзини тийган маҳаллий ер эгаларининг маълум қатламлари энди бу ҳаракатда иштирок этибгина қолмасдан унга раҳнамолик ҳам қилдилар.

XVI аср охири – XVII аср бошларидағи усмоний турклар зулмiga қарши ҳалқ кўзғолонларини тайёрлашда христиан черкови раҳбарлари, хусусан Охрид архиепископлиги ва Печ патриархияси, Альбания, Болгария шаҳарлари ва серб қишлоқларидаги ўз-ўзини бошқариш органларининг кўзга кўринган оқсоқоллари катта роль ўйнади. Улар усмонийларга душман бўлган давлатлардан ҳарбий ёрдам олишга интилишиб, жиддий дипломатик фаолият олиб бордилар, турли кўзғолон марказларини бирлаштиришга

уриндилар. Аммо Австрия, Венеция ва Испаниянинг фаол ёрдамига ишонч бехуда бўлиб чиқди. Бундан фойдаланган усмонийлар қўзголонларни қаттиққўллик билан бостирди, илгари маълум имтиёзларга эга бўлган ёки деярли бўйсундирилмаган вилоятларда янада қатъи назорат ўрнатилди.

Усмонийлар кўшинининг қатор юришлари Альбаниянинг тоғли аҳолисини бўйсундиришга қаратилган эди, аммо тоғли ҳудудларда усмонийлар ўз ҳукмронлигини ўрната олмади. Шу йиллари усмонийларга қарши курашда болқон ҳалқларининг кучларини бирлаштиришга уриниш жараёни давом этди. 1614 йили Албания, Черногория, Босния, Герцеговина, Болгария, Сербия, Далмация ва Македония вакилларининг йигинида умумболқон ҳалқ қўзголонининг режаси ишлаб чиқилди. Аммо режада асосий куч сифатида Византия империясини тиклаш орзусида юрган француз герцоги Карл Навварскийнинг эскадрасига ишонилганлиги ва бу эскадра денгизда турклар томонидан яксон қилинганлиги туфайли умумболқон ҳалқ қўзголони режаси амалга ошмади. Бунинг натижасида XVII аср 20–30-йилларига келиб усмоний турклар Болқонда ўз мавқеларини бирмунча мустаҳкамлашга эришдилар. Албания ва Руминиянинг қатор ҳудудларида исломлаштириш сиёсати яна авж олди.

* * *

XVII асрнинг ўрталариға келиб аста-секин ўзгариб бораётган ижтимоий-сиёсий вазиятнинг асосий хусусиятларидан бири жанубий славян, грек ва альбан ҳалқларининг усмонийлар зулмига қарши курашда жипслашув жараёни бўлди. Шу курашнинг XVII асрдаги энг каттаси 1686–1688 йиллардаги болгарлар қўзголони эди. Шунингдек, XVII аср охири ва бутун XVIII аср давомида Сербия ва бошқа жанубий славян ерларида ҳам қўзголонлар тўхтамади. Мустақиллик учун курашда айниқса Черногория яхши муваффакиятларга эришди. Вақти-вақти билан мустақиллигини тиклашга эришиб турган бу давлат XVIII аср охирида Россиянинг Туркия устидан қозонган қатор ғалабалари натижасида батамом мустақилликни қўлга киритди. Шунингдек, 1793–1794 йиллари сербларнинг қатъи харакати туфайли Белград подшолиги ҳам автономияга эга бўлди.

Бироқ Болқонда турклар ўрнатган мустамлакачилик зулми XIX асргача, баъзи ҳудудларда эса XX асргача сақланиб қолди. XVIII аср охири ва XIX аср болқон ҳалқларининг миллий уйғониш, ўзлигини

англаш даври бўлди. Шу сабабли бу даврдаги мустақиллик учун олиб борилган кураш ғоявий асосланганлиги ва юксак ташкиллашибтирилганлиги билан ҳам ажralиб туради.

XV боб бўйича саволлар

1. Усмонийларнинг Болқондаги ҳарбий-сиёсий устунлиги ва маҳаллий халқларни итоатда ушлаб туришга қаратилган сиёсати қандай факторларга асосланган эди?
2. Усмонийлар истилоси Болқонда ишлаб чиқариш ва савдонинг ри-вожланишига қандай таъсир кўрсатди?
3. Болқон мамлакатларида капиталистик муносабатларнинг шаклланиши бошқа Европа мамлакатларидан қандай фарқ қиласиди?
4. Болқон халқларида миллый уйғониш жараёнининг ўсишига Европадаги қайси воқеалар жиддий таъсир кўрсатди?
5. Болқон халқларининг миллый-озодлик ҳаракатига усмонийларнинг исломлаштириш сиёсати қандай таъсир кўрсатди?

XVI БОБ. XVI–XVIII АСРЛАРДА ШИМОЛИЙ ЕВРОПА МАМЛАКАТЛАРИ

XVI–XVIII асрлар Шимолий Европа мамлакатлари тарихида алоҳида ўрин эгаллади. Бу даврда улар Европанинг энг ривожланган мамлакатлари қаторига кирмаса-да, товар ишлаб чиқариш ва капиталистик муносабатларнинг шаклланиши, феодал дехқончиликнинг барҳам топиши жадал суратлар билан давом этаётган эди. Шунингдек, Шимолий Европа давлатларининг сиёсий ҳаётида ҳам муҳим ўзгаришлар юз берди: Кальмар унияси¹ бекор қилинди; Швеция ва Данияда абсолютизм ўрнатилди; кирол ислоҳоти амалга оширилди; минтакада ҳукмронлик учун кураш кучайиб, етакчилик роли Даниядан Швецияга ўтди.

XVII аср ўрталарига келиб Шимолий Европа мамлакатлари иккита давлат – Швеция ва Данияга бирлашди ҳамда уларда абсолют монархияга ўтиш жараёни асосан якунланди.

XVI асрга келиб Кальмар унияси атрофидаги кураш ҳам якунловчи босқичга кирди. Унияга биноан бирлаштирилган мамлакатларнинг қироли бўлиб Дания монархи қолаверди. Ютландия

¹ Кальмар унияси – 1397 иили Швециянинг Кальмар шаҳрида Дания, Швеция, Норвегия ўртасида абадий бирлик тўғрисида тузилган акт. Дания қироли Эрик Померанский уч давлатнинг қироли деб эълон қилинган.

ва Скоње, Блекинг, Халланд ҳудудларидаги Дания оролларидан ташқари Шлезвиг ва Гольштейн герцогликлари ҳам бу пайтда Данияга қарашли эди. У стратегик жихатдан мухим ҳамда агарар ва товар ишлаб чиқариш учун бой ҳудудларни эгаллаб турарди. Дания билан нафакат Ганза, балки империя (герман миллатининг Муқаддас Рим империяси) ҳам хисоблашарди.

Унияга кирган Норвегия ва бошка майда давлатлар кучсиз, факат Швециягина уни бекор қилиш учун фаол ҳаракат олиб бораётган эди. XVI аср бошларида Швеция ҳукмдорлари озод дехқонлар ва Ганза шаҳарларининг ёрдамига таяниб, амалда мамлакат мустакиллигига эришдилар.

1518 йили Дания қироли Кристиан II турли-туман ҳалқлар вакилларидан ташкил топган армияга бош бўлиб унияни тиклаш учун Швецияга бостириб кирди. У Стокгольмни эгаллаб, пойтахтда ва бошқа шаҳарларда номдор фуқароларни қатл қилдирди. Бунга жавобан шведлар унияга қарши умумхалқ ҳаракатини бошладилар (1520–1523). Ҳаракатга таникли зодагон Густав Ваза бошчилик қилди. У Ганза флоти ёрдамида 1523 йили Швеция таҳтини кўлга киритди ва Швециянинг униядан чиққанлигини эълон қилди.

Униянинг бекор қилиниши натижасида Шимолий Европада бирбири билан ракобатлашадиган икки давлат – Дания ва Швеция вужудга келди.

Дания. Дания қироллигига унинг ўз ерларидан ташқари Норвегия, Исландия, Гренландия, Фарер ороллари ва Эльба дарёси ортидаги Шлезвиг ҳамда Гольштейн герцогликлари ҳам кирад эди.

Скандинавия мамлакатлари ичida бойлиги ва аҳоли сонининг кўплиги билан ажралиб турувчи Данияда XVI асрдан бошлаб капиталистик муносабатлар шакллана бошлади. Мануфактура ишлаб чиқариши кенгайиб, савдо тез ривожланди.

Чет эл савдосидаги конъюктура XVI аср ўрталарига келиб Даниядан жавдар, арпа, гўшт, ёғ, тирик моллар (шу жумладан, чўчкалар), чўчқа ёғи, тери ва балиқ маҳсулотларини четга сотиш учун ниҳоятда қулай шароит яратди. Кемалар катнови кўпайди. Шимолий денгиздан Болтиқ денгизига ўтувчи бўғозга эгалик қилиши ҳам Данияга катта фойда келтирди: факат Зунд бўғози орқали ўтиш учун савдогарлар киролга кемадаги юкнинг 1/30 миқдорида бож тўлашар эди; кирол товарларни биринчи бўлиб сотиб олиш хуқуқидан ҳам фойдаланарди.

Қишлоқ хўжалигига товар ишлаб чиқариш кенгайиб, давлат ва хусусий ер эгалиги кучайди. Агар XVI аср бошларида ҳайдаладиган ерларнинг 1/3 кисми зодагонларга қарашли бўлса, юз йилдан кейин бу кўрсаткич 50 фоизга етди.

Германия империяси билан яқинлик ҳам Даниянинг иқтисодий тараққиётига ижобий таъсир кўрсатди. Дания зодагонлари Скандинавиядаги энг бой ва кучли қатламга айланди. Бир табақали Зодагонлар йифини Давлат кенгашининг асосий таянчи ҳисобланар эди.

Хали XVI аср бошларидаёт қирол Кристиан II (1513–1522) Данияни илғор Европа мамлакатлари қаторига кўтариш учун ҳаракат бошлайди. У олиб борган абсолютизм сиёсати зодагонларнинг ҳукуқларини чеклашга ва немисларни мамлакатдан сиқиб чиқаришга қаратилган эди. Шу мақсадда расмий иш юритишда кўлланиб келинган немис тили данияликлар тили билан алмаштирилди. Кристиан II томонидан қабул қилинган шахар ва савдо тўғрисидаги янги қонунлар (1521) шахар аҳолиси ва савдогарларнинг ролини оширди. Бундан ташқари у дехконларнинг сотилишини тақиқлади, мактабларда ўқувчиларга нисбатан кўлланиб келинаётган тан жазосини бекор қилди, шаҳарлар орасидаги алоқа хизматини (почта) яхшилади, дехқончилик маданиятини ошириш мақсадида нидерландларни кўплаб таклиф қилди.

Ислоҳотларнинг зодагонларга қарши қаратилганлиги уларни қиролга қарши қўйди. Жорий қилинган янги солиқлар ҳам аҳоли ўртасида қиролнинг обрўсини тушириб юборди. Ташқи сиёсатдаги муваффакиятсизликлар, Швеция билан Кальмар униясининг бузилиши Кристиан II га қарши исён кўтарилишига олиб келди. Давлат кенгаши уни таҳтдан тушириб, ўрнига амакиси Фредерик I Данияликни сайлади (1523–1533). У Швециянинг мустақиллигини тан олди ва Кристиан II нинг муҳим ислоҳотларини бекор қилди.

1534–1536 йиллари Кристиан II нинг таҳтга кайтиш учун қилган ҳаракатлари мамлакатда фуқаролар урушига олиб келди. Натижада Фредерикнинг ўғли Кристиан III Дания қироли қилиб сайланди (1536–1559). Шу йиллари католик епископлар устидан ҳам ғалабага эришилиб, мамлакатда лютеранлик жорий қилинди (1536). Данияликлар тили черков, мактаб ишларида кенг кўлланилиб, расмий давлат тили сифатида қарор топди.

Қирол Кристиан IV даврида (1588–1648) Дания қудратли давлатга айланди. Меркантилистик сиёсат юргизилиб, мануфактура

ривожланди, савдо флоти ташкил қилинди. 1619 йили Исландия билан савдо қилувчи монопол компания ташкил қилинди. Мамлакат ичкарисида савдо қилувчи компаниялар ҳам кўплаб ташкил бўлди. Хиндистонга қилинган экспедициядан кейин Транкебарда савдо флотилияси қурилиб, Даниянинг Ост-Индия (1616), Вест-Индия (1625), Африка (1636) компаниялари вужудга келди.

Кристиан IV хукмронлигининг катта қисми урушларда ўтди. 1611–1613 йиллари Швеция билан уруш, кейин Ўттиз йиллик уруш, 1626 йилги Любек сулҳи билан 1629 йилги Вестфаль тинчлик сулҳи Данияга катта муваффақиятсизликлар олиб келди. 1557–1560 йиллари шведлар билан олиб борилган уч йиллик уруш натижасида Дания ўз тарихидаги энг оғир сулҳ – Роскиль тинчлик сулҳини имзолашга мажбур бўлди. Скандинавия ярим оролининг жануби ва Бохусланд тўлиқ Швецияга ўтди. Дания энди Шимолий Европа билан Атлантик океани ўртасидаги йўлни назорат қила олмай қолди. XVII асрда олиб борилган урушлар Даниянинг сиёсий салоҳияти ва иқтисодий қурратига катта путур етказди.

Айниқса, Даниянинг Шимолий урушдаги мағлубияти ҳукуматни ислоҳотлар ўтказишга мажбур қилди. 1702 йили қирол имзолаган рескрипт эълон қилиниб, унга биноан 1699 йил 25 августдан кейин туғилган дехқонлар крепостной қарамлиқдан озод қилинди. Лекин озодлик учун тўланадиган товон пулининг юқорилиги (у 30 дан 50 риксадергача эди) қарорнинг аҳамиятини йўққа чиқарди. Бунинг устига қирол ландвер (лашкарлик) ҳақида бошқа бир рескрипт эълон қилиб, унга қўра хизматга яроқли деб рўйхатга олинган дехқонлар қарамлигича қолаверди. Бир оздан кейин, 1703 йили ландвер бекор қилинди, лекин крепостнойлик сақланиб қолаверди. 1733 ва 1764 йиллари ландвер тикланиб, энди 4 ёшдан 40 ёшгacha бўлган дехқонлар рўйхатга олинадиган бўлди.

Юзага келган молиявий танглик туфайли XVIII аср 60-йилларида ҳукумат қиролликка қарашли ерларнинг бир қисмини сотишга мажбур бўлди. Кўплаб худудлар майда дехқон хўжаликларига бўлиниб кетди. Бу қишлоқда капиталистик муносабатларни ривожлантириш йўлидаги дастлабки қадамлар эди. Шунингдек, маълум шартлар асосида тўлов эвазига жамоа ерларини хусусийлаштириш тўғрисида ҳам қонун қабул қилинди. Ер эгаларининг бир қисми қарам дехқонларнинг меҳнати унумсиз бўлганлиги сабабли уларни озод қилди.

1766 йили Дания таҳтига Кристиан VII келди. Руҳий қасалга чалинган қиролни даволаш мақсадида Иоганн Струэнзе (1737–1772) тақлиф қилинди. Струэнзе Вольтер ва Руссонинг ашаддий мухлиси, маърифатли ва маданиятли киши эди. У тез орада қиролича Каролина Матильданинг маъшуқи, 1770 йилдан Даниянинг диктатори бўлиб олади. Икки йил ичидаги Струэнзе 1700 дан кўп қонунлар ишлаб чиқди ва қирол имзоси билан эълон қилди.

Струэнзе маърифатли абсолютизмнинг идеал кўринишини ҳаётга татбиқ этишга харакат қилди. Қабул қилинган қонунлар натижасида яширин давлат кенгаси тарқатиб юборилди, молия соҳасида тартиб ўрнатилди, фойда келтирмайдиган мануфактуралар ёпилди, суд олдидаги барчанинг тенглиги эълон қилинди, қийноққа солиш ва тан жазоси бекор қилинди, цензура йўқ қилиниб, матбуот эркинлиги эълон қилинди. Бундан ташқари армиянинг сони қисқартирилди, сарой харажатлари камайтирилди. Никоҳсиз туғилган болаларни камситиш тақиқланди, якшанба куни ишлаганлик учун жарима бекор қилинди ва черков байрамлари сони камайтирилди. Норвегияга автономия бериш ва унда университет очиш режалаشتаририлди.

Струэнзенинг дехқончилик соҳасидаги қонунлари келишувчалик характеристида эди. Крепостной хукуқ фақат 14 ёшдан 34 ёшга ча бўлган эркакларгагина жорий қилинди. Барщинанинг миқдори давлат томонидан назорат қилинадиган бўлди. Солиқлар ва тўловларни дехқонлар ўз хўжайинига эмас, балки хазинага тўлаши жорий қилинди.

Струэнзенинг ислоҳотлари катта ер эгалари, сарой аёнлари ва руҳонийларининг қатъи қаршилигига учради. 1772 йил 17 январда улар Струэнзени ағдаришди ва қатл қилишди. Унинг барча ислоҳотлари бекор қилинди. Айтиш лозимки, Струэнзе ислоҳотлари катта прогрессив аҳамиятга эга бўлса-да, Дания жамияти маданий ва ижтимоий-руҳий жиҳатдан уларнинг кўпчилигини қабул қилишга тайёр эмас эди.

XVIII аср охирида Дания иқтисодий сиёсатининг асоси меркантилизм бўлиб қолди. 1800 йили крепостной хукуқ ҳам бекор қилинди.

Швеция. Айтиб ўтганимиздек, Кальмар униясининг бузилиши Швециянинг мустақиллигини тиклади ва марказлашган миллий давлатнинг шаклланиши учун асос яратди.

Қирол Густав I Ваза (1523–1560) кўзга кўринган ислоҳотчи, сиёсий раҳбар ва ҳарбий ташкилотчи эди. У Реформациянинг ғалабасидан фойдаланиб, мамлакатни бошқариш тизимида ҳам ўзгаришлар ясади: қирол хизматига тажрибали, абсолютизм тарафдорлари бўлган немис амалдорлари таклиф қилинди; улар раҳбарлигида қирол канцелярияси (девони) ва ҳазина хизмати (камера) қайта ташкил қилинди; ўзига хос парламент ролини ўйнаб келган рискорд қирол хузуридаги ижро органига айлантирилди; вилюятларда ҳам феодаллар ўрнини қирол бошқарувчилари эгаллади.

Қиролнинг абсолют ҳокимияти ўрнатилиб, у Вазалар сулоласининг мероси деб эълон қилинди. Ҳамма ерлар, сув ва ер ости бойликларига қиролнинг олий мулкий ҳукуки ўрнатилди.

Армияда ёлланма қўшинлар пайдо бўлди. Ҳарбий денгиз флоти кучайди. Ислоҳотлар Швеция учун катта аҳамиятга эга бўлди. Мамлакат сиёсий тангликдан чиқиб, кўплаб Европа давлатлари билан алоқалар ўрнатилди.

Абсолютизмнинг тўлиқ ўрнатилиши, мамлакатни бошқаришнинг марказлашуви қирол Густав II Адольф (1611–1632) ва унинг ворислари даврида якунланди. Айниқса Густав II Адольфнинг ҳарбий ислоҳотлари, XVII асрда олиб борилган урушлар Швецияни Европанинг буюк давлатлари қаторига олиб чиқди.

Аммо XVIII аср бошидаги Шимолий уруш ва унда Швециянинг мағлубияти унинг мавқеига катта путур етказди. 1721 йилги Ништадт сулҳига биноан Швеция ўзининг мағлуб бўлганлигини тан олди. Бу халқ учун катта руҳий тушкунлик, мамлакат учун эса иқтисодий ва ҳудудий ўйқотиш бўлди. Ингерман ерлари, Карелия, Эстляндия ва Лифляндия Россияга ўтиб кетди. Германиядаги ерларининг катта қисми эса Пруссияга ўтди.

Шимолий уруш натижалари Швеция учун ҳалокатли бўлди. Бу бир томондан, уни қурратли давлатдан учинчи даражали давлатга айлантириб қўйди. Мамлакат вайрон бўлган, очлик ва турли эпидемиялар аҳолининг қирилишига олиб келаётган эди. Бошқа томондан эса узоқ тинчлик даври бошланди. Мамлакатни оёққа турғазиш, хўжаликни тиклаш учун имконият пайдо бўлди.

1719–1738 йиллар ичida 149 та мануфактура ташкил қилинди. Қишлоқ хўжалигида картошка ва тамаки етакчи экинларга айлантирилди. 20-йиллари пул ислоҳоти ўтказилди. Иқтисодий сиёsatнинг асосини меркантилизм ташкил қилди. Хукумат четга мис, темир,

ёғоч сотишни қўллаб-кувватлади. XVIII асрдан саноатда дастлабки буғ машиналари қўлланила бошланди.

Аммо XVIII асрда Швеция яна бир нечта урушда – 1741 йили Россияга қарши ва 1756–1763 йиллари Россия ва Франция билан иттифоқда Пруссияга қарши Етти йиллик урушда иштирок этди. Бу урушларда қатнашиш ҳам Швеция манфаатлари учун ҳеч қандай фойда бермади. Мамлакатда ҳокимият учун кураш кескинлашди, холос.

Натижада 1772 йили Густав III давлат тўнтаришни уюштириб, абсолют монарх бўлиб олди. У маърифатли абсолютизм руҳида бир қатор ислохотлар ўтказди. Қийноққа солиш ва тан жазоси бекор қилинди, жодугарлар устидан жараёнлар тақиқланди, матбуот эркинлиги эълон қилинди ва бошқалар.

Абсолютизм ва 1788–1790 йилларда Россия билан бўлган навбатдаги урушда мағлубият зодагонларнинг қиролга қарши ғазабини кучайтирди. 1792 йил қирол Густав III зодагон – фитначи томонидан отиб ўлдирилди.

Янги қирол Густав IV даврида ҳам Швеция ўзининг Европадаги мавқеини тиклаш учун қатор урушларда иштирок этди. Энди бу урушлар мамлакатга иқтисодий қийинчиликлардан бошқа ҳеч нарса олиб келмади.

Норвегия. Норвегия ўзининг кучли қўшниларидан анча ортда қолаётган эди. XVI асрда у кам сонли ва сийрак жойлашган аҳолига, кучсиз зодагонларга эга камбагал давлат эди. Калмар унияси бузилгандан сўнг Норвегия расман қироллик хисобланиб, Давлат кенгаши – рискорд тимсолида ўз ҳукуматига эга бўлса-да, амалда Дания қироллари қўл остида қолди.

Худуди асосан тогли ерлардан иборат бўлган бу ўлкада донетиширишни ривожлантиришнинг имконияти йўқ эди. Шу сабабли дон доим танқис бўлиб, уни қўшни давлатлардан, асосан Даниядан олиб келишар эди. Ахолининг асосий машғулоти яйловда мол боқиш, балиқ тутиш ва овчилик эди. Четга сотиладиган асосий маҳсулот ёғоч ва балиқ бўлиб, у ганзаликлар монополиясида, йирик порт Берген ҳам тўлиқ улар қўлида эди. XVII асрда ганзаликлар Норвегиянинг тижорат ишларидан даниялик ва голландияликлар томонидан сиқиб чиқарилади.

XVI аср ва XVII асрнинг биринчи ярмида Норвегия аҳолиси уч марта, шаҳар аҳолиси икки марта кўпайди. Мамлакат ерларини

ўзлаштириш бошланиб, темир ва мис конлари ишга туширилди. Ўрмон саноати интенсив ривожланиш йўлига ўтди. Аҳоли сонининг ошиши савдонинг ҳам тез ривожланишига олиб келди.

XVII аср ўрталарига келиб умуман Норвегия иқтисодида кескин жонланиш юз берди. Дастлаб кемасозлик, кейин эса кумуш қазиб олиш кўпайди. Ташқи савдо асосан Англия, Голландия, Испания, Португалия ва Африка мамлакатлари билан олиб борилди. XVIII аср охирларига келиб Норвегия савдо флоти мингта кема ва ўн минг денгизчига эга эди.

XVII–XVIII асрларда Дания хукумати Норвегиядаги қироллик ерларини сотишни кўпайтирди. 1760 йилга келиб дехқонларнинг 66 фоизи хусусий ер эгалари, 34 фоизи ижарачилар эди. Шаҳар аҳолиси ҳам тез ўсиб борди.

Денгиз савдоси, тоғ-кон саноати ва металлургиянинг ривожланиши ўсиб бораётган буржуазиянинг бойишига олиб келди. Иқтисоди гуллаётган ва капиталистик муносабатлар тез ривожланаётган Норвегия билан у қарам бўлган Дания ўртасидаги қарама-қаршиликлар кучайиб борди. Айни пайтда Норвегиянинг ички зиддиятлари ҳам таранглашиб, қатор кўзғолонлар бўлиб ўтди. 1764–1767 йиллардаги балиқчилар кўзғолони ва 1786–1787 йиллардаги Лафтхус бошлигидаги дехқонлар кўзғолони шулар жумласидандир.

Натижада 1788 йили Дания хукумати дон савдосига монопол эгаликни бекор қилди. Шунгача Норвегия дон ва дон маҳсулотларини юкори нархларда фақат Даниядан сотиб олишга мажбур эди.

Ўсиб бораётган миллий онг кишиларда Дания қироллигига нисбатан норозиликни кучайтирди. 1797 йили Жанубий Норвегияда қўзғолон бўлиб ўтди. Норозиликларнинг ўсишига Франциядаги инқилоб ҳам катта таъсир кўрсатди. Бироқ XIX аср бошларида ҳам Норвегия Дания қарамлигича қолаверди.

Финляндия. Финляндия XVI асрда Швециянинг чекка ўлкаси саналар эди. Кейинчалик, 1556 йили герцоглик, 1623 йили эса генерал-губернаторлик деб эълон қилинди. Швеция қироли томонидан тайинланадиган бошқарувчи кейинчалик (1581–1721) Финляндия буюк князи унвонини олди. Расмий тил швед тили ҳисобланар эди.

1721 йилги Ништадт сулҳидан сўнг Фин қўлтиғидаги ерларнинг бир қисми Россия ихтиёрига ўтди. 1809 йили эса Финляндия бутунлай Россия томонидан забт этилди ва то 1917 йилнинг охиригача унинг таркибида бўлди.

Финляндиянинг иқтисодий ва ижтимоий аҳволи Швецияникига ўхшаш, бироқ ривожланиш даражаси анча паст эди. XVI асрда аҳоли асосан денгиз бўйларида яшар, аммо шу даврдан ички худудларни ўзлаштириш ҳам бошланган эди. Аҳоли асосан дехқончилик, балиқчилик, овчилик, ёғоч савдоси ва ботқоқдан темир олиш билан шугулланар, ҳайдашга яроқли ерларнинг асосий қисми зодагонларга қарашли эди. Энг катта шаҳри Або (ҳозирги Турку) бўлиб, ўша пайтда 5 минг аҳоли истиқомат қиласади.

Финляндияда амалга оширилган ислоҳотчиликдан сўнг швед тили ва маданияти ўз таъсирини сақлаб қолган бўлсада, финлар ўз ёзувига эга бўлди, фин адабиётiga асос солинди.

XVII–XVIII асрларда Финляндия иқтисоди ва маданияти асосан Швеция таъсири остида ривожланди.

Исландия. Исландия тоғли ва совук ўлка бўлиб, бу ерда ҳаёт асосан бошқа ўлкалардан келтириладиган маҳсулотларга боғлиқ эди. Калмар унияси даврида Исландия ўлат ва бошқа касалликлардан ва бу ерда жойлашиб олган дengiz қароқчиларидан катта зарар кўрди.

Исландияда феодал ишлаб чиқариш деярли ривожланмади. Оролнинг шаҳарлари ҳам, ўз зодагонлари ҳам йўқ эди. У «алтинг» деб аталувчи фуқароларнинг умумий йигини томонидан бошқариларди. Исландия XII асрдан Норвегияга қарам бўлиб, кейин у билан бирга Дания таркибига киради.

Шимолий Европа халқлари маънавий ҳаётидаги ўзгаришлар. XVI аср Шимолий Европа халқлари маънавий ҳаётига кўплаб янгиликлар олиб келди. Бевосита Реформациядан сўнг, ибодатхона ва монастирлар қошидаги мактабларнинг ёпилиши, католицизм билан боғлиқ ўрта аср қўлёзмаларининг, рассомчилик ва ҳайкалтарошлиқ асарларининг йўқ қилиниши натижасида маориф ва санъатда маълум тушкунлик юз берди. Бироқ бу ҳолат жуда тез ўзгарди. Диний маросимларнинг миллий тилларда ўtkазилиши шу тилларнинг, энг аввало Швеция, Дания, Финляндияда ривожланишини тезлаштириди. Китоб нашр қилиш кўпайди, Инжилнинг скандинав тилларидаги таржимаси ва дастлабки алифболар кўпайди. Адабиёт ва тасвирий санъатда дунёвий жанрлар пайдо бўлди. Меъморчиликда Уйғониш даври анъаналари шимолий готика усули билан алмашади, XVII асрдан эса готика ўrniga илк барокко¹ усули келади. Дастлабки

¹ Барокко – (итальян. *barocco* – мўъжизавий, ажойиб) XVI–XVIII асрнинг ўрталарида Европа мамлакатларида санъат, архитектура, адабиёт ва мусикада кенг тарқалган йўналиш.

фольклор тўпламлари ва миллий тарихнинг илк баёнлари пайдо бўлади. Мактаб таълими ҳам кенгайиб борди. Стокгольм (1477) ва Копенгаген (1479) университетлари таълимнинг миллий марказла-рига айланади. Шу билан бирга кўплаб скандинав ёшлари Европа-нинг машхур университетлари – Париж, Болонья ва бошқаларда ўқий бошлайди.

Даниялик олим Тихо Брагенинг астрономияга оид асарлари, Ураниенборг қасридаги расадхонаси ва мактаби бутун Европада шуҳрат қозонади. XVII асрда Швецияда қадимий ёдгорликларни, шу жумладан археологик ёдгорликларни ҳимоя қилиш бўйича даст-лабки қонунлар кабул қилинади.

Шимолий Европа халқлари маданий тараққиётида илгаригидек илфор чет эл маданияти намуналарини ижодий ўзлаштириш катта рол ўйнайди. Шу ўзлаштириш туфайли Шимолий Европа халқлари пороҳ, китоб чоп қилиш дастгоҳи, компас, вексель, мукаммал тоғ-кон қурилмалари, металлургия пресси ва қурилишнинг илфор усул-лари билан танишиди.

Бир неча аср Ганза билан узвий алоқада бўлиш ва кўплаб немисларнинг Скандинавия мамлакатларида ўтроқлашиб қолиши маҳаллий тилларда, Шимолий Европанинг моддий ва маънавий маданиятида сезиларли из қолдирди.

* * *

XVI аср ўрталари, айниқса XVII ва XVIII асрларда ёш миллатлар – французлар, инглизлар, биринчи навбатда голландлар, валлонлар ва фламандларнинг Шимолий Европага таъсири катта бўлди. Нидерландиянинг жанубий худудларидан кўчиб келганлар ўзига тўқ ва ишбилармон кишилар эди. Тадбиркорлар, молиячи ва савдогарлар, курувчилар, металлурглар, мухандис ва денгизчилар – буларнинг ҳаммаси Данияга, кейин эса Швецияга катта маблағни, биржани, ҳарбий ишдаги янгиликларни, чет эл савдо компанияларининг тажрибасини олиб кирди. Қиролнинг, бой аслзодаларнинг саройларида, кийимларида, умуман аҳолининг туриш-турмушида янги давр руҳи уфуриб турарди. Скандинавия халқлари маданияти миллий ва бадиий ўзига хосликни саклаб қолган бўлса-да, янги давр руҳи бу жабҳада ҳам сезила бошлаган эди.

XVI боб бўйича саволлар

- 1.** Кальмар унияси бекор қилингандан сўнг Шимолий Европа мамлакатлари ривожида қандай мухим ўзгаришлар юз берди?
- 2.** Даниянинг ривожланишида Кристиан II ва Струэнзе ислоҳотлари қандай роль ўйнади?
- 3.** XVI–XVIII асрларда Швеция тараққиётининг қандай асосий босқичлари мавжуд эди?
- 4.** Сиёсий ва иқтисодий қарамлик Норвегия, Финляндия ва Исландия мамлакатлари ривожига қандай таъсир кўрсатди?
- 5.** XVI–XVIII асрларда Шимолий Европа халқлари маданий ҳаётидаги асосий ўзгаришларнинг моҳияти нимада эди?

IV БЎЛИМ

ЯНГИ ДАВРДА АМЕРИКА МАМЛАКАТЛАРИ

XVII БОБ. XVII–XVIII АСРЛАРДА ШИМОЛИЙ АМЕРИКА

Америкадаги дастлабки мустамлакалар

Фарбий Европа мамлакатлари Янги дунёга аллақачон бойликлар манбаи сифатида қарай бошлаганди. Чунки илк европаликларни олқишилаб кутиб олган Америка кимсасиз чўлга сира ўхшамасди. Ҳозир хисоблашларича, ўша пайтларда Ернинг Фарбий Ярим куррасида худди Фарбий Европада бўлгани каби, 40 миллионга яқин одам истиқомат қилган. Ҳозирги Америка Кўшма Штатларининг ерлари европаликлар томонидан мустамлакалаштирилган пайтда америкаликларнинг сони ҳар хил ҳисобларга кўра 2 миллиондан 18 миллионгacha деб кўрсатилмоқда. Европаликлар билан бўлган беҳисоб жанглар ва 1600 йилги очарчилик, даҳшатли чечак эпидемияси аҳолининг кўпчилигини қириб юборди.

Европаликлар XVIII аср бошларида Шимолий Америкада мустамлакалар ташкил қилдилар. Натижада, Европа цивилизацияси Атлантик океанининг ғарбий соҳилларига ҳам тарқала бошлади.

Христофор Колумб Кариб денгизи соҳилига қадам босганидан атиги беш йил ўтгач, яъни 1497 йили венециялик денгизчи Жон Кэбот Британия қиролининг топшириғига биноан Ньюфаунлендга келди. Кэботнинг бу саёҳати умуман катта аҳамият қасб этмаса-да, кейинчалик Британиянинг Шимолий Америка ерларига даъвогарлик қилиши учун асос бўлди.

Христофор Колумб каффиётлари натижасида асос солинган Испания ер мулкларидан Американинг европаликлар томонидан ўзлаштирилиши бошланади. Улардан дастлабкиси, 1513 йили Хуан Понс де Леон бошчилигига таъсис этилган гурух бўлиб, улар ўша йили Флорида соҳилларини ўзлаштиришни бошладилар.

1522 йили Мексиканинг забт этилиши билан Испаниянинг Америкадаги мавқеи янада мустаҳкамланди.

1539 йили Эрнандо де Сото экспедицияси Флорида орқали Шимолий Американинг жануби-шарқий қисми бўйлаб то Миссисипи дарёсигача кезиб чиқди.

Франция байроғи остида сузган асли венециялик Жованни де Веразано каби денгизчиларнинг саёҳатлари туфайли қарам Американинг шимолий қисми кашф этилиб борди. Де Веразанонинг 1542 йилги экспедициясидан ўн йил ўтгач, Сант-Лоуренс дарёси узра уюширилган Жак Картье экспедицияси Франциянинг Шимолий Америка ерларига то 1763 йилга қадар даъво қилишига асос бўлди.

1540-йиллари французлар Квебекда (ҳозирги Канададаги шахар) таъсис этган биринчи мустамлакаси барбод бўлганидан сўнг, орадан йигирма йил ўтгач, улар Флориданинг шимолий соҳилини ишғол қилишга уриндилар, бирок бу мустамлака 1565 йили испанияликлар томонидан вайрон қилинди. Сўнгра Испания қуролли кучларининг бошлиғи Педро Мененdez (1519–1574) томонидан барпо этилган Санта Августин шахри европаликларнинг Шимолий Америкадаги доимий истиқомат жойига айланди.

Испанияга Мексика, Кариб минтакаси ва Перудаги мустамлакалардан оқиб келган бойликлар бу жойларга Европанинг ўзга давлатларида, хусусан Англия каби қудратли давлатларда ҳам катта қизиқиш уйғотди.

Англиянинг Шимолий Америкадаги ilk мустамлакасини 1585 йили Вольтер Раллей деган киши Роанок оролида ташкил қилди. Лекин инглизларнинг бу ерда доимий ўрнашиб олишлари учун яна 20 йил чамаси уриниш лозим бўлди. 1607 йили Жеймстаунда инглизларнинг мустамлакачилик ҳаркатлари муваффакият қозонди ва Шимолий Америка янги даврга кириб келди.

Инглиз мустамлакачиларининг оқими йил сайин ошиб борди. Бу ерда бошпана топиш ва «Исо подшолиги» ҳақидаги таълимотни эркин тарғиб қилишга умид қилган пуритан жамоалари ўз нигоҳларини тобора тез-тез Америкага қаратдилар.

Америкага келаётганлар орасида ғов тутиш оқибатида ўз ерларидан айрилган кўплаб дехқонлар, ҳеч қанақа хунари йўқ минглаб ёшлар бор эди. Шунингдек, меҳнатга яроқли жиноятчилар ҳам хукумат томонидан мустамлакаларга жўнатилар эди.

Шимолий Америкада ўрнашиб олган Англиянинг мустамлакаларидан биринчиси Жеймстаун бўлди. Қирол Яков (Жеймс) I нинг кафолат хати билан имтиёзга эга бўлган Виржиния (Ёш Лондон)

компаниясининг тахминан 100 кишилик бир гурухи 1607 йили Чесапик кўрфази томон йўл олди. Бир қатор муваффакиятсизликлардан сўнг, 1610 йили Хенрико (ҳозирги Ричмонд) шахри бунёд этилди. 1612 йили Жон Рольф томонидан Вест-Индиядан келтирилган тамакининг маҳаллий ўсимликлар билан чатиштирилиши натижасида олинган янги тамаки нави, Виржиниянинг асосий даромад манбаига асос солди.

1620 йили ўзларининг иқтисодий аҳволидан ва диний камситилишидан норози бўлган лейденлик пуританлардан бир гурухи Виржиния компаниясидан ер патентини олди ва 101 нафар пуритан (ота-пилигримлар)дан¹ иборат гурух «Мэйфлауэр» кемасида Виржинияга келди. Ўзларини шаклланган давлат қонунлари доирасидан ташқарида турғанлигига ишонган пуританлар, ўзлари танлаган раҳбарлар ишлаб чиқкан «адолатли ва барчага teng қонунлар»га риоя этишга расман аҳдлашиб олдилар. Бу келишув «Мэйфлауэр аҳдлашуви» номи билан маълум.

Декабрь ойида «Мэйфлауэр» кемаси Плимут портига кириб келди. Кейинчалик бу ерда Янги Плимут шахри қурилди ва Янги Англия мустамлакаларига асос солинди. Кўчиб келувчилар қирғоққа туширилган кун – «Ота пилигримлар куни» ҳар йили АҚШда байрам сифатида нишонланади.

Кўчиб келганларга улкан жасорат, тоқат ва чидам керак бўлди. Қиши эди, шунинг учун кемада яшашга тўғри келди. Икки-уч ой ичida яшаш жойи йўқлигидан, цинга ва бошқа касалликлардан одамларнинг ярми ҳалок бўлди, бироқ қўшни Вампонаад хиндулари уларга мадад берди, маккажўхори этиштиришни ўргатди. Баҳор келиши билан кўчиб келганлар фақат ўз кучларига ишониб ишга киришдилар. Улар ерларни тозаладилар, экинлар этиштирдилар, уйлар қурдилар, хўжалик юрита бошладилар. Даствлабки пайтларда бундай ерларда жамоа тартиби сақланиб турди, жамоа омборлари қурилди, озиқ-овқатлар ва асбоб-ускуналар марказлашган ҳолда тарқатилди. Акс ҳолда яшаб қолиш мумкин эмасди.

1630 йили, қирол Карл Iнинг мустамлака барпо этиш кафолатига таянган инглизларнинг янги тўлқини Массачусетс кўрфазига етиб келади. Кўчиб келувчиларнинг кўпчилиги пуританлар бўлиб, уларнинг диний эътиқодлари ва амалиёти Англияда борган сари кўпроқ таъқиб остига олинмоқда эди.

¹ Пилигрим – кезиб юрувчи дуохон, муҳожир.

Мустамлакалар ташкил қилинган худудларда хинду қабилярининг асосан икки гурухи, ирокезлар ва алгонкинлар яшарди. Уларнинг умумий сони 200 минг киши бўлган, деб тахмин қилинади.

Мустамлакачиларнинг сони шимолда нисбатан кам бўлиб, улар қирғоқ бўйларида яшаётган пайтларида ҳиндулар билан дўстона муносабатда бўлдилар. Кўчиб келганларга ўрмонларни тозалаш ва ерга ишлов беришни айнан ҳиндулар ўргатдилар. Улар оқ танлиларга тамаки, нўхат, маис, ошқовок, қовун ва бодринг экишни, шакар олишни, балиқларнинг бош қисмидан ўғит сифатида фойдаланишни, ёввойи ҳайвонларни овлашни, қайнин пўстлоғидан қайиқ ясашни (бундай қайиқларсиз мустамлакачилар ҳеч қачон ёввойи чангальзорларга кира олмаган бўларди), моллюскалар истеъмол қилишни ўргатдилар. Ҳиндуларнинг сўқмоклари келажақда мустамлакачиларнинг йўлларига айланиши керак эди. Бир сўз билан айтганда, ҳиндулар европаликларга Янги Дунёда қандай яшаш кераклигини ўргатдилар, улар эса қўпчилик холларда ҳиндуларнинг ерларини тортиб олиш билан жавоб қайтарди.

Уй ҳайвонларига эга бўлмаган мустамлакачилар ўрмонларни эгаллаб ола бошладилар. Савдогарлар ром ёки фабрика товарлари эвазига ҳиндулардан қимматбаҳо тери, мўйна, ер сотиб оларди. Ҳозирда Нью-Йоркнинг марказий қисми жойлашган орол ҳаммаси бўлиб 24 доллар турадиган пичоқлар ва тақинчоқларга сотиб олинган.

Мустамлакачилар ва ҳиндулар ўртасидаги ўзаро муносабатлар ҳамкорлик ва тўқнашувдан иборат мураккаб қоришма эди. Асл америкаликлар янги технология ва савдо-сотиққа яқинлаштирилганидан фойда кўришига қарамай, кўчиб келганлар ўзлари билан келтирган касалликлар ва очкўзлик ҳиндуларнинг азалдан шаклланган хаёт тарзларига жиддий таъсир кўрсатди.

1570 йили шимолий минтақалардаги ирокезлар ўз даврлари учун энг демократик давлат – «No-De-No-Sau-Nee», яъни Ирокезлар Лигасини ташкил қилиш мақсадида бешта қабила бирлашади.

1600–1700 йиллар давомида Лига кудратли куч бўлган. Лига Англия билан мўйна савдо-сотиқ ишларини олиб бориб, Америкага ҳукмронлик қилиш учун 1754–1763 йиллар мобайнида авж олган урушда Францияга қарши Буюк Британияга иттифоқдош бўлган. Ирокезлар Лигасининг мадади бўлмагандан Буюк Британия мазкур

урушда ғолиб чиқмаган бўлиши ҳам эҳтимолдан холи эмас. Мазкур Лига Америка инқилобига қадар ўз кучини сақлаб турди.

XVII аср ўрталарида Англияда содир бўлган инқилоб муҳожирлар сонини чеклади ва метрополиянинг Америкадаги монополияларга эътиборини сусайтириди. Бу ҳол 1643 йили Массачусетс кўрфази, Плимут, Коннектикут ҳамда Нью-Хэвен мустамлакалари Янги Линия Конфередациясини тузишлари учун имконият туғдирди. Бу – европалик мустамлакачиларнинг миңтақавий иттифоқ тузиш борасидаги дастлабки уринишлари бўлди.

1660 йили қирол Карл II нинг таҳтга қайта тикланиши билан Англия яна бир бор Шимолий Американи ўз дикқат марказига олди. Қисқа муддат ичida Каролинада кўчиб келган европаликларнинг илк работлари бунёд этилди ва голландияликлар Нью-Нидерланддан сиқиб чиқарилди. Нью-Йорқ, Нью-Джерси, Делавэр ва Пенсильванияда хусусий мулкчиликка асосланган янги мустамлакалар таъсис этилди.

1732 йили, Жоржиянинг кўчиб келувчилар томонидан ўзлаштирилиши билан 13 та мустамлакадан охиргиси ҳам таъсис этилди.

Англия мустамлакаларидағи ижтимоий ва иқтисодий ҳаёт. Янги Англиянинг (Шимолий Америкадаги Англияга қарашли ерлар шундай атала бошланди) мустамлакаларида кичик фермер хўжаликлари кўпроқ тарқалди. Аста-секин кишлоқ хўжалиги билан боғлиқ бўлган саноат ўсиб борди, XVII аср иккинчи ярмида биринчи мануфактуралар пайдо бўлди (йигириувчи, тўкув, темирдан буюм ясовчи ва ҳ.к.). Янги қатламлар – буржуазия ва ёлланма ишчилар қатламларининг шаклланиши тезлашди. Жанубий мустамлакаларда ер эгалари катта майдонларни плантацияларга айлантирадилар. У ерларда етиштириладиган асосий экинлар пахта, тамаки ва шоли эди. Бироқ мустамлакаларда бўш ишчи кучи сони чекланганлиги учун ҳам бу ерларга ишчи кучларининг оммавий киритилиши бутун Американи тўлдириб борарди. Кўпгина камбағал-иммигрантлар океандан бу тарафга ўтиш учун маблағлари йўқлигидан савдогарлар ва кема эгалари билан қулларча келишувига рози бўлар, кейин эса хўжайнлар уларни Америкада қайта сотишардилар. Бу одамларни «шартномаланган хизматкорлар» деб аташарди, улар янги хўжайнларига 2 йилдан 7 йилгача ишлаб беришлари шарт эди. Бироқ Европадан қул-хизматкорларнинг оқиб келиши ҳам плантациялардаги ишчи кучи етишмовчилигини ҳал қила олмасди,

ҳиндуларни ишлашга мажбур қилиш учун уринишлар эса фойда бермади. Аста-секин «оқ қулларни» негрлар сиқиб чиқарди. Қуллар меҳнати айниска плантацияли хўжаликнинг негизи бўлган жанубий мустамлакаларда кенг қўлланилар эди.

Америкача плантация капиталистик тузум ривожланаётган бир шароитда қулдорлик даври эксплуатация усуллари қайта тикланишнинг ўзгинаси эди. Мустамлакаларга негрларни олиб келиш 1619 йилдаёқ бошланганди. Мехнат шароитлари чидаб бўлмас даражада эди. Кочганлик учун негрларни шафқатсиз жазолашарди, хаётдан маҳрум қилинишлари ҳам мумкин эди. Аммо қулларга қарши йўналтирилган террорга қарамасдан, улар икки юз йил давомида (1863 йилгача) 250 марта исён ва қўзғолонлар кўтардилар.

Мустамлакалар буржуача қадриятлар негизида ташкил топди, лекин инглиз қироллари ва ер аристократияси уларда феодал тартибларни ўрнатишга уринишарди. Англия қироллари ўз яқинларига мустамлакалардан катта ерларни тарқатарди. Лорд Ферфакслар оиласига майдони жиҳатидан Голландияга teng ер берилганди, Лорд Балтимор Мэрилендинг эгаси, герцог Йоркский эса Нью-Йоркнинг, Уильям Пен – Пенсильваниянинг эгаси ва ҳ.к. Бу мулкдорлар ўз ерларида феодал тартибларни ўрнатишга уринишарди. Бироқ бўш ерларнинг мавжудлиги бу сиёsatни йўққа чиқарди. Ишчилар Farbga кетиб қолар, у ёқда эркин фермер бўлишарди.

Англияда туриб мустамлакаларни бошқарар экан, қирол кўпчилик мустамлакалар губернаторларини шахсан ўзи тайинларди. Барча суд, ижро ва олий қонунчилик ҳокимияти уларнинг қўлларида эди.

Мустамлака ассамблеялари икки палатадан: юқори палата – губернатор аристократлар орасидан тайинлайдиган кенгашдан ва аҳоли сайлайдиган қуий палатадан иборат эди. Сайловчилар учун юқори мулкий чеклов мавжуд бўлиб, у овоз беришда ва қарор қабул қилишда энг қашшоқ, демакки, аҳолининг энг норози қисми қатнаша олмаслиги учун ўрнатилганди. Сайловлар очиқ овоз бериш йўли билан ўтказиларди.

Шимолий Американинг шимолий ва жанубий мустамлакалари иқтисодий ҳолатидаги фарқлар

	Шимолий мустамлакалар	Жанубий мустамлакалар
Қишлоқ хўжалиги	Кичик фермерлик	Йирик плантациялар
Асосий ишчи кучи	Озод кўччинчилар	Африкалик қуллар
Даромаднинг асосий манбай	Саноат	Қишлоқ хўжалик маҳсулотлари савдоси

Замонавий миллатнинг шаклланиши. XVIII аср ўрталарига келиб, мустамлакалarda ягона ички бозор шакллана бошлади, савдо алоқалари ривожланди. Шимолий мустамлакалардан жанубга дон, балиқ, саноат маҳсулотлари олиб келинарди. Савдо йўллари асосан дарёлардан иборат эди.

Америка ерларида қарийб икки асрлик биргаликда яшаш тажрибасидан кейин кўчиб келганларнинг ягона тарихий тақдири юзага келди. Инглиз тили умумий тил бўлиб қолди. XVIII аср ўрталарига келиб мустамлакаларнинг кўпгина аҳолиси ўзларини америкалик деб атай бошлади. Аҳолининг ўзига хос турмуш тарзи ҳам шаклланди. Одамлар ўз уйларини ёғочдан куардилар. Одатда уйлар битта хонадан иборат бўларди, лекин улар бир нечта бўлса, унда киш пайти фақат биттаси иситиларди. Ёритгич сифатида чўпчироқ ишлатиларди. Кийим ва қўрпалар уйда тўқилган каноп матодан бўларди.

Катта шаҳарларда савдогарлар икки ва уч қаватли уйларда яшашарди. Мебель, экипажлар, матолар Англиядан буюртма билан олиб келинарди. Плантаторлар ўзларига ҳашаматли саройлар қуриб оларди.

Худуднинг умумийлиги, мустамлакаларнинг иқтисодий ва хўжалик манфаатлари, тил, диннинг ягоналиги янги миллатнинг шаклланишига асос солди.

Америка буржуса жамиятининг гоялари. Америка миллати шаклланиши билан бир пайтда ўзига хос миллий маданиятнинг ҳам таркиб топиш жараёни юз берди. XVIII асрдаги Америка жамиятида диний дунёқараш хукмронлик қилас, маънавий-диний фанатизм ўрнатилган, черковга солик бериб туриш мажбурий эди. Якшанба куни дуо ўқишга бағишли нарди. Якшанба кунлари кўчаларда дунёвий мавзудаги сухбат учун то шармандали устун ёнига қўйиб

кўйишигача жазоланиши мумкин эди. Дунёвий санъат нафратга лойик деб ҳисобланарди. Кўпинча «ажиналар ови» ўтказилар ва «афсунгарлик» учун таъқиб килинарди. Қарийб барча ўкув муассасалари черков кўлида эди.

Бирок XVIII аср ўрталарига келиб, маданият ва ижтимоий фикр ривожида миллий буржуазия шаклланиши билан боғлик бўлган жиддий ўзгаришлар юз берди. Буржуа маърифатчилиги тоялари кенг тарқалди, дунёвий илм олиш, фан, адабиёт ва санъат муваффақиятли ривожланди. Коллежлар сони ўсиб борарди, аср ўрталарига келиб уларнинг сони 8 тага етди. Гарвард университетига (1636 йилдаёқ ташкил қилинган) Йель ва Принстон университетлари қўшилди. 1765 йили мустамлакаларда 43 та газета нашр қилинар, жамоатчилик кутубхоналари очилган, босмахона ишлари тез ривожланаётган эди.

Бостон ва Филадельфия энг йирик маданий марказлар бўлиб қолдилар. Америка маърифатчилиги ажойиб олим ва файласуфлар Бенжамин Франклин ва Томас Жефферсон (1743–1826) номи билан чамбарчас боғлик.

Бенжамин Франклин – демократиянинг буюк устози. Бенжамин Франклин (1706–1790) – «золимлардан скептерни, Худодан – чақмоқни¹ олиб қўйган одам», файласуф, сиёsatчи, олим ва иқтисодчи сифатида машхур. 1682 йилга яқин унинг отаси, пуритан, диний эркинлик истаб оиласи билан Янги Дунёда ўрнашди. Ўн етти ёшидан бошлаб, Франклин «барча нарсалар учун ўзи миннатдор бўлган», яъни мустақил ҳаёт бошлаган одам бўлди. У Нью-Йоркда, Филадельфияда баҳтини синаб кўрди, муҳтоҷликни бошдан кечирди, омадсизлик, муваффақиятсизликлар бўлди. Кейин Франклин Англияга кетди, у ерда босмахонада ишлади. Америкага қайтиб келиб, Франклин Филадельфияда жойлашди, ишлаб топган пулларига китоб сотадиган дўконча очди. Кейин у биринчи оммавий кутубхона ташкил қилди, шахсий газетасини чиқарди, Пенсильвания университетига асос бўлган академияни ташкил қилди ва ниҳоят 25 йил давомида бошқа тилларга ҳам таржима қилинадиган машҳур календарини чиқарди. Тахминан 1754 йилдан бошлаб, у сиёsat билан жиддий шуғулдана бошлайди. Америка мустамлакалари унинг фаол иштирокида Англиядан ажралиб чиққанидан сўнг,

¹ Б. Франклин чақмоқнинг электрик табиатини исбот қилди ва у лаборатория шароитида қандай пайдо қилиниши мумкинлигини кўрсатди.

у Францияга Кўшма Штатларнинг биринчи дипломатик вакили сифатида келди. Қулликнинг бекор қилиниши ҳақидаги петицияга қўл кўйиш унинг энг сўнгги сиёсий ҳаракати бўлди.

Франклин босмахона шогирдлигидан буюк давлат арбоби ва донишманд олимга айланди. У барчасига фақат ўз меҳнати билан эришганлигидан фахрланарди ва ватандошларига ҳам шундай қилишни маслаҳат берарди. Нашр қилган календари хақида эслар экан, у шундай деб ёзади: «Мен календардаги машхур саналар оралиғини фаровонликка олиб келадиган йўл сифатида меҳнатсеварликка ва тежамкорликка чорловчи мақол ва маталлар, фикрлар билан тўлдирадим».

Франклиннинг ҳаёти – бу йўл ҳамма учун очик эканлигини кўрсатди. «Камбағаллик, хушомад шеърлар ёзиш ва унвон орқасидан қувиш одамни кулгили қилиб кўяди» – деб ёзганди у. Франклин буржуа ахлоқи нормаларини шундай баён қилган эди.

Америка инқилоби. Мустақиллик учун кураш. АҚШнинг ташкил топиши.

Мустақиллик учун урушининг сабаблари. Буюк Британия кироли, зодагонлар ва тадбиркорлар мустамлакалардан олинадиган фойдани тобора кўпайтиришга ҳаракат қилишди. Улар мустамлакалардан қимматбаҳо хомашё, тери ва паҳтани олиб кетишарди, мустамлакаларга эса тайёр маҳсулотларни олиб келишар, солиқ ва тўловларни йиғиб олишарди. Буюк Британия парламенти мануфактуралар очиш, темирдан буюмлар ишлаб чиқариш, бошқа мамлакатлар билан савдо қилиш каби бир қатор фаолият турлари учун мустамлакаларда турли тақиқ ва чеклашлар ўрнатган эди. Шунга қарамасдан, мустамлакалар иқтисодий қудрат ва маданий равнақ жиҳатидан бекиёс даражада ўсида ва деярли барчаси узоқ йиллар давомида ўзини бошқариб келди. 1760 йили мустамлакаларнинг жами аҳолиси 1 500 000 кишидан ортиб, 1700 йилдан бери олти бараварга ўсида.

Кўчиб келганларнинг янги ерларга силжиб бориши ҳиндулар билан уруш келтириб чиқаришидан чўчиган Британия ҳукумати бу борада ҳам чеклаш сиёсатини кўллади. 1763 йилги қирол Декларациясига биноан Аллеген тоғлари, Флорида, Миссисипи дарёси ва Квебек орасидаги гарбий ҳудудларга мустамлакаларнинг

жойлашиши тақиқланди. Шу тариқа қирол ҳокимияти мустамлакаларнинг ғарбий ерларга бўлган талабларини сўндириш ва ғарб томон силжишини тўхтатишга уринди. Бу чора плантаторларни ўз плантацияларини ҳосил бермай қўйган ерлардан янги, ҳосилдор ерларга кўчириш имкониятидан маҳрум этарди. Бундан ташқари майда арендаторларнинг, Ғарбга кетиб у ерларда мустақил фермер бўлишни хоҳлаётган кишиларнинг ҳам манфаатларига путур этаётган эди.

Амалда ҳеч қачон қўлланмаганига қарамасдан, мазкур тадбир мустамлакачилар назарида уларнинг ғарбий ерларни ишғол этиш ва ўзлаштириш борасидаги хуқукини Буюк Британия томонидан назар-писанд қиласлик эди.

Бунинг устига, ўзининг кенгайиб бораётган империясини сақлаш учун тобора кўпроқ маблағга муҳтоҷ бўлаётган Британия хукуматининг янги молиявий сиёсати ҳам анча норозиликлар келтириб чиқарди.

Буюк Британияга тобе бўлмаган минтақалардан ром ва қора шинни импортига ман этувчи бож ёки соликни киритган, 1773 йилги Қора Шинни қонунини 1764 йилги Шакар Қонуни билан алмаштириш янги тизимни татбиқ этиш борасида дастлабки қадам бўлди. Хорижий ром ичимлигини импорт қилиш ман этилди. Қонун йўли билан барча манбалардан келтириладиган қора шиннига меъеридағи бож солиги ўрнатди ва вино ичимликлари, ипак матолари, қаҳва ва бошқа ҳашамат мол-маҳсулотларига бож соликлари солди.

1764 йили, парламент «минбъад Зоти олийларининг имкониятларида чиқарилган қофоз пулларни қонуний тўлов воситасига айлантиришнинг олдини олиш учун» валюта қонунини татбиқ этди. Мустамлакалар савдо-сотиқ борасида камомад ҳис этаётган ва доимий нақд пул этишмаётган бир пайтда, бу чора мустамлакалар иқтисоди учун қўшимча қийинчилик тудирди. Қирол қўшинларини озиқ-овқат ва тураг жой билан таъминлашни талаб этган 1765 йилги жойлаштириш қонуни ҳам кўчиб келганлар назарида номаъқул эди.

Айниқса, метрополия 1765 йили киритган «Гарб йигими қонуни»га биноан бериладиган тўловлар жуда оғир эди: ҳар қандай маҳсулотни, ҳатто газетагача сотиб олинганда солиқ тўлаш зарур эди.

Бу чоралар оммавий норозилик харакатини келтириб чиқарди. Шимолий Америка шаҳарлари бўйлаб «Ваколатсиз солиқ йўқ!» деган шиор остида аҳолининг йигинлари бўлиб ўтди. Мустамлака-

лар адолатли талаб қўйиб, уларнинг вакиллари Англия парламентига овоз бериш хукуқига эга бўлсаларгина солиқларни тўлашларини айтдилар. 1765 йили биринчи инқилобий ташкилот – «Озодлик фарзандлари» пайдо бўлди. У мустамлакаларда авж олаётган инглиз товарларини бойкот қилиш ҳаракатини йўналтириб турди. Герб тўловларини йигувчи амалдорларни бўяб ташлаб, лойларга ағнатиб, пакир ва товаларни қулоқни қоматга келтирувчи таққилатишлар жўрлигига узун ёғочларга боғлаб олиб юришган пайтлари ҳам бўларди. 1773 йил 16 декабрда Самуил Адамс бошчилигида бостонлик бир гуруҳ радикаллар портда турган инглиз кемаларига хужум қилдилар ва соликка тортиладиган учта инглиз кемасидаги чой ўрамларини кемалардан сувга ташладилар. Бу воқеа «Бостон чойхўрлиги» деган ном олди. Бунга жавобан Британия хукумати чой можаросини ваҳшийлик деб қоралади ва чўқтирилган чойнинг ҳаққи тўланмагунча Бостон портини ёпиб қўйди. Британия парламенти бу воқеаларга жавобан шундай ялпи қонунлар қабул қилди, мустамлакалар уларни «Мажбурий ёки чидаб бўлмайдиган қонунлар» деб атади.

Урушнинг бошланиши. 1774 йил 5 сентябрь куни Филадельфияда Биринчи Континентал Конгресс йигилди. Унда Жоргиядан ташқари барча мустамлакалардан 55 нафар вакил қатнашди. Конгресс Буюк Британиядан ажralиш муаммосини кўтаришга журъат қила олмади, лекин унинг сиёсатини қоралади. Эҳтиёткорона оҳангдаги асосий маъзуза ниҳоясидаги «қарор қилинди» қисмида қонунларга итоат этиш мажбурий эмаслиги айтилиб, қатор қарорлар қабул қилинди: шулар жумласидан, мустамлакачиларнинг «ҳаёт, озодлик ва мулк» хукуқлари ва провинциялардаги қонун чиқариш тармоқларининг «солик солиш ва ички сиёsat борасидаги барча мусалаларни» ҳал этиш ҳукуқи ҳам қайд этилди.

Конгресс томонидан жорий этилган энг муҳим иш «Континентал Уюшма»нинг ташкил этилиши бўлиб, у савдо-сотиқ бойкотини қайта тиклаш, божхона декларациясини назорат этувчи комитетлар тизими яратиш, шартномаларни бузган брокерларнинг номларини нашр этиш, уларнинг импорт молларини мусодара этиш, тежамкорлик, иқтисод ва саноатни рағбатлантириш саъй-ҳаракатларини таъминлади.

Уюшма мустамлакаларда етакчи мавқени эгаллаб, қирол ҳукмонлиги қолдиқларини бартараф этишга қаратилган янги маҳаллий

ташкилотлар барпо эта бошлади. Мустақиллик тарафдорлари томонидан бошқарилган ушбу ташкилотлар ўз ҳаракатлари билан жамоатчилик фикрида инқилобий шиҷоатни авж олдириб юборди. Шунга қарамай, Британиянинг Америка хуқуқларини чеклашига қарши турган кўплаб америкаликлар масаланинг мақбул ечими сифатида музокаралар ва келишувлар йўлига хайрихоҳлик билдиришди.

Британия қироли мазкур кўпсонли, баъзан эса келишувга мойил гурухлар билан самарали иттифоқ тузиши ва шу орқали уларнинг мавқеини шу қадар кучайтириши мумкин эдики, инқилобий кураш амри-маҳол бўлиб қоларди. Бироқ қирол Георг III келишувга мойиллик билдирамади. 1774 йилнинг сентябринда Филадельфия квакерларининг номасини назар-писанд қилмай, у шундай деб жавоб берди: «Энди тақдир ўйинидан кўринг: мустамлакалар ё таслим бўлиши, ё ғолиб чиқиши лозим». Куролли кураш 1775 йил 19 апрелда бошланди. Бостон гарнizonига кўмондонлик қилаётган генерал Томас Тейг Конкорд шаҳридаги яширин курол аслаҳа омборини йўқ қилиш ва «исёнкорлар»нинг раҳбарларини кўлга олиш учун у ерга 700 кишидан иборат Британия отрядини юборди. Исёнчиларни бу топшириқ ҳақида огоҳлантиришди ва инглиз отряди Лексингтон қишлоғига кириб келганида рўпарасидаги майдонда турган маҳаллий бирдақиқачилар (жангга бир дақиқа ичидан тайёр бўла олишларини рўкач қилгани туфайли шундай деб аталган) отрядини кўрди. Бу кишилар ҳаммаси бўлиб 70 киши эди. Улар фақат сукунат норозилигини билдиришга тўпланган эдилар. Британия аскарларининг раҳбари майор Жон Питкерн «Тарқалинг, лаънати исёнкорлар! Эй, итлар, қочинг!», деб ҳайқиради. Бирдақиқачиларнинг раҳбари капитан Жон Паркер ўз аскарларига биринчи бўлиб ўқ узмасликни тайинлади. Америкаликлар тарқала бошлаганида кимdir ўқ узиб, британиялик бир аскарни ярадор қилди. Инглизлар муншийлардан ўқ узишди, натижага шу бўлдики, мустамлакачилардан 10 киши ярадор бўлди ва 8 нафар киши вафот этди.

Инглиз солдатлари Конкордга киришди ва қуроллар омборини эгаллаб олишди. «Исёнкорларнинг» раҳбарларини эса ушлаб ололмадилар ва ортга қайтдилар. Бу орада Лексингтондаги воқеалар бутун округга тарқалди ва қирол отрядига ҳужум уюштирилди. Қизил кийимдаги британия аскарлари яхши нишон эди. Бу жангда мустамлакалар биринчи бор «тарқалган қатор» тактикасини кўлладилар. Улар уйлар, тўсинлар, шоҳ-шаббалар орқасига беркинар эдилар.

Қирол отряди 223 кишини йўқотиб, орқага қайтишга мажбур бўлди. Америкаликлар эса 93 кишидан айрилди.

Америка мустақиллиги учун кураш ана шундай бошланди. 1775 йил 10 май куни Пенсильваниянинг Филадельфия шаҳрида Иккинчи Контиентал Конгресс йиғилди. 15 майда Конгресс уруш бошлашга овоз бериб, мустамлака ҳалқ лашкарини расман континентал хизматга ўтказди ва виржиниялик полковник Жорж Вашингтонни (1732–1799) Америка қуролли кучларининг Бош қўмондони этиб тайинлади. Нима учун айнан уни? Биринчидан, у хиндулар ва французларга қарши ҳарбий ҳаракатларда қатнашган, қобилиятли ҳарбий бошлиқ сифатида ном чиқарган эди. Иккинчидан, у бой эди, ишда омади чопарди, қарор қабул қилишда мустақил эди. Бунинг учун уни ҳурмат қилишарди, пуританларда шахснинг бундай хислатлари юкори баҳоланарди.

Республикачилик кайфияти аҳолининг турли қатламларини қамраб олди. Метрополиядан ажралишга чакирувчи адабиётлар пайдо бўлди.

Мустақиллик Декларацияси. Иккинчи Контиентал Конгресс илк бор йиғилган кундан кейин бир йил ўтгач, 1776 йилнинг 10 май куни Буюк Британиядан ажралишга чакирувчи қарор қабул қилинди ва гап расмий баёновт чиқаришга тақалди. 7 июнь куни, виржиниялик Ричард Хенри Ли «Мазкур қўшма мустамлакалар, лозимий равишда, озод ва мустақил штатлар» эканлигини эълон қилувчи қарорни муҳокамага кўйди. Расмий баёновтнома тайёрлаш учун виржиниялик Томас Жефферсон (1743–1826) бошчилигига беш кишидан иборат комиссия тайинланди.

1776 йил 4 июлда қабул қилинган ва асосан Жефферсон законватининг маҳсули бўлган Мустақиллик Декларацияси янги давлатнинг қарор топганлигини эълон қилибгина қолмасдан, балки шу билан бирга бутун дунё узра ҳаракатчан кучга айланиши муқаррар бўлган озод инсон дунёқарашини ҳам татбиқ этди. Унда, жумладан: «Биз, қуйидаги ҳақиқатларни ўз-ўзидан аён деб биламиз: – барча инсонлар тенг қилиб яратилган ва Яратувчи томонидан муайян дахлсиз хукуклар билан тақдирланган бўлиб, шулар жумласига Яшаш, Озодлик ва Бахт-саодат сари интилиш хукуклари киради. Мазкур хукукларни муҳофазалаш учун кишилар орасида хукуматлар таъсис этилиб, улар ўз ҳокимиятини бошқарувчиларнинг розилиги билан амалга оширади ва агарда хукуматнинг бирон шакли ана

шу мақсадларга хилоф келса, бундай ҳукуматни ўзгартириш ёки бекор қилиш ҳамда ўз хавфсизлеклари ва баҳт-саодатини рўёбга чиқариш учун ўзларига энг мақбул бўлиб кўринган тарзда унинг пойдеворини шундай тамойиллар асосида қуриш ва куч-қудрат ваколатлари шундай шаклга асосланган янги ҳукумат барпо этиш халқ ҳуқуқидир.

...Биз, Америка Кўшма Штатларининг вакиллари... халқ номидан ва унинг ваколати билан эълон қиласизки, бу бирлашган мустамлакалар аслида ҳам ва ҳақ-ҳуқуқка кўра ҳам озод ва мустақил Штатлар бўлмоғи лозим. Шу дақиқадан бошлаб улар Британия таҳтига ҳар қандай мансубликдан озод қилинадилар. Озод ва мустақил Штатлар сифатида улар уруш эълон қилиш, тинчлик ўрнатиш, иттифоқларга кириш, савдо юритиш ва мустақил давлат нима қилиши мумкин бўлса барчасини амалга ошириш борасида тўла ҳуқуқларга эгадирлар» дейилган эди.

Мазкур Декларация француз ва инглиз Маърифатпарварлик фалсафасидан илхом олди, бироқ бир манба – Жон Локкнинг «Ҳукумат ҳақида икки рисола»си – алоҳида дикқатга сазовордир. Локк инглизларнинг анъанавий ҳуқук назариясини олиб, уларни бутун инсониятнинг табиий ҳуқуқлари даражасида умумлаштирган эди. Декларациянинг дебочаси Локкнинг хизмат юритиш борасидаги ижтимоий келишув назариясига ҳамоҳангдир.

Жефферсон Жан Жак Руссо таълимотига ҳам қўшиларди ва Декларация лойиҳасига қулликни бекор қилиш ҳақида модда киритган эди. Лекин лойиҳа таҳрир килинганда маҳсус комиссия томонидан бу модда олиб ташланди.

Мустақиллик Декларациясида давлат қурилишининг асоси сифатида халқ суверенитети принципи эълон қилинди, халқнинг золимларга қарши исён қилиш ҳуқуқи, яшашга, эркинликка, тенгликка бўлган ҳуқуқи тасдиқланди. АҚШда ҳар йили 4 июль мустақиллик куни сифатида нишонланади.

Америка инқилобининг характери ва хусусиятлари. Шимолий Америкада мустақиллик учун олиб борилган уруш айни пайтда буржуа инқилоби бўлиб, у икки вазифани ҳал қилиши лозим эди: миллий мустақилликка эришиш ва Америкада капиталистик муносабатлар ривожланишига халақит бераётган тўсикларни йўқ қилиш. Юз бераётган ўзгаришларнинг марказида ер муаммоси туради. Қишлоқ хўжалигида феодал тартиб белгиларини тугатиш, аҳолига

ғарбий ерларга эркин бориши учун йўл очиш, плантацияли қулчилик тизимини йўқ қилиш зарур эди.

Аҳолининг қайси катламлари мустақиллик учун урушни ёқлаб чиқишид?

Барча мустамлакачилар икки лагерга – ватанпарварлар ва лоялистлар¹га бўлинарди.

Ватанпарварлар лагерига майда ҳунармандлар, ёлланма ишчилар, миллий буржуазиянинг турли табакалари, жануб плантаторлари киради. Улар ғарбдаги ерлар ҳисобига ўз мулкларини кенгайтиришдан манфаатдор эдилар.

Лоялистлар лагери Буюк Британия киролидан ер олган феодал аслзодалар, англикан черкови руҳонийлари, мустамлака маъмурияting нинг кўп сонли амалдорлари, Англия бозорлари билан боғланган савдогарларнинг бир қисмидан иборат эди. Инқилобнинг лидерлари буржуазия ва қулдор-плантаторлар бўлиб, ҳаракатга келтирувчи кучи халқ оммаси эди.

Инқилобнинг асосий хусусияти шу эдики, у миллий озодлик уруши шаклида ўтди.

Уруш давридаги демократик ўзгаришилар. Уруш даврида аграр муносабатлар ўзгарди: майда ер эгалари ижара учун пул тўламай қўйдилар; лоялистларга қарашли бўлган катта ер майдонлари мусодара қилинди ва кичик участкаларга бўлиниб сотилди; Аллеген тоғлари ортидаги ерларга қўйилган тақиқни ҳукумат қонунсиз деб эълон қилди, Штатлар кенгашлари эса у жойларда аввал эгаллаб олинган ерларни тан олдилар. Жефферсон ҳар бир ерсиз кишига Ғарбдаги ерлар ҳисобидан бепул участка беришни таклиф қилди.

Уруш ҳаракатларининг бориши. Ҳарбий ҳаракатлар асосан мамлакат шимолида бўлди. Инқилоб даврида мустамлакачилар армияси катта қийинчиликларни бошидан кечирди. Аскарлар ҳарбий ишга деярли ўргатилмаган, курол-аслаҳа, ўқ-дори, озиқ-овқат этишмас эди.

1776 йилнинг августида Нью-Йоркнинг Лонг-Айленд жангиди Вашингтон армияси оғир ахволда қолди ва Бруклиндан Манхеттен қирғоғига чекинди. Британия генерали Уильям Хоув журъатсизлик қилиб, америкаликларнинг чекинишига йўл қўйди, бирорқ ноябрда Манхеттен оролидаги портни ишғол қилди. Нью-Йорк шахри уруш тугагунга қадар инглизлар назорати остида қолиб кетди.

¹ Лоялист – ўзини мавжуд қонун доирасида тутувчилар.

1776 йил 26 декабрь куни Вашингтон армияси Трентон ҳарбий гарнizonига ҳужум қилиб, 900 дан ортиқ британияликни асир олди. 1777 йил 13 январда Вашингтон британияликларга Пристонда ҳужум қилди ва расман Британия томонидан ишғол қилинган худуднинг аксарият қисмини қайтариб олди. Трентон ва Пристондаги ғалабалар американликларнинг сўниб бораётган руҳини жонлантириди.

1777 йили генерал Хоув Америка армиясини Пенсильваниянинг Брандивайн деган жойида мағлубиятга учратди ва Филадельфияни ишғол этиб, Континентал Конгресс аъзоларини қочишга мажбур қилди. Вашингтон армияси эса 1777–1778 йилларининг киши ойларини озиқ-овқат, кийим-кечак ва таъминотдан қийналган ҳолда, Пенсильваниянинг Форг водийсида ўтказишга мажбур бўлди. Армиядаги қийинчиликка қарамасдан, 1777 йил урушда бурилиш ясалди. Канададан Нью-Йорк яқинидаги инглиз қўшинлари билан бирлашиш учун йўл олган генерал Бергойн бошчилигидаги Британия армияси Саратога (Нью-Йорк яқини) остонасида генерал Хорацио Гейтс қўмондонлигидаги Америка қўшини томонидан куршовга олинади. 1777 йил 17 октябрда Бергойн бутун армияси билан таслим бўлади. Оқибатда, Британия қўшинларининг олтига генерали, 300 та бошқа офицерлари ва 5500 та кичик офицерлари ва аскарлари курбон бўлган эди. Бу орада қулай сиёсий имконият пайдо бўлганлигидан фойдаланиб 1776 йили Парижга юборилган Бенжамин Франклин Франция мададига эришади.

1776 йилнинг май ойидан Франция Америкага ёрдам бера бошлади ва Америкага уруш анжомлари ортилган 14 та кема юборилди. Британия кучлари Саратогада мағлубиятга учрагач, Франция ўзининг азалий душманини жиддий равишда заифлаштиришга ва Етти йиллик уруш (Франция ва ҳиндулар уруши) оқибатида йўққа чиқарилган қудрат мувозанатини қайта тиклашга қулай имконият борлигини англади. 1778 йил 6 февралда Америка ва Франция «Дўстлик ва Тижорат Битими»ни имзолади: унга кўра Франция Америка Қўшма Штатларини тан олди ва савдо-сотик шартномаларини таклиф этди. Шунингдек, улар Иттифоқ Битимини имзолашди, унга биноан, агарда Франция урушга қўшилса, Америка ўз мустақиллигини қўлга киритмагунга қадар, у ўз қуролли кучларини олиб чиқиши ёки иттифоқдошининг розилигисиз Британия билан тинчлик сулҳи тузиши мумкин эмасди ва ҳар бир томон Америка-

даги худудларнинг дахлсизлигини кафолатлаган эди. Бу битим Америка Кўшма Штатлари 1949 йилга қадар имзолаган ягона иккита-рафлама мудофаа шартномаси бўлиб қолди.

Франция-Америка иттифоқи оқибатида тўқнашув қамрови кенгайди. 1778 йилнинг июнида Британия кемалари Франция кемаларига қарши ўт очди. 1779 йили Етти йиллик уруш мобайнида Британияга ўтиб кетган худудларни қайтариш умидида Испания бу урушда Франция тарафини олди. 1780 йили Британия америкаликлар билан савдо муносабатларини тўхтатмаганлиги учун Голландияга уруш эълон қилди. Англияning заифлашувидан манфаатдор Россия ва Испания ҳам АҚШга нисбатан дўстона позицияни эгалладилар. Франция бошлигидаги Европа давлатларининг мазкур иттифоқи Британия учун Америка мустамлакаларига нисбатан хавфли эди. Бу орада, Жанубий Каролинада жанг ҳаракатларини олиб бораётган Британия генерали Корнуоллис бошлигидаги қўшинлар 1781 йили Коупенси деган жойда қаттиқ мағлубиятга учради. Шундан сўнг ҳам уруш ҳаракатлари яна икки йилга яқин давом этди. 1782 йили инглиз қўшинларининг асосий кучлари америкаликлар ва француздарга Йорктаун яқинида таслим бўлгандан сўнг Британиянинг янги ҳукумати Парижда тинчлик музокаралари ўтказишига қарор қилди. Музокараларда Америка томонидан Б.Франклин, Ж.Адамс¹, Ж.Жей² қатнашдилар. 1783 йил 15 апрелда томонлар маъқуллаган Париж сулҳи Британия ва унинг собиқ мустамлакалари томонидан 3 сентябрь куни имзоланди. Битимга мувофиқ Буюк Британия Америка Кўшма Штатларининг тузилганлигини, унинг мустақиллиги, озодлиги ва суверенитетини тан олди ҳамда АҚШ ерлари фарбда Миссисипи дарёсигача, шимолда Канадагача ва жанубда Испанияга қайтарилган Флоридагача кенгайди.

Уруш тугади. Олдинда эса давлатни жипслаштириш, унинг иқтисодий аҳволини яхшилаш вазифаси турарди. Урушдан кейинги йилларнинг барча иқтисодий оғирлиги халқ зиммасига тушди. Мамлакатда уруш туфайли хонавайрон бўлган фермерлар ва ишчиларнинг қўзғолонлари бўлиб ўтди. Мустақиллик учун уруш ветерани, фермер Даниэль Шейс бошлигидаги 1786–1787 йилла-

¹ Жон Адамс (1735–1826) – АҚШ мустақиллиги учун курашчи, машҳур давлат арбоби, биринчи вице-президент, АҚШ нинг иккинчи президенти.

² Жон Жей (1745–1829) – АҚШ конституциясининг муаллифларидан бири, давлат арбоби, АҚШ Олий судининг биринчи раиси.

ри кўтарилиган қўзғолон энг катталаридан бири эди. Олдингилари каби бу қўзғолон ҳам бостирилди.

1787 йилги конституция. Инқилоб муваффакиятлари американкларга Мустақиллик Декларациясида ифодаланган орзу-умидлари ва ғояларига қонуний шакл бериш ва ўз норозиликларини штат конституциялари воситасида қондириш имкониятини берди. Мустақиллик Декларацияси қабул қилингандан сўнг бир йил ўтгач, учта штатдан бошқа барчаси ўз конституцияларини қабул қилдилар.

Янги конституциялар демократик ғоялар таъсирини акс эттирган ва инглиз таомилининг бой пойдеворига таянган бўлиб, уларни ўтмиш билан боғловчи ришталар кескин қирқилмади, аммо хар бири республикачилик рухи билан суғорилган эди.

Англия билан уруш бошланишидан олдин маҳаллий ассамблейлар Иттифоқ тузишнинг Олбани режасини 1754 йили рад этишган эди. Бироқ инқилоб пайтидаги ўзаро ёрдам бундай иттифоқнинг са-марадорлигини исботлади. 1776 йили Жон Дикинсон «Конфедерация ва Абадий Иттифоқ Моддалари»ни ишлаб чиқди. Континентал конгресс бу моддаларни 1777 йили қабул қилди ва улар 1781 йили кучга кирди. Бироқ мазкур моддалар томонидан жорий этилган хукумат шакли қатор камчиликларга эга эди. Маҳаллий хукуматнинг тарифлар ўрнатиш, тижоратни тартибга солиш ва солиқлар йиғиши борасидаги ваколати заиф эди. Халқаро алоқалар соҳасида ҳам назорат мустақиллиги этишмаслигидан қатор штатлар хорижий давлатлар билан ўзлари музокаралар бошлаб юбордилар. Тўқизта штат ўз армияларини шакллантирди ва қатор штатлар ўз ҳарбий-денгиз қуролли кучларига эга бўлди. Арапаш-куралаш танга пуллар муаммоси ва штат ҳамда давлат миқёсидаги қофоз пулларнинг чалкаш хилма-хиллиги мавжуд бўлиб, барчаси тез қадрсизланиб борарди.

Урушдан сўнг юзага келган иқтисодий қийинчиликлар ўзгаришлар киритишни тақозо этди. Чунки Жорж Вашингтон ёзганидек, штатлар факат «кумдан тўқилган арқон» ёрдамида бирлаштирилган эди.

Урушдан олдин ҳал этилмай қолган муаммолардан бири – штатларнинг ерларини кенгайтириш ва Аллеген тоғларидан ғарбда жойлашган ерларни бошқариш муаммоси бўлиб, бу 1787 йили эълон қилинган Шимоли-Гарбий Ордонанс (декрет) деб аталувчи хужжатда ўз ечимини топди. Ордонанс орқали ўрнатилган ўз-ўзини бошқаришнинг чекланган тизимиға биноан бу ерлар яхлит худуд

бўлиб, Конгресс томонидан тайинланувчи губернатор ва судьялар томонидан бошқариладиган бўлди. Штатлар (Нью-Йорк, Виржиния) бу ерларга ўз даъволаридан уларни Кўшма Штатларга ўтказиш орқали воз кечди. Худуд аҳолиси сайлов ёшидаги 5000 озод эркакларга етгач, икки палатали қонун чиқарувчи тармоққа айланиши ва қуий палатани ўзи сайлаши лозим эди.

Бу худудларда бештадан ортиқ бўлмаган ва учтадан кам бўлмаган штатлар шаклланиши керак эди ва улардан бирининг аҳолиси 60 000 озод кишига етса, у «асл штатлар билан барча жиҳатдан тенг мақомда» Иттифоққа қўшилиши лозим эди. Ордонанс фуқаролик хукуклари ва эркинликларини кафолатлади.

Янги сиёсат Америка мустамлакалари метрополия манфаатлари учун мавжудлиги ва сиёсий жиҳатдан тобе, ижтимоий жиҳатдан эса паст эканлиги ҳақидаги асрий тушунчани рад этди. Бу назария давлатнинг кенгайишини билдириб, тенглик манфаатлари билан имтиёз сифатида эмас, балки хукуқ тарзида тақдимлаш тамойилига алмаштирилди. Шимоли-Гарбий Ордонанс Америка халқ сиёсатининг асослари шаклланишига таъсир қилди.

Бироқ Ордонанс штатлар ўртасида пайдо бўлаётган бошқа кўплаб муаммоларни ҳал қилмади. 1786 йили Мэриленд ва Виржиния штатлари орасида Потомак дарёсидаги кема қатнови бўйича муаммони ҳал этиш учун йиғилган беш штат вакиллари, Александр Гамильтон¹ таклифига кўра бу муаммони ваколатли йиғинда ҳал этишга келишди.

1787 йили майда Филадельфияда бошланган Федерал Конвент йиғинига штатлардан сайланган вакиллар сифатида кўзга кўринган арбоблар тўпланди. Улар орасида Жорж Вашингтон, Жэймс Уилсон², Бенжамин Франклин, Жэймс Мэдисон³, Александр Гамильтон каби машҳур кишилар бор эди. Франция ва Буюк Британияга элчи қилиб юборилган Томас Жефферсон ва Жон Адамслар Конвент ишида қатнаша олмадилар. Умуман, 55 та вакил сайланган бўлиб, улар орасида ёшлар анчагина эди (вакилларнинг ўртacha ёши 42).

¹ Александр Гамильтон (1755–1804) – АҚШ мустакиллиги учун курашчи, давлат ва сиёсат арбоби, АҚШ нинг жадал савдо-саноат ривожланиш дастури муаллифи, биринчи молия вазири.

² Жон Уилсон (1741–1798) – шотландиялик юрист, АҚШ нинг давлат арбоби, Мустакиллик декларациясига имзо чеккан, АҚШ конституциясини ишлаб чиқишида катнашган, Олий суднинг биринчи судьяларидан бири.

³ Жэймс Мэдисон (1751–1836) – АҚШ нинг 4-президенти, давлат ва сиёсат арбоби.

Конвент фақат Конфедерация моддаларига қўшимчалар киритиш ваколатини олган эди, бироқ муҳокама давомида давлат ва ҳукуматнинг тамомила янгича шаклини барпо этишга киришилди. Фикр-мулоҳаза ва тортишувлар 16 ҳафта давом этди. Баҳслар асосан қонун чиқарувчи орган-Конгресснинг, федерал ҳукуматнинг, суднинг мақоми ва штатлар билан марказий ҳокимият ўртасидаги муносабатлар хусусида борди. Натижада, 1787 йил 17 сентябрда шу баҳс ва тортишувлар маҳсули – Конституция қабул қилинди. Конституцияни мажлисда қатнашаётган 42 вакилнинг 39 таси имзолади. Бироқ бу хужжат кучга кириши учун ҳали ҳалқ томонидан ошкора сайланган штатлар конвентларининг розилиги зарур эди.

Конвент қарорига биноан 13 штатдан тўққизтасининг конвентлари тасдиқлагач, Конституция кучга кириши керак эди. 1788 йили июнда талаб этилган тўққизта штат Конституцияни тасдиқлади, бироқ йирик штатлардан Виржиния ва Нью-Йорк ўз тасдигини бермади.

Кучли марказий ҳокимиятга қарши қарашлар Конституцияга қарши чиққанларнинг асосий сабаби эди. Шахс ҳукуқлари ва эркинликларининг камситилишидан чўчиш эса барчани бир хилда ташвишга солар эди. Конституция шахс ҳукуқларини қайд этмаганлиги сабабли Виржиния вакили Патрик Хенри (1736–1799) уни имзоламаган эди. Конституцияга қўшимча «Ҳукуқлар тўғрисида билль» таклиф этилганлиги туфайли 25 июнь куни Виржиния конвенти, Александр Гамильтон, Жон Жэй ва Жеймс Мэдисонларнинг саъй-ҳаракатлари билан 26 июль куни Нью-Йорк конвенти Конституцияни тасдиқлади.

1789 йил сентябрда Нью-Йоркда тўпланган Биринчи Конгресс конституцияга қўшимчаларни қабул қилди. 1791 йил декабрида 10 та қўшимчани Конституциянинг таркибий қисмига айлантириш учун зарур даражадаги штатлар розилиги олинди. Бу қўшимчалар «Ҳукуқлар тўғрисидаги билль» сифатида тарихга кирди. Ҳукуқлар тўғрисидаги билль қабул қилинган даврдан бери Конституцияга яна 16 та қўшимча киритилди. Уларнинг аксарияти Ҳукуқлар тўғрисидаги билль ўрнатган шахс ҳукуқлари ва эркинликларини кенгайтирган.

Конституция АҚШда республика тузумини ўрнатди. Ижро ҳокимияти бошида 4 йил муддатга сайланадиган ва кенг ваколатларга эга бўлган президент лавозими жорий қилинди. Президент

армия ва флотга кўмондонлик қилас, халқаро шартномалар тузар, олий мансабдорларни тайинлар эди. Биринчи Президент этиб, 1789 йил 30 апрель куни бўлиб ўтган сайловларда Жорж Вашингтон сайланди. Олий қонун чиқарувчи орган АҚШ Конгресси бўлиб қолди. У икки палатадан иборат эди – юқори (сенат) ва қуи (вакиллар палатаси). Сенатга ҳар бир штатдан 2 киши сайланарди, вакиллар палатасига эса депутатлар штат аҳолисининг сонига мос равиша сайланадиган бўлди. Конгресс тез суръатлар билан департаментлар (вазирликлар)ни барпо қилди ва барча департаментларнинг раҳбарларидан таркиб топган АҚШ Президентининг Кабинети вуждга келди.

Бош судья ва бешта ёрдамчи судьялардан таркиб топган Олий Суд ҳамда учта округ судлари ва 13 та худудий судларни таъсис этиш орқали Конгресс федерал суд тармоғини ҳам таъсис этди. Олий Суд катта ваколатларга эга бўлди, унинг аъзолари президент томонидан бир умрга тайинланар эди. Олий Суднинг вазифаси қонунларнинг Конституцияга мос келишини кузатишдан иборат қилиб белгиланди. Штатларда қонунчилик кенгашлари сакланиб қолинди, улар маҳаллий ишларни бошқариш хуқуқига эга эдилар.

Айни пайтда, мамлакат событ равиша ўсиб, Европадан келувчи муҳожирлар сони ҳам ортиб борди. Америкаликлар гарб томон силжишиди: Янги англияликлар ва пенсильванияликлар Оҳайо томон; виржинияликлар ва каролиналиклар Кентукки ва Теннесси томон. Нью-Йорқ, Пенсильвания ва Виржиниядан юқоридаги бой водий ерлари тез фурсатда буғдой етиштирувчи улкан далаларга айланди.

Кўп анжомлар ҳамон уйда ишлаб чиқарилишига қарамай, са ноатлаштириш тез ривожланиб борди. Массачусетс ва Род-Айленд тўқимачилик саноатининг пойдеворини яратди; Коннектикут тунукдан ясалган анжомлар ва соатлар чиқара бошлади; Нью-Йорқ, Нью-Жерси ва Пенсильвания қофоз, шиша ва темир ишлаб чиқарди. Кемасозлик шу қадар ривожландики, денгизда Кўшма Штатлар Британиядан сўнг иккинчи ўринга кўтарилди.

Янги ерлар ўзлаштирилиб, учта штат – 1791 йили Вермонт, 1792 йили Кентукки ва 1796 йили Теннесси ташкил топди.

Ташқи сиёсатда оқилона иш тутилди. Француз инқилоби ва унинг оқибатлари туфайли Европада бошланиб кетган урушда қатнашмаслик учун АҚШ 1778 йили Франция билан имзоланган ўзаро Битм шартларини бекор қилди. Ж. Вашингтон АҚШ уруш

ҳолатидаги давлатларга нисбатан дўстона ва бетараф бўлишини эълон қилди.

1797 йили Ж. Вашингтон президентликка қайта сайланиш тақлифини қатъян рад этиб истеъфога чиқди. Жон Адамс президент этиб сайланди. Буюк Британия ва Франция билан муносабатлар янада чигаллашиб, 1799 йили Франция билан қатор дengиз тўқнашувларидан сўнг уруш мукаррар бўлиб кўринди. Шунга қарамасдан мамлакатнинг иқтисодий қудрати ва сиёсий салоҳияти ортиб борди.

* * *

Хуллас, мустақиллик ва инқилоб саноат ва савдони ривожлантиришдаги барча тўсиқларни олиб ташлади, мамлакат ичкарисида эркин рақобатга, иқтисодий ҳаётда ташаббусга, фаолликка, ишбильармонликка кенг йўл очилди. Замондошларнинг таъкидлашларича, инсон баҳтигининг асоси ўз мулкидан эркин фойдаланиш бўлиб қолди. Бироқ жанубий штатларда плантацион қуллик ҳали сақланиб қолаётган эди.

Мустақиллик Декларацияси ва АҚШ Конституцияси Европа-нинг илфор тафаккурига катта таъсир кўрсатди, уларда илгари сурилган ғоялар умуминсоний характерга эга бўлиб, кўплаб халқлар курашининг мазмунига айланиб қолди.

XVII боб бўйича саволлар

1. Шимолий Америкага келган дастлабки кўчкинчилар ҳаётида пуританлик принциплари қандай роль ўйнади?
2. Англия мустамлакаларида ижтимоий ва иқтисодий ҳаётнинг шаклланиши қандай нормаларга асосланган эди?
3. Америкада янги миллатнинг шаклланишига қандай факторлар асос бўлди?
4. Шимолий Америкада мустақиллик учун курашнинг бошланишига нималар сабаб бўлди?
5. АҚШ Мустақиллик Декларацияси қандай ғоявий манбаларга таянади ва кайси принципларни илк бор эълон қилди?
6. АҚШ Конституциясининг асосий ғоялари нималар эди?
7. АҚШ ҳукуматининг қандай асосий тадбирлари унинг худудий кенгайишига ва иқтисодий юксалишига олиб келди?
8. АҚШ Конституциясига қўшимча сифатида киритилган «Ҳукуклар тўғрисида билль»нинг мазмуни ва аҳамияти нимада?

XVIII БОБ. XVI–XVIII АСРЛАРДА ЛОТИН АМЕРИКАСИ МАМЛАКАТЛАРИ

Мустамлакачилик тузуми ва XVI–XVIII асрлардаги озодлик ҳаракатлари. Европада вужудга келган индустрисал цивилизациянинг мағкуравий асоси маърифатчилик бўлиб, у аста-секин бошқа мамлакатлар ва қитъаларга ҳам тарқалди. Янги қадриятлар – хокимиятнинг бўлиниш принципи, фуқароларнинг қонун олдида тенглиги, сўз, йигилишлар ва партиялар тузиш эркинлиги, бошқача фикрловчиларга токат, Европа давлатларининг Лотин Америкасидағи¹ мустамлакаларида ҳам аста-секин шаклдана борди.

Шимолий Америкадаги инқилоб ҳамда Лотин Америкаси мамлакатларидаги инқилобий ва озодлик ҳаракатлари янги тартибга ўтиш барча мамлакатлар ва халқлар учун бир хилдаги йўналиш эканлигини кўрсатди.

Бошқариши тизими. Лотин Америкаси халқларини бўйсундириш Колумб Американи очгандан сўнг (1492) дарҳол бошланиб кетди. Европаликлар босиб олинган ерларда қаттиқ мустамлакачилик тартибини ўрнатдилар. Кенг мустамлакаларни эгаллаб олган испания-ликлар у ерларда ҳам худди ўз ватанларидагидек бошқариш тизими ни жорий қилдилар.

Бу пайт Испанияда абсолют монархия хукм сурарди. Худди шу тарзда ҳар бир мустамлакада ҳам вице-қирол ёки генерал-капитан бутун хокимиятга эга эди. Уларга вилоятларнинг губернаторлари бўйсунардилар. Шахар ва қишлоқ округларини коррехидорлар ва алкольдлар бошқаради. Хинду қишлоқларининг тепасида эса касиқлар бўлиб, улар хокимияти наслий эди. Вице-қироллар ва генерал-капитанлар кенг хукуқларга эга бўлиб, улар губернаторлар ва бошқа амалдорларни тайинлар, хазина ва қуролли кучларни бошқарап, турли хил фармонлар чиқарап эди. Бундан ташқари испан мустамлакаларининг вице-қироли Испания қироли номидан руҳонийларнинг тайинланишини тасдиқлар ҳам эди.

¹ Лотин Америкаси мамлакатларига Жанубий Америкада ва Шимолий Американинг жанубий кисмида жойлашган давлатлар, шунингдек, Кариб денгизидаги ороллар киради. Бу ном европаликлар боскинидан кейин бу ерда лотинчадан келиб чиқкан испан, португал, француз тиyllарида сўзлаша бошлаганлари учун берилган. Аввал «Ибероамерика», «Индоамерика», «Испан Америкаси» терминлари ҳам кўлланилган. Бугун БМТ нинг хужжатларида бу худуд «Лотин Америкаси ва Кариб мамлакатлари» деб юритилади.

Испан Америкаси шаҳарларида ҳам маҳаллий ҳокимият органдари мавжуд бўлиб, улар асосан суд ишлари ва ободонлаштириш билан шуғулланарди.

Хўжалик ҳаёти. Мустамлакаларнинг бутун иқтисодий ривожланиши Испания ва Португалия манфаатларига бўйсундирилган эди. Метрополиялар учун Янги Дунё мамлакатлари олтин, кумуш ва плантацияларда етишириладиган маҳсулотлар манбаи эди, холос.

Мустамлака ҳукуматлари маҳаллий саноатнинг шаклланиши учун шароит яратмасдилар, мануфактуралар қурилишига тўсқинлик киларди.

Мустамлакаларнинг метрополиялар билан рақобатлашувининг олдини олиш мақсадида маҳаллий ҳокимият бу ерларда узум, олхўри етиширишни, ипак қурти боқишини тақиқлаганди. Узум токлари ва олхўри дараҳтлари кесиб ташланар эди. Мустамлакаларда факат Испания ва Португалияда етиширилмайдиган мева дараҳтларини ўстиришга рухсат бериларди. Бу каби чеклашлар мустамлакаларда хўжаликнинг тараққий этиши учун катта тўсиқ бўлаётган эди.

Савдо. Мустамлакалардаги аҳолининг асосий қисми жуда камбағал бўлганлиги сабабли ички бозор ҳам тор, кам тараққий этган эди. Қирол, черков, латифундияларнинг эгалари фойдасига олинадиган сон-саноксиз тўловлар аҳолида энг зарур маҳсулотларни сотиб олиш учун ҳам маблағ қолдирмасди. Бунинг устига мустамлакаларда спиртли ичимликлар, тамаки маҳсулотлари, туз, қофоз ва шу каби бозоргир маҳсулотларнинг савdosига давлат монополияси ўрнатилган эди.

Мустамлакалар бошқа давлатлар билан мустақил савдо алоқаларини ўрнатиш ҳуқуқига эга эмасдилар. Факат XVIII асрнинг охириги чорагига келиб испан ва португал мустамлакалари Шимолий Америкадаги инқилобий воқеалар таъсири остида бир-бири билан ўзаро савдо қилиш ҳуқуқини қўлга киритдилар. Шу даврда устама солиги ҳам камайтирилди.

Мустамлакалардаги ҳиндуларнинг аҳволи. Америка эгаллангандан кейин мустамлакалардаги маҳаллий аҳоли – ҳиндулар ҳақ-ҳуқуқсиз қулларга айлантирилди. Ҳиндулар учун янгича ҳаёт тарзига кўниши жуда оғир кечди. Конлар ва плантациялардаги шафқатсиз, оғир меҳнатдан, очлик ва касалликлардан улар юзлаб ва минглаб ҳалок бўлдилар.

Европаликлар янги Дунёга ўзларининг илфор гоялари билан бирга турли касалликлар – вабо, ўлат ва тифни ҳам олиб келдилар. Касалликлар бутун ҳудудлардаги аҳолини қириб ташларди. Махаллий аҳолида бу номаълум касалликларга қарши на табиий, на сунъий кўнникма йўқ эди. Шу сабабли Марказий Мексикада XVI асрда маҳаллий аҳолининг сони 10 баробар камайди. Бразилияда XVI аср охирига келиб маҳаллий хиндулар деярли тўлиқ қирилиб кетганди. Тирик қолганлари европаликлар бора олмайдиган ерларда яшириндилаш.

Хиндуларнинг бу аянчли аҳволига қарши биринчилардан бўлиб машхур испан гуманист-ёзувчи Бартоломео де Лас Каас (1474–1566) чиқди. 1552 йили унинг «Ҳиндистоннинг вайрон қилиниши ҳақида қисқача хабар» номли китоби чоп этилди. Бу китобда жасоратли ёзувчи мустамлакачиларнинг хиндуларга қарши килган жиноятларини очиб ташлашга ҳаракат қилди ва маърифатли илфор кишиларнинг эътиборини қирилиб кетаётган аҳолининг аянчли аҳволига қаратди.

Ҳиндуларнинг тезлик билан камайиб кетаётганлиги ишчи кучининг етишмаслигини келтириб чиқариши хавфидан қўрқкан испан ва португал ҳукуматлари маҳаллий аҳолига шафқатсизлик билан килинаётган муносабатларни чеклаш борасида баъзи бир чораларни ҳам кўришди.

Ҳиндуларга нисбатан зулмни чеклаш тўғрисида Испания киролининг фармонларини мустамлакачилар норозилик билан қабул қилдилар.

XVII аср охирига келиб мустамлакаларда ўрнатилган тартиб яна юз эллик йил сақланиб турди. Ҳиндулардан жон солиги олинар, уни йиғишда амалдорлар тез-тез ғирромликка йўл қўярдилар. Ҳиндулар ҳокимиятнинг рухсатисиз яшаш жойларини ўзгартира олмасдилар. Ҳар бир жамоа кон ва плантацияларда ишлаш, мол боқиш, бино, кўпприқ, йўллар қуриш учун ўз орасидан 15 ёшдан 60 ёшгacha бўлган маълум сондаги эркакларни ажратиши лозим эди. Улар текин ёки жуда кам иш ҳаққи эвазига чекланмаган вақт давомида ишлар эди.

Европаликлар ер майдонларини кенгайтириш учун ҳиндуларни бу ерлардан ҳайдаб юборишарди, улар ернинг янги хўжайнларига мардикор, батрак бўлиб ёлланишга мажбур эдилар. Баъсан ҳиндулар ўзларининг ерларини янги хўжайндан ижарага олар ва бунинг учун ҳосилнинг маълум бир қисмини унга берар эди. Уларнинг кўпчилиги

вақти билан ерга бириктирилган наслий қулларга айланарди. Кредитордан олган қарзлар эвазига юз берадиган бундай қарамлиқ авлодларга ҳам ўтадиган кулликнинг янги шакли эди. Бундай шакл кон ва мануфтураларда ҳам кенг қўлланилди. Ҳиндуларни фақатгина латифундистлар ва қирол ҳокимиюти эмас, католик черкови ҳам қул қилиб олган эди.

Шундай қилиб, XVIII аср охирига келиб ҳиндуларнинг аксарият қисми феодал қарамлиқда эди. Уларнинг асосий қисмини қул қилинган дехқонлар, шунингдек, кон, мануфтура, хунармандчилик устахоналарининг ишчилари, юк ортувчилар, уй хизматкорлари ташкил қиласиди. Шу билан бир қаторда бориш қийин бўлган жойларда босқинчилар ҳокимиютини тан олмаган ва уларга қаттиқ қаршилик кўрсатаётган қабилалар ҳам бор эди. Баъзи бир вилоятларда эркин дехқон жамоалари ҳам сақланиб қолган эди.

XVII–XVIII асрларда маҳаллий аҳолининг камайиб кетганлиги, ишчи кучига талабнинг ортиб бораётганлиги сабабли Африкадан негр-қулларни олиб келиш бошланди. Бу даврда Лотин Америкасига миллионлаб африкалик қуллар тўхтовсиз олиб келинган бўлса ҳам, оғир меҳнат, бегона иқлим ва касалликлар сабабли улар орасида ўлим юқори дараҷада бўлиб, африкаликлар сони кўпчилик мустамлакаларда амалда кўпаймади.

Негр-қулларнинг меҳнати биринчи навбатда шакарқамиш ва пахта плантацияларида қўлланилар эди. Кубада шакар қамишни йиғиб олиш мавсумида қуллар суткасига 18–20 соатлаб ишлар ва фақат икки мартағина овқатланар эди. Плантацияларнинг эгалари ва назоратчилар қулларни жазолашнинг шафқатсиз усувларини қўллашарди. Кўплаб қуллар калтаклаш оқибатида ҳалок бўларди.

Табиийки, бундай оғир шароитда қулларнинг қочиб кетиши ҳоллари тез-тез учраб турарди. XVI аср биринчи ярмидаёқ испан мустамлакаларида қочоқ қулларни топиш, ушлаш билан шуғулланувчи фонdlар ташкил қилинган эди. Ҳатто янги касб – қочоқ қулларнинг «овчиси» ҳам пайдо бўлди. Кўлга тушган қулларни уч кун ичида эгасига қайтаришар, алоҳида айборларини эса қамоқка ташларди.

Дастлаб мустамлакаларга кучли эркакларни олиб келишган бўлса, XVIII асрдан бошлаб аёлларни ҳам олиб кела бошлишди.

Мустамлака жамиятининг юқори қатламини метрополиянинг имтиёзли оқ танли вакиллари: наслий зодагонлар ва бой савдогар-

лар ташкил қиласиди. Улар қарийб барча маъмурий, ҳарбий ва черков мансабларини эгаллаб олгандилар. Йирик ерлар ва конларнинг эгалари ҳам улар эди.

Бир поғона пастда креоллар – европаликларнинг мустамлакаларда туғилган «тоза қонли» авлодлари туришарди. Катта ер эгаларининг асосий қисми улар орасидан чиққан, улар зиёлилар ва пастки лавозимлар сафини тўлдиришар, маъмуриятда ва армияда иккинчи даражали мансабларни эгаллашар, савдо билан шуғулланишар, кон ва мануфактураларга эгалик қилишарди. Улар орасида кичик ер эгалари ва хунармандлар ҳам бор эди. Расман креоллар метрополияда туғилганлар билан бир хил ҳуқукка эга эдилар, аммо бошқарув тизимидағи олий лавозимларни уларга беришмас эди.

Мустамлакаларда аралаш никоҳ натижасида пайдо бўлган аҳолининг кўплаб гурухлари мавжуд эди. Улар асосанmetisлар, мулатлар ва самболар бўлиб, фуқаролик ҳуқуқларидан маҳрум, официер ва амалдор лавозимларини эгаллай олмас, маҳаллий ҳокимият органларига сайловларда иштирок этмасди.

Америкадаги янги ирқий гурухлар

Европалик	+	Хинду	=	Метис
Европалик	+	Негр	=	Мулат
Хинду	+	Негр	=	Самбо

Бу тоифанинг вакиллари хунармандчилик, майда савдогарлик ва бошқа эркин қасблар билан шуғулланишар, бой латифундистлар кўлида бошқарувчи, хизматкорлар бошлифи ва назоратчи бўлиб ишлашарди, кичик ер эгаларининг кўпчилигини ташкил қиласиди. Мустамлака даврининг охирига келиб улар пастки диний лавозидагилар сафини тўлдиридилар, peonларга¹, мануфактура ишчиларига ва аскарларга айландилар.

Католик черкови ҳиндулар ва негрлар ўртасида христианлик динини жорий қила бошлади. Бу ердаги христиан руҳонийларнинг баъзилари катта ер эгалари ҳам эди. Лекин аксарият христиан ташвиқотчилари маҳаллий аҳолига сидқидилдан ёрдам берарди – савод ўргатишар, даволаш билан шуғулланишарди.

¹ Peon (испанча – қарздор) – Лотин Америкаси мамлакатларида ер эгаларидан қарздор бўлиб колиши эвазига қўлга айлантирилган деҳкон шундай аталган. Қарздорлик ва ишлаб бериш мажбурияти авлоддан авлодга ўтган ва бутун оиласига бўлган.

XVIII асрга келиб бутун Лотин Америкаси Испания, Португалия, Голландия, Англия ва Франциянинг мустамлакаларига айлантирилди. Бунга қарама-қарши Лотин Америкасининг аҳолиси орасида озод бўлиш, мустақил давлат тузишга интилиш кучайиб бораётган эди.

Озодлик ҳаракатлари. Мустамлакачиларга қарши қўзғолонлар XVI асрда ёки бошланган эди. Биринчилардан бўлиб курашга Куба хиндулари бош кўтардилар (1511–1512). Уларга Атуэй исмли шахс бошчилик қилди. Бу дастлабки қўзғолон нисбатан узоқ давом этган бўлсада, оқибатда тор-мор қилинди. Атуэйни испанлар тутиб олишиб гулханда ёқдилар. Кейинчалик ҳам бундай қўзғолонлар доимий равишда бўлиб турди.

Худди шу тарзда XVI асрда негр-куллар исёни бошланди. Бу курашнинг энг ёрқин тимсоли «Палмарес» (Палма Республикаси) бўлди. Кўзғолончилар Бразилиядага маълум ҳудудни эгаллаб, уни Республика деб эълон қилдилар. Республика 1630 йилдан 1697 йилгacha мавжуд бўлди, курашди. Бу «озод давлат»нинг 20 минг аҳолиси бор эди. Аҳоли асосан қишлоқ хўжалиги ва хунармандчилик билан шугулланишарди, улар ҳатто металлга қайта ишлов беришни ҳам ўзлаштириб олишган эди. «Палма Республикаси»ни Оқсоқоллар Кенгаши бошқарарди.

Негрларнинг озод давлатини йўқотишига қаратилган муваффақиятсиз уринишлардан сўнг XVII аср 80-йилларида унга қарши республикани курсаб турган бутун португал армияси ташланди. Республиканинг сўнгги жангчилари баланд қирдан ўзларини жарларликка ташлаб озод ҳолда ҳалок бўлдилар.

Бутун XVII–XVIII асрлар – хиндулар ва негрларнинг мустамлакачиларга қарши озодлик учун кураш даври бўлди.

Шимолий Америкадаги инглиз мустамлакаларининг мустақиллик учун курашдаги муваффақиятлари ва Буюк Француз инқилоби Лотин Америкаси ҳалқларига ҳам катта таъсир кўрсатди. Франциядаги инқилоб садоси Гаити оролидаги француз мустамлакасида (унинг французча номи – Сан-Доминго) қудратли акс-садо бўлиб жаранглади. Бу ерда 4–5 минг плантаторга 500 минг қул ишларди. Франциянинг Таъсис мажлиси оқ танли бўлмаган барча эркин кишиларнинг европаликлар билан тенг ҳуқуқлилигини эълон қилди, бироқ қулларнинг ахволи ўзгартирилмади. Факат бунга қарши

кўзғолон кўтарилгандан кейин, 1791 йилги декрет билан Франция-нинг ўз худудига қадам қўйган қулларга озодлик берилди.

1791 йил 22 август куни Гайтида бошланган қуллар кўзғолонига Туссен Лювертюр (1743–1803) бошчилик қилди. Болалигидаги бир руҳоний Туссенга ҳисоблаш, ўқиши ва ёзиши ўргатган эди. Плантациядаги иш бошқарувчи эса унга ўз кутубхонасидан фойдаланишга руҳсат берганди.

Туссен «Озодлик ҳамма учун» шиори остида жанг қилувчи ажойиб армия тузди. Кўзғолончилар француз мустамлакачи қўшинларини тор-мор қила олдилар. Қуллар бу муваффакиятлар натижасида озодликка ва плантаторларнинг ерларига эга бўлдилар.

1801 йили Гайти оролида қулликнинг бекор қилинганлигини ва мустамлаканинг барча аҳолиси қонун олдида тенглигини тасдиқловчи конституция қабул қилинди. Конституция хусусий мулкнинг дахлсизлигини таъкидлади, 1-моддасида эса Сан-Доминго Франция империяси таркибидаги мустамлака эканлиги тан олинди. Туссен Лювертюр Сан-Домингонинг умрбод хукмдори деб эълон қилинди. Бироқ Директория даврида Франция ҳукумати Сан-Домингодаги аввалги тартибларни тиклашга уринди ва шу мақсадда оролга 10 минг кишилик жазо қўшинини жўнатди. Кўшин озодликдан руҳланган кўзғолончиларни енга олмади. Шунда француз қўмондонлиги Туссенни музокарага таклиф қилди ва музокара пайтида уни тутиб олиб Францияга жўнатди. У қамоқда 1803 йили вафот этди. Унинг сафдошлари Гайти мустақиллиги учун курашни давом эттирилар.

* * *

Европалик босқинчилар ўрнатган тартиб Америка мустамлакаларининг ривожини тўхтатиб турди, хинду ва негрларнинг инсоний қадр-қимматини хўрлади. Шимолий Америкадаги инглиз мустамлакаларининг мустақиллик учун кураши ва Буюк Француз инқилобининг таъсири остида Лотин Америкасидаги мустамлакаларда мустақилликка интилиш кучайди. Сан-Домингодаги негр-қулларнинг инқилоби ва Лотин Америкасидаги биринчи мустақил давлат Гайтининг тузилиши мустамлакачилик режимига қарши улуғ кураш бошланаётганлигидан нишона эди.

XVIII боб бўйича саволлар

- 1.** Лотин Америкасидаги мустамлакаларни бошқариш тизими қандай ўзига хос жиҳатларга эга эди?
- 2.** Мустамлакалардаги маҳаллий аҳоли-хиндуларнинг иқтисодий аҳволи ва сиёсий ҳолатини қандай таърифлаш мумкин?
- 3.** Мустамлакаларда капиталистик муносабатларнинг ривожланишига нималар тўсқинлик қилаётган эди?
- 4.** Бразилия ҳудудида Палма Республикасининг ташкил топиши маҳаллий аҳолининг мустақиллик учун курашида қандай аҳамият касб этди?
- 5.** Мустамлакалардаги озодлик ҳаракатлари қандай ғоявий асосларга эга эди?

V БЎЛИМ

XVI–XVIII АСРЛАРДА ОСИЁ МАМЛАКАТЛАРИ

XIX БОБ. ЯНГИ ДАВРДА АНЬАНАВИЙ ЦИВИЛИЗАЦИЯ МАМЛАКАТЛАРИ.

Европа тарихшунослигига шарқча тараққиётни «анъанавий цивилизация», «анъанавий жамият» деб аташади. Бунга кўпчилик камтарона ҳаёт тарзи, диний сабр-тоқат, ер эгалигининг ўзига хос шакли, кишилар ҳаётининг давлат томонидан тартибга солиниши кабиларни асосий белгилар сифатида киритишади. Хўш, «Шарқ цивилизацияси» деган тушунча ортида нималар яширган?

Ижтимоий тараққиётнинг асосий йўналишилари. Шарқ мамлакатлари табиатнинг барқарор бўлмасада, нисбатан сахий инъоми туфайли ўзларининг географик ва тарихий устунликларини намойиш қилиб, ривожланган ижтимоий меҳнат тақсимотига, маданий тараққиётнинг ўта юқори даражасига, жамият маънавий ривожининг анчагина юқори босқичини акс эттирувчи диний ва ахлоқий тизимни шакллантиришга эриша олдилар. Янги эра бошларида Хитойдаги Хан империяси тараққиёт даражасига кўра илк принципат давридаги Рим империясидан бир мунча олдинлаб кетган эди. Янги эранинг дастлабки минг йиллигига Шарқ мамлакатлари, хусусан Хитой, Ҳиндистон ва Яқин Шарқ мамлакатлари иқтисодий ва маданий тараққиётда катта сакрашга эришдилар. Бу даврда техник, технологик, ташкилий ва маданий инновациялар кенг тарқалган бўлиб, уларнинг кўпчилиги 300–500 ва ҳатто 1000 йил ўтгандан сўнг Европада пайдо бўлди (қисман Шарқдан ўзлаштирилди). Иккинчи минг йиллик бошларигача ўтган давр ичida Хитойда дон маҳсулотларини етиштириш аҳоли жон бошига камида 1,5 марта ошиб, гектаридан 14–16 центнерни ташкил қилди. Худди шу кўрсатгич Яқин Шарқ ва Шимолий Африкада 10–13 центнерни ташкил қилиб, бу Фарбий Европадаги кўрсатгичдан 4–5 марта юқори эди¹. XVI–XVIII аср-

¹ Қаранг: Новая история стран Азии и Африки: Учеб. для студ. высш. учеб. заведений /Под ред. А.М. Родригеса: В 3 ч. – М.: Гуманит. изд. центр ВЛАДОС, 2004. – Ч. 1. С. 9.

ларда Хитойда миллий маҳсулотнинг аҳоли жон бошига нисбатан йиллик ўсиши 0,15–0,25% ни ташкил қилган ва Фарбий Европанинг муқим ривожланаётган Голландия, Англия сингари мамлакатларни-ки билан тенг бўлган. Шарқнинг Farbdan устунлиги айниқса асрлар давомида тўплланган маънавий имкониятлар, тажриба ва билимларга таянган интеллектуал кучларда яққол кўзга ташланади. Аҳолининг ўсиш динамикаси ҳам иқтисодий имкониятларнинг юқорилигидан далолат беради.

Шарқ ва Farb мамлакатларида аҳоли сонининг ўсиши (млн киши)¹

Мамлакат, минтақа	1000 йил	1800 йил
Хитой	60–70	320–330
Ҳиндистон	55–75	180–200
Яқин Шарқ	28–32	28–34
Farbий Европа	28–30	114–118

Шарқнинг иккита йирик мамлакатлари – Хитой ва Ҳиндистонда аҳоли сонининг кескин ўсиши (Хитойда 5 марта, Ҳиндистонда 3 марта) истеъмол бозори ва ишлаб чиқарувчи кучлар имкониятларининг ҳам мос равиша ўсганлигидан далолат беради. Умуман иккинчи минг йиллик бошларида Шарқ мамлакатларида ривожланиш даражаси Farbий Европага нисбатан икки марта юқори эди. Бироқ Янги давр бошларига келиб Шарқ мамлакатлари Европага нисбатан сезиларли орқада кола бошлади. Бунинг асосий сабаблари куйидагилардан иборат эди:

- Шарқнинг деспотик давлатларида ҳарбий харажатларнинг, демак ишлаб чиқаришга йўналтирилмаган харажатларнинг умумий миқдори Farb давлатлариникidan анча юқори бўлган;
- XVI–XVII асрлардан бошлаб Шарқ мамлакатларида транспорт воситалари (кемалар, портлар, йўллар, каналлар қурилиши) ва коммуникация тизимининг (китоб чоп қилиш, саводхонлик даражаси) ривожланиш суратлари Farb мамлакатларига нисбатан пасайди;
- Ўрта асрларнинг охирларидан бошлаб Шарқ мамлакатлари яккаланиш ёки «ёпиқ эшиклар» принципига асосоланиб, фаол ташқи сиёсат юритмади;

¹ Новая история стран Азии и Африки: Учеб. для студ. высш. учеб. заведений / Под ред. А.М. Родригеса: В 3 ч. – М.: Гуманит. изд. центр ВЛАДОС, 2004. – Ч. 1. С. 8.

– европалик мустамлакачилар кириб келиши арафасида Шарқнинг кўплаб мамлакатларида тарихан яратилган моддий, ижтимоий ва маънавий бойликларни ривожлантириш ўрнига табиий ресурслардан узоқ вақт экстенсив фойдаланиш натижасида келиб чиқсан ижтимоий-иктисодий инқироз кузатилаётган эди.

XVIII асрга келиб, масалан, саводлилик даражаси Хитойда 20–30 %дан 15–20% га, Ҳиндистонда – 10–15%дан 4–6% га, Яқин Шарқда 8–12%дан 4–5%га тушиб кетди. Миллий маҳсулотнинг аҳоли жон бошига улуши Хитой ва Ҳиндистонда 1/4, Яқин Шарқда эса 1/3 га қисқарди¹. Бу кўрсатгичлар Шарқнинг учта катта минтақасида ишлаб чиқарувчи кучлар деволюциясини² яққол акс эттириб турибди. Яна бир муҳим хулоса шундан иборатки, ҳозирги иктисодий ўсишнинг бошланғич (одатда индустрисал) босқичига хос бўлган экстенсив-интенсив турдаги кенгайтирилган қайта ишлаб чиқаришнинг баъзи муҳим аломатлари саноат инқилоби давридаги Farb мамлакатларида эмас, дастлаб Шарқда, Хитойда Farbdagi «саноат тўнтириши»дан юз йиллар олдин пайдо бўлган эди.

Европа экспансияси ва мустамлакачилик Осиё мамлакатлари-нинг ижтимоий-иктисодий тузилишига анчагина зиддиятли таъсир кўрсатди. Цивилизациялар ўргасидаги «мулоқот» одамлар орасидаги жуда катта йўқотишларга олиб келди. Кўпчилик ҳолларда мустамлакачилик кенг миқёсдаги талончиликдан иборат бўлиб қолди. Мавжуд маълумотларга қараганда XVIII аср иккинчи ярмида мустамлакалардан Европага ташиб кетилган соф бойликлар (контрабанда йўли билан олиб чиқиб кетилгандаридан ташқари) Лотин Америкаси мамлакатлари ялпи миллий маҳсулотининг (ЯММ) 3% ни, Ҳиндистон ва Индонезия каби аҳолиси кўп мамлакатлар ЯММнинг 1,2 % гачасини ташкил қилган. Метрополиялардан арzon фабрика товарларининг оқиб келиши маҳаллий ишлаб чиқаришнинг, биринчи ўринда шаҳарлардаги ҳунармандчиликнинг инқирозига олиб келди.

Ерга эгалик шакли. Осиё мамлакатларида ерга эгалик қилишнинг шакллари мураккаб тизимга эга бўлиб, узоқ йиллар давомида шаклланган урф-одат, диний дунёқараш ва табиий шарт-шароитга асосланган. Шарқда давлат барча ерларнинг олий мулкдори ҳисобланади

¹ Қаранг: Новая история стран Азии и Африки: Учеб. для студ. высш. учеб. заведений / Под ред. А.М. Родригеса: В 3 ч. – М.: Гуманит. изд. центр ВЛАДОС, 2004. – Ч. 1. С. 24.

² Деволюция – (лотинча *devolutio*) ийғиштирмок.

ва бу ҳолат Шарқ цивилизациясининг асосий белгиларидан бири-дир. Шарқ динлари ҳам чексиз олий ҳукмдорлик принципини ва олий ҳукмдорнинг барча ерларга мулкдорлигини улуғлайди.

Шарқ жамиятининг тарақкий этиши билан хусусий мулк ҳам ри-вожланиб борди. Масалан, Ҳиндистонда ишлов бериладиган ерларнинг саккиздан бир қисми бевосита давлат ҳукмдори – подшохнинг ихтиёрида бўлиб, қолганлари феодал аъёнларга бўлиб бериларди. Хитойда императорнинг қариндошлари, йирик феодаллар, обрўли амалдорлар ерларни, у давлатники ёки хусусийлигидан қатъи назар «сотиб юборардилар». Ислом мамлакатларида ҳам ерларнинг асосий қисми (65% дан 85% гачаси) ҳукмдорга тегишли бўлиб, бу ерлар маълум тўлов эвазига феодалларга бўлиб бериларди. Тааж-жубланарлиси шундаки, мулк эгалари бир томондан, уни давлат томонидан қўриқланишига ҳаётий эҳтиёж сезиб, муҳтож бўлсалар, бошқа томондан, шу давлат ҳокимиятининг мулкка нисбатан чега-расизлигидан, назоратсизлигидан азият чекарди ва зулмга қарши чиқарди.

Натижада, амалда Осиёning барча мамлакатларида ўз олий ҳукмронлигини мустаҳкамлашга интилаётган давлат билан эскирган тартиблар ривожланишига тўсиқ бўлаётган хусусий мулк ўртасида қарама-қаршилик мавжуд бўлган. Ҳаддан зиёд бойиб кетган мулкдорлар ҳар доим ҳукмдорнинг қаршилигига дуч келар ва ҳаётини хавф-хатарга қўярди. Масалан, Японияда Осакалик Едойлар хона-дони ана шундай бойлиги билан машҳур эди. Дон сақлайдиган бинолар, омборлар, юз минглаб олтин қўймалари, қимматбаҳо тошлар ва амалий санъат асарлари бу хонадонга қарашли эди. Бундай катта бойлик ва обрў ҳукмдорнинг ғашига тегар, ғазабини келтиради. Оқибатда хонадон давлатга бўйсунмаганликда айбланиб, барча мол-мулклари мусодара қилинди. Кўплаб ҳолларда ҳукмдорлар ўзларининг шахсий ҳокимиятларини мустаҳкамлаш йўлида худди юқоридаги мисолдагидек иш тутишган.

Ҳаётнинг давлат томонидан тартибга солиниши. Шарқ цивилизацияси шароитида кишилар ҳаётининг давлат ва дин томонидан тартибга солиниши оммавий кўринишга эга эди. Давлат соликлар, тўловлар, анъанавий йигимлар орқали етиштирилган маҳсулотнинг асосий қисмини олиб қўярди.

Японияда, масалан, солиқ йиғувчилар ўша даврларда мавжуд бўлган бир мақолга амал қиласарди, яъни: «Дехқон ҳўл сочиқقا

ўхшайди, қанча қучли сиқсанг шунча кўп сув чиқади». Қишлоқ ва шаҳар аҳолиси давлат фойдасига турли тўловлар тўларди, савдогар ва хунармандлардан эса солиқ олинарди. Бундай улкан даромаднинг ҳаммасини тақсимлаш ҳарбийлар, хизматчилар ва баъзи бошқа тоифадаги шахсларга турли манбалардан (масалан, маълум худуддан) тушадиган даромаддан фойдаланиш хуқукини бериш ва даромад манбанини турли давлат ташкилотларига бириттириб қўйиш йўли билан амалга ошириларди.

Барча ҳарбийлар ва давлат хизматчилари амалдаги тартибларга сўзсиз итоат этишлари шарт, акс ҳолда ўлим жазосига ҳукм қилинار эди. Бўйсунмаганлар ва гунохкорларни қатл этиш ҳар куни юз берадиган одатий ҳол бўлиб қолганди. «Агар бир оила айб қилиб қўйса, бошқа тўққиз оила ҳамкорлик учун жазоланади», – XVIII асрда Хитойдаги Сичжоу шаҳрининг деворларидан бирида ана шундай ёзув ўйиб ёзилган. Ҳар бир шаҳарлик маҳсус дафтарга киритилиб, ўз маҳалла ва кўчасига ёзиб қўйиларди, у ҳар ойда икки марта маҳсус текширувдан ўтиш учун бошқармaga боришга мажбур эди. Барча шаҳарга келгандар ёки кетаётганлар ҳисобдан ўтишарди. Монахларнинг мажбуриятига хунармандлар ҳақида ахборотлар йиғиш ва чақимчилик ҳам киради.

Ислом дини ҳукмрон бўлган мамлакатларда, айниқса кўплаб халқлар ва турли динларга эътиқод қилувчиларни бир давлатга бирлаштирган Усмонийлар империясида, ислом динига эътиқод қилмайдиганлар учун барча бошқа чеклашлардан ташқари диний чеклашлар ҳам мавжуд эди. Улар алоҳида солиқ – жузъя ҳам тўлашлари шарт эди.

Бундай шароитда товар-пул муносабатлари фақат ўрнашиб колган анъаналар, диний гоялар ва давлат бошқарув тизими билан курашдагина туғилиши мумкин эди.

Хўжалик юритишининг жамоа усули. Шарқ цивилизацияси учун жамоа хўжалигининг сақланиб қолиши ҳам характерли эди.

Хинд жамоаси одатда бир қишлоқдан иборат бўларди. Аксарият қишлоқлар бир-бирига жуда ўхшаш эди. Қишлоқ марказида ибодатхона ва бош майдон жойлашган, бу ердан шунингдек, юқори касталар – брахманлар, савдогарлар, ер эгалари, тўқувчилар маҳаллалари ҳам жой олган. Қишлоқнинг асосий худудидан ташкарида паст касталарга мансуб кишилар яшайди, уларнинг уйлари қирларнинг ён бағрида жойлашган. Энг узоқда бошқалар ҳазар қиласиган дахлсиз-

лар кастасига тегишли кишиларнинг уйлари бор. Барча қишлоқларда диний бошлик хурматли ўрин эгаллайди. У диний маросимларни ўтказади ва ҳаётий муаммоларни ҳал қилишда маслаҳат беради. Қишлоқдаги иккинчи шахс нотариусдир. У ўз дафтарига барча муаммоларни қайд қилади, ер майдонларининг солиқ ҳисобини ва даромадларнинг тушумини белгилаб беради.

Бундан ташқари ҳар бир жамоа умумий эҳтиёжи учун ҳамда оқсоқол, солиқ йигувчи ва бошқа амалдорларнинг заруриятларини бажариш учун ишлайдиган 10–12 хунармандни ҳам боқиб туришади.

Айрим жамоа аъзолари томонидан бажариладиган мансаб ва вазифалар наслдан-наслга ўтади. Бу билан жамоа дехқон ва хунармандларни ўзида боғлаб туради, чунки дехқон ва хунарманд фақат ўз жамоасидагина маълум машғулот билан шуғулланишга ҳақли. Юридик жиҳатдан аксарият дехқонлар озод ҳисбланаарди, лекин амалда, масалан, ҳинд дехқони ўз жамоасини тарқ эта олмасди.

Япон қишлоғи бошида оқсоқол туради. У бутун қишлоқ ахли томонидан сайланарди ёки қишлоқ феодали томонидан тайинланарди. Қишлоқ ахолиси бешта-бешта кўшни уйлардан иборат гурухларга бўлинади ва ҳар бир гурухнинг тепасида маҳсус вакил туради. Бундай бешликнинг ҳар бир аъзоси солиқларни тўлаш ва бошқа мажбуриятларни бажаришда бир-бири билан боғланган. Яъни, тўлов ёки мажбуриятларни бажармаган гуруҳ аъзоси учун қолган аъзоларнинг умумий жавобгарлиги ўрнатилган. Мажбуриятдан қочишнинг олдини олиш мақсадида ҳеч бир уй эгаси ўзининг гурухдошларини огохлантирмасдан уйига биронта ҳам йўловчини қўя олмасди. Худди шунингдек, огохлантиришсиз бирон бир дехқон вақтингчага бўлса ҳам бошқа қишлоққа кета олмасди.

Ислом мамлакатларида ҳам жамоалар ўз ерларига, жамоани бошқариш тизимиға эга эди. Бу ерда ҳам қишлоқ жамоаларига одатда кам ҳосил берадиган, сугориш тизимларидан узоқда жойлашган ерлар берилар эди. Қишлоқ оқсоқоли билан бирга сунъий суғориладиган минтақаларда миробнинг ўрни юқори бўлган. Қишлоқ ахли энг хурматли кишилар орасидан оқсоқол ва миробни сайлашган. Барча ислом мамлакатларида дин кишилар ҳаётини туғилгандан то ўлгунига қадар тартибга солиб турар, шариат ўрнатган қоидаларга қатъи амал қилиниши талаб қилинаарди. Турли ҳукмдорлар даврида ўтказилган кўплаб ислоҳотларга қарамасдан, қишлоқ ҳаёти минг йиллар давомида деярли ўзгармас эди.

Шундай қилиб, жамоа ўз-ўзини бошқариш ва ўзининг ички муаммоларини ечишда одат, анъана, диний-ахлоқий нормалар доирасида нисбий мустақилликка эга эди.

Шаҳарлар. Шарқ ва Европа шаҳарларининг ҳолатида ҳам фарқ мавжуд эди. Агар Европа мамлакатларида шаҳарларнинг ўсиши ва мустаҳкамланиши шаҳар аҳолисининг феодал қарамликка қарши кураши билан бирга олиб борилган бўлса, Шарқда ахвол бутунлай бошқача, яъни янги даврда ҳам феодалнинг шаҳар устидан назорати сақланиб қолаётган эди.

Маълумки, хинд шаҳарларининг кўпчилиги рожаларнинг қароргоҳи сифатида пайдо бўлган. Рожа қасри ёнида ўн минглаб нонхўрлар, хизматкорлар, қуллар овқатланишарди. Йирик феодалларнинг шаҳардаги қароргоҳлари рожа қасрининг кичрайтирилган нусхаси эди. Шаҳарда жойлашган ёлланма қўшинга жуда кўп хизматкорлар, аравакашлар хизмат қилишарди. Бундай шаҳар феодал ва унинг армияси билан яқин боғланган бўлади. Агар феодалнинг қароргоҳи кўчирилса шаҳар бўшаб қолади. Масалан, шу тарзда бобурийзода Ақбаршоҳнинг пойтахти бўлган энг бой шаҳар ҳисобланмиш Фатхпур-Сикри пойтахт Аграга кўчирилгач, бир неча йил ичида тўлиқ инқирозга юз тутади.

XVII аср бошларида Фатхпур-Сикрига келган бир инглиз сайёхи «Шаҳар маркази вайроналардан иборат. Бинолар бўм-бўш, аҳоли йўқ. Ернинг каттагина қисми томорқаларга бўлиб берилган», – деб ёзган.

Феодалларнинг қароргоҳи сифатида пайдо бўлган шаҳарлардан ташқари ички савдо ва хунармандчилик маркази бўлиб хизмат қиласидиган шаҳарлар ҳам мавжуд эди.

Хитой шаҳарлари янги даврда ҳам аввалгидек ўрта аср қиёфасини сақлаб қолган эди. Одатда иккита кенг кўча бир-бирини шимолдан жанубга ва шарқдан ғарбга қараб шаҳарни кесиб ўтади. Бу кўчалар шунчалик тўғрики, улар кесишган чорраҳадан шаҳарнинг тўртта дарвозаси ҳам бемалол кўриниб туради. Уйлар, ҳатто бойларники ҳам пастгина қилиб қурилган. Биноларнинг асосий қисми ёғочдан ишланган, ташқи тарафидан лок билан бўялган ва расм солинган бўлади. Деразаларга қофоз, ойна, чиройли панжаралар ўрнатилган. Уйдаги хоналар (улар одатда беш ёки олтита) биридан иккинчисига ўтиладиган қилиб қурилган ва катта ҳовли билан ажратилган.

Хусусий саройларнинг фақат дарвозасигина кўчага қаратиб қурилган. Дарвоза чеккаларида иккита пастқамгина бино бўлиб, уларда хизматкорлар, дўйончилар ва ишчилар яшаган. Кўчаларнинг икки чети устунларига шиорлар ёзилган, мато байроқчалар билан безатилган дўйонларга тўлиқ бўлган. Улар шунчалик кўпки, кундаклик эҳтиёж молларининг ҳаммасини дарвоза олдидан сотиб олиш мумкин бўлган. Сотувчилар эса ўз молларини мақтаб тинимсиз қичқиришган.

Йўловчиларнинг ҳордик чиқариши учун ҳар қадамда дам олиш жойлари: меҳмонхона ва ошхоналар, мева, чой, муз солинган сув сотадиган чодирлар бўлган. Кўчаларни сайёр савдогарлар, ҳунармандлар ва сартарошлар, хат ёзувчи ҳаттотлар, фолбинлар ва гадолар тўлдириб юришган. Хитойда бўлган испан сайёхи кўчаларда одамларнинг кўплигидан ҳайратланиб, «Агар буғдой донини отиб юбориша, у ерга тушмаган бўларди», – деб ёзган эди.

Сарой амалдорлари ва император хонадонининг шаҳзодалари кўчаларда отлиқ кўриқчилари билан юришган. Оддий ҳалқ яшайдиган маҳаллалар қаровсиз ва ифлосроқ бўлган. Ҳунармандлар, шаҳар қашшоқлари ғарип кулбаларда яшашган, жанубий шаҳарларда эса усти айвонли қайиқларда кун кечиришган.

Дехқончилик хўжалик ҳаётининг асосини ташкил қилган. Баъзи бир худудларда аҳолининг мутлақ кўпчилиги фақат зироатчиликдан кун кўришган.

Хитой дехқони ўта меҳнатсевар хисобланади. Бу ерда меҳнатга заҳмат, гуноҳлар учун берилган жазо деб эмас, инсонга юклangan шарафли ва муқаддас бурч деб қаралади. Дехқоннинг қанчалар фаровон яшashi ана шу меҳнатга бўлган муносабатига боғлиқ эканлигини улар яхши тушунишарди. XVIII аср охирида Хитойга саёҳат қилган лорд Маккартни тоғ чўққисидан бошқа бирор қарич ҳам ишлов берилмаган ер йўқлигини ҳайрат билан ёзади. Хуллас, тик тоғ ён бағрларидан тортиб то сувли ботқоқларгача экин экишга мослаштирилган. Ботқоқларда тупроқ тўлдирилган қайиқлардан сузуб юрувчи томорқалар ҳосил қилинган.

Хитойдаги мавжуд табақа тизими ҳам ўзига хос кўринишга эга бўлган. Имтиёzlари наслдан-наслга ўтувчи олий табакага императорнинг қариндошлари ва уларнинг авлодлари – «сариқ белбоғлилар», яъни император каби сариқ белбоғ тақиб юриш

хуқуқига эга бўлганлар, «қизил белбоғлилар» ва дастлабки императорларнинг яқин авлодлари бўлган «темир қалпоқлилар» киради.

Кишининг мансублиги мерос тариқасида авлоддан авлодга ўтмайдиган имтиёзли табақа «шэнши» – олимлар эди. Фақат «шэнши» бўлиш учун имтиҳон топшириш ва илмий унвон олиш зарур эди. Бундай унвон унинг соҳибига давлат хизматига кириш имкониятини берарди. Фақат зодагонларгина эмас, дехқон ва хунармандлар ҳам бундай имтиҳон топшириш ва унвон олиш хуқуқига эга эдилар.

Бироқ диний китоблар матнини ёд олиш кераклиги, имтиҳонда бериладиган иншо мавзуларининг мажозий характерга эга эканлиги сабабли талабгорларнинг кўпчилиги имтиҳондан ўта олмасди. Шэншилар орасидан шаҳар ҳокимлари, судьялар ва бошқа юқори амалдорлар чиқарди. Европаликлар уларни «мандаринлар» деб аташарди (португалча «мандар» –бошқармоқ сўзидан олинган).

«Мандаринлар»нинг ташки кўринишидаги фарқи бош кийимига тақиладиган кичкина шарчаларда бўлиб, улар мавқеига қараб марварид ва бошқа қимматбаҳо тошлардан ясаларди.

Олий табақа вакилларига қилган гуноҳлари учун шармандали жазолар қўлланилмасди, хусусан уларни бамбук таёғи билан савалаш мумкин эмасди. Уларга савдогарлик, олиб-сотарлик, хунармандлик билан шуғулланиш ҳам тақиқланган эди.

Табақа пиллапоясининг пастки қисмини дехқонлар, савдогарлар ва хунармандлар эгаллаганди. Дехқонлар табақасига помешчиклар ҳам, хунармандлар табақасига эса йирик устахона ва мануфактура эгалари ҳам киради.

Актёрлар, фаррошлар, давлат идораларининг қоровуллари, доимиий қайиқда яшовчилар ва қуллар энг пастки табақа вакиллари хисобланарди.

Хиндистонда эса барча аҳоли касталарга бўлинарди. Инсоннинг жамиятдаги ўрни, касби, унинг кастаси, ота-онасининг машгулоти билан қатъи белгиланарди. Дехқоннинг ўғли дехқон, савдогарнинг ўғли савдогар бўлиши керак эди. Кастандан қувилиш инсонни умуман жамиятдан ташқарида қилиб қўярди.

Япон жамиятининг бутун ҳаёти тақиқлар ва йўриқномалар билан ўраб ташланган эди. Бундай тартибга олишдан асосий максад жамиятдаги мавжуд анъанавий турмуш тарзини сақлаб қолишга қаратилган. Фармонлар ва қоидалар барча табақа вакиллари

ҳаётини, фаолият турини, хулқ-атвор нормасини, кийиниш тартиби ва ташқи кўринишини, ҳатто овқатини ҳамда шу каби майда икирчиликларгача белгилаб берарди.

Махсус қонунлар билан дехқонларга тонг отиши билан туриш, ароқ ва чой ичмаслик, тамаки чекмаслик, овқатга фақат оддий донни ишлатиш, пахтадан тўқилган матодан кийим кийиб юриш, паст ва кичкина уй қуриш, эгарга гилам солмаслик белгилаб қўйилган эди. Шундай қонунлар орқали шаҳарликлар ҳаёти ҳам тартибга солинарди. Уларга шоҳи кийимлар кийиб юриш, уйда локланган идишларга эга бўлиш, олтин ва кумуш тақинчоқлар тақиб юриш, учқаватли уй қуриш кабилар тақиқланган эди.

Янги даврга келиб одамларнинг табақавий мансублиги уларнинг мулкий ҳолатига, демак жамиятдаги амалий ўрнига мос келмай қолди. Бироқ Шарқ жамиятининг анъанавий тараққиёт шакли табака тизимининг сақланиши учун шароит яратарди.

Шарқ динлари – камолот йўли. Шарқ динлари бу энг аввало инсоннинг ўзини мукаммаллаштириш, камолотга эришиш ва шу орқали оламни ҳам такомиллаштириш йўлидир. Аслида инсоният тарихидаги барча динларнинг ҳам асосий муаммоси Инсон, унинг коинотдаги ўрни ва камолоти мавзусидир. Айниқса Шарқ динларида бунга алоҳида эътибор берилади, уларнинг принциплари ахлок ва хуқуқ нормаларида мужассамлашади ва борган сари мафкуравий характер касб этиб боради.

Хитойликларнинг маънавий-руҳий оламида кўп юз йилликлар мобайнида конфуцийлик хукмронлик қиласи. Бу таълимотнинг асосчиси – файласуф, тарихчи ва давлат арбоби Кун Фу-цзи (милоддан олдинги 551–549 йиллар) – Конфуций эди. Конфуций таълимотининг асосини инсонпарварлик ташкил қиласи ва бу хусусият, унинг фикрича, фақат аслзодалардагина бўлиши мумкин. Оддий одамларга жасурлик, олийжаноблик, садоқат, сахийлик каби хислатлар бегонадир, уларсиз эса инсонпарварлик бўлиши мумкин эмас. Файласуф давлатни катта бир оила сифатида қарар экан, «само ўғли» – хукмдорни хурмат-иззат қилиш лозимлигини исботлайди. «Ҳукмдор – халқнинг отаси ва акаси», – дейди у. «Ҳар бир хукмдорнинг хизматкори олий насаб ёки олий насаб эмасми, бойми ёки камбағалми ўз ҳаётининг ҳар қандай ҳолатларида хукмдорга қарши исён қилмаслиги керак». Конфуций ҳар бир инсон жамиядаги ўзининг само белгилаб берган ҳолатини қаттиқ эсда тутиши

шарт, дейди. Само белгилаб қўйган «хўжайин билан хизматкорнинг муносабати шамол билан майсаларнинг муносабатига ўхшайди», – деб кўрсатади у. «Агар шамол эssa майсалар бошини эгиши керак».

Конфуций «чегарарадан чиқиб кетишдан ўзини тиядиган олий-жаноб одамларнинг» хулқ-атвор қоидаси сифатида ўртамиёналик принципини олға суради. «Давлатнинг хукмдори бўлишни истаган одам, – дейди у, ўзи шунга мос яшashi лозим: қулларини бошқаришда олийжаноблик кўрсатиши керак». Конфуцийлик Хитойда эътиқод объектига, расмий давлат динига айланади.

Шарқ динларидан яна бири – хиндуизм минг йиллар давомида Ҳиндистон халқларида шаклланган кўп сонли диний тасаввурларни, эътиқод, анъана ва маросимларни ўзида бирлаштирган. Ҳалқнинг анчагина қисми ўз эътиқодларининг ифодаси ҳисобланган кўп сонли худоларни тан олардилар. Бу худолардан асосийлари: Браhma – яратувчи худо, Вишна – мангутирик табиатни ифодалайди, Шива – табиатнинг даҳшатли кучлари, унинг муттасил қайта туғилиш қобилиятининг рамзидир. Ҳиндуизм ҳаётнинг мақсади инсонни худога яқинлаштиришдан иборатдир, деб таъкидлайди. Шунинг учун тананинг мавжудлиги ҳақида қайтурмаслик керак, чунки «Тана бу – кўпикдир», дейилади. Ҳар бир ҳинд барча бўлиб ўтаётган воқеаларнинг олдиндан такдирга ёзиб қўйилганлигига чин дилдан ишонади.

Ҳиндуизмга эътиқод килувчиларда сигир муқаддас жонивор ҳисобланади, унинг гўштини овқатга ишлатиш тақиқланади.

Ҳиндуизм жамиятнинг тўртта мустақил табака – кастага, яъни брахманларга (дин арబолари), кшатрийларга (жангчилар), вайшьяларга (дехқонлар) ва шудраларга (хизматкорлар, қуллар) бўлинишини талаб қиласи. Кундалик ҳаётда бундай бўлинишга қатъи амал қилинарди, бир кастадан бошқасига, айниқса, юқори кастага ўтишнинг деярли иложи йўқ эди. Кишилар тириклиқдаги амалларнинг яхши ёмонлигига қараб ўлгандан сўнг бир кастадан бошқасига ўтиш мумкинлигига ишонардилар.

Милоддан аввалги VI–V асрларда Шимолий Ҳиндистонда пайдо бўлган буддизм¹ бу дунёдаги уқубатларнинг муқаррар эканлиги ҳақидаги таълимотдан келиб чиқади ва ҳар бир кишининг гунохлардан фориғ бўлиши ўз қўлида эканлигини таъкидлайди. Бу

¹ *Буддизм асосчиси* – Будда (башоратчи) деб аталган афсонавий қашшоқ сайёҳ Сиддхарти Тауталга Шакъямуни (шакъялар қабиласидан чиқкан), тарки дунёчи.

дунёдаги манфаатлар учун ҳар қандай уриниш, Будда таълимотига кўра, янги уқубатларнинг давом этиш имкониятини сўзсиз ўзида сақлаб қолади. Ҳаёт чанқоқлигидан воз кечиш, ўзидаги ҳар қандай ҳиссийётларни, кучли туйғуларни енгиш кабилар азоб-уқубатларнинг тугашига олиб келади. «Мафтункор нарсаларни кўрмаслигинг учун кўзларингни юм, қулоқ, тил, танангни тий, нутқингни, ақлингни тий, барчасини тий», – дейилади бу таълимотда. Буддизм зулмга қарши курашмасликни, ҳаётга бепарво муносабатни, унга мослашишни тарғиб қиласи.

Шарқда, Японияда пайдо бўлган динлардан яна бири – синтоизм. «Синто» «худолар, рухлар йўли» деган маънони англатади. Синтоизмнинг одил ва ёвуз рухлар ҳақидаги энг қадимги эътиқодлар, одамларнинг уларни юмшатишга қаратилган маросимлари билан алоқаси яққол кўзга ташланади.

Синтоизмда худолар сони жуда кўп бўлиб, улар орасида Куёш худоси Амстерасу алоҳида ўрин эгаллайди. Ривоятларга биноан япон императорларининг келиб чиқиши гўёки Амстерасудан бошланган эмиш. Шу сабабли дунёвий ҳукмдорлар осмон элчилари сифатида ҳурмат қилинган, уларнинг обрўлари асрлар оша эътиrozсиз қолаверган.

Синтоизм Японияда император ҳокимиятини мустаҳкамлашга хизмат қилган. Ҳали VII асрдаёқ император синтоизмнинг олий руҳонийсига айланган.

Шундай қилиб, Шарқ динлари инсон ўзини мукаммаллаштириш, комилликка эришиш орқали дунёни мукаммаллаштира олади, у билан уйғунликка эришади, деган ғояни тарғиб қилишган.

* * *

XVII–XVIII асрларда Европа ва Осиё халқларининг ўзаро муносабатларида чукур ўзгаришлар юз берди. Илгари уларда ҳарбий техника, хунармандчилик ва савдонинг ривожланганлик даражаси бир-бирига яқин эди. Бироқ кейинги давр европаликлар тараққиёти учун анча қулайроқ келди. Осиё халқлари эса хуннлар, араблар, мўғуллар сингари катта-катта империялар зулмидан озод бўлганда, ҳар сафар анъаналарни тиклаш, босқингача бўлган ижтимоий ва сиёсий ҳаёт тартибларини қайтадан ўрнатишга ҳаракат қилдилар. Бу тартиблар маҳаллий зодагонларга ҳам, кенг халқ оммасига ҳам босқинчилар ўрнатган тартиблардан яхшироқ, адолатлироқ туюлар-

ди. Эски ҳаётга қайтиш мантиқига Хитойда ҳам, Ҳиндистонда ҳам, кўпчилик ислом мамлакатларида ҳам қатъи амал қилинарди.

Шакланган, ҳамма кўнишиб қолган, анъанавий тартибларни идеаллашириш Шарқ цивилизациясининг муҳим жиҳати бўлиб қолди. Айнан шу жиҳат бир томондан, кўплаб ташки босқинлар шароитида цивилизациянинг асосларини сақлаб қолиш имконини берган бўлса, бошқа томондан, унинг ривожланиш суратларини секинлаштириди, фан ва техника соҳасидаги янгиликларни татбиқ этишга, ижтимоий ҳаёт ва ишлаб чиқаришни ташкил қилишнинг янги усулларини жорий қилишга тўсқинлик қилди.

XIX боб бўйича саволлар

1. Шарқ цивилизациясининг белгилари ва шарқона тараққиётнинг асосий йўналишлари нималардан иборат?
2. Конфуцийлик таълимотининг асосини қандай фоя ташкил қиласди?
3. Ҳиндизмда ҳаётнинг мақсади нимадан иборат деб қаралади?
4. Шарқда ҳаётнинг давлат томонидан тартибга солиниши нима билан изоҳланади?
5. Шарқ динлари инсон камолотининг қандай йўлларини тарғиб қиласди?
6. Ҳиндистон ва Хитойдаги шаҳарлар ривожланишида қандай ўхшашликлар ва фарқлар мавжуд?

XX БОБ. XVI–XVIII АСРЛАРДА ХИТОЙ

ХИТОЙ МИНЛАР СУЛОЛАСИ ҲУКМРОНЛИГИ ОСТИДА

XVI аср бошларига келиб Хитой монархия бошқарув тизимиға, иқтисодда капитализмгача бўлган муносабатлар устуворлик қиласидиган, умумий белгилари ҳали Қадим даврларда ва Илк ўрта асрлардаёқ шакланган сертармок ижтимоий тизимга эга бўлган, марказлашган давлат эди.

Ташки сиёсий жабҳада Хитой кўшни давлатларнинг, энг аввалио Марказий Осиё давлатларининг ерларини босиб олишга ҳаракат киласиди. Европа давлатлари ва Россия билан бирон бир доимий алоқалар ҳали ўрнатилмаганди.

Минлар империясининг давлат тузилиши (Минлар сулоласи XIV аср иккинчи ярмида мўғулларнинг Юань сулоласи ағдарилганидан

сўнг ҳокимиятни эгаллаган) шарқона мустабид тузум эди. Мамлакатда ҳеч қанақа табақавий-вакиллик институтлари мавжуд эмас, шунинг учун ҳам император саройида, энг аввало, қарорлар қабул қилинишида ҳал қилувчи овозга эга бўлган ҳукмдорга таъсир ўtkазиш учун турли гурухларнинг доимий кураши борарди. Лекин ҳукмдорнинг ўзи бевосита давлат ишларига аралашмасди, ўз амалдорларининг омилкорликларига ишонарди.

Бу даврда Хитойда ҳарам оғалиги¹ кенг тарқалган бўлиб, унга факат этник хитойларгина олинар эди. Улар камбағалларнинг болаларидан император саройига сотиб олинарди. Ҳарам оғалари хизматидан факат император оиласи аъзолари фойдаланишлари мумкин эди. Императорнинг ўзида баъзи йиллари уч мингтагача ҳарам ходими бўларди, князларда – ўттизгача, императорнинг болаларида – йигирматагача ҳарам ходими бўлиши мумкин эди. Минлар ҳукмронлиги даврида саройда ўн мингтадан кам бўлмаган ҳарам ходимлари яшаган (уларнинг умумий сони, баъзи маълумотларга кўра 100 мингтага етган), улардан бири эса, охирги Мин императори даврида, унинг номидан амалда давлатни бошқарган. Баъзи бир ҳарам ходимлари вилоятларда катта лавозимларни эгаллаган, у ерларда ҳоким, ҳарбий бошлиқ, шаҳар маъмуриятининг бошликлари ва шу кабилар бўлган. Императорга таъсир ўtkазишда ҳарам ходимларининг асосий рақиблари Сарой котибияти аъзолари бўлиб, улар Хонъминъ ташкилотига (Фанлар академиясига ўхшаш ташкилот) бирлашган йирик хитой олимларининг қўллаб-қувватлашларидан фойдаланардилар. Улар ўзларининг императорга ёзган номаларида кўпинча пойтахтда ва худудларда ҳукм суроётган амалдорлар зулмини фош этишарди, иқтисодиётни қайта қуришни, ҳарбий ислоҳот ўtkазишни ва шу кабиларни ёқлаб чиқардилар. Кўпинча бундай фикрлар учун улар таъқиб қилинар, шундай бўлсада, шаҳар аҳолисининг бир қисми уларни қўллаб-қувватлар эди.

Хитой иқтисодида XVI аср бошларига келиб ривожланишининг анча юқори даражасига эришган аграр соҳа муҳим ўрин эгаллади. Иш қуроллари анча жўн бўлишига қарамасдан, дехқонлар хитойликларнинг асосий озиқлари бўлган шолидан юқори ҳосил олардилар. Баъзи дехқонлар сувни юқорига кўтариб берувчи маҳсус машиналар ясашни ўргангандилар, ҳосилдорликни ошириш учун ўғитлардан фойдаланардилар, шоли етиштиришнинг янги техно-

¹ Ҳарам оғаси, ҳарам ходими (евнуҳ) – бичилган кул.

логияларини, масалан, уялаб экиш усулини, сифатли уруг тайёрлашни ва шу кабиларни кўллардилар. Хитой дехқонлари шолидан ташқари аҳолининг турли хил газламаларга бўлган эҳтиёжларини қондириш имконини берадиган пахта етиштириш соҳасида ҳам катта ютуқларни кўлга киритдилар. Хитойда ерга эгалик қилишнинг иккита асосий тури – давлат ва хусусий ер эгалиги мавжуд эди (хусусий ер эгалигини шартли-хусусий деб атаса ҳам бўларди, чунки расман бу ерлар ҳам императорнинг мулки ҳисобланарди). Хусусий ерлар бутун XVI аср давомида камайиб борди: дехқонларнинг ерлари аста-секин катта ер эгаларининг, судхўрларнинг, шунингдек, амалдорларнинг кўлларига ўтди. Ерларнинг анча кисми бевосита император саройининг мулкига айланди.

Минлар Хитойда натурал тўловлар ва пул йигимларига ҳам асосланган ўзига хос солик ва мажбуриятлар тизими юзага келган эди. Давлат ерларида солиқлар шартли-хусусий ерларнинг солигига нисбатан юкори бўлар эди. Давлатнинг солиқларни оширишга уринишлари кўпинча солиқ тўловчилар ва уларни йиғувчи амалдорлар ўртасида кескин қарама-қаршиликларни келтириб чиқараради. Солиқлар асосан шоли билан ҳисобланарди, солиқни кумуш билан олиш эса фақат XVI аср охирларида гина ўрнатилди. Лянлар билан ўлчанадиган кумуш қўймалари билан бир қаторда XVI аср бошлиридан турли қийматдаги мис тангалар ҳам муомалага киритилган.

Шаҳарларга келганда, улардаги аҳоли сони қишлоқлардагидан анча кам эди. Шаҳарликларнинг асосий машғулотлари хунармандчилик ва савдо бўлган. Газламалар ишлаб чиқаришда ўша вақт учун анча мукаммал бўлган дастгоҳлар, шу жумладан, сув ёрдамида айлантирилувчи қурилмалар ҳам қўлланиларди. Бинолар қурилишида кўтариш кранларига ўхшаш қурилмалардан фойдаланиларди. Ўша пайтлардан сақланиб қолган бинолар бугунги кунда ҳам ўзининг мукаммаллиги ва гўзаллиги билан кишини ҳайратга солади. Йирик ва мустаҳкам кемалар кура оладиган хитойлик кема-созлар ҳам техник муваффақиятларга эришган эдилар. Буюк географик кашфиётлар даврида Хитой Европа мамлакатлари мустамлакачилик интилишларининг нишонига айланди. Ҳали 1516 йилдаёқ бу ерга ўз кемаларини юборган португаллар «кашфиётчи» бўлдилар. Португалия қиролининг вакили ҳатто Хитойнинг ички худудларига ҳам кириб борди, лекин португал ва хитой кемаларининг бир қатор тўқнашувларидан кейин у мамлакатдан чиқариб юборилди.

1531 йили Хитой ва Португалия кемалари ўртасида денгиз жанги бўлиб ўтди ва унда португалияликлар мағлубиятга учради. Шундан кейин Хитой ўз портларини чет эл кемалари учун ёпиб қўйди. Шунга қарамасдан, Португалия Хитой ҳудудида ўз мустамлакаси Макао (Аоминь)га асос солишга эришиди, католик руҳоний-иезуитларига эса Хитойда тарғибот билан шуғулланиш учун имконият берилди.

XVI аср ўргаларида Хитойга Япония қўшинлари бостириб кирди. Узоқ давом этган қонли жанглардан сўнг, 1597 йили японлар мамлакатдан қувиб чиқарилди.

Хитой XVII аср биринчи ярмида. XVI аср охири – XVII аср бошларида жанубий Хитойнинг муҳим савдо ва маданий марказларидан бири бўлган Уси шаҳрида, Дунлинь академияси базасида янги бир ташкилот пайдо бўлди. Унинг аъзолари ижтимоий ҳаётнинг барча соҳаларида ислоҳотларни талаб қилиб чиқдилар. Уларнинг дастурлари кўп жиҳатдан XVI асрдаги ислоҳот тарафдорларининг талабларини эслатарди, зеро ташкилот ҳукуматга қарши қарашлари учун бу ерга Пекиндан қувиб юборилган амалдорлар томонидан тузиленди. Уси бойларининг ва баъзи бир шэнъшиларнинг кўмагига суянган Гу Сянчэн тўра ташкилотга бошчилик қилди. Уларнинг талаблари орасида давлат аппаратини ислоҳ қилиш, мамлакатни бошқаришда бевосита императорнинг ролини ошириш, шунингдек, иқтисодий ўзгаришлар самарадорлигини ва ишлаб чиқарилаётган маҳсулотларнинг сифатини ошириш учун давлат мануфактуралари ва устахоналарини хусусийлаштириш, йирик мулқдорлар томонидан дехқонлар ерларининг эгаллаб олинишини тўхтатиш, солиқка тортиш тизимини тартибга солиш ва шу кабилар муҳим ўрин тутарди.

1620–1624 йиллари ислоҳотчилар Пекинда ҳокимиятга келишга эришдилар ва ўз дастурлари талабларини амалда ҳаётга татбиқ этишга уриндилар. Аммо сарой аслзодаларининг қаршилиги туфайли ислоҳотчилар ҳокимиятдан четлаштирилиб, кўпчилиги қатағон қилинди. Давлат хазинасидан маблағ ўмариш, дехқонлар ерларини тортиб олиш, солиқлар ва шахсий мажбуриятларнинг оширилиши яна давом эттирилди. Хитойнинг халқаро аҳволи ҳам тобора ёмонлашиб бораётган эди. Бироқ Минлар ҳокимияти учун, ҳукмрон тузумга қарши тобора йирик миқёсдаги урушга айланиб бораётган, дехқонлар қўзғолонлари айниқса хавфли эди.

XVII аср биринчи ярмида европаликларнинг Хитойга кириб келиши давом этди. Испания Филиппинни эгаллаб олганидан сўнг, Лусон оролида савдо билан шугулланувчи 20 мингдан ортиқ Хитой фуқароларини йўқ қилиб юборди. Худди шундай ёвузлик 1639 йилда яна бир марта такрорланди. XVII аср йигирманчи йилларида Хитой қирғокларида голланд кемалари пайдо бўлди. Улар Пэнхулемда оролига хужум қилди ва Тайвань (Формоза) оролининг бир қисмини эгаллаб олди. Бироқ Хитойнинг қитъадаги қисмida ўрнашиб олиш уларга насиб қилмади. Голландлар билан бир қаторда Англия ҳам бу худудларга ўз тажовузкорлик қизиқишларини билдириди. Инглизлар Гуанчжоу худудига кириб, Хитой ҳукуматидан бу ерда савдо қилиш ҳуқуқини олдилар. Европаликлар Хитойдан биринчи навбатда ипак ва чинни олиб кетишар, тамаки ва ўточар куролларни эса олиб кирадилар.

Хитой ҳукумати аввалгидек, чет элликларнинг мамлакатга киришларини тақиқлаганди. Фақат католик руҳонийлари бундан мустасно эди. Уларнинг Хитойдаги фаолиятига баҳо бериш анча мурракаб, бир томондан, улар Хитойни мустамлакага айлантириш учун ғоявий замин тайёрлардилар, кўпминг йиллик маданият ва анъаналарнинг бузилишига олиб келдилар, бошқа томондан эса, аҳолини Ғарб цивилизациясининг ютуқлари билан таништириди, уларни кундалик турмушда қўллашга ёрдамлашди.

XVII аср бошларида Хитой ва Россиянинг биринчи давлатлараро расмий муносабатлари кузатилади. Бироқ то Хитой манъҷурлар томонидан эгаллаб олинганига қадар бу давлатлар ўртасида тўлақонли алоқалар ўрнатилган эмас.

XVI–XVII аср ўрталаридағи Хитойда ижтимоий онг ва маданият. Мўғулларнинг Юань сулоласи Хитойда хукмон бўлган даврда турли хил фалсафий-ахлоқий таълимотларни, энг аввало, буддавийлик, конфуцийлик ва даосизмни ўзида мужассам қилган синкетизм дини юзага келди. Кўпгина хитойлик донишмандларнинг фалсафий изланишларида ғоявий асос бўлган конфуцийлик Минлар даврида ҳам алоҳида ўрин эгаллади.

Минлар даврининг энг ёрқин олимларидан бири Ван Янмин (1472–1529) хитойликлар дунёқарашининг асоси бўлган конфуцийликдан воз кечмаган ҳолда бу таълимотни, ўзгарган тарихий вазиятга мос равишда, янгича шарҳлай бошлади. Ван Янминнинг дунёқарашида марказий ўринни лянчжи (туғма билим) ҳақидаги

таълимот эгаллайди. Унинг фикрича, ҳар бир одам, ижтимоий ке-либ чиқишидан қатъи назар, бундай билимга эга ва у донишмандлик ҳолатига эришиши мумкин. Шундай қилиб, донишмандлик факат са-раланган кишиларнинг мулки эмас, барчанинг умумий қисмати экан.

Ван Янмин ғояларининг давомчиси файласуф Ли Чжи (1527–1602) бўлди. У ҳам конфуцийлик ақидаларига қарши чиқди. Жум-ладан, Конфуций асарларининг баъзи бир жойларини, шунингдек, Лао Цзи ва Будда Гаутамага тегишли деб ҳисобланган ишларни танқид қилишга журъят этди. У ҳақиқатнинг нисбийлиги ҳақидагиояни ривожлантириш тарафдори эди.

Бундай ғоялар ақидапараст конфуцийчиларнинг қаршилигини келтириб чиқарди. Улар Ли Чжининг қариндошларига нисбатан ахлоқий ва жисмоний тазиик ўтказдилар. Охир-оқибатда хўр-ланишларга чидай олмаган Ли Чжи ўз жонига қасд қилди.

Бу давридаги ижтимоий фикрнинг яна бир ёрқин вакили Линь Чжаоэнь (1517–1598) эди. У синкетизм ғояларининг изчил тарғиботчиси бўлган. У «дао» (йўл), «сюань» (тасаввуф) ва «кун» (бўшлиқ) тушунчаларига янгича маъно киритди, уларнинг ҳаммаси бутун борлиқни акс этиришини ва Хитой давлатининг ягона ғоявий асосини ташкил этиши лозимлигини исбот қилишга уринди.

Минлар даврида Хитой маданияти гуллаб-яшнади. Олдинги даврларнинг энг яхши ютуқларини ўзига сингдириб олган жамият тараққиётнинг янги босқичига кўтарила олди.

Адабиёт ҳам катта ютуқларга эришди. Ёзувчи У Чэнъэнь (1500–1582) қадимги афсоналар асосида «Фарбга саёҳат» романини яратди. Унда руҳоний Сюань-цзаннинг Буддага оид муқаддас китобларни топиш учун мўъжиза излаб фантастик жоноворлар ҳамроҳлигида Ҳиндистонга қилган зиёрати тасвиранади. Бу роман китобхонларнинг кўплаб авлодларида катта таассурот қолдириди.

XVII аср бошларида «Бизнинг давримизда ва қадимда рўй берган ҳайратли воқеалар» номли қиссалар тўплами тузилди. Бу қиссаларнинг мазмуни ҳалқ достонлари ва кўплаб ҳикматли сўзлар, маталлар билан бойитилган бўлиб, улар жуда кенг тарқалиб кетган.

Хитой маданий анъаналарида санъат «юқори» ва «паст» турларга ажратиларди. «Юқори» турга давлат тантаналарининг бир қисми сифатидаги маросим мусикалари ва рақслар киради. Мусика инсонни анъаналар руҳида тарбиялаш воситаси ҳисобланарди. Маросимиий мусика ва рақслардан анъанавий хитой театри келиб чиқкан.

Кейинчалик санъатнинг мустақил турига айланган театр ўзининг такрорланмас овозига эга бўлди.

Оммавий театр санъатининг шаклланиши унинг ўша давр жамиятидаги юкори доирага ҳам, паст қатламга ҳам мослашишига олиб келди. Шу сабабли театр санъатнинг «юкори» ва «паст» турлари оралиғидаги жойни эгаллади. Театр сюжетларининг манбай адабий проза ва поэзия эди.

XVI–XVII асрларда театр санъатининг энг машҳур тури, кейинчалик умуммиллий театрга айланган куньцой бўлди. Бутун дунёга машҳур бўлган Пекин операси ҳам XVIII аср охирларида айнан куньцой асосида шаклланди.

Хитойда янги давр бошларида адабиётнинг «оддий халқ» учун турлари, энг аввало драматик пьесалар ривожланди. Ўша даврнинг энг машҳур драматурги, Ван Янминнинг тарафдори бўлган ва «тайчжоус мактаби»ни шакллантирган Тан Сянцзу (1550–1616) эди. Хэ Синъинь, Ло Жуфон, Хуан Чунси ва бошқалар ана шу мактабнинг ёрқин вакиллари бўлган.

Минлар даврида қарор топган Хитой шаҳарларининг меъморий кўриниши XIX асргача сақланиб қолди. 1421 йилда пойттахт Пекинга қайтганидан кейин, у ерда қайта қуриш ишлари ўтказилди. Унинг эски, шимолий қисми (Ички шаҳар) жанубий шаҳардан девор билан ажратилди. Бу девор 1564 йили қуриб бўлинди ва шаҳарнинг жанубий қисми «Ташқи шаҳар» номини олди. «Ички шаҳар»нинг марказида «Император шахри» қурилди, унинг ичида эса – асосий биноси муҳим давлат маросимлари ўтказиладиган «Тайхэдянь» («Олий мутаносиблик павильони») бўлган «Тақиқланган шаҳар» жойлашганди. 1530 йили ички шаҳарда хитойликларнинг бош маъбудаси Самога бағишлиланган «Само ибодатхонаси» комплекси қурилди.

XV асрда ва XVI асрнинг бошларида Пекин атрофида императорлар қабристони мемориали қурилди, унда қабрлардан ташқари ибодатхоналар, миноралар, ер ости хазинаси ва шу кабилар ҳам жойлашди.

Тасвирий санъатда аввалги анъаналар сақлаб қолинган эди. Минлар даврида аввалги бадиий мактаблар тарафдорларини бирлаштирган тасвирий санъат Академияси қайта туғилди.

Хитойлик усталар бутун дунёда жуда қадрланадиган ва юкори баҳоланадиган чинни, газлама, локланган миниатюралар яратишда ҳам катта ютуқларга эришдилар.

XVII аср 20–40 йилларидағи дәхқонлар күзголонлари. Хитойдаги хукмрон тузумга қарши дәхқонлар исёни 1622 йили Шаньдан вилоятида «Оқ нилуфар» яширин жамияти раҳбарлигиде бошланды ва тез орада анча кенг худудга тарқалды.

Күзголонни бостириш учун бу ерга юборилган қүшин аввалига исёнчилар устидан бир қатор ғалабаларга эришди, бирок тез орада исёнчилар Шэнси ва Ганьсу вилоятларида ўз фаолиятларини яна бошладилар. У ерда дәхқонлар, Минлар армиясидан қочган аскарлар ва шахар камбағалларидан иборат партизанлик гурухлари пайдо бўлди. Исёнчилар помешчикларни ва судхўрларни алоҳида шафқатсизлик билан ўлдиради, чунки ўзларининг барча кулфатларига бош сабабчилар деб уларни билишарди. Күзголончилар орасида Ли Цзичэн ва Чжан Сянъжунлар қобилиятли раҳбарлар сифатида ўзларини кўрсатдилар.

Махаллий аҳоли кўчманчиларга ихтиёрий ёрдам берарди, уларнинг сафлари эса янги тарафдорлар ҳисобига тўлдириларди. Кўзголончиларни фақат Пекин остоналаридагина тўхтата олдилар. Кўзголончилар жанубга чекиндилар. Ҳукумат учун жуда қалтис вазият юзага келди, чунки кўзголон энди Хитойнинг катта қисмини эгаллаганди. 1636 йили ҳукумат, агар кўзголон иштирокчилари ўз ихтиёрлари билан доимий яшаш жойларига қайтиб борсалар ва куролли қаршиликни тўхтатсалар, улар авф этилишини эълон қилди. Исёнчиларнинг йўлбошчиларига тўлиқ авф этилиш ва император армиясида зобитлик лавозимлари ваъда қилинди. Императорнинг махсус қарори билан аҳолидан олинадиган солик пасайтирилди. Ўтказилган тадбирлар тез орада ижобий натижаларга олиб келди. Кўпгина дәхқонлар ўз уйларига қайтиб келдилар ва тинч меҳнатга киришдилар. Қолганлари хамма ерда мағлубиятга учрай бошладилар. Кўзголон раҳбарларидан баъзи бирлари, шу жумладан Чжан Сянъчжун ҳам, Минлар тарафига ўтди, бошқалари Хэнань ва Шаньси вилоятлари чегарасидаги бориш қийин бўлган тоғларга кетдилар.

Дәхқонлар уруши узил-кесил исёнчиларнинг мағлубияти билан якунлангандек туюлди, аммо бу фақат алдамчи кўриниш эди, холос. 1639 йили дәхқонлар кўзголони яна Хитойнинг кўплаб худудларини қамраб олди, уларга энди Минлардан норози бўлган хукмрон қатламнинг баъзи бир вакиллари ҳам қўшилди. Яна кўзголоннинг бошида Чжань Сянъчжун ва Ли Цзичэн турди. Хэнань ва Шэнси

вилоятларига юришлар қилинди, бу жараёнда исёнчилар анча жанговар күшин шакллантиришга эришдилар. Ли Цзычэн Шэньсининг пойтахти Сиань шахрида, Чжань Сяньчжун эса – Сичуань вилоятининг маркази бўлган Чэнду шахрида ўрнашиб олдилар.

1644 йил бошларида Ли Цзичэн Пекинга юриш бошлишга қарор қилди. Ахолининг кенг қатламлари томонидан қўллаб-кувватланган исёнчилар қўшини икки гуруҳ бўлиб Сиандан йўлга чиқди. Жиддий қаршиликка учрамаган қўзғолончилар ўша йилнинг апрелида пойтахтга кириб келдилар. Бундай шармандаликка чидай олмаган император Чунь Чжэнъ ўз жонига қасд қилди. У аввал ўз қўли билан қизини ва бир неча жазмаларини ўлдириб, кейин ўз қароргохи яқинидаги боғнинг айвончасида ўзини осди. Императорга содиклик белгиси сифатида яна 80 мингга яқин одам ўзини ўзи ўлдириди.

Хокимиятни эгаллаб олган Ли Цзичэн тарафдорлари халқа мурожаат қилиб, уларни хотиржамликка ва тинч ҳаётларини давом эттиришга чақирдилар. Исёнчиларга карши курашган бир неча ҳарбий бошлиқлар, шунингдек, халқнинг ғазабига учраган баъзи амалдорлар ҳам қатл қилинди. Бой одамларга катта солиқлар солинди. Фақат Минлар даврида кувғин қилинган, ғазабга учраган амалдорлар давлат хизматига «адолат билан бошқариш ва халқни сикувга олмаслик» шарти билан қайтарилди.

Ли Цзичэн янги император деб эълон қилинди, унинг энг яқин кишилари эса олий мартабаларни эгалладилар. Янги давлат аппарати Хитой учун анъанавий бўлган шарқона мустабид шаклда қурилди ва ўз фаолиятида қайта ташкил қилинган армияга суюнди. Қўзғолончилар назорати остида бўлган ерлар дехқонлар қўлига ўтди, кўплаб солиқлар ва тўловлар бекор қилинди. Буларнинг барчasi дастлабки пайтларда дехқонлар ва шаҳар хунармандларида катта завқ-шавқ уйғотди.

Бироқ қўзғолончилар Пекинни эгаллаган пайтда манъчжур фронтида бўлган У Саньгуй қўмондонлигидаги Минлар қўшини янги ҳукуматни тан олмади. Улар ўзини манъчжур васалли деб тан олишга қарор қилди ва манъчжурларга Буюк Хитой девори дарвозаларини очиб берди. Манъчжурлар хитойлик ҳарбий бошлиқнинг ниятлари жиддий эканлигига тезда ишона қолмадилар. У Саньгуй рақибларининг қароргохига ўз элчиларини юбориб, саккиз марта улардан ёрдам сўраб мурожаат қилди, кейин унинг шахсан ўзи манъчжурларнинг қароргохига борди, ўзини уларнинг васалли деб

тан олди ва итоаткорлигининг белгиси сифатида сочининг ярми-ни қирқтириб ташлади. Фақат шундан кейин манъчжурларнинг ва У Саньгуйнинг бирлашган қўшинлари қийинчиликсиз Ли Цзичэн-нинг қўшинларини енди ва 1644 йилнинг июнида Пекин уларнинг назорати остига ўтди.

XVII–XVIII асрларда Хитой

XVII аср 1-ярмида Манъчжурия. XVI аср бошларида ҳозирги Хитойнинг шимоли-шарқий ҳудудида XII аср бошларидаёқ Цзин Империяси кўринишидаги ўз давлатларини қурган, чжурчжэнлар авлоди хисобланувчи манъчжур қабилалари яшардилар. Бу ҳудуднинг юз йилга яқин Хитой цивилизацияси доирасига кирганилиги манъчжурларга хитой маданиятини қисман ўзлаштириш имконини берди.

XVI аср охирида Амурдан жанубда, Уссуриядан ғарброкда талантли ҳарбий бошлиқ ва сиёсий арбоб Айсиньгиоро Нурхаци (1559–1626) раҳбарлигига қабилалар иттифоқи пайдо бўлди.

1609 йилдан бошлаб манъчжурлар Минлар императорига ўлпон тўламай кўйди. Бу жараёнларнинг натижаси ўлароқ 1616 йили 16 та манъчжур қабилаларининг кенгашида Хоу-Цзинь (кейинроқ Цзинь империяси) давлати дунёга келди. Бу билан аввалги Цзинь давлатига дахлдорлиги таъкидланганди. Янги давлатнинг фуқароларини манъчжурлар деб атая бошладилар.

Нурхаци тез орада Минлар сулоласига қарши қуролли кураш бошлади, улардан 1618 йили Лядун ярим оролини ва унга ёндош ҳудудларни тортиб олди. Шундан кейин манъчжурлар тарафига хитой ва мўғул қўшинларининг бир қисми ўтдилар.

Айнан ўша пайтлари орқа томонни мустаҳкамлашга уринган Нурхаци Жанубий Мўғулистанга қарши юриш бошлади. Биринчи йирик тўқнашув 1619 йили рўй берди ва мўғулларнинг мағлубияти билан тугади. Лекин бутун Мўғулистанни бирданига эгаллай ол-маслигини тушуниб етган манъчжур хоқони уни парчалаб юборишга ва қисмларга бўлиб, аста-секин эгаллашга қарор қилди. 1626 йили Нурхаци вафот этди. Унинг ўрнига тахтга келган ўғли Абахай (1592–1643) отасининг ишини давом эттирди. Аввалига Харчин (Цицилар) хоқонлиги бўйсундирилди, кейин, 1635 йили, умуммўғул хони Лигденхон бошчилигидаги Чахор хонлиги ҳам

эгалланди. Маньчжурлар эгалланган худудлардаги ишга яроқли аҳолини мажбур олиб кетдилар ва уларни ўзларининг саккиз байроқли қўшинларига қўшиб олдилар. Лигденхоннинг мағлубияти 1636 йили Абахайга ўзини умуммўғул хони деб эълон қилиш имконини берди. Ўша йилнинг ўзида у ўз давлатининг номини Цин (яни «соф, тоза») деб ўзгартирди.

Жанубий Мўгулистон Абахай хоннинг «ташқи» вассали бўлди. Бу худудда аҳолининг эркин ҳаракатланиши, Хитой билан мустақиллигини саклаб қолган бошқа мўғул ерлари билан савдо қилиши, курол сотиб олиши, жанубий мўгуллар, халхасслар ва ойратлар билан турмуш қуриши тақиқланди, лам руҳонийлари устидан назорат ўрнатилди.

1618 йилдан бошлаб маньчжурлар бир неча марта Корея худудига бостириб киришди. 1636 йилнинг охирларида уларнинг 140 минг кишилик қўшини Сеулни эгаллади, талади ва тез орада Корея хукмдори ўзини уларнинг вассали деб тан олди, таҳт меросхўрларини маньчжурларга гаров тариқасида юборди. Аммо улар корейс қўшинларининг Хитойга қарши урушда қатнашишига эриша олмадилар. Катта тўлов олиш билан чекланишга тўғри келди.

1643 йили Абахай вафот этди ва унинг кичик ёшдаги ўғли Шуньчжи бодихон бўлди. Бу воқеа Маньчжурия тарихида янги даврни – худуди ва аҳоли сони жиҳатидан унча катта бўлмаган давлатнинг Хитой империясидаги энг имтиёзли қисмга айланиши, унинг хукмдори эса – Хитой таҳтидаги биринчи маньчжур-император бўлиши даврини бошлаб берди. Бу 1644 йили У Санъгуй қўшинлари Ли Цзичэн тарафдорларини таъқиб қилишда давом этганлигидан, маньчжурлар эса Пекинда қолганларидан кейин юз берди. Маньчжур зодагонларидан энг қудратлиси Дурган (Доргон, Жуйван) Шуньчжини Хитой императори деб эълон қилишнинг ташаббускори бўлди, ўзи эса уга регент бўлиб олди. Ана шу пайтдан то 1911 йилгача Хитойда чет эллик маньчжурларнинг Цинлар сулоласи хукмронлик қилди.

Хитойнинг маньчжурлар томонидан эгалланиши. 1644 йилнинг 6 июнида Пекинни эгаллаганидан ва уни Муқденнинг ўрнига Цин давлатининг пойтахти деб эълон қилганидан сўнг Дурган ўз қўшинларининг бир қисмини У Санъгуйга ёрдамга, бошқа бир қисмини Шандунъ вилоятини эгаллаб олишга жўнатди. 30 октябр-

да Шунъжи яна бир бор Цин давлатининг императори деб эълон қилинди.

Сиан ва Тунгуан туманларида дехконларнинг гурухлари манъчжурларга бир йилга яқин қаршилик кўрсатдилар, лекин оқибатда Янцзи дарёсидан ўтиб, жанубга кетишга мажбур бўлдилар. Хубэй вилоятида Ли Цзичэн ва унинг кўпгина сафдошлари ўлдирилди. Дехконлар уруши қўзголончиларнинг мағлубияти билан якунланди.

Пекин эгалланиши пайтида Мин императорлик оиласининг омон қолган аъзоларидан баъзилари манъчжурларни олқишилади, бошқалари эса, йўқотилган эътиборларини тиклашга умид боғлаб, Янцзи водийсига жўнадилар. У ерда, қадимий пойтахт Нанкинда, маҳаллий ҳукмдорларнинг кўмагида, Минларнинг вакили Фу Ван (Чжу Юсун) Хитойнинг янги императори деб эълон қилинди. Шундай қилиб, Минларнинг бу қисми янги император атрофида ватанпарвар кучларни йифиб, манъчжурларга қаршилик кўрсатишга уриндилар. Бирок бу қадам Минлар сулоласининг Нанкинда ҳозир бўлган баъзи вакиллари томонидан маъқулланмади ва улар императорлик тахтига бошқа номзодни кўрсатдилар. Натижада манъчжурларга қарши кучлар ўзаро жанжалларга ботиб қолди ва чет элликларга қарши ягона фронт тузишга эриша олмадилар.

Манъчжурлар аввалига Янчжуони эгалладилар, унга хужум пайтида 800 минг кишини ўлдирганларидан сўнг, Нанкинга қараб юрдилар. У ерда император деб эълон қилинган Фу Ван ўз аъёнлари билан бирга қочиб қолди (кейинроқ у асир олиниб, Пекинда қатл қилинди), маҳаллий аёнларнинг бир қисми эса Цинларга хизмат қилишни маъқул кўрдилар.

1648–1652 йилларда манъчжурлар бўйсундириб олган ерларда бир неча қўзголонлар аланга олди, улардан энг йириклари Наньчанда, Чжэцянда, Фуцзянда, Хунанда, Сичуанда ва бир қатор бошқа жойларда бўлиб ўтди. Шимолий Хитойда қўзголонлар Ганьсу, Шэньси ва Шаньси вилоятларини қамраб олди ва баъзи бир мўғул хонлари томонидан қўллаб-куватланди.

Баъзida қўзголончилар манъчжурлардан анча йирик шаҳарларни ҳам тортиб олишга муюссар бўларди. Шу тариқа улар Янцзидан жануброқда жойлашган Цзянлин шаҳрини эгалладилар. Унинг саксон кунлик мудофаасида манъчжурлар 75 мингга яқин кишини йўқ қилди, 100 минг киши эса, таслим бўлишни истамади ва ўша ерда ўзини ўзи ўлдириди. Ганьчжоу шаҳри ёқиб юборилди ва у ерда ҳам

юз минг киши қурбон бўлди. 1646 йили Сичуан аҳолиси жон-жаҳди билан қаршилик кўрсатди ва фақат 1647 йилнинг бошларидағина манъчжурлар уларни тинчишишга муваффақ бўлдилар. Хитойлик зодагонларнинг ёрдамисиз вазиятни назорат остида ушлаб туришнинг иложи йўқлигини тушунган манъчжурлар уларга бир кадар ён бердилар, мўғул отлиқ отрядларини ўз томонларига жалб қилдилар, европаликлар ёрдамида ўз қўшинларини қайта қуроллантиридилар ва Хитойни забт этишни давом эттиридилар. Янцзи водийсини эгаллаган манъчжурлар Жанубий Хитойни босиб олиш учун йўлга тушдилар.

1673 йилнинг охирида Цинлар даврида князъ бўлган, хозир эса улардан норози У Саньгуй Пекиндаги марказий ҳукуматга бўйсунишдан бош тортди ва ўз назорати остидаги ерларда Минларнинг анъаналари тикланганлигини эълон қилиб, қўзғолон кўтарди. У хитойликларни манъчжурлар билан курашга чақирди. Бироқ одамлар онгига унинг сотқинлиги ҳақидаги фикр мустаҳкам ўрнашиб қолганлиги туфайли, У Саньгуй манъчжурларга қарши озодлик ҳаракатининг етакчиси бўла олмади. Шунда у Жануби-Гарбий Хитойда ўз давлатини яратишга қарор қилди. Бу ишда уни яна иккита князлик қўллаб-қувватлади, шунинг сабабли бу уруш тарихда «Хирож тўловчи уч князъ уруши» деб ҳам аталади. Дастребни даврда улар муваффақият қозона бошладилар ва Хитойнинг 15 та вилоятидан 6 таси улар назорати остига ўтди. 1678 йили У Саньгуй Чжоу Ди номи остида император деб эълон қилинди, аммо тез орада вафот этди. Унинг таҳтга чиққан невараси У Шифань манъчжурларга қарши курашда бобосига нисбатан анча омадсизроқ чиқди. Цинлар Чжоу империясини йўқ қилишга эришдилар. Шундай қилиб, Хитойнинг Цинлар назоратига ўтмаган ягона ҳудуди Чжэнларнинг Тайвандаги давлати бўлиб қолди. У 1683 йили Цинлар томонидан эгаллаб олинди.

XVII асрда Хитойдаги давлат тузуми ва иқтисодий аҳволи. Ҳокимият тепасига келган Манъчжурлар Хитой давлат тузумининг аввалги тамойилларини умумий тарзда сақлаб қолдилар. Ўзгаришлар асосан ижтимоий тизимга тааллукли бўлди. Энди тоифалар тизими бешта асосий – учта ҳукмрон ва иккита эзилган, бўйсинувчи гурухлардан иборат эди.

Расман чекланмаган ваколатларга эга бўлган император бевосиста ўзи мамлакатни бошқармас эди. Энг муҳим ишларни ҳал қилувчи

орган Олий императорлик кенгаши бўлиб, унга императорнинг қариндошлари ва олиймақом аёнлар киарди. Ундан кейин ижро-чи тизимлар – Император котибияти, чет эл, соликлар, маросимлар, ҳарбий ишлар, жиной, жамоатчилик ишлари, цензорлик ва шу каби маҳкамалар турарди. Аввалги сулола даврида улкан ҳокимиятга эга бўлган ҳарам оғаларининг таъсири то XIX аср охирларига қадар сусайди. Энди улар давлат қарорларини қабул қилиш жарёнларига таъсир кўрсата олмасди.

Манъчжурлар Хитой худудида ҳукмрон элатга айланди, энди маъмурий ва ҳарбий амалдорлар улар орасидан тайинланарди. Манъчжурлар меҳнат қилиш ва савдо билан шугулланишни ўзлари учун таҳқири деб ҳисоблардилар. Шунинг учун улар фаолиятининг асосий жабҳалари маъмурий ва ҳарбий хизмат бўлди. Ҳарбий хизматдаги манъчжурларнинг ўғиллари вояга етганларига қадар давлат маошини олардилар. Бир хилдаги жиноят учун манъчжурлар ва хитойларга турли хил жазо бериларди. 1644 йилдан манъчжурлар ва хитойликларга аралаш турмуш куриш тақиқланганди.

Хитой ноибликларга ажратилган бўлиб, уларнинг ҳар бирида ўз молия тизими ва куролли қўшинлари мавжуд эди.

Конфуцийликка риоя қилувчи хитойликлар назарида ўз ҳукмронлигини мустаҳкамлаш учун илгари шаманизмга сифинувчи манъчжурлар, расмий давлат дини сифатида конфуцийликни сақлаб қолдилар. Манъчжур бодихани эса хитойлик издошлари бажарган ўша одатий маросимларни ижро этадиган бўлди. Бу йўналишдаги дастлабки қадамлардан бири Конфуцийга «Кун Цзи» – «Қадимий Ўқитувчи», «Буюк ва Шуҳратли», «Энг Етук Донишманд» унвонларнинг берилиши бўлди. Янги император таҳтга кўтарилаётганида ўз фуқароларига Конфуцийнинг оиласи макбарасида ва қабрида қурбонликлар қилишни буорарди, ўз ўтмишдошини ҳурмат қилиш ва унинг рухига таъзим бажо келтириш мажбуриятларини юкларди.

Бундан ташқари, монархлик ҳокимиятининг меросий эканлигини кўрсатишга уринган манъчжурлар сулоласи Минларнинг охирги императори Чун Чжэннинг рухига таъзим бажо қилди. Ҳатто у ўзини осган дараҳт ҳам муқаддас ёдгорлик сифатида асраларди.

Манъчжурлар ҳукмронлик қилган даврда уларнинг тили императорлар тили бўлиб қолган бўлса ҳам, манъчжурлар хитой тилини қабул қилдилар. Ҳар бир императорнинг бошқарув шиори маҳсус иероглифлар билан белгиланади. У ёки бу Хитой императори та-

рихга кўпинча ўз номи билан эмас, айнан бошқарув шиори билан киради.

Цинлар даврида куйидаги императорлар хукмронлик қилган: Шунъҷжи (Омадли бошқарув), ўз номи Фу-Минъ; Канси (Гуллаб-яшновчи ва Нур таратувчи), ўз номи Снань-е; Юнчжэ (Мукаммал ва Адолатли), ўз исми Юаньчжэн; Цяньлун (Букилмас ва Шухратли), ўз исми Хун-ли; Цзяцин (Ажойиб ва Қувончли), ўз номи Юн-ян; Даогуан (Мақсадга интилувчи ва Порлок), ўз исми Мянь-нин; Сянь-фэн (Умумий тўкинчилик), ўз номи У Чжу; Тунчжи (Биргаликда бошқарув) ўз номи Изай Чунъ; Гуансюй (Ажойиб мерос) ўз исми Цзай Тянь ва Сюаньтун (Умумий бирлик), ўз номи Пу И.

Хитой йилномасида йил ҳисоби навбатдаги императорнинг таҳтга чиқишидан бошланиб, унинг хукмронлиги тугагунга қадар давом этарди. Таҳт меросхўрлигини фақат эркаклар давом эттиарди, таҳтнинг вориси олдиндан эълон қилинмасди ва императорнинг катта ўғли бўлиши шарт эмасди. Аёллар фақат вояга етмаган императорнинг регенти бўлиш ҳукуқига эга эдилар.

Императорнинг бosh (катта) хотинидан ташқари иккита кичик (иккинчи даражали) хотинлари шунингдек, кўп сонли жазманлари (айрим йиллари уларнинг сони икки юз саксонтагача етарди) бўларди. Улар император ҳарамини ташкил этар, уни Минлар даврида бўлгани каби ҳарам оғалари бошқарарди. Манъҷурлар даврида, то XIX асрнинг иккинчи ярмига қадар, ҳарам оғаларининг саройдаги таъсири анча камайган ва асосий ишлари ҳарамни кузатиш бўлиб қолганди.

XVII аср иккинчи ярмидаги Хитойнинг иқтисодий аҳволи. Манъҷурларнинг ҳокимиятга келиши Хитой жамиятида маълум бир иқтисодий ўзгаришларга олиб келди. Хитойнинг барча ер майдонларини эгаллаб олишнинг реал имкониятига эга бўлмаган манъҷурлар бу ерларнинг катта қисмини хитойлик мулкдорлар қўлида қолдирди. Манъҷурлар ўзларига Чжили пойтахт вилоятидан, шунингдек, хитойлик аҳоли зич яшайдиган бошқа худудлардан ер ажратдилар. Манъҷуриянинг ўз худуди (1644 йилги чегараларда) ўзига хос қўриқхонага айланганди. Барча ерлар bogдихоннинг мулки бўлиб, этник хитойларга у ерларда яшаш тақиқланганди.

Шунингдек, ўрмонлар, ишлов берилмайдиган ерлар, ўкув ташкилотлари жойлашган ерлар ва диний маросимлар ўтказиладиган майдонлар ҳам давлат мулки ҳисобланарди.

Ер майдонларининг асосий қисми шартли равища хусусий мулк бўлиб, эгаси ундан фойдаланганлиги учун солиқ тўларди. Ҳосилни йигиб олишни қулаштириш учун аҳоли устидан қаттиқ назорат ўрнатилганди. Давлатга ер, жон ва бошқа солиқлар тўлаётган дехқон хонадонлари ўнликлар ва юзликларга бирлаштирилганди. Бундан ташқари дехқонларнинг шахсий мажбуриятлари хам сақлаб қолинганди. Солиқлар кумуш билан ўлчанарди, лекин асосан, ҳосил билан тўланарди.

Давлат туз чиқаришни ўзи эгаллаб олганди, чой, спиртли ичимликлар, мулк олди-соттиси ва шу кабиларга қўшимча солиқлар соилинарди. Дехқон олинган ҳосилнинг катта қисмини ернинг эгасига беришга ва унинг турли хил шахсий топшириклини бажаришга мажбур эди.

Шунга қарамасдан, манъҷурлар ўз хукмронликларини мустаҳкамлаш учун Минлар даврида мавжуд бўлган солиқларни қисқартирди ва қисман бекор қилди, давлатга қарашли қўриқ ерлардан бир қисмини дехқонларга фойдаланиш учун берди. Бунинг барчаси XVII аср охирларига келиб иқтисоднинг бир қадар ўсишига ва ижтимоий муносабатларнинг барқарорлашишига олиб келди. Бунинг оқибатида аҳоли сони кўпайди, ҳайдаладиган ер майдонлари кенгайди, хунармандчилик хам ривож топди.

Баъзи бир тарихчилар Хитойдаги барқарорлашув натижасида капиталистик ҳаёт тарзи пайдо бўла бошлаган, деб ҳисоблайдилар. Аслида бу ижобий ўзгаришларнинг барчаси анча юзаки ва қарама-қарши характерга эга эди. Бошқа тадқиқотчилар эса, Хитой жамияти XIX аср бошларига қадар ҳали тўлиқ анъанавийлигича қолган ва капиталистик ривожланиш томон ҳеч қанақа силжиш қузатилмаганигини таъкидлайдилар. Манъҷурлар эса Хитойдаги ҳолатларини мустаҳкамлаб олганларидан сўнг, аста-секин солиқ ва мажбуриятларнинг аввалги тизимига қайтдилар.

Бундай шароитда судхўрлик капитали мухим роль ўйнай бошлади, чунки кўргина дехқонлар унинг ёрдамисиз солиқларни тўлаши ва шахсий хўжаликларини юритишнинг иложи кам эди. Кўргина дехқонлар хонавайрон бўлиб шаҳарларга кетиб, у ерда гадоларча кун кўра бошладилар.

Сунлар сулоласи давридан буён Хитойда баоцзя деб аталган бирбирини қўллаш тизими мавжуд бўлган, унда фақат қариндошлар эмас, у ёки бу жойда яшовчи барча кишилар бирлашарди. Беш

ховли ёки ўн ховли тизимиға кирған ҳар бир оила бошқаларни кузатиб юриши керак эди. Агар баоцзя аъзолари тайёрланаётган жиноят хақида хокимиятта ўз вактида хабар беришмаса, унда жиноятчига бериладиган жазо уларга ҳам бериларди. Бундай тартибдан ўзларига амалий фойда бўлишини кўрган манъҷурлар, ўз хукмронликлари даврида ҳам уни саклаб қолдилар.

Ўз навбатида, шаҳарларда ҳам аҳоли устидан қаттиқ назорат ўрнатиш, савдогарлар ва хунармандларнинг тадбиркорлик ташаббусларини чеклаш билан боғлиқ бўлган жиддий муаммолар бор эди. Савдогарларга катта кемалар қуриш, ўз маҳсулотларини Хитой ҳудудидан олиб чиқиш тақиқланганди. Бошқа давлатлар билан савдо қилиш хукуқига ҳам Цинлар саройининг қаттиқ назорати остида бўлган, маҳсус ташкил қилинган савдо компанияларигина эга эди.

XVII аср ўртаси – XVIII аср бошлирида Цинларнинг ташкисиёсати. Цинлар саройининг ташкисиёсий фаолияти бир-бирига қарши бўлган иккита йўналиш билан характерланади. Бир томондан, Японияга ўхшаб, ташки дунёдан «эшикларини ёпиб олиш» истаги, бошқа томондан, қўшни давлатларнинг ҳудудларини босиб олишга уриниш намоён бўлмоқда эди.

Дастлаб Корея, кейин Гарбий ва Шимолий Мўгулистан ҳамда Вьетнам Цинларга вассалликни тан олишди. Европа мамлакатлари билан алоқага келганда, Цинлар аввалига уларга анча ижобий муносабатда бўлдилар, чет элликларда ўзларининг Хитой устидан тўлиқ назорат ўрнатиш учун курашларида иттифоқчиларни кўрдилар. Бу энг аввало католик миссионерларига хитойлик аҳоли ўртасида ўз ташвиқотларини олиб бориш, европаликларнинг савдо кемаларига эса ўз маҳсулотларини сотиш ва хитойликларнинг молларини сотиб олиш учун портларга кириш хукуқини берганлигида намоён бўлганди.

XVIII аср 70-йилларида Россия Хитой билан ўзаро алоқалар ўрнатишга уринди. Аммо Узоқ Шарқда ва Марказий Осиёда таъсир учун бўлган қарама-қаршилик ўша пайтда бунга йўл қўймади. Кейин икки томон ўртасида қуролли тўқнашувлар бўлди, унинг натижасида Цинларнинг қўшинлари Амур дарёси ёқасидаги Абазин шахрини қамал қилди ва 1689 йили рус-хитой Нерчин шартномаси имзоланди. Бу шартномага кўра Россия билан Хитой ўртасида савдо алоқалари ўрнатиладиган бўлди, лекин Россия Хитойга Амур дарё-

сининг чап соҳилини бериши, Абазин шаҳри эса вайрон қилиниши керак эди.

1727–1728 йиллари яна иккита келишув – Бурун трактати ва Кяхта шартномаси имзоланди. Улар, Россия томонидан яна ҳудудий ён беришларга, рус-хитой савдо алоқаларининг янада кенгайтирилишига ва рус диний вакиллигининг Пекинда доимий туриши учун рухсат берилишига олиб келди. Бу вакиллик аъзолари у ерда хитой тилини, маданий анъаналарини ўргандилар ва айни пайтда баъзи бир дипломатик вазифаларни ҳам бажардилар.

Фарбий Европа давлатларининг Хитойда ўз диний ваколатхоналарини очиш учун қилган уринишлари ўша даврда муваффақият қозонмади. Аксинча, XVIII аср ўрталарида Хитой ҳокимияти чет элликларга ўз ҳудудида савдо қилишни тақиқлаб қўйди, бундан фақат Кантон (Гуанчжоу) порти мустасно эди.

Жўнгория ва Қашқар устидан қозонилган ҳарбий ғалабалар, шунингдек, Тибетнинг Хитой таркибига қўшиб олиниши Цинларнинг ташки сиёsatдаги катта ғалабаси бўлди. XVIII аср 60-йиллари охирида Бирма ҳам Хитойга вассалликни тан олди.

XVIII аср охирида Буюк Британиянинг Ост-Индия компанияси Хитойда катта фаоллик кўрсатди. Хитойга лорд Маккартни бошчилигидаги элчилар келди. Уларнинг мақсади иккала давлат ўртасида дипломатик алоқалар ўрнатиш, инглиз савдосини кенгайтиришга уриниш, «Гунхан» компаниясининг ташки иқтисодий алоқаларда якка ҳукмронлигини тутгатиш, шунингдек, Англия фуқароларининг Хитой ҳудудида эркин харакатланишига рухсат олиш эди. Бироқ ўша даврда Хитой тахтида ўтирган император Цзянлун бу даъвolarни рад этди. Инглизлардан ташқари, Хитой ҳудудига суқилиб киришга америкаликлар ҳам уриниб кўрдилар, уларнинг кемалари 1784 йилдан бошлаб кўп марта Хитой қирғоқларига сузиб келди.

Чет элликлар ўшанда ҳали шуни тўлиқ англаб етмаган эдиларки, уларнинг Хитой билан алоқа ўрнатишга бўлган ҳар қандай уринишлари Хитой ҳукмдорлари томонидан «варварлар»нинг хитой цивилизациясини «ўзгартириш»га интилишлари, шунингдек, уларнинг Ўрта империяга «фанъ» (вассал) бўлиш истаклари, деб қабул қилинарди. Бу ҳол Хитойнинг бошқа мамлакатлар билан тенг алоқалар ўрнатиш имкониятини йўққа чиқаарди. Шунинг ўзи совғалар олиб келишга ҳам тааллуқли эди. Бошқа мамлакатларнинг дипломатик маросимларида одат бўлган совға бериш, агар бу совға

Хитой императорига берилса, у хурмат белгиси сифатида эмас, вассаллари томонидан берилган хирож сифатида тушуниларди. Ўз на-вбатида, император ҳам, жавоб қадами сифатида ўзининг ҳақиқий ёки сохта вассалларига сахийлик билан совғалар улашарди.

* * *

Шундай қилиб, XVIII аср охирига келиб Европа давлатлари ва Америка Хитойга суқилиб кириш ва уни мустамлакага айлантириш режасини амалга ошира бошлаган бўлсаларда, Хитой ҳали Осиё-нинг катта ва кучли давлати бўлиб қолаётган эди. Аммо иқтисодий ва сиёсий қолоқлик охир оқибатда Хитойнинг ярим мустамлакага айланишига олиб келди.

XX боб учун саволлар

1. XVI–XVII асрлардаги ислоҳотчилик ҳаракатлари ва дехконлар қўз-голонларининг сабаблари нимада эди?
2. Юаньлар сулоласи ҳукмронлиги даврида ижтимоий онг ва маданият қандай ғоялар асосида ривожланди?
3. Хитойда манъчжурларнинг ҳокимиятга келиши ва Цин империяси-нинг эълон қилинишига қандай ички факторлар сабаб бўлди?
4. Манъчжурларнинг ҳокимиятга келиши билан Хитой давлат тузуми ва иқтисодиётида қандай ўзгаришлар юз берди?
5. Цинлар ташки сиёsatининг асосий йўналиши нимага қаратилган эди? Хитой-Россия муносабатларида қандай ўзгаришлар юз берди?
6. XVIII асрда Хитой худудининг кенгайишига, ташки сиёsatдаги муваффакиятларга қарамасдан кайси ички сабаблар империяга чет элликларнинг кириб келиши ва Хитойнинг ярим мустамлака айла-ниш жараёнининг бошланишига олиб келди?

XXI БОБ. XVI–XVIII АСРЛАРДА ҲИНДИСТОН

XVI аср бошларида Ҳиндистон сиёсий парокандалик ҳолатида эди. Ўзаро феодал урушлар савдо ва дехқончиликнинг ривожла-нишига, Ҳиндистон қишлоқ хўжалиги учун муҳим аҳамиятга эга бўлган йирик сугориш иншоатларини зарурий ҳолатда сақлаб ту-ришга халакит берарди. Фақат вайроналик келтирувчи бу урушлар-нинг тутатилишидан аҳолининг деярли барча қатламлари манфаат-дор эди.

Жамиятдаги қўпчилик қатлам ва гуруҳларнинг кучли давлат сари интилишлари мамлакатнинг бирлашиши учун қулай шароитни ўзага келтириди.

XVI аср 20-йилларидан Дехлида ҳокимиятни эгаллаб турган султон Иброҳимнинг харакатлари ажralиб чиққан васалларни ўз хукми остида бирлаштириш учун етарли бўлмади. Натижада султон Иброҳимнинг сиёсатидан норози бўлган сарой аёнлари орасида ўша пайтда Кобулда хукмдор бўлиб турган Заҳириддин Муҳаммад Бобурни тахтга таклиф қилиш ғояси пайдо бўлди.

Талантли саркарда, тажрибали давлат арбоби ва ажойиб шоир Бобур бу қулай шароитдан усталик билан фойдаланади.

Хиндистонда Бобурийлар империяси

1526 йили Бобурнинг жангларда тобланган 20 минг қўшини Афғонистоннинг тоғли йўллари орқали Хиндистонга ишғол қилди. Хинд рожалари бирлаша олмадилар ва Бобур қўшинига қаршилик қилишга ожизлик қилдилар. Унинг қўшини артиллерияда катта устунликка эга эди. Шу устунлик, ажойиб саркардалик маҳорати ва жангдаги уддабуронлик туфайли Бобур қисқа вақт ичida Шимолий Хиндистоннинг катта қисмини ўзига бўйсундирди. 1526 йил 21 апрелда Панипат ёнидаги жангда султон Иброҳим қўшинларини торомор қилди ва Дехлини эгаллади. Бобурни тахтга таклиф қилган сарой аёнлари ундан фақат султон Иброҳимга қарши фойдаланмоқчи эдилар, холос. Бобур Дехли тахтида узок ўтирумайди, олган ўлжалари кўрсатган ёрдами учун етарли, тахтни ўзларига қолдириб, қайтиб кетади, деб хисоблашганди. Аммо Бобурнинг Дехли тахтида узок қолишини тушунган хинд зодагонлари унга қарши бирлашдилар. 1527 йил 13 марта бўлган жангда Бобур улар устидан ҳам ғалаба қозонди.

Бобур яна бир қатор хинд ерларини босиб олди ва ўзини бу ерларнинг ҳукмдори деб эълон қилди. У асос соглан давлатни ғарб тарихчилари Буюк Мўғуллар империяси¹ деб аташади. У Ғарбда Кобулдан Шарқда Бенгалия чегараларигача бўлган худудни қамраб олди.

¹ Янги сулоланинг асосчиси бўлган Бобурнинг келиб чиқишини Чингизхонга боғлаб, сулолани мўғуллар ёки форсча «могол»дан Европада Буюк моголлар империяси деб аташган.

Бобур қобилиятли ва узоқни кўрувчи сиёсатчи, лашкарбоши ва давлат арбоби, шоир ва тарихчи олим эди. У ҳаммадан кўпроқ ҳинд халки зарар кўраётган феодал урушларни тугатди, савдо-сотик, қурилиш, фан ва адабиётга ҳомийлик қилди. Бу буюк ватандошимиз Туркистон, Ҳиндистон ва Афғонистон халқлари тарихига, уларнинг санъати, урф-одатларига ва динига катта қизиқиш ва хурматини намоён қилди. Шу хислатлар туфайли у ўзи забт этган ҳудудда қудратли давлат барпо этди ва маданият тараққиётига катта ҳисса қўшди.

Бобур 1530 йили вафот этди. У ер мулкларини фарзандларига бўлиб, Деҳли таҳтида севимли фарзанди Ҳумоюнни қолдирди ва колган фарзандларига унга буйсинишни васият қилди. Бироқ ака-укалар Бенгалия ва Бихар феодаллари билан бирга Ҳумоюнга қарши бирлашдилар. Бир неча жангларда мағлуб бўлган қобилиятсиз Ҳумоюн Синд орқали Эронга қочиб кетди. Натижада ҳокимият 15 йилга (1540–1555) Сур уруғидан бўлган афғон феодаллари қўлида колди. Ҳумоюн Деҳли таҳтига қайтишга муваффақ бўлди, аммо тез орада, 1556 йили вафот этди. Таҳтга Ҳумоюннинг 13 ёшли ўғли Акбар (1542–1605) келди.

Акбар ва унинг ислоҳотлари. Бобурнинг ворислари ичida энг машҳури Акбар эди. У ҳакиқий империянинг асосчиси, Ҳиндистон тарихида буюк ислоҳотчи сифатида ном қолдирган. Бобурйлар империяси унинг ҳукмронлиги даврида энг юксак гуллаб-яшнашга эришди. Акбар отасидан мерос қилиб урушлар оқибатида хароб бўлган бир неча ярим мустакил князликларнигина олган эди. У баъзан қурол кучи билан, баъзан эса келишувлар йўли билан мамлакат ҳудудини бир неча марта кенгайтирди, бой вилоятлардан Гужорат, Бенгалия, Марказий Ҳиндистон ва Кашмир, шунингдек, Декан сultonлигига қарашли Берар ва Ахматнагор ерларини ўз давлати таркибиغا қўшиб олди. Илгари доимий тинчликни бузувчилар бўлган мағрут ва жанговар Ражпут рожаларини ўзининг ишончли иттифоқчиларига айлантирди, уларнинг энг обрўилари билан кудаандачиликни йўлга қўйди, ражпутларнинг отлиқ қўшини Акбар армиясининг асосига айланди. Акбар мустаҳкам, марказлашган давлатни ва кучли марказий ҳокимиётни барпо қилиш учун бир қатор ислоҳотларни амалга оширди. Ҳудудий-маъмурий ислоҳотлар натижасида империя аниқ бошқарув, суд ва солик тизимиға эга бўлган, подшоҳ тайинлайдиган ноиблар томонидан бошқариладиган

худудларга ажратилди. Бутун империя учун бир хил узунлик ва оғирлик ўлчов бирликлари тизими, ислом ва хиндуизмнинг додг-маларига эмас, ўша давр астрономия фанининг, хусусан Улуғбек астрономиясининг ютуқларига асосланган тақвим жорий қилинди.

Солик ислоҳоти мамлакат иқтисодиёти учун фавқулодда мухим аҳамиятга эга бўлди. Натурал шаклда олинадиган, одатда ҳосилининг 1/3 гача етадиган ер солиги пул шаклига ўтказилди. 1570 йилларнинг охирида подшоҳ бир неча асрлардан бери мавжуд бўлган ҳарбий-лен тизимини бекор қилишга, ҳарбий хизматлари учун ажратиладиган ер ўрнига пул билан тўлашни жорий қилишга ҳаракат қилди. Бунга қарши турли жойларда исёнлар бўлганлиги сабабли ислоҳотни тўхтатишга тўғри келди. Акбар давлат хизматидаги феодаллар учун мансаблар тизимини жорий қилиш билан чекланди.

Ислоҳотлар ичida Акбарга энг катта шуҳрат келтиргани диний ислоҳот бўлди. Бу ислоҳотнинг мақсади диний мансублигидан қатъи назар ҳукмрон гурӯхларни жисплаштиришдан иборат эди. Акбар ўз тарафига маҳаллий ҳинд аҳолисини ҳам оғдиришга ҳаракат қилди. Ҳиндистон аҳолисининг тўртдан уч қисмини ҳиндуизм динига сифинувчиilar ташкил қиласа-да, Аллоҳ ва унинг пайғамбари Муҳаммадга сифинган барчанинг тенглигини эълон қилган ислом динининг айниқса паст касталар орасида таъсири кучайиб бораётган эди. Диний муносабатлар мураккаб, баъзан эса муросасиз бўлиб қолаётган бўлса-да, ислом дини бобурийлар империясининг давлат дини, аслзодаларнинг аксарияти сифинадиган дин эди. Шу сабабдан ҳам Акбар диний муросасозлик сиёsatини олиб борди. У мамлакатни бошқаришга мусулмонлар билан бирга ҳиндларни ҳам жалб қилди, ҳиндларни ҳар қандай таъқиб қилишларни тўхтатди, мусулмон бўлмаганлардан олинадиган солик – жузъяни бекор қилди. У ўз мамлакати доирасида тўлиқ диний эркинликни эълон қилиб, мусулмон бўлмаганларнинг ҳар қандай камситилишини бекор қилди.

У Ҳиндистон қишлоқ хўжалигининг асоси бўлган суғориш тизимини яхши асраш йўлида кўп ишлар қилди. Бу ҳинд дехқончилиги учун катта аҳамиятга эга эди.

Акбарнинг ислоҳотлари мусулмон феодаллар ва диний мутаасибларнинг норозилигига сабаб бўлди. Улар подшоҳни динсизлигда айблашдилар, ҳалқни унга қарши кўтаришга ҳаракат қилдилар. Норозилар томонда Акбарнинг ўғли, таҳт вориси Жаҳонгир ҳам

бор эди. У таҳтга келиши билан (1605–1627) отасининг кўплаб ислоҳотларини йўққа чикарди.

Жаҳонгирнинг ўғли Шоҳ Жаҳон хукмронлик қилган йиллари (1628–1657) империя ўз қудратининг энг чўққисига етди.

Шаҳар, ҳунармандчилик ва савдо. Ҳиндистоннинг бобурийлар хукмронлиги остида бирлашиши шаҳарларнинг, савдо ва ҳунармандчиликнинг ҳам ривожланишига олиб келди. Шаҳарлар иқтисодий, маъмурий-сиёсий ва маданий марказлар ролини ўйнай бошлади. XVII асрда хинд шаҳарларида аҳолининг 15–20 фоизи яшарди. Айрим шаҳарлар масалан, Дехли, Лахор, Агра, Ахмадобод кабилар аҳолиси жуда кўпсонли бўлиб, ярим миллиондан ошарди. Шаҳарлarda ҳунармандчиликнинг кўплаб турлари, айниқса тўқимачилик кенг ривожланганди. Бу соҳада янги меҳнат қуроллари, масалан, йирик нақшли матоларни тўқиши дастгоҳи, лентали дастгоҳ ва янги техник усуллар пайдо бўлди. Ҳинд матолари Европа бозорларига чиқарилди. Айниқса, Бенгалияning ўта нозик ва чиройли пахта матолари жуда машҳур эди.

Металлга ишлов бериш, айниқса қуролсозлик яхши ривожланган бўлиб, европаликлар ҳиндернинг тўплари, мушкетлари ва тўппончаларига юқори баҳо беришган. Қирғоқбўйи шаҳарларида, айниқса Суратда европаликларнига ўхшаш кемалар куриларди, Англияning Ост-Индия компанияси тез-тез шундай кемаларга буортма берарди.

Кўпчилик ҳунармандлар оиласлари билан ишлар, баъзилари эса ёлланма меҳнатдан ҳам фойдаланар эди. Йўқчилик ва бозордан хомашё сотиб олиш эҳтиёжи ҳунармандларни ҳали тайёр бўлмаган матолар учун савдогарлардан пул олишга мажбур қиласларди. Ҳунарманд эса шу йўл билан қарзга ботарди.

Ҳунармандлардан маҳсулотни сотиб олиш, олдиндан пул бериш, ишлаш учун хомашё тарқатиш – савдо капиталининг ҳунармандчиликка кириб бориш йўллари шулар эди ва ҳиндердан бу йўлларни европаликлар ўзлаштирган эдилар. Подшоҳга ва маҳаллий феодалларга ҳам тегишли корхоналар бўлиб, уларда моҳир ҳунармандлар меҳнат қиласлар ва асосан безак буюмлари ясар эдилар. Шаҳар ҳунармандларининг ижтимоий бирлашув шакли касталар бўлиб, улар ишлаб чиқариш ва савдони тартибга солиш, бошқа каста ва давлат вакиллари билан алоқа ўрнатиш, муҳтожларга ёрдам кўрсатиш каби фаолиятлар билан шуғулланган.

XVI–XVIII асрларда Ҳиндистон савдонинг ривожланганлиги билан ҳам характерланади. Бутун мамлакат бир-бiri билан узвий боғланган катта-кичик бозорлар билан ўралган эди. Шахарлар товар алмашинув пунктлари бўлиб, бу ерларда савдо ва банк капитали фаол иш олиб бораради. Ўзига хос «фирмалар», «савдо уйлари» мавжуд бўлиб, улар ўзларига маълум синалган тизим билан иш юритардилар. Умуман шаҳар савдогарларини ўта юқори касбий маҳорат ва ишчанлик ахлоқи ажратиб туради. Савдогарлар ва банкирлар орасида кредит хатлари кенг тарқалган бўлиб, савдогар бу хат воситасида Самарқанд ва Жиддада, Пега ва Маскатда, ҳатто Астраханда ҳам осонгина пул олиши мумкин бўлган. Бой савдогарлар подшоҳ саройига ҳам кредит бериб, шу йўсинда сиёсатга ҳам таъсир ўтказишган.

Шаҳар маданияти Ҳиндистоннинг санъати ва адабиётига ҳам катта таъсир кўрсатди. Диний ислоҳотчилик ғоялари ҳам шаҳарларда пайдо бўлди. Бу ерда албатта саводилиар сони ҳам қишлоқдагиларга қараганда анча юқори эди. Ҳиндларнинг кўплаб тилларида «шаҳарлик» дегани «маълумотли», «козик таъб» деган маъноларни ҳам англатади. Шаҳарликлар, айниқса «бозор кишилари» орасида браҳманларнидан фарқ қиласидан ўз дунёқарашлари, ўз қадриятлар тизими шаклланади. Бу ерда маҳорат, тезкорлик, тадбиркорлик, тежамкорлик, баъзан ёлғондан ҳам қайтмайдиган олчоқлик қадрланади ва хислатларнинг барчаси шаҳар адабиётининг турли жанрларида ўз ифодасини топади.

Халқ ҳаракатлари ва империянинг парчаланиши. Бобурийлар даврида Ҳиндистонда бетакрор ва ҳашаматли бинолар қурилди, улар хинд ва мусулмон меъморчилигининг уйғуналигини ўзида мујассамлаштириди.

Бироқ аҳолининг катта қисми аввалгидек қашшоқликда кун кўярди. Акбарнинг солиқ ислоҳотлари умуман тараққийпарвар аҳамиятига қарамасдан, дехқонларнинг аҳволини янада оғирлаштириди, судхўрликка кенг йўл очди. Қарздор бўлиб қолган дехқонлар ерларини ташлаб қочиб кета бошладилар. Унумдор ерлар чангальзорларга айланди. Йўлларда қароқчилар кўпайиб, савдо тушкунликка учрай бошлади. Давлат хазинасига ҳам тушумлар камайиб кетди. Бундай ҳолатда империядан ажралиб чиқиши, айирмачилик кайфияти кучайди. Натижада бобурийлар империяси инқирозга юз тута бошлади. Бу ҳолат айниқса Шоҳ Жаҳоннинг ўғли Авранг-

зеб ҳукмронлиги йилларида (1658–1707) авжига чиқди. Аврангзеб сарой фитнаси натижасида отасини таҳтдан ағдариб ва қонли жангда учта ака–үкаларини енгиб таҳтга келган эди. У тажрибали қўмондон ва сиёсий найрангларнинг устаси бўлган. У Декан во-дийсига бир неча юришлар уюштириб, энг чекка жанубдан ташқари бутун Ҳиндистон ҳудудини бирлаштиришга эришди. Мутаассиб диндор бўлғанлиги сабабли парчаланаётган империяни сақлашнинг йўли сифатида ислом қоидаларини қатъи жорий қилишга киришди. Мусулмон бўлмаганлардан олинадиган солиқ – жузъяни қайтадан тиклади, ҳиндлар учун қолган барча солиқларни икки ҳиссага оширди, уларга ўз байрамларини нишонлашни тақиқлади, ҳинд ибодатхоналарини бузиб ташлашни буюрди. Натижада империянинг турли чеккаларида бобурийларга қарши ҳаракатлар бошланиб кетди. Бу ҳаракатлар феодал давлатларда доимий бўлиб турадиган одатдаги қўзғолонлардан оммавийлиги билан ажralиб турарди. Бобурийларга қарши ҳаракатларнинг гоявий асосида этник ва диний факторлар алоҳида аҳамиятга эга бўлди.

Йирик қўзғолонлардан бири Махараштра минтақасида бўлиб, унга Шиваджи (1630–1680) исмли киши бошчилик қилган. Қўзғолон 1646 йили бошланиб тезда мустақил давлатнинг ташкил топишига олиб келди. 1674 йили Шиваджи тантанали равишда таҳтга ўтириди. Бироқ Шиваджининг ўлимидан сўнг бир неча йил ичida Аврангзеб бу давлатни босиб олди. Таҳтга келган Шиваджининг ўғли Самбахаджи 1689 йили қатл қилинди. Лекин Махараштрани қайтадан тўлиқ бўйсундиришнинг иложи бўлмади. XVIII аср бошига келиб маратхларнинг мустақил давлати энди бобурийларнинг пойтахи Дехлига хавф солиб турарди.

XVII аср бошларида юз берган йирик қўзғолонлардан яна бири сикхларнинг мустақиллик учун кураши эди. Ўз вақтида Ақбар шоҳнинг ҳомийлигидан фойдаланган сикхлар кейинчалик яrim мустақил давлатга айланган эди. 1675 йили Аврангзеб сикхларнинг йўлбошчиси гуру Тег Бахадурни Дехлида қатл қилдирди. Шундан сўнг сикхлар ҳаракатига гурунинг ўғли, қобилиятли сиёsatчи, саркарда ва шоир, кенг билимли ва жасур шахс гуру Гобинд Сингх (1666–1708) раҳбарлик қилади. XVII аср ҳинд маданиятининг ёрқин намояндаларидан бири Гобинд 1708 йили ёлланма қотил томонидан ўлдирилди. Гобиндинг ўлимидан сўнг ҳаракатга Банда Бахадур

исмли шахс раҳбарлик қилди ва 1715 йили у ўлдирилгандан сўнг ҳам ҳаракат давом этди.

XVII–XVIII асрларда яна бир қанча қўзғолонлар бўлиб, уларда сварадж – «ўзимизнинг ҳокимият» сўзи пайдо бўлди ва бу сўз XIX–XX асрлардаги миллий-озодлик ҳаракатининг ҳам шиорига айланди.

XVIII аср бошларига келиб империянинг реал инқирози бошланди. Армия аввалги қудратини йўқотди, маҳаллий ҳукмдорларнинг эса мустакиллиги ошди. Император энди на маъмурий, на ҳарбий ҳуқуққа эга бўлмаган, ўзига хос давлатлар уюшмасининг рамзий ҳукмдорига айланиб қолди. Энди унинг ҳаракатлари факат саройдаги қарама-карши гурухлар ўртасида мувозанат ўрнатишга қаратилган эди, холос.

Шундай бир ҳолатда, 1739 йили Эрон шохи Нодиршоҳ қўшинлари Ҳиндистонга бостириб кириб, Деҳлини талади, пойтахт ахолисининг кўпчилигини кирғин қилди. Ундан кейин Шимолий Ҳиндистонни аффонлар босди. Деҳли императорларининг ҳокимияти тобора заифлашиб борарди. Мамлакат амалда унга кўз олайтираётган европаликлар учун қулай бўлган феодал тарқоқликка қайтди.

Европаликларнинг Ҳиндистонга кириб келиши. Европалик мустамлакачиларнинг Ҳиндистонга кириб келиши ҳали XVI асрдаёқ бошланган эди. Ҳиндистонга денгиз йўлини очган португаллар Малабар қирғоқларидаги бир неча базаларни эгаллаб олдилар. Лекин улар мамлакат ичкарисига кириш учун етарли кучга эга эмасдилар.

Португалларнинг ўрнига келган хотиржам ва мулоҳазали голландлар Ҳиндистондан катта микдорда қандолат маҳсулотларини олиб кетар, ҳиндларнинг ҳаётига умуман аралашмасдан факат савдо билан шугулланишар эди. Сўнг пайдо бўлган французларда эса ҳинд ҳукмдорларининг таҳт талашларида зимдан иштирок этиш истаги йўқ эмасди.

Бирор ўша пайтда бутун Европада мавқеи ошиб кетаётган ишбилармон ва чаққон инглизлар бошқа барча европаликларни Ҳиндистондан сикиб чиқариб, ўзлари факат савдода эмас, сиёсий ҳаётда ҳам тобора катта рол ўйнай бошладилар. Шу мақсадда тузилган Ост-Индия компанияси 1600 йили Ҳиндистонда ўз корхоналарини очиш ҳуқуқини қўлга киритди. Ост-Индия компанияси акционерлик жамияти бўлиб, унинг маблаглари жуда тезлик билан ошиб бор-

ди. 1657 йили Кромвелнинг маҳсус хартияси эълон қилинган бўлиб, унга биноан компанияга уруш эълон қилиш ва сулҳ тузиш, танга пул зарб қилиш ва ўз армиясига эга бўлиш хукуки берилган эди. Компания Ҳиндистоннинг турли нуқталарида савдо шохобчалари, шўйбалар ташкил қила бошлади. Масалан, фақат Бенгалияда компаниянинг 150 та омбор ва 15 та йирик шўйбалари мавжуд эди. 1690 йили улар бобурийлардан олган ерларига мустаҳкам қўрғон – Калкutta шаҳрини барпо қилдилар. Улар савдо ва сиёсий фаолиятининг марказлари Дехли, Калкutta ва Мадрас шаҳарлари бўлиб қолди.

Компания, шунингдек, генерал-губернатор бошқарадиган ер мулкига ҳамда уни қўриқлаш учун маълум микдордаги қўшинга ҳам эга эди. Шу тариқа инглиз офицерлари қўмондонлигига Европа усулида куролланган ва ўргатилган ёлланма ҳинд аскарлари – сипоҳилардан ҳарбий қисмлар ҳам ташкил қилинди.

Ост-Индия компаниясининг бошида енгил ва тез бойишнигина излайдиган мулкпарат иш билармонлар турар ва улар Ҳиндистоннинг ерлари ҳамда бойикларини эгаллаб олиш учун ҳар қандай қабиҳликдан ҳам қайтмасдилар.

Англияning Ҳиндистондаги асосий рақиби Франция эди. Бирок Англияning иқтисодий қурдати ва инглиз компанияларининг давлатдан узлуксиз ёрдам олиб турганлиги туфайли француздар енгилди. 1763 йилдан кейин Францияning Ҳиндистонда бирорта ҳам мустаҳкамланган қалъаси қолмади. У фақат арзимас савдо позициясини сақлаб қола олди, холос.

Ост-Индияning савдо компаниясидан мустамлака ҳокимиятига айланиб бориши оқибатида XVIII аср ўрталаридан бошлаб эгалланган худудларда ҳарбий ва маъмурий ҳокимиятини ўрнатиш ҳамда дипломатик келишувлар компания фаолиятнинг асосий турлари бўлиб қолди. 1757 йили инглизлар Бенгалияни босиб олдилар ва бу Ost-Индия компаниясининг қўшинлари томонидан бутун мамлакатни аста-секин эгаллашнинг, ҳинд халқининг икки юз йиллик асоратининг бошланиши эди. Инглизларнинг муваффақиятларига уларнинг саноатдаги илғорлиги билан бирга улкан сипоҳи қўшинларига эвалиги ҳам сабаб бўлди. Айтиш мумкинки, Ҳиндистон асосан ҳиндларнинг ўз қўллари билан забт этилди.

XVIII аср охирларида ўзининг барча рақибларини енган Ost-Индия компанияси шу тариқа тарқоқ ва заиф Ҳиндистонни бўйсундиришда давом этди.

XVIII асрда Ҳиндистон

Аср бошларида бобурийлар империяси кучли халқ харакатлари оқибатида барбод бўла бошлади. Бу жараёнга якунловчи зарбани 1739 йили Ҳиндистонга бостириб кирган Эрон ҳукмдори Нодир шоҳ берди. Дехли даҳшатли талон-торож қилинди. Бобурийлар империяси таркибига кирган барча ерлар ўзларини мустақил деб эълон қилдилар. Нодир шохнинг босқинидан сўнг, 1750-йилларнинг иккинчи ярми ва 1760-йилларнинг бошларида Афғонистон ҳукмдори Аҳмад шоҳ Дурронийнинг қўшинлари Ҳиндистонга бостириб кириб, Дехли ва унинг атрофини таладилар.

Бобурийлар империяси ўрнида пайдо бўлган давлатлар ижтимоий-иқтисодий, сиёсий ва маданий тараққиётнинг турли босқичларида эди. Янги давлатларнинг кўпчилиги худуди ва аҳоли сони жиҳатидан Европа давлатлари билан тенглаша оларди. Уларнинг баъзилари давлат тузилиши жиҳатидан бобурийлар империясини аниқ такрорлаган бўлса, бошқалари қандайдир ўзига хос йўлни излай бошладилар. Умуман Ҳиндистоннинг XVIII асрдаги ахволини замондошлар оғир, инқирозли деб баҳолашган. Янги мустақил давлатлар ўртасидаги урушлар шаҳар ва қишлоқларни вайрон қилиб, иқтисод ва савдонинг ривожланишини тўхтатиб қўйганди. Баъзи чекка давлатларда эса иқтисодий ва маданий ҳаёт гуркираб ривожланди, савдо ва ишлаб чиқариш ўсди, кўркам архитектура иншоотлари бунёд этилди. Уларнинг тинч ва тўкин ҳаётларига хавф қўшниларидан эмас, энди Ҳиндистондаги тижорат фаолиятидан худудларни босиб олишга ўтган европалик мустамлакачилардан, асосан инглизлардан келаётган эди.

Ҳиндистондаги худудлар учун икки Европа давлатлари – Франция ва Буюк Британия ўртасидаги рақобат ер юзининг катта қисмини – Канададан Ҳиндистонгacha бўлган худудни қамраб олган катта рақобатнинг бир қисми эди, холос. Агар хинд ерлари учун курашда дастлаб французларнинг қўли баланд келиб, улар инглизларнинг Жанубдаги асосий таянч пункти – Мадрасни эгаллашган бўлсалар, кейинчалик асосан Карнатик ва Ҳайдаробод худудларида олиб борилган жангларда улар қақшатгич мағлубиятга учрадилар. Етти йиллик (1756–1763) уруш натижасида Франция Ҳайдаробод ва Карнатикдаги асосий ерларидан айрилди. XVIII аср 50–60-йилларида инглизларнинг Бенгалияни – ривожланган қишлоқ хўжалик

вилояти, дунёга машхур тўқимачилик марказини эгаллаб олишлари Етти йиллик урушда Франция мағлубиятининг асосий сабабларидан бири бўлди. Бенгалияда маҳаллий ҳокимлар номинал ҳокимиятни сақлаб қолган бўлсаларда, Р. Клайв, Г. Ванситтарт, У. Хейстингс каби губернаторлар (бу лавозим Буюк Британия парламенти томонидан 1773 йили жорий қилинган) бу ернинг ҳақиқий хўжайинлари эдилар. Бенгалиянинг эгалланиши инглизларга хиндларнинг муқаддас шахри Варанаси ва бой вилоятлардан бири Аудни эгаллаш учун йўл очди. У. Хейстингс томонидан бошланган Аудни талаш сиёсати унинг ўрнини эгаллаган Ж. Шор (1793–1798) томонидан давом эттирилди.

XVIII асрдаги нуфузли давлатлардан яна бири Маратхлар конфедерацияси эди. Конфедерация бешта катта: Нагпур, Гвалиор, Индор, Барода ва Махараштранинг ўзи ҳамда бир неча кичик давлатлардан ташкил топган эди. Бу давлатларнинг ҳукмдорлари марказий ҳокимият бошлиғи пешвни ўзларига фойдали ва қулай бўлган даражадагина тан олардилар. Ҳали Шиваджи томонидан тузилган кучли марказлашган, этник бир хил давлатдан асар ҳам қолмаганди. Бу ҳол инглизларга ўзларининг босқинчилик мақсадларини амалга ошириш учун жуда қулай эди. Бу борада Ост-Индия компаниясининг назорат кенгаши раиси лорд Дандас 1798 йили шундай деб ёзади: «Бахтимизга на маратхлар империясининг бошлиғи, на конфедерация таркибига кирувчи давлатлардан бирортасининг раҳбари маратхларни бирлаштириш учун етарли куч ва воситага эга эмас». Маратхларнинг сикхлар ва Ражпут князлари билан иттифоки ҳам мустаҳкам эмасди. Дастрлаб бир-бирига ёрдам қўрсатганлигига қарамасдан, 1761 йили Панипат ёнидаги жангда Аҳмад шоҳ Дурроний қўшинлари маратхлар армиясини тор-мор қилди. Бу мағлубиятдан кейин маратхлар Шимолий Ҳиндистонда ўзларининг гегемонлик ролини йўқотдилар. Кейинчалик маратхлар Деҳлини эгаллашга ва Шимолий Ҳиндистонда ҳукмронликларини тикилашга бир неча бор уриниб кўрдилар. Фақат Махададжи Синдхия ва Нана Пхаднис ҳокимиятни эгаллаб турганда 1790-йиллардагина маратхларнинг обрўси бир оз тикланди.

Ҳиндистоннинг жанубида маратхларнинг рақиблари Ҳайдаробод ва Майсур эди. Ҳайдаробода бобурийларнинг ворисларидан бўлган низомлар ҳукмронлик қиласарди. Низомлар келиб чиқишига қўра ўзларини бутун Деканда олий ҳокимиятга даъвогар ҳисоблашар

ва қолганлардан вассалликни талаб қилишар эди. Лекин бошқалар учун бу энди хеч қандай таъсирга эга эмасди. Қандайдир даражада ўз мавқеларини сақлаб туриш учун Ҳайдаробод ҳукмдорлари Ост-Индия компанияси билан шартнома тузиб, инглизларнинг кўғирчоқларига айландилар.

Кўғирчоқ ҳукмдор бўлишни хохламаганлардан бири унча катта бўлмаган Майсур давлати ҳукмдори Ҳайдар Али ва унинг ўғли Типу Султон эди. Майсурни бўйсундириш учун инглизлар узоқ уруш олиб боришиди. 1767–1769 йиллари бўлиб ўтган биринчи инглиз-майсур уруши Ҳайдар Алиниң ғалабаси билан якунланди. 1780–1784 йиллардаги иккинчи инглиз-майсур уруши даврида Типу Султон французларга мурожаат қилиб уларнинг ёрдамини олишга эришиди. Шунга қарамасдан у 1784 йили инглизлар билан Мангальор сулҳини тузишга мажбур бўлди. Сулҳга биноан Типу Карнатикдан, инглизлар эса Малабардан қўшинларини олиб чиқиб кетдилар. Учинчи инглиз-майсур уруши 1792 йили тинчлик шартномаси билан якунланиб, Типу инглизларга 33 млн рупия контрибуция тўлайдиган ва ушбу сумма тўлангунча Типунинг икки ўғли гаровда сақланадиган бўлди. 1799 йили бўлган тўртинчи урушда Типу Султоннинг бир қатор вазирлари ва қўшин бошлиқлари хоинлик қилганлиги, инглизлар ваъда қилган катта пулга сотилганлиги учун майсурликлар мағлубиятга учрадилар. Узоқ каршилик кўрсатган Майсур давлати охир оқибатда инглиз мустамлакачилари томонидан забт этилди.

Ижтимоий фикр, фан, адабиёт ва санъат. Бу даврда бхакти ва сўфизм таълимотлари кенг тарқалган эди. Ҳиндистон шимолида бхакти таълимотининг йирик намояндалари Даду Дајал (1544–1603) ва Малукдас (1684 йили вафот этган) эди. Малукдас мусулмонларнинг динини ҳам, хиндларнинг урф-одатларини ҳам, хинд фалсафасидаги олтита тизимни ҳам тан олмайди. Унинг фикрича Рама, Хари, Оллоҳ битта худонинг исмларидир. Одамларни эътиқодига қараб эмас, ниятига, ҳаракатидан фарқламоқ керак. Худога етишишнинг «ҳақиқий йўли» шафқат қилишда ва яқинларига ёрдам кўрсатиша, дейди у.

Кришнача бхакти таълимотига телингандлик брахман Валлабхой (1478–1530) Матхура яқинидаги Гокулада, хинд мифологиялари га мувофиқ Кришнанинг болалик ва ёшлик йиллари ўтган жойда, асос солади. Валлабхой ўз издошларига таклиф қилган йўл пушти (тарж. кўллаб-куватлаш) деб аталади ҳамда ғариф ва бечора-

ларга мўлжалланган. Валлабхойнинг издошларидан, ўз даврининг буюк шоири Сурдас – «Худо ҳеч қандай касталарни тан олмайди. Сен ғарифмисан ё рожа, унга барча баробар», деб ёзади. Жамиятини диний ва каставий ажратишга қарши ҳаракат ўша давр илфор гояларининг асосий мавзуси ҳисобланади.

XVI–XVIII асрлар Ҳиндистонда янги дин – сикхизмнинг шакланиш даври бўлди. Ортодоксал ҳиндуизмдан ва кўпсонли бхактилар жамиятидан сикхизм тарафдорларини яккахудоликка ўта катъи итоати ва аскетизмга, таркидунёчиликка ғоят салбий муносабати ажратиб туради. Сикхлар меҳнат орқали кун кечиришни инсонга хос ягона хаёт тарзи деб тушунишган. Тиланчилик қилиш ва бошқалар ҳисобига кун кечиришни сикхлар энг оғир гуноҳ деб ҳисоблашади.

Бу давр фани сўнгги Ўрта асрлар ва Янги давр бошларига хос бўлган инқилобий жараёнларни бошдан кечиради. Фаннинг ютуқлари орасида математиканинг ривожини алоҳида таъкидлаш лозим. Улуғ математик Нилаканта ўзининг «Иплар мажмуи» асарида тангенс эгри чизигининг чексиз даражали қаторда ёйилиши ечимини беради. Ушбу мавзуу бошқа ҳинд математиклари томонидан давом эттирилди. Улар ўз асарлари билан Грегори, Лейбниц ва бошқа европалик олимлардан анча олдинлаб кетдилар. Шунингдек, астрономия, химия, физика фанлари ҳам катта муваффақиятлар билан ривожланди.

Табиий фанлар ичида тиббиёт алоҳида юқори ўрин эгаллади. Бу соҳа анъанавий равища икки мактабдан – аюрведа (ҳинкларники) ва юнани (мусулмонларники)лардан иборат эди. Умуман ҳинд табобати турли касалликларни аниқлаш ва даволаш бўйича ўз замонасининг илфор усусларни кашф этган. Хусусан, овқат ҳазм қилиш жараёни ва қон айланиш тизими тўғрисидаги ҳинд олимларининг трактатларида ҳали европалик олимлар даволай олмаган касалликлар ва уларни даволаш усуслари тўғрисида маълумотлар берилган. Хирургия, айниқса пластик хирургия, Европа фанидан анча олдинлаб кетган эди. Бу давр ҳинд фармакологияси ҳам яхши ривожланган.

Агар олдинги даврларда ҳинклар ва мусулмонлар бир-бирини билишга, ўрганишга ҳаракат қилган бўлсалар, бобурийлар даврига келиб улар ўзаро бир-бирларини тушуна бошладилар. Бу ҳол энг аввало адабиётда ўз аксини топди. Ақбар шоҳ саройида маҳсус таржимонлар гурухи тузилган бўлиб, улар барча мусулмонларга тушунар-

ли бўлган форс тилига ҳиндларнинг муқаддас китоблари ва адабиёт намуналаридан «Махабхарата», «Рамаяна» ва «Атхарваведа»ни таржима қилдилар. Умуман Акбар шоҳ подшолик қилган давр мисли кўрилмаган маданий юксалиш даври бўлди. Шоир ва тарихчи Абул Фазлнинг Ҳиндистон тарихига бағишлиган асарлари, унинг укаси, «Махабхарата»нинг таржимасига раҳбарлик қилган Абул Файзийнинг «Нал ва Даман» поэмаси Ҳиндистон адабиётининг юксак намуналаридан хисобланади. Бу давр адабиётининг энг юксак чўққиси Шарқ ҳалқларининг гениал шоири, файласуфи, мутафаккири ва ўз даврининг «Мирзо Малик уш-шуаро»си Мирзо Абдулқодир Бедил (1644–1721) ижодида намоён бўлди. Бедилнинг фикрича дунёдан ташқарида ҳеч қандай куч йўқ ва бўлиши ҳам мумкин эмас. Бедил дунёning бошланиши бўлмаганидек, охири ҳам бўлмаслигини, дунёда бўлиб ўтадиган ҳамма жараёнлар табиий эканлигини ўзича исботлайди. Бедилнинг назарича, дунё барқарор, бўлинмасдир, у ҳамма нарсани ўз ичига олади, одам эса реал борлиқнинг, коинотнинг маҳсулидир. Бу ҳақда Бедил шундай дейди:

*Эйки, найранг ду олам аз худо фамидан,
Баҳс заҳду дарс тавқи аз кужсо фамидан.
Мавжу кафро айн дарё туфтанат инсоф нист
Э онки гавҳарро азин олам жудо фамидан.*

Маъноси: «Эй икки олам найрангини худодан дегувчи! Тақво, диний дарс ва тортишишларни қаердан олдинг, мавж ва қўпикларни худди дарёнинг ўзи дейиш инсофдан эмас. Сен у гавҳарни бу оламдан ажратиб тушунгансан!». Бедил «гавҳар» деб худони англаған.

Европалик мустамлакачилар Ҳиндистонни босиб олишга уринаётган бир пайтда Бедил бирдамликка чақиради:

*Ёрон ба вифоқ агар қадам мешкананд,
Жайши арабу сафи ажсам мешкананд.
Аз қудрати иттифоқ, ғофил, нашави,
Дандонҷо сангро бахам мешкананд.*

Маъноси: «Агар ёронлар бирдамлик билан қадам ташласалар, душманнинг усул-идораси ва қўшини тор-мор бўлгусидир. Иттифоқ бўлиш қудратидан ғофил қолма, эсингда тутки, тишлар бирлашиб тошни синдиргусидир».

Бу даврда маҳаллий тилларда ижод қилганларнинг ичидаги иккита буюк ном ажралиб туради – Тулсида ва Сурдас. Тулсида «Рамаяна» сюжетлари асосида «Раманинг жасоратлари» номли жуда катта поэма яратади. Поэма оддий халқ орасида айниқса машҳур бўлган. Ривоят қилишларича Сурдас кўр бўлган, аммо бу ҳол унга Кришнанинг хаёти ҳақидаги ёрқин поэма – «Сура океани»ни яратишга халақит қилмади.

Бобурийлар даври архитектураси маҳобати, безакларнинг бойлиги, мусулмон меъморчилиги ва ҳинд сарой архитектураси ань-аналарининг уйғунлиги билан ажралиб туради. Бу даврда бунёд этилган меъморий обидаларнинг энг машҳури, жаҳон меъморчилик санъатининг ноёб дурдоналаридан бири Тож Махал мавзолейидир. Уни Шоҳ Жаҳон севимли хотинига бағишлиб қурдирган.

Тасвирий санъатда минатюра жанри, мусикада бобурийлар мусиқаси XVIII асрдаги сиёсий воқеалар адабиёт ва санъатга ҳам таъсир этмай қолмади, улар ҳам бошқа соҳалар сингари тушкунликка юз тутдилар.

* * *

Шундай қилиб, қачонлардир юксак тараққиётга эришган Ҳиндистон XVII аср охиридан бошлаб қарийб 300 йилга инглизларнинг мустамлакасига айланди. Мамлакатдаги иқтисодий тушкунлик ва сиёсий парокандалик, бобурийлар империяси ўрнида пайдо бўлган давлатларнинг ўзаро урушлари инглизларнинг Ҳиндистонни босиб олиши учун имконият яратди. Энг ачинарлиси инглизлар Ҳиндистонни ҳиндларнинг ўзлари ёрдамида босиб олди ва узок йиллар қарамлиқда ушлаб турди.

XXI боб бўйича саволлар

1. Ҳиндистондаги қандай ижтимоий-сиёсий ҳолат Бобурнинг Дехли таҳтини эгаллашига сабаб бўлди?
2. Акбар ислоҳотларининг асосий максади жамиятдаги қандай зиддијатларни бартараф қилишга қаратилган эди?
3. Бобурийларнинг қайси ислоҳотлари савдо ва ҳунармандчиликнинг ривожланишига, маданий марказлар ролининг ошишига олиб келди?
4. Қандай сабаблар туфайли бобурийлар империяси инқирозга учради?
5. Ҳиндистон ривожланишининг қандай жиҳатлари европаликларнинг кириб келишлари учун шароит яратди?

ХХII БОБ. XVI–XVIII АСРЛАРДА ЯПОНИЯ

Япония тарқоқлик ва фуқаролар урушлари даврида

Янги замонни Япония, «жангари вилоятлар даври» номини олган тарқоқлик ва фуқаро урушлари давридаги Асикага сёгунатидан (1467–1568) мерос қилиб олди. Бу давр вассалларнинг сёгунга қарши курашлари билан ажралиб туради. Асикага хонадонидан бўлган сёгунлар пойтахт Киото устидан назоратни қўлдан бердилар, у ерда шаҳарни мустақил бошқаришнинг қучли тизими шаклланди. Етакчилик энди вилоятлардаги ҳукмдорларга – князь-даймиоларга ўтди. Ўз князликларида улар хўжалик ва сиёсий ҳаёт устидан тўлиқ назорат ўрнатишга ҳаракат қиласилар.

Бу даврда князлар даромадларининг таркиби сезиларли ўзгарди. Агар, масалан, йирик феодал уруғи Сандёнисиларнинг даромади илк ўрта асрлар даврида (ХІІ) отамерос мулқдан (сёзендан) 50 фоиздан ортиқроқни ташкил этган бўлса, XVI аср бошларида 29 фоизга тушиб кетди. Бу ҳолат князларнинг хунармандчилик, тоғ-кон ишлари ва савдони ўз худудларида ҳамда бутун мамлакатда ривожлантиришдан манфаатдорлигини белгилаб берди. 1549 йилда Оми вилоятидаги (ҳозирги Сига префектураси) Исидэра шаҳридаги Каннодзи будда ибодатхонасида мамлакатда биринчи «эркин бозор» пайдо бўлди ва унга хунармандларни ҳамда савдогарларни жалб этиш мақсадида бозор солиғи бекор қилинди. Кейинчалик бундай бозорлар бошқа жойларда ҳам пайдо бўлди.

XVI асрда кулолчилик бўйича учта ва спиртли ичимликлар ишлаб чиқарувчи битта мануфактура типидаги корхона юзага келди. Уларнинг маҳсулотлари фақат маҳаллий талабларни қондирибгина қолмай, қисман бошқа худудларга ҳам тарқатиларди.

Хитой билан ташқи савдо ўлпон тўлаш кўринишида амалга оширилишига қарамасдан, катта даромад келтиради. Унинг устидан назорат ўрнатиш мақсадида феодаллар ўртасида аёвсиз кураш бораради.

1543 йили Япония кирғоқларида португалларнинг, олти йилдан сўнг эса испанларнинг ҳам пайдо бўлиши мамлакатдаги кейинги сиёсий ва иқтисодий муҳитга сезиларли таъсир кўрсатди. Улар мамлакатга ўқ отар қуролларни олиб кирдилар. Европаликлар олиб келган християнлик дини ҳам тарқала бошлади. Чет эллик савдогарлардан ўқ отар қуроллар харид қилиш ва ички низоларда европали-

клардан мадад олишга умид боғлаган князлар христианликни қабул қилдилар ва ўз вассалларини ҳам шундай йўл тутишга мажбур этдилар. Католикликни тарғиб қилиш, айниқса, Кюсю оролида кенг тарқалди ва бу ерда христианлик мактаблари ҳамда ибодатхоналарини оча бошладилар.

Европаликларнинг пайдо бўлиши савдо капиталининг кучайишига, ҳарбий ишнинг мукаммаллашишига кўмаклашди, ўзаро урушларни кескинлаштириди ва фақат Япониянинг бўлинниб кетиш хавфини эмас, балки унинг европаликларга тобе бўлиб қолиш хавфини ҳам келтириб чиқарди.

Ўзаро урушлар ва дехқонларнинг қўзғолонлари феодалларнинг ўзига ҳам реал хавф туғдирди; савдо капиталининг тўлақонли иш юритиши учун феодал тўсиқлар олиб ташланиши лозим бўларди; Япониянинг чет элликлар томонидан босиб олиниш хавфи етилиб келаётганди.

Хонсю ороли марказий қисмининг феодаллари – Ода Нобунага (1534–1582), Тоётами Хидэёси (1536–1598) ва Токугава Иэясулар (1543–1600) бирлашишнинг ташаббускорлари бўлиб чиқдилар.

Японияни бирлаштириши учун кураши. Ода Набунага Овари ҳудудидан (ҳозирги Айти префектурасидан) эди. У майда феодалнинг иккинчи ўғли бўлиб, отаси унча катта бўлмаган Нагоя қалъасини қурган ва уни ўша кўргонда, оиласидан алоҳида тарбиялаган. 1551 йили отаси вафот этганидан сўнг ўн етти ёшли Набунага бошқаларнинг ерларини эгаллаб олишда кўпгина ҳийла-найранглар ишлатди, қариндошларини ҳам, ўзиникиларни ҳам, қўшниларини ҳам аяб ўтирмади. Оданинг ўз қўшинини ўқотар куроллар билан таъминлаганлиги ҳарбий ютуқларига сабаб бўлди. 1573 йили у Асикага хонадонидан бўлган, бу пайтга келиб сиёсий таъсирини бутунлай йўқотган, охирги сёгунни таҳтдан қулатди.

Ўз ерларини тўғри ва нотўғри йўллар билан кенгайтириб, дехқонлар қўзғолонларини аёвсиз тарзда бостириб, Ода Набунага «сёгун-князлик» (бакухан) давлатига асос солди. Аммо унинг бундай юксалиши, авваллари бир-бирлари билан келишмай юрган кўплаб феодалларни унга қарши курашда бирлашишга мажбур қилди, бунинг устига, Оданинг ўз қароргоҳида ҳам келишмовчиликлар бошланиб кетди. 1582 йили Киотодаги ибодатхоналардан бирида рақибларининг қўшинлари томонидан қуршаб олинган Ода ўзини ўлдириш билан ҳаётини яқунлади.

Мамлакатни бирлаштириш ишини, дехқонлардан чиққан ва Оданинг хизматида ўзини кўрсатган Тоётами Хидэёси давом эттириди.

Ўзи дехқонлардан чиққан Хидэёси дехқонлар қўзғолонларини аёвсиз бостиради. Дехқонларни ерга бириткириш жараённида улардан куроллар олиб қўйиларди. 1588 йилдаги «қиличларни излаш» деб аталган фармонга биноан дехқонларнинг қиличлар, ханжарлар, милтиқлар ва бошқа куролларга эга бўлиши тақиқланарди. Уч йилдан кейин чиққан янги фармон ижтимоий табақаланишни расмий тарзда мустахкамлади. Жамиятни самурайлар (си), дехқонлар (но) ва шаҳарликлар (симин)дан иборат уч тоифага ажратиш ўрнатилди. Шаҳарликлар ҳали табақалаштирилмаган савдогарлар ва хунармандлардан иборат эди.

1598 йили Хидэёсининг ўлими биринчи бирлаштирувчиларнинг уринишларини йўққа чиқарди. Ўзаро урушлар Токугава Иэясу билан Хидэёсининг ўғли – Хидэёри ўртасида янгича куч билан алана олди.

Сэкигахара ёнидаги (Бива кўлининг шарқий қирғоқларида) жангда мағлубиятга учраган Хидэёри ва унинг тарафдорлари 1600 йили Осака шаҳрида қўним топдилар ва бу ер 15 йил давомида муҳолифатнинг марказига айланди. Сэкигахара ёнидаги жангда Токугава биринчи марта «кўринмас» лардан (нинзя) айғоқчи сифатида фойдаланди.

1603 йили Иэясу Токугава сёгун унвонини қабул қилди ва Эдо (замонавий Токио) шаҳрини пойтахт қилиб, сёгунатга (1603–1867) асос солди. Бу билан у ўз замонасининг энг машҳур хонадони ҳарбий-феодал диктатурасини бошлаб берди. Амалда Токугава ва унинг издошлири император хонадонини ҳокимиятдан ҳамда сиёсий ҳаётдан ажратди. Аммо улар императорнинг (микадо) диний обрўсини таъкидлашда давом этдилар ва доимо ҳокимиятга император руҳсати билан келганликларини таъкидлар эдилар.

Япония Токугавалар сёгунати даврида

Япония XVII аср бошларида. Токугава хонадонидан дастлабки сёгунлар даврида Япония ягона давлатга айлана бошласада, аслида мамлакатнинг бирлашишига эришилмаганди. Сиёсий мухитнинг муқимлигига эришиш князлар муҳолифатини бостириш йўли билан ушлаб туриларди. XVII аср бошларида улардан баъзилари

(Такэда, Минаи, Кумачаи) христианликни қабул қилиб (Токугава-нинг ракиблари Гарбнинг ёрдамига умид боғлашарди), оиласали билан катл килиндилар. Кўпгина князларнинг, асосан жануби-гарбдагиларнинг, ерлари мусодара қилинди. Бошқалари янги ерларга кўчирилди. Иттифоқчиларга миннатдорчилик белгиси сифатида, уларнинг ер майдонлари кенгайтирилди.

Шундай қилиб, Токугавалар ўз мулкларини Хонсю оролининг марказида жамлашга муваффак бўлдилар. Мулк эгалари бўлган князлар йиллик шоли даромади билан ўлчанадиган бойликлари даражасига биноан фарқланарди. XVII аср бошларида Япония-нинг умумий шоли даромади 11 миллион коку (1 коку – 180,4 кг.) микдорида белгиланди. Ана шу микдордан 4 млн коку Токугава хонадонига тегишли эди. Фақат энг бой феодалларнинг унча катта бўлмаган гурухларигина (фақат 16 феодал князларнинг ҳар бири 300 минг коку шоли даромадига эга эди) бир оз мустақилликдан фойдаланарди, анчагина вассал-самурайларга хўжайинлик қиласарди ва баъзан ҳатто ўз тангларини ҳам зарб қиласарди. Князларнинг асосий қисми эса (200 дан зиёд) ўзларининг иқтисодий ва ҳарбий заифликлари туфайли тўлалигича Токугава сёгуналарига боғлиқ эдилар. Микадо атрофидагилардан иборат бўлган сарой ахли ҳам ана шу қарамлар тоифасига киради.

Токугавалар даврининг бошларида Япониянинг аҳолиси 20 миллионга яқин кишидан иборат эди. XVII асрдаги барқарорлик туфайли аҳоли 29 миллионга яқинлашди. Уларнинг 80 фоиздан ортикрофи (яъни асосий қисми) қишлоқларда яшарди ва мамлакатнинг бош ишлаб чиқарувчи кучи – дехқонлардан иборат эди.

Токугавалар Япониясида ерлар феодалларга тегишли бўлган. Феодал ер эгалигининг асосий шакллари қуйидагилар эди: 1) сёгунларнинг ерлари; 2) князларнинг ерлари; 3) черков ва монастирларнинг ерлари.

Ҳар бир феодал ўз мулкида ҳукмдор сифатида иш юритарди ва ернинг амалдаги (лекин расмий эмас) эгаси эди. Шарқнинг бошқа мамлакатларида бўлганидек, ернинг олий мулкдори ҳукмдор қиёфасида, айни ҳолатда – микадо қиёфасидаги давлат ҳисобланарди. Император оиласининг ҳокимиятдан маҳрум килинганлиги ернинг шартли эгалари – князларнинг аҳволини мустахкамлади.

Савдогарлик ва ҳунармандлик асосан Япониянинг бевосита сёгунат назорати остида бўлган шаҳарларида тўпланганди. Энг йирик

шахарлар Эдо – Япониянинг пойтахти (ҳозирги Токио), Осака – мамлакатнинг бош савдо маркази, Киото – императорнинг қароргохи, порт шаҳарлари Сакай ва Нагасаки эди. XVII аср ўрталарига келиб Эдо, Киото ва Осакада 300 минг аҳоли (самурайлардан ташқари), порт ва савдо марказлари бўлган Нагасаки, Нагоя, Сакай ва Кандзава шаҳарларининг ҳар бирада 60 мингдан ортиқ киши яшарди. Хиросима, Окайма, Хаката, Кумамото ва Акита шаҳарларида 20 мингдан зиёд аҳоли истиқомат қиласарди. Хёго, Фукуога ва Такатада 10 мингдан 20 минггача одам бор эди. Қароргоҳ шаҳарларнинг катта-кичиклиги князликларнинг худудлари ҳажмига ва аҳоли сонига боғлик эди.

Токугаванинг ички сиёсати. «Япониянинг ёпилиши». Биринчи сёгун Изясу Токугава ўрнатган ва учинчи сёгун Токугава Иемицу (XVII аср ўрталари) даврида тўлиқ ривожлантирилган токугавалар тузумининг асоси қуйидагилардан иборат эди: дехқонларнинг эзилган ҳолатини сақлаб туришга асосланган мавжуд тартибни зўрлик билан ушлаб қолиш, шаҳар аҳолисининг тобелик ролини аслзодаларнинг чекланмаган хукмронлигини рағбатлантириш орқали таъминлаш. Бу феодал тартибнинг мустаҳкамлигига хавф солиб турдиган учта асосий омил мавжуд эди: феодалларга қарши кенг ҳалқ оммасининг кураши; чет эллик босқинчиларининг ташқи хавфи (Японияга бирин-кетин португаллар, испанлар, голландлар ва инглизлар хавф солиб турарди); феодаллар лагеридаги ўзаро ички урушлар хавфи.

Бу хавфларни ҳисобга олган Токугавалар ўз сиёсатларини қуйидагича қурдилар: биринчидан, дехқонлар ва шаҳарликларнинг қуи табақаларини жиловлаб туриш, иккинчидан, феодал князларнинг ўзаро муносабатларини назорат қилиш, улардан бирортасининг кучайиб кетишига йўл қўймаслик ва бу билан Токугавалар хонадонининг раҳбарлик ролини сақлаб қолиш; учинчидан, чет элликларни сергаклик билан кузатиб туриш ва Япония эшикларини ёпиб қўйиш.

Токугава ички сиёсатининг муҳим жиҳатларидан бири мамлакатни «ёпиб қўйиш» бўлди. Бунга европаликларнинг суқилиб киришлари, христианликнинг тарқалаётганлиги ва Япониянинг мустамлакага айланиб қолиш хавфи (шунга ўхшаш вазият Филиппинда юз берди) сабаб бўлди. Ҳали XVI асрдаёқ португал ва испан миссионерларининг Япониядан қул қилиб сотиш учун одамларни олиб кетишилари японларнинг қаттиқ ғазабларини келтирганди.

Бирок Токугавалар европаликларнинг ўқотар қуроллар етказиб берилишидан манфаатдор эди. Сёгун 1600 йили Японияга келган Голландиянинг Ост-Индия компаниясига анча қулай шартлар билан савдо қилиш ҳукуқини берди.

Аммо тез орада сёгунат ташқи савдодан келадиган даромаднинг катта қисмини эгаллаб олаётган голландларнинг савдо сиёсатдан ва Токугаваларнинг энг ашаддий душманлари – мамлакатнинг жанубий қисмидаги христианликни қабул қилган князларга кўрсатаётган ёрдамидан норози бўла бошлади. Буларнинг барчаси Токугавани жазо юришлари ўтказишга ва христианликни тўлиқ тақиқловчи фармон (1614) эълон қилишга унади.

1623 йили сёгун бўлган Токугава Иемицу ўзидан олдинги сёгунга кўра ҳам кучлироқ шиддат билан христианларга қарши курашга ташланди. Самабарадаги (Нагасаки яқинида) воқеалар қарама-каршиликларнинг энг юқори нуқтаси бўлди. Кўзғолончиларнинг таянчи – Симабара қальаси эгалланганидан сўнг 38 минг кўзғолончи христианлар қатл қилинди. Бу тарихда христианларни энг йирик оммавий қирғин қилишлардан бири бўлди. Шуниси характерлики, голландлар, сиёсий нуфуз орттириш учун, бу ишда сёгунга катта ҳарбий ёрдам кўрсатдилар.

Самабара кўзғолони бостирилганидан сўнг сёгунат чет элликлар учун Японияни «ёпиб қўйиш» ва мамлакатни ҳар қандай ташки таъсирдан муҳофаза қилиш ҳақида узил-кесил қарор қилди. 1638 йили Иемицу барча португалларни Япония сарҳадларидан ташқарига кувиб юбориш ҳақида фармон берди (испанлар ҳали 1634 йилдаёқ кувиб юборилганди). Япония қирғоқларига келган ҳар қандай чет эл кемаси дарҳол йўқ қилиниши, унинг экипажи эса – ўлим жазосига хукм этилиши шарт эди. Фақат голландларгина бундан мустасно эдилар. Уларга Дэсима оролчасида манзил қолдирилган бўлиб, уларнинг бу ердаги савдолари хукумат хизматчиларининг қатъи назоратлари остида амалга ошириларди.

Япония фуқароларига эса, ҳали 1636 йилдаёқ ўлим жазоси хавфи остида, ўз ватанларини тарк этиш ва узоқ саёҳатларга мўлжалланган катта кемалар куриш тақиқланганди. Ана шундай чоралар натижасида мамлакат чет элликлар учун ёпилди.

Сёгунатнинг феодал тузуми. Токугавалар барча аслзодаларни бир неча туркумга ажратгандилар. Киото зодагонларини, яъни, император оиласини ва уларнинг энг яқин қариндошларини алоҳида

гурух – «күгэ» га киритгандилар. Күгэлар феодал аслзодалар орасида энг юқори мартаба эгаларини ташкил этарди. Сарой ахли ва аслзодалар-күгэ-амалда япон жамиятидан ажратиб қўйилганди.

Бошқа барча феодал табақалар «букэ» (уй ҳарбийлари) номини олганди. Мулкдор князлар (даймио), ўз навбатида, уч тоифага бўлинарди; биринчиси сёгун хонадонига тегишли бўлиб, синхан деб аталарди, иккинчиси – фудай-қадимдан Токугавалар хонадони билан боғлик бўлган, ҳарбий ва иқтисодий томондан уларга муте бўлганлиги сабабли асосий суюнчиқлари ҳам бўлган (улар кенгаш аъзолари, ноиблар ва шу каби лавозимларни эгаллардилар) князлар хонадони вакилларидан ибоарт эди ва нихоят, учинчи тоифа-тодзама – Токугавалар хонадонига боғлик бўлмаган ва ўзларини улар билан тенг феодал хонадони деб ҳисоблаган мулкдор князларни ўзида жамлаганди. Тодзамалар ўз мулкларида улкан, қарийб чекланмаган ҳокимииятдан фойдаланаардилар. Сёгунат уларда ўз рақибларини кўрар ва ҳар хил йўллар билан уларнинг қудрати ҳамда таъсирларини камайтиришга уринарди. Уларга нисбатан ҳам чекловчи тартиблар мавжуд эди. Улар ҳукумат лавозимларини эгаллай олмасдилар.

Токугавалар ҳокимииятининг мустабитлигига қарамасдан, князлар ўз мулки доирасида қарийб чекланмаган ҳукмдор ҳисобланарди. Улар, сёгунга совғаларни ҳисобга олмагандা, ҳеч қанақа солик тўламас эдилар.

Ҳарбий табака бўлган, курол олиб юришга танҳо рухсати бўлган самурайлик ҳам расман букэга тегишли эди. Токугавалар замонидаги самурайликда эътиборли қатлам – хатамото (сўзма-сўз «байроқ остида») ажralиб туарди. Самурай-хатамотолар сёгуннинг бевосита ва энг яқин вассаллари бўлиб, Токугавалар мулкларида дехқонлар ва бошқа тўлиқ ҳукуқли бўлмаган қатламлар устидан назоратни амалга ошириб, хизматчи аёнлар ҳолатини эгаллашган, шунингдек, солиқ йиғишни ҳам бошқаргандар.

Улардан кейин сёгуннинг қўл остида бўлмаган, ҳудудий князларнинг вассаллари бўлган самурайларнинг асосий оммаси туарди. Улар ерга эга эмасдилар, ҳеч қанақа аниқ бир мажбуриятсиз, фақат ўз ҳукмдорлари-даймиоларнинг доимий аёнларини ташкил килар, маошни эса гуруч билан олардилар. Оддий самурайларнинг аҳволлари Токугавалар тузуми даврида анча ёмонлашди. Вакт ўтиши билан уй-жойсиз ва синфий қиёфаларини йўқотган бундай

самурайлар сони ортиб бораётганлиги ҳукумат учун катта хавф эди. Бу хавф шундан иборат эдики, улар қўп сонли ҳукмрон қонунлардан норозилар сафини кенгайтирас эдилар.

Норозилик чиқишларининг олдини олиш ва исённи бошланғич босқичдаёқ бостириш учун сёгунат турли хил ижтимоий кучлар: дехқонлар ва шаҳарлик камбағаллар (ронинлар ҳам қўшилади); тодзамиа-даймио князлари; норози самурайлар устидан назоратни амалга оширувчи, фавқулодда кенг тармоқли ва кучли полиция аппаратини яратди. Бироқ бу чоралар мамлакат феодал хўжалигини инқиrozдан асрраб қололмади.

Иқтисодий тараққиёт. Дехқонларнинг қўзғолонлари. Токугавалар тузуми учинчи сёгун Токугава Иемицу (1623–1651) даврида узил-кесил шаклланди. Токугавалар қонун-қоидаларининг асосан тажовузкор характерга эга эканлигига қарамасдан, то XVII аср охири – XVIII аср бошларига қадар ишлаб чиқарувчи кучларнинг ўсиши кузатилди. Бу шунинг билан изохланадики, XVI асрдаги дехқонларни хонавайрон қилган тинимсиз ўзаро урушлардан кейин Япония узоқ муддатли тинчлик даврига кирганди.

Ишлаб чиқарувчи кучларининг ривожланганлиги ҳунармандчиликдаги муваффакиятларда, ички савдонинг анча кенгайганлигига ўз ифодасини топди. Аммо буларнинг барчаси товар-пул муносабатларининг ривожланиши, дехқонларнинг табакалашуви ва савдо-судхўрлик капиталининг кучайиши каби жараёнлар билан бирга юзага келарди. Бу ҳол мамлакатнинг ички зиддиятларини кескинлаштириб юборди. Товар-пул муносабатларининг қишлоқка суқилиб кириши натижасида дехқонларнинг асосий қисми тезда хонавайрон бўлди.

Бу япон жамиятининг юқори катламида рўй берган қуйидаги воқеалар билан бирга юзага келди. Япония тарихида «Эрой генраку» деб номланган, тўқин-сочинлик бўлиб туюлган давр (1688–1703 йиллар) маданиятнинг гуллаб-яшнаши, сёгунатнинг мусиқа, тасвирий санъат, театрга ҳомийлик қилиши билан белгиланганди. Князлар зебу-зийнатга, ҳашаматдорликка ва сёгунлар саройининг исрофгарчилигига тақлид қилишда бир-бирлари билан мусобақалашардилар.

Аслзодалар кўнгилхушликларга улкан маблағлар сарфлашарди. Бу шаҳар буржуазиясининг бойишига ва савдогарлар ҳамда судхўрларга қарз сўраб тобора тез-тез мурожаат қилишаётган са-

мурайлар, князларнинг қарзлари ошиб боришига олиб келди. Айни пайтда шусиз ҳам хонавайрон бўлган дехқонларнинг асосий қисмини эксплуатация қилиш кучайди.

Агар XVII асрда ва XVIII аср бошларида Япониядаги ишлаб чиқарувчи кучларнинг бир қадар ўсиши кузатилган бўлса, ундан кейинги даврда эса таназзулнинг аниқ белгилари намоён бўлади.

Дехқон ахоли ўсишининг тўхтаганлиги бу даврнинг ўзига хос жиҳатларидан бўлиб қолди. Ҳукумат рўйхатига кўра 1726 йили Япониянинг ахолиси 29 миллион киши, 1750 йили – 27 миллион, 1804 йили 26 миллион кишини ташкил қилган. Агар шаҳар ахолисининг бир қадар ошганлиги ҳам ҳисобга олинса, кишлоқ ахолисининг шаксиз камайганлиги яққол намоён бўлади.

Ахоли камайишининг сабаблари очлик ва касалликларда эди. 1730–1740-йилларда очлик натижасида ахоли 800 минг кишига, 1780 йилларда эса 1 миллион кишига камайди, бунда очликдан бирорта ҳам самурай ўлмаган.

Ана шу ўта шафқатсиз ва қийин шароитларда дехқонлар ўз болаларини ўлдиришни кенг қўллаганлар. Бу даҳшатли одатнинг тарқалганлигини тилда дастлабки маъноси гўдакларни ўлдириш бўлган атамаларнинг (масалан, «мобики» – «ягоналаш») сақланиб қолганлиги ҳам исботлайди.

XVIII аср 80-йиллари охирида феодал тузум учун даҳшатли бўлган дехқонлар қўзғолонлари ва шаҳарлик камбағалларнинг, расмий хужжатларга «очлик исёnlари» номи билан киритилган, чиқишлиари рўй берди. Феодал Япония тарихида ҳеч қачон Токугавалар давридагидек дехқонларнинг қўзғолонлари кўп бўлган эмас (фақат қайд қилингандарни 1163 та). Дехқонлар чиқишиларининг энг кўп тарқалган тури энг адолатсиз тўловлар ва мажбуриятларнинг бекор қилинишини оммавий талаб қилиш эди. Дехқонлар қўзғолонлари тўғрисида сақланиб қолган баёнлар кўп ҳолларда уларни феодаллар ва савдогар-судхўрларнинг бошларига тушган даҳшатли ва кутилмаган халқ ғазаби сифатида тасвирлайди.

Дехқонларнинг алоҳида қўзғолонлари мавжуд тузумга қарши кенг халқ урушига айланиб кетишига Япониянинг феодал тарқоқлиги имкон бермади. Аммо бошқа томондан, айнан князларнинг тарқоқликлари дехқонларга қўпинча у ёки бу феодалларга қарши чиқишиларида ва уларни вақтинчалик ён беришга мажбур қилишларида қўл келарди.

Шуниси характерлики, феодалларга ва судхўрларга қарши барча дехқонлар, шу жумладан, бой дехқонларнинг юқори қатламлари ҳам чиқардилар. Улар хатто кўзголонларга, айниқса, феодалдан маълум бир ҳудудлардан солиқ йиғиш ҳуқуқини олган савдогар-судхўрларга қарши қўзголонларга, бошчилик ҳам қилишарди. Бу шунинг билан изоҳланадики, кўтарачи савдогарлар фақат қишлоқни талабгина қолмасдан, ўз хусусий савдо яккаҳокимлигини ўрнатиб, бошқаларнинг савдо қилишларини тақиқлашарди. Улар бу билан бой дехқонлар учун иқтисодий ташаббуснинг шундайига ҳам кам бўлган имкониятларини чеклаб қўярдилар.

Шаҳарлар ва шаҳарликларнинг чиқишилари. XVIII аср ўрталарида иқтисодий таназзул аввалига, асосан, қишлоққа тегишли бўлди. Шаҳарларда мануфактуралар ривожланиши давом этар, буржуа элементлари мустаҳкамланарди. Лекин XVIII аср охирларида дехқонларнинг қўзголонлари билан бир вақтда шаҳарлик камбағаллар-хунармандлар, майда савдогарлар, қишлоқлардан қочиб келган дехқонлар ва шу кабиларнинг чиқишилари ҳам тез-тез бўлиб турди. Баъзан бундай чиқишиларга шаҳарларни тўлдириб юборган ронинлар ҳам қўшиларди.

Шаҳарликларнинг чиқишилари асосан гуручга ва бошқа қундалик эҳтиёж молларига савдогар монополистлар ўрнатган нархларнинг оширилишига норозилиқдан келиб чиқарди. Шунинг учун ҳам бу чиқишилар япон манбаларида «гуруч исёнлари» деб аталган. Исён кўтарганлар бой савдогарларнинг уйларини бузишар, амалдорлар ёки маҳаллий князларнинг ишончли вакиллари кароргохларига ҳужум қилишар, омборларни эгаллаб олишар ва гуруч заҳирасини очларга тарқатардилар. Шуниси характерлики, бундай исёнлар пайтида уларнинг иштирокчилари кўпинча феодал тузумга қарши кенг сиёсий талаблар ҳам қўйишган.

XVIII аср охира, 1793 йилдан бошлаб, ҳали сёгун жуда ёш бўлгани сабабли, Мацудайра Садонобу регент ва Япониянинг амалдаги хукмдори бўлди. У феодал тузумни кутқариб қолиш мақсадида бир қатор чоралар кўрди. Аслзодалар ва савдо буржуазияси орасида ҳашамдорлик ва исрофгарчиликка қарши кураш эълон қилинди. Порахўрликка қарши даҳшатли чоралар кўришга уринилди. Харажатларни камайтириш учун Мацудайра Киотодаги император саройи учун қилинадиган сарфни анча қисқартириди.

Япон феодализмининг қалтираб қолган таянчи – самурайларни қўллаб-кувватлаш учун Мацуудайра фавқулодда воситаларни қўллашга журъат қилди. Уларнинг олти йилдан аввалги барча қарзлари кечирилди ва қолганлари бўйича тўланадиган фоизлар анча қисқартирилди. Бу чоралар қандайдир даражада ва қисқа вакт аслзодаларни қониқтириди, лекин савдогар-судхўрлик буржуазиясининг норозилигини кучайтириди.

Шундай қилиб, савдо буржуазияси сёгунатнинг иқтисодий сиёсатидан, уларнинг савдо манфаатлари соҳасига қўпол аралашувидан ҳамда, ниҳоят, ўз сиёсий хукуқсизликларидан норозиликларини ва ғазабини тобора кўпроқ ва кескинроқ билдиради.

Товар-пул муносабатларининг ўсиши. Япон феодализми ва унинг тимсоли бўлган Токугавалар тузуми янги шаклланаётган ҳаётий воқеалар билан аёвсиз қарама-қаршиликларга тобора кўпроқ киришаётганди. Японияда юз берадётган ижтимоий-иктисодий жараёнлар бутун феодал иқтисоднинг қулаганлигидан, тузумнинг ижтимоий таянчлари емирилиб бораётганлигидан ва товар-пул муносабатлари барқарор ривожланаётганлигидан далолат берарди.

Япон қишлоқларида ҳам жиддий ўзгаришлар юз берадётганди. Товар-пул муносабатлари ривожлана бориши билан ички табақаланиш жараёни тезлашди. Ҳали XVIII аср бошларидаёқ шаҳарларда кўпчилик солиқларни пул билан тўлай бошладилар. Аста-секин тўловлар пул-маҳсулот аралаш шаклини ола бошлади. Пулга бўлган эҳтиёж дехқонларнинг савдо-судхўрлик капиталига қарамлигини оширади. Одатда қарз ерни гаровга қўйиш эвазига берилганлиги туфайли дехқонлар тобора катта микдорда ўз ер майдонларидан айрилар, ерсиз арендаторларга ва тўлай олмайдиган қарздорларга айланарди. Оч дехқонларнинг катта қисми кун кўриш чорасини излаб шаҳарларга интилишарди. Ўша замонларда уларни образли қилиб, «сув ичаётган дехқонлар» деб аташарди.

Ўша пайтлардаги япон қишлоқларида бой дехқонларнинг кам сонли, лекин иқтисодий кучли бўлган қатлами ўсиб борар ва шаҳарлик савдогарлар ҳамда судхўрлар қаторида камбағал дехқонларнинг асосий қисмини эзар, ерларини эгаллаб оларди. Булар «гоно»лар-бой дехқонлар ва «госи»лар-ерларини ўзларида саклаб қолган, оддий самурайлардан чиқкан ер эгалари эдилар. Бироқ асосий ер сотиб олувчилар, ўз хосилдор ерларини тез кўпайтириб бораётган

ва дехқонларни чўлларни ҳайдашга мажбур қилаётган савдогарлар ҳамда судхўрлар эди.

Шундай қилиб, кўринишдан «ўзгармас» бўлган токугава қишлоқларидағи феодал муносабатлар қобиғи остида асосан савдогар-судхўрлардан бўлган амалдаги ер эгаларининг янги синфи пайдо бўла бошлади. Бунда ерни эгаллаб олиш ёки ҳатто сотиб олиш ҳам ноқонуний эди, чунки феодал Японияда ерни сотиш ва сотиб олиш тақиқланганди. Шунинг учун келишувлар муҳлатсиз ижарага бериш, совға қилиш, ердан воз кечиш ва шу кабилар кўриниши остида расмийлаштириларди.

Ҳали XVIII асрдаёқ қасаначилик кенг тарқалганлиги юкорида айтиб ўтилганди. Уларнинг ташкилотчилари бўлган савдогар-судхўрлар кўпинча дехқон аёлларни хомашё билан таъминлар ва улардан тайёр маҳсулотларни йиғиб оларди. Япониянинг турили худудлари товарларнинг қатъи белгиланган турларини ишлаб чиқаришга мутахассислашган бўлиб, бу товарлар йирик фирмаларнинг қўлларида тўпланар, кейин бозорга чиқариларди.

Сёгунат иқтисодиётидаги катта ўзгаришларга сабаб бўлган энг муҳим омил шаҳар мануфактурасининг пайдо бўлиши эди. Биринчи мануфактуралар XVIII аср охиirlарида, аввалига соя қайнатиш ва вино тайёрлаш саноатида пайдо бўла бошлади. Саноат ишлаб чиқаришидаги навбатдаги қадам XVIII–XIX асрлар чегарасида, Киотода биринчи тўкувчилик устахоналарининг яратилиши эди. Уларда ҳам асосан аёллар ишларди, тадбиркор-савдогар эса уларга маош тўларди. Тез орада тўқимачилик мануфактуралари – аввалига тўқув ва йигирув, кейинроқ бўёқчилик ва кулолчилик бўйича пайдо бўлди. Бу мануфактураларнинг аксариятида ёлланма ишчилар меҳнат киларди. Бу корхоналардаги ишчилар сони 20–30 кишидан ошмасди.

Дехқонларнинг шаҳарларга қочиб кетишлари, хунармандларнинг хонавайрон бўлишлари, ронинлар сонининг ошганлиги туфайли шаҳарларда ўз ишчи кучини сотишга тайёр бўлган кишиларнинг кўпчилиги тўпланганди. Шундай қилиб, капиталистик турдаги мануфактураларнинг пайдо бўлишини осонлаштирувчи жуда муҳим шарт яққол кўриниб туради.

Ҳали XVIII аср ўрталарида хукмдор синфнинг – унинг энг кўп сонли гуруҳи – самурайларнинг ички табақаланиш жараёни сезиларли кучайганлиги юкорида таъкидлаб ўтилганди. Айниқса, ро-

нинларнинг ва оддий самурайларнинг табақаланишлари ва айтиш мумкинки, буржуача қайта дунёга келиши тез юз бараётганди. Қарзларидан кутулмоқчи бўлган, ўз иқтисодий аҳволларини яхшилашга уринган оддий самурайлар, шон-шараф қоидаларини бузиб савдо қила бошладилар, турли хил майда хунармандчиликни – чироклар, ўйинчоқлар, ёзиш учун мўйқаламлар, ёмғирпўшлар ва шу кабилар ишлаб чиқаришни бошладилар. Самурайларнинг оддий шаҳарликлар билан турмуш қуришлари одатий ҳол бўлиб қолди.

Токугавалар даврининг охирига келиб, князликларнинг бир маҳсулот турини ишлаб чиқариш бўйича мутахассислашиши узилкесил ўрнатилди. Шу равишда Кага тумани – лок, Тоса князлиги – қофоз, Сацуума князлиги – ип-газлама бўйича мутахассислашди.

* * *

Шундай қилиб, алоҳида худудлар ўртасида меҳнатнинг тақсимланиши умумяпон миллий бозори яратилишига олиб келди. Шу билан бирга дехқонлар ва хунармандларнинг зўрлик билан ўз ишлаб чиқариш воситаларидан ажратилиши ва бу ишлаб чиқариш воситаларининг капиталга айлантирилиши маблағнинг, яъни капиталистик муносабатлар куртагининг дастлабки тўпланишига асос яратди. Сўнгги Токугавалар даврида ёлланма меҳнат сезиларли роль ўйнай бошлади.

XXII боб бўйича саволлар.

1. Янги давр бошларида Японияни қандай ўзига хос жиҳатлар ажратиб турарди?
2. Японияни бирлаштириш учун кураш қандай асосий босқичлардан иборат?
3. Токугавалар даврида Япония ривожланишининг асосий жиҳатлари нималардан иборат?
4. Токугавалар Японияни чет элликлар учун ёпиб қўйиш орқали қандай жараёнларнинг олдини олишга уриндилар?
5. Иқтисодий ривожланишдаги қандай жиҳатлар дехқонлар қўзғолонлари ва шаҳарликларнинг чиқишлирга олиб келди?

ХХIII БОБ. XVI–XVIII АСРЛАРДА КОРЕЯ

Янги даврнинг бошланишида Кореяни, 1392 йили ҳокимият тенасиға келган, Ли сулоласи бошқаришда давом этарди. Сулола асосчиси Ли Сонг (1392–1398) Кореяни, аввалги сулола даврида аталган «Корё» ўрнига, «Чайсон» деб атади. Чайсон иероглифлари «тонг гўзаллиги» ёки «тонг хотиржамлиги» маъноларини англатади. Ли Сонг даврида Кореянинг давлат тузуми Минлар сулоласи давридаги Хитой намунасида қайтадан ташкил қилинди.

Янги даврда Кореянинг ижтимоий тузуми. Аҳолининг асосий машғулоти дехкончилик бўлган Кореяда ерга ҳукмрон феодаллар (ёки аслзодалар-янбанлар қатлами) эгалик қиласиди. XIX аср охирларига қадар давлат-феодал ер эгалигига асосланган муносабатлар тизими сакланиб қолди. Унда эксплуатациянинг асосий шакли маҳсулот рентаси – солиқ (шоли ёки бошқа маҳсулот билан) эди. Аммо бундан ташқари, аҳоли сарой маҳкамаси ёки ҳукумат ташкилотлари фойдасига турли ишларни бажаришлари (барщина) лозим бўларди.

Маҳсулот етиштирувчи дехқон хўжалиги жамиятнинг иқтисодий асоси, дехқон жамоалари эса – энг кичик хўжалик ва ижтимоий бирикма эди. Ҳали XIV–XV асрлар оралиғидаёқ ўрнатилган ерга эгалик қилиш шаклига биноан барча ерлар давлатники (кондйон) ва хусусий фойдаланишда (лекин ерга давлат эга бўлганлиги туфайли, хусусий эгалиқда эмас) бўлган помешчикники (садйон) эди. Аммо ҳар иккала ҳолатда ҳам ерга йирик ер эгалари – помешчиклар, амалдорлар ва умумдавлат рентаси – солиқни йигиш ҳуқуқини ўзлариники қилиб олган ҳукмрон уруғ вакиллари хўжайнлик қилишарди.

Феодал эксплуатация савдо – судхўрлик капиталини эксплуатация қилиш билан чуқурлаштириларди. Эксплуатация қилишнинг судхўрлик усулларидан помешчикларнинг ўзлари ҳам фойдаланардилар, бунда давлат, баҳорда дехқонларга кузда фоизи билан кайтариб бериш шартини қўйиб, дон қарз бериб туриш тизимини ўрнатган ҳолда, энг йирик судхўр сифатида иш юритарди.

Кишлоқ хўжалигидаги бундай ҳолатга шаҳар иқтисоди, саноат ва савдо тараққиётининг паст даражаси мос келарди. Ҳунармандлар ҳам, худди дехқонлар сингари, қарам қилинган ва уларнинг аксарияти ҳукумат буюртмаларини бажариш билан банд эдилар. Бундан

фақат тўқимачилик мустасно эди. Матолар дехқон хўжаликларида тайёрланар ва шу ҳолда хазинага тушарди. XV аср охирларида барча худудий шаҳарларда 3511 та давлат ҳунармандлари бор бўлиб, XIX асрга келиб уларнинг сони 5431 тагача кўпайди.

Иқтисодий муносабатлар билан белгиланган корейс жамиятининг синфий таркиби тоифалардаги фарқлар билан мустаҳкамланганди. Феодал ер эгалари синфини ҳукмон тоифа «янбан» (икки бўлиниш) ташкил қиласиди, тоифалар пиллапоясида янбанлардан пастда ўрта табақа – «чжуунин» турарди. Унга йирик савдогарлар, шунингдек, врачлар, танобчилар, рассомлар ва давлат лавозимларини эгаллаб турган, лекин аслзодалар тоифасига кирмаган кишилар мансуб эдилар.

Аҳолининг жуда катта қисми иккита паст тоифага тегишли эди: 1) «сянин» тоифаси (оддий одамлар), унга дехқонлар, майда савдо-гарлар, ҳунармандлар кирадилар, ва 2) «чёнин» (пасткашлар) тоифасига қуллар билан биргаликда «ифлос» ҳисобланган бир қатор касбларнинг вакиллари: акробатлар, қамоқхона хизматчилири, фохишелар, кўча тозаловчилар ва жамоат жойларидағи хизматкорлар, қассоблар ва бошқалар кирадилар.

Ернинг олий мулкдори ҳисобланган қирол қиёфасида олий давлат ҳокимияти мужассам эди. У барча давлат ишларининг олий бошқарувчиси, ўз фуқароларининг ҳаёти ва мулки устидан чекланмаган ҳокимиятга эга эди.

Мамлакатни давлат имтиҳонлари –«кваго» да танлаб олинадиган феодал амалдорлар гурухи бошқарарди. Амалда бу имтиҳонларни фақат имтиёзли тоифа вакилларигина топшира олардилар. Барча фуқаро амалдорлари ва ҳарбий бошлиқлар даражаларга, унвонларга ажратилганди. Марказда маъмурий ҳокимиятни давлат Олий кенгаши – «Иҷҷонбу» амалга оширади, уни биринчи даражали учта амалдор ва унга бўйсунувчи тармоқлар: 1) давлат хизмати (амалдорлар), 2) молия, 3) маросимлар, 4) ҳарбий ишлар, 5) жиноий ишлар, 6) жамоатчилик ишлари бўлимларидағи маҳкамалар бошқарарди. Маҳкамалардан ташқари пойтахтда яна ўнлаб турли хил идоралар ва ташкилотлар жойлашганди ва уларда Кореяning қолган барча шаҳарларини бирга кўшиб ҳисобланганидагидан ҳам кўпроқ амалдорлар бор эди.

Корея маъмурий жиҳатдан саккизта вилоятга (Кйонгидо, Чун-чyonдо, Кванвондо, Чжалладо, Кйансандо, Хванхэдо, Хамгйондо,

Пхйонандо) ва 332 та округга бўлинганди. Ҳар бир вилоятни губернатор (гамса) бошқарар, унга округлардаги барча бошлиқлар бўйсунарди. Округ бошлиқларига қишлоқ бошкармалари бўйсунишарди. Қишлоқларни оқсоқоллар – тхонхжан бошқарарди, улар қишлоқнинг энг бой кишиларидан тайинланарди. Қишлоқ жамоасининг барча аъзоларини (жамоа ичидаги эса – барча уруғдошларни) бир-бирларига ўзаро кафиллик боғлаб турарди. Ҳокимиятнинг барча амалдорлари жамоа ҳаёти устидан майдакашлик ва зулмкорлик билан назорат олиб боришарди. Улар солиқлар тўланишини, мажбуриятлар ва одатларга, маросимлар ўтказилиши шартларига риоя қилинишини қаттиққўллик билан кузатиб, барча усувлар билан дехқонлар ҳисобидан бойлик ортиардилар.

Иқтисодий ва ижтимоий-сиёсий ривожланиш бўйича янги даврдаги Корея Осиё ҳамда Шимолий Африканинг кўпгина мамлакатларидан орқада эди. Бунинг сабабларини XVI асрдаги феодал галаёнлардан излаш лозим, лекин ундан ҳам кўпроқ равища – япон ва манъҷур босқинларидан кейин дехқонларнинг ахволлари ёмонлашишидан, унинг заминдорлар томонидан аёвсиз эзилганлигидан ва бунинг оқибатида, дехқон хўжаликлари вайрон бўлганлигидан изламоқ керак. Умуман, дехқонлар ва хунармандларнинг феодал эзилиши ишлаб чиқариш кучларининг ривожланишини кечиктирди. Тез-тез бўладиган ҳосилсизликлар, оммавий очарчилик ва касалликлар юз минглаб кишиларнинг умрига зомин бўларди. XVII аср 50-йиллари бошларида (манъҷур босқини оқибатида) бутун Кореяни қамраб олган очарчилик рўй берди. Шимолий вилоятлар – Пхйонандо ва Хамгйондода XVII аср 80-йилларида аҳолини хонавайрон қылган сув босишилари ва ёнғинлар бўлиб турди. XVIII асрдаги энг йирик оғатлардан 1722 йили Чжечжюдо оролидаги очарчиликни ва 1751 ҳамда 1776 йилларда бутун мамлакатни қамраб олган очарчиликларни айтиб ўтиш мумкин. Очарчилик кўп сонли ҳалқни пойтахтга томон қувди ва бундай ҳолатларда, исёнлар бўлишидан кўрқкан ҳукumat, очарчилик қурбонларига ёрдам кўрсатарди. Бироқ бу ёрдам муҳтоҗларнинг юздан бирини ҳам қониқтирмасди. Очарчилик йилларида вабо ва ўлат касалликлари ҳалқнинг бошига ёғилган оғат эди. Факат 1786 йилнинг ўзидағина вабодан 370 минг киши ҳалок бўлди (солиқ рўйхатига кўра 7 миллиондан ортиқроқ аҳолидан).

Аёвсиз эзишлар ва сиқувга олишлар дехқонларнинг оммавий норозиликларини келтириб чиқарди. Дехқонларнинг курашлари турли кўринишларда бўларди. Улар кўзғолонларда, айрим феодаллар ва амалдорларни ўлдиришда, солиқларни тўлаш пайтида рўйхатга олинган ерлардан оммавий қочишиларида намоён бўларди. Афсуски, XVII–XVIII асрлардаги кўп сонли дехқон кўзғолонлари корейс тарихчилари томонидан ҳанузгача яхши ўрганилмаган. Ҳозирча баъзи бир (балки энг муҳимлари эмасдир) дехқон кўзғолонлари ҳақидаги оддий хабарларгина маълум, холос. Уларга, Конҷжу шахрида (Чунчондо вилоятида) 1644 иили бўлиб ўтган катта исённи, 1684 иили қандайдир диний мазҳаб томонидан уюштирилган, «иложи борича кўпроқ аёнларни ўлдиришга» чорлаган кўзғолонни ёки ниҳоят, XVIII аср бошларида Чжоллодо вилоятидаги ерсиз дехқонларнинг кўзғолонини киритиш мумкин. Халқ қаршилигининг ва ижтимоий қарама-қаршиликлар кескинлашишининг бевосита кўрсатгичи бўлиб, XVIII аср бошларида ҳокимиятнинг дехқонларга қарши жазо чораларини кучайтирганлиги хизмат қилиши мумкин.

XVI асрда Кореяning сиёсий ривоҷжисланиши. XV аср охиридан марказлашган феодал давлатни заифлаштирувчи инқироз жараёнлари сезила бошлади. Сиёсий ҳолатнинг ёмонлашишига иқтисодий характердаги, энг аввало, аграр муносабатлардаги ўзгаришлар бевосита таъсир кўрсатди. Феодал аёнлар ва маҳаллий заминдорларнинг ерларни эгаллаш ҳоллари кўпайиб, давлат ер эгалигининг тарқоқлашиши рўй берди, маҳаллий феодал ер эгалиги эса амалдаги (хуқуқий расмийлаштирилмаган бўлса ҳам) мулк белгиларини ола бошлади. Феодалларнинг кучайиши билан марказий хукуматнинг позицияси заифлашиб борди.

Ҳокимият аёнлар қўлида жамланди, бу эса мамлакатдаги зулм ва зўравонликни янада ошириди. Бунга жавобан халқнинг норозилиги ошиб борди.

XVI асрда йирик дехқон кўзғолонлари бўлмаган бўлса ҳам, дехқонларнинг қочиб кетишлари, мажбуриятларини бажаришдан бўйин товлашлари, мулқдорларнинг кўрғонларига ўт қўйишлар кўпайди.

Умуман олганда, инқирознинг умумий чукурлашиб бориши билан бир қаторда ижтимоий қарама-қаршилик ҳам кўп карра ошиб борарди ва заифлашган мамлакат ташқи босқинчилар учун тобора кўпроқ ёқимли луқмани эслатарди.

Япониянинг 1592–1598 йиллардаги тажовузи. Марказлашган мамлакатнинг аста-секин заифлашиб бораётганлиги XVI асрда шимолий ва жанубий чегаралардаги кўшниларнинг тажовузларига сабаб бўлди. 1580-йилларда шимолдан чжурчженларнинг босқинлари кўпайди ва айниқса жанубда Япония томонидан хавф кучайди.

1592 йилнинг май ойида Япониянинг 200 минг кишилик кўшини Пусан худудига тушди ва корейс кўшинлари қаршилигини енгиб, 20 кундан кейин Сеулни эгалладилар, ёзнинг ўрталарида Пхенъянни олдилар, шимоли-шарқда эса Тумаган дарёсига чиқдилар. Мамлакатнинг катта қисми, аҳоли билан шафқатсиз муносабатда бўлаётган япон кўшинлари томонидан босиб олинди. Бу ваҳшийликларга Япониянинг Киото шаҳридаги «қулоқлар қабри» исбот бўла олади, унга ўлдирилган корейслардан кесиб олинган 30 мингта қулоқлар ва бурунлар кўмилган.

Мамлакатда халқ уруши бошланди. Босиб олинган худудларда «хақ иш учун» халқ партизан гурухлари тузилди. Шуниси характерлики, халқнинг қаршилигини хукумат қўллаб-куватламади. Халқ кўшинларининг ҳаракатларига Ли Сунсин (1515–1598) қўмондонлиги остидаги корейс флотининг ғалабалари далда бўлди. 1592 йилнинг ёзида Ли Сунсиннинг флоти япон флотини тор-мор килди ва Хансандо ороли яқинидаги жанг (1592 йилнинг августи) урушдаги бурилиш нуктаси бўлди. Бу ва бундан кейин Ангалиҳо порти яқинида бўлиб ўтган жангда юзта душман кемаси чўқтирилди ва 9 мингдан ортиқ денгизчилар ҳалок бўлди.

Шундан кейин бўғозда корейс флоти ҳукмронлик қила бошлади. 1592 йилнинг охирида 50 минглик Хитой армиясининг ёрдамга келганлиги босқинчилар билан курашни енгиллаштириди. 1593 йилнинг февралида Хитой ва Корейс кўшинларининг бирлашган кўшинлари Пхенъянни озод қилдилар. Япон кўшинлари мамлакатнинг шимоли-шарқий қисмидан ҳам чекиндилар, 1593 йилнинг май ойида эса, шаҳарга ўт қўйиб Сеулни ҳам ташлаб чиқдилар. Японлар фақат мамлакат жануби-шарқий қисмининг энг чеккасида, Пусан ва Ульсан худудларида туриб қолишга муваффақ бўлдилар. Хидэёси ҳукумати тинчлик ҳакида музокаралар бошлашни таклиф қилди.

Бироқ япон феодаллари (шу жумладан Хидэёсининг душманлари ҳам) Кореяда ерларга эга бўлиш умидида музокараларни чўзардилар, бу вақтдан эса ҳарбий ҳаракатларни янгидан бошлаш учун тайёргарлик кўришда фойдаландилар. 1597 йилнинг бошла-

рида Кореяга японларнинг янги қучлари келди ва янги ҳужумни бошлади. Бироқ бу сафар Корея душман ҳужумларини қайтаришга анча яхши тайёрланганди. 1597–1598 йиллари озодлик урушини якунлаш имконини берувчи ғалабаларга қуруқликда ҳам, денгизда ҳам эришилди. XVII аср бошларида япон томонининг ташаббуси билан тинчлик хақида музокаралар олиб борилди. Тинчлик шартномаси тузилиши билан Пусан порти орқали Япония билан Корея ўртасида савдо ўрнатилди, шунингдек, элчилар ва совгалар ҳам алмашинилди.

Корея XVII аср биринчи ярмида. Манъжурларнинг бостириб кириши. Японларнинг босқини мамлакатни даҳшатли харобаликка олиб келди, улкан маънавий ва моддий йўқотишларга сабаб бўлди. Кўпгина худудларда фақат вайрон қилинган шаҳар ва қишлоқларнинг қолдиқларигина қолганди, холос. Уруш йилларида Корея пойтахтининг аҳолиси икки баробар қисқарди. 1611 йилги кадастрга биноан ҳайдаладиган ер майдонлари фақат 541 минг¹ кёлни ташкил қиласди, урушгacha бундай ерлар 1 млн 708 минг кёль эди. Ер майдонларининг кескин қисқарганлиги факат уруш пайтидаги вайронгарчиликлар оқибати эмас, ҳарбий даврнинг қийинчиликларидан фойдаланиб қолган феодаллар давлат ерларининг анчагина қисмини эгаллаб олганликлари ва бу ерларни ўлпон тўлаш кадастрига киритишдан яшириб қолганликларининг ҳам оқибати эди.

1608 йили шаҳзода Кванхэ тахтга ўтириши билан «катта шимолий тўда» («партия») нинг ҳукмронлиги ўрнатилди ва у ўзининг барча рақибларини қириб ташлади. Ёмон ниятли бу галанинг вакиллари ҳеч торгинмасдан талончилик қиласди ва давлат ўлпонлари ҳамда тўловларини ҳаддан зиёд оширади. Вайрон қилинган саройларни қуриш учун пойтахтга кўп минглаб дехқонларни қувиб келдилар. Порахўрлик ва амалдорлар орасида жиноятчилик авжига чиқди.

«Шимолий тўда» сиёсатидан кўпчиликнинг норозилигидан, Кванхэни ағдарган ва тахтга қирол Инджони (1623–1648) чиқарган «ғарбий тўда» фойдаланиб қолди. Аммо ишонтиришларга ва саҳий ваъдаларга қарамасдан, солиқлар ва феодал мажбуриятлар юки

¹ Кадастрга – бирор нарса ҳакида маълумотлар тўплами, бирор нарсанинг рўйхати.

² Кёль – ер ўлчов бирлиги. Дастигъ ғалла ҳосили ҳажмини билдирган бўлиб, 10 минг кв. фут ердан олинадиган ғалла ҳажмига тенг бўлган.

камаймади. Бу орада янги ташқи хавф пайдо бўлди: манъчжурлар (чжурчжэнь) давлати юксалди.

Хитой билан урушаётган манъчжурлар Кореяни ҳам бўйсундиришга уринардилар. 1627 йилнинг қишида 30 минг кишилик манъчжур армияси Кореяга бостириб кирди ва корейс қўшинларининг қаршилигини енгиб, Ийджу, Квансан, Анджу ва бошқа шаҳарларни эгаллаб олди ва талади. Манъчжурларнинг бундан кейинги олға силжишлари сари корейс ҳукумати аста-секин Канхва оролига қочиб ўтди ва у ердан туриб босқинчилар билан музокаралар олиб борди.

Манъчжурлар тезда тинчлик шартномаси тузишга рози бўлди. Корея Хитойнинг ёрдамидан ва иттифоқчилик муносабатларидан воз кечиши керак эди, шунда манъчжурлар Кореядан ўз қўшинларини олиб чиқиб кетиш мажбуриятини олдилар. Бу тинчлик манъчжурларнинг янги ҳужумларига қадар нафас ростлаш бўлиб чиқди, лекин корейс феодаллари бундан мамлакат хавфсизлигини таъминлаш учун фойдаланиб қолмади.

1636 йили энди 140 минг кишилик манъчжур қўшинлари Кореяга бостириб кирди. Манъчжурлар Сеулни эгаллашга муваффак бўлдилар, кейин корейсларнинг қироли яшириниб олган тоғли Намхан кўргонини қамал қилдилар. Қирол ва корейс қўшинлари таслим бўлди. 1637 йилдаги янги шартномага кўра Кореяning вани ўзини Цинлар императорининг вассали деб тан олди. Корейс ҳукумати Минлар сулоласи билан ҳар қандай муносабатларни тўхтатиш ва манъчжурларга қўшин, қурол-аслаҳа, кемалар билан Хитойга қарши бўлажак урушда ёрдам бериш, ҳар йили олтин, кумуш, гуруч, ипак, матолар ва қоғоз билан ўлпон тўлаб туриш мажбуриятини олди.

Манъчжур босқини натижасида, ҳали японларнинг босқинидан ўзига кела олмаган Корея, янги харобаликларга дучор бўлди. Кўпгина шаҳарлар ва қишлоқлар талангандан ва вайрон қилинганди, уларнинг аҳолиси эса қулликка ҳайдаб кетилганди. Қишлоқ хўжалиги ва хунармандчилликка катта зарар етказилганди. Фолибларга бериладиган улкан ўлпон хонавайрон аҳолига оғир юк бўлди. Буларнинг барчаси ишлаб чиқарувчи кучларнинг вайрон бўлишига олиб келди ва Кореяning оғир иқтисодий ҳолатини чуқурлаштириди.

Ижтимоий-иқтисодий инқироз заманлакатда ислоҳотчилик уриншилари. Феодал тизимнинг инқирози факат дехқонларнинг оммавий ҳаракатларидағина эмас, феодалларнинг ўzlари учун эскича бошқаришнинг имкони йўқлигига ҳам намоён бўлаётганди. Ана

шуни англаш ўзига хос аслзодалар мухолифати пайдо бўлиши учун асос яратди. Мухолифатлик кайфиятлари ва ғоялари одатда аслзодаликнинг ҳокимиятдан четлатилган, даромадли ўринларга ҳам, етарлича ерга ҳам эга бўлмаган қисмида пайдо бўларди. Аммо бу ғоялар эски тузумни ағдаришга эмас, уни ислоҳотлар йўли билан янги вазиятларга мослаштиришга йўналтирилган ғоялар эди.

Мухолифат юз йиллар аввал эски одатлар ва тартибларни мустаҳкамлаш учун шакллантирилган конфуцийлик таълимотини тафтиш қилишга чақиради. Улар амалий фанларни (астрономия, математика, агрономия) ўрганишга чорлардилар, Европа мамлакатларининг, дараклари Хитой орқали етиб келаётган, илмий ва техник ютуқларидан фойдаланишлари учун жон куйдирадилар ва ниҳоят, баъзи бир иқтисодий ва ижтимоий ўзгаришлар зарурлигини кўрсатардилар. Аслзодалар орасида «аник фанлар учун ҳаракат» (сирхак) номини олган ғоявий оқим учун ҳарактерли бўлган асосий белгилар ана шулардан иборат эди.

Сирхак ҳаракатининг йўлбошчиси жанубликлар партиясидан бўлган бой аслзода – Лю Хйон Вон (1622–1673) эди. Бундан кейинги ислоҳотчилик уринишлари кўп жихатдан унинг ғояларига асосланганди. Фарбий партиянинг ҳукмронлик даврида Лю Хйон Вон (таксаллуси Танге) сиёсий ҳаётдан йироқлашди ва ўз мулкида жойлашиб, ўзини адабий ва амалий машғулотларга бағишилади. У қулларни ва деҳқонларни ҳарбий ишга ўргатди ва уларни чет элликлар бостириб кирадиган ҳолатларга тайёрлади. У ўз кемаларига эга эди ва Хитой билан дengiz алоқалари ўрнатишга уринарди. «Танге Сурок»да (Танге ёзувларида) у ўзгаришлар зарурлигини очиқ айтганди. Маданият ва маорифни ривожлантириш лойиҳалари билан бирга у, муаллифнинг фикрича, «ҳокимиятдан ўз манфаатлари йўлида фойдаланишларни тутагатиб, мамлакатни соғломлаштириш»га олиб келадиган ижтимоий-иқтисодий ислоҳотлар дастурини олға сурди.

XVIII аср охирини – XIX аср бошларида Кореядаги ижтимоий тараққиёт. XVIII аср охирларида Кореядаги ижтимоий ҳаёт ва ижтимоий онгда янги ҳолатлар кўзга ташланади. Улар мамлакатда XVII–XVIII асрлар давомида рўй берган иқтисодий силжишлар билан боғлиқ эди. Феодал муносабатларнинг тўсиқ бўлишига қарамасдан, мамлакатда маҳаллий бозорлар шаклланди, Тэгу шаҳридаги ярмарка каби умуммиллий аҳамиятга эга бўлган савдо марказларининг дастлабки кўринишлари пайдо бўлди. Хитой ва

Япония билан ташқи савдо алоқалари кенгайди, шаҳарларда савдо-гарлар қатлами кенгайди. Шаҳардаги савдо-хунармандчилик билан шугулланувчи ахолининг манфаатларини кўзлаб, конфуцийлик билан алоқани узган ёзувчилар ва олимларнинг фаолиятлари ривожланди. «Сирхак» (реал фанлар учун) оқимини ва унинг энг илғор қисми – «пукхак» (Шимолдан, яъни Хитойдан таълим олиш учун) гурухини ташкил қилувчи кўпчилик ёзувчиларнинг фаолиятлари XVIII аср охири – XIX аср бошларига тааллуқли. Янги бадиий адабиётнинг асосчиси Пак Чжи Вон, ажойиб математик ва астроном Хон Дэ Йон, шунингдек, бошқа бир қатор ёзувчилар ва олимлар ҳам ана шу оқимдан эдилар. Бу гурухга конфуцийлик таълимотига салбий муносабат ва ўзгаришларга интилиш хос эди. Улар ўз цивилизацияси билан гуурланадиган Корея ҳатто «ёввойи» манъҷкурлар Хитойидан ҳам ўрганиши зарур деб ҳисоблардилар. Пукхак тараффорларининг фикрларига кўра, Хитойнинг ютуқларидан фойдаланиш, қишлоқ хўжалигини юксалтириш, савдони ривожлантириш, Кореяни гуллаб-яшнаётган мамлакатга айлантириш учун зарурий шартлардан эди.

Йонихон уезди бошлиғи Пак Чже Га 1799 йили қиролга йўллаган номасида бу оқимнинг ижтимоий-иктисодий ғояларини жуда кенг баён қилган. Пак Чже Га дехқонларнинг оғир ва ҳақ-хукуқсиз ахволларига кўп эътибор қаратарди ва шундай хulosага келади: «Агар ҳаммаси ҳозиргидек қоладиган бўлса... унда бундан кейин бир кун ҳам яшашнинг иложи қолмайди, чунки бу каби ҳолат барча ҳудудларда ва бутун мамлакатда мавжуд». Шунинг билан бирга, у мамлакатни инқироздан чиқаришнинг кенг дастурини таклиф қилди. Дастурни амалга оширишнинг асосий шарти эса жиловсиз эксплуатациянинг юмшатилиши эди.

Феодализмга қарши йўналиш 18 йил умрини сургунда ўтказган, сирхакнинг энг йирик вакили Дйон Як Йоннинг (1762 йил туғилган) илмий асарларида жуда ёрқин баён қилинган. Унинг асарларида, айниқса «Қул қилинган халқ хақида китоб»да мавжуд тузум қаттиқ танқид остига олинади.

Шундай қилиб, аслзодаликнинг мухолифатлик қатламларида пайдо бўлган сирхак ва рукхак фақат мавжуд тузумни танқид қилибгина қолмасдан, янги ижтимоий воқеаларнинг даракчилари ҳам бўлдилар. Бироқ Кореяning қолоқлиги ва янги ижтимоий тузум унсурларининг заифлиги туфайли бу ғоялар кенг тарқала олмади.

Бундан ташқари, Европанинг илғор илмий гояларини қабул қиласр эканлар, ҳатто феодал зиёлиликнинг энг илғор вакиллари ҳам христиан миссионерларининг таъсири остига тушиб қолдилар, уларнинг фаолиятларида мамлакатни қарам қилишга бўлган яширин тайёргарликни кўра олмадилар.

Қирол Йончжон (1725–1776) даврида ҳокимиятда бўлган норонлар феодал эксплуатацияни тартибга солишга ва оғир аҳволда бўлган суғориш тизимини тиклашга янги уринишларни амалга ошириди. Тез-тез бўлиб турадиган қурғоқчилик ва оммавий очарчилик туфайли ҳукумат суғориш тармоқлари: тўғонлар, сув омборлари қуриш, очарчилик ҳолати учун маҳсус дон омборлари ташкил қилиш билан шуғулланди, шунингдек, гуручдан спиртли ичимликлар тайёрлашни ман қилишга ва баъзи бир давлат солиқларини бекор қилиш ёки камайтиришга мажбур бўлди. Сўроқ қилиш пайтида қийноқнинг энг оғир турлари (оёқларни синдириш) ҳам ўша пайтда бекор қилинганди. Қирол Йончжон даврида дехқонларнинг заминдорларга шахсий қарамлигини бекор қилиш ва қул аёлнинг невараси озод инсон бўлиши ҳақида декларация (лекин у факат қофозда қолди) эълон қилинди. Заифлашаётган феодал тузумни мустаҳкамлашга бўлган бу уринишлар 1785 йилда тузилган, «Қонунларнинг буюк тўплами» деб номланган хужжатда ўз ифодасини топди. Бу хужжатда феодал эксплуатацияни қонун томонидан ўрнатилган маълум бир тартиблар орқали чеклашларга уриниш ифодаланган.

* * *

Хуллас, заминдорлар ва амалдорлар хукмронлигини мустаҳкамлаш мақсадида қилинган қисман ён беришлар, мамлакатдаги бутун феодал тизимнинг чуқур инқизозини тўхтата олмади. Мамлакат Хитой, Япония, Россия ва Европа давлатларининг мустамлакачилик объектига айланиб борди.

XXIII боб бўйича саволлар

1. Янги давр бошларида Кореяда ерга эгалик қилиш шакли ва ижтимоий тузумнинг қандай ўзига хос жиҳатларини ажратиб кўрсатиш мумкин?
2. XVI асрда Кореяда юз берган қайси сиёсий жараёнлар марказий ҳокимиятнинг заифлашувига олиб келди?

3. XVI аср охирларида Кореяга японлар тажовузининг сабаблари нимада эди ва у қандай оқибатларга олиб келди?
4. XVII асрдаги маньчжурлар боскени Кореянинг сиёсий ривожланишида қандай оқибатларга олиб келди?
5. XVII асрда сирхак харакати вакиллари томонидан олға сурилган ислоҳотлар корейс жамиятида қандай ўзгаришларни амалга оширишга картилган эди?
6. XVIII асрда Кореяда амалга оширилган ислоҳотлар жамиятда қандай ўзгаришларга олиб келди?

XXIV Б О Б. XVI–XVIII АСРЛАРДА МЎҒУЛИСТОН

Янги даврга Мўғулистон ўзининг аввалги қудратини йўқотган, жанубий Сибирдан Буюк Хитой деворигача ҳамда Хинган тоғидан Тянь-Шань этакларигача бўлган катта худудда жойлашган, бир-бири билан доимий урушаётган худудлардан иборат таркоқлик холатда кириб келди. Аҳолининг асосий машғулоти чорвачилик бўлиб, обҳавонинг нокулайлиги ва ернинг унумсизлиги сабабли дехқончилик ривожланмаган эди.

Давлат тепасида расман умуммўғул хони турарди. Хон ҳокимиятининг белгиси бўлиб 1288 йилан 1380 йилгача Хитойда хукмронлик қилган Юань сулоласининг мухри хисобланарди. XV аср охирида умуммўғул хони Даян-хон ўзини «Да Юань Да Кэхань» (Буюк Юань империясининг Буюк хони) деб эълон қилди ва бу билан шу сулоланинг вориси эканлигини яна бир бор таъкидлади.

1543 йили Даян-хон вафот этди. Бу ҳодиса Мўғулистоннинг сиёсий тарихида ўзига хос бурилиш нуқтаси бўлиб, шундан кейин мамлакатнинг таназзулга юз тутиш жараёни кучайди. Даян-хоннинг катта ўғиллари хукмронлик қилаётган Мўғулистоннинг жанубий қисми ажралиб чиқа бошлади. Бу худудлар Хитой билан яқин алоқа ўрнатган эди.

Мўғулистоннинг шимолий қисми ҳам ажралишга мойил бўлиб, бу ерлар Даян-хоннинг кичик ўғли Герсэндзэга қарашли ва Халха деб аталаётган эди.

Маньчжурлар XVII аср ўрталарида, ҳали Хитойни эгаллашларидан олдин Мўғулистоннинг жануби-шарқий қисмини босиб олишга харакат қилдilar. Ҳокимият тепасида турган Лигдан-хон маньчжурларга қарши минлар билан иттифоқ тузди. Бироқ иттифоқчилар мағлубиятга учраганларидан сўнг, 1634 йили, мань-

чжурлар императори Абахай Жанубий Мўғалистоннинг хони деб эълон қилинди. Халха мустақиллигини сақлаб қолди ва бу ҳол манъчжурларни қаноатлантирумас эди. Халхаликлар эса манъчжурларнинг ҳужумидан сақланиш учун ойратлар билан иттифоқ тузди ҳамда Абахайга совға-саломлар юборди.

Шундай килиб XVII аср бошига келиб мўғул қабилалари жойлашган учта асосий ҳудудни ажратиш мумкин – Жанубий (Чахар), Шимолий (Халха) ва Фарбий (Ойрат).

Ҳали Чингизхон зомонидаёқ Мўғалистонга кириб келган буддавийлик янада кенгроқ тарқалди. Буддавийликнинг турли йўналишларидан XVI аср ўрталарига келиб Мўғалистонга Тибетдан кириб келган ламаизм ҳукмрон дин сифатида ўрнатилди. 1578 йили Тибетнинг олий ламаси билан Жанубий Мўғалистон ҳукмдорлари ўртасида бўлиб ўтган музокаралардан сўнг Хитойга қарши ўзига хос тибет-мўғул иттифоқи шаклланди. Алтанхон Тибетнинг диний раҳбарини Далай-лама (Донишмандлик уммони) унвони билан сийлади.

1586 йили Алтанхоннинг чевараси Тибетнинг бош ламаси қилиб сайданди. Бу ламаизмни мўғул бошқарган биринчи ва ягона ҳолат эди.

Тез орада Халха ҳукмдори Абатай ҳам ламаизмга ўтганлигини эълон қилди ва Мўғалистондаги дастлабки дацанлар (ламаизмда ибодатхона шундай аталади) курилди. 1642 йили Тушету хоннинг ўғли Ундуру Мўғалистон ҳудудидаги барча дацанларнинг бошлиги этиб тайинланди.

Ламаизм билан бирга мўғул маданияти ва ёзуви ривожланди. Дацанлар қошида мактаблар очилиб, маълумотли кишилар тайёрлаш ўчогига айланди. Бошқа томондан, дацанлар ўз қаторига ҳар йили кўплаб эркакларни оларди ва бу ҳол Мўғалистоннинг иқтисодий ривожланишига салбий таъсир этмасдан қолмади.

Жўнғор хонлигининг ташкил топиши. XVI аср охири – XVII аср бошларида Фарбий Мўғалистонда алоҳида давлат вужудга келиб, Жўнғор хонлиги номини олди. Россия ва Хитойнинг манфатлари кесишган ерда жойлашган бу давлат Марказий Осиёдаги халқаро муносабатларда муҳим роль ўйнади.

Нокулай қўшнилар қуршовида жойлашганлик Жўнғор хонлигининг иқтисодий ва ички сиёсий ҳолатига таъсир этмасдан қолмади. Мамлакатда аста-секин ҳукмронликни Чорос уруғи эгаллаб олди

ва ўз сафидан Харахулни хон қилиб кўтаришди. Норози бўлган бир гурух зодагонлар ўз қавмлари билан Жўнғордан кўчиб кетдилар. Кўчиб кетгандилардан бир гурухи кейинчалик қолмиклар бўлиб шаклландилар ва Россияяга тобеликни тан олдилар. Жўнғорда қолган мўғиллар 1635 йили Харахули вафотидан сўнг унинг ўғли Батур-хунтайжи бошчилигида манъжурларга қарши бирлашдилар. Шу сана Жўнғор давлати ташкил топган вақт ҳисобланади.

Жўнғор давлати ташкил топганлигидан норози бўлган бир қисм ойратлар Волга бўйига, Кўкинорга кўчиб кетдилар ҳамда мустакил ойратлар хонликларини ташкил қилдилар. Хитой ва манъжурларга қарши кайфиятга қарамасдан ойратларнинг ташкисиёсатидаги бош ўйналиш Шарқий Туркистон бўлиб қолди.

XVII аср 40-йилларида Жўнғор хонлиги Мўғулистоннинг шарқий ҳудудларини Чалиш ва Турфондан бошлаб босиб ола бошлади. Кейин Кирия, Оқсув, Қашғар ҳудудларига бостириб кирди. Етти сувнинг шарқий қисмидан қирғиз ва қозоқларни сиқиб чиқарди. Айтиш мумкинки, бу пайтга келиб Цинлар Хитойининг кириб келишига қарши тура оладиган турк-мўғул этник бирлиги шаклланган эди.

Маҳаллий ойрат аҳолисининг бир қисми ўтроқ ҳаёт кечиришга ўтади, шаҳарлар қура бошлайди. Қонунлар тўплами – «Цааджин бичик» ишлаб чиқилди ва алоҳида ойрат ёзувини жорий қилишга ҳаракат қилинади. Бу ойратларни Цинлар таъсирига тушиб қолган ва Шарқий Туркистон халқлари билан яқинлашиб кетган бошқа мўғул уруғларидан анча узоқлашганлигидан далолат беради.

1690 йили цинлар билан жўнғорлар ўртасида бошланган уруш бутун XVIII аср биринчи ярмида давом этди. 1755 йили Амурсана бошчилигига кўтарилиган қўзғолонни бостириш чоғида цинлар қўшини томонидан Жўнғор хонлигининг ўша пайтдаги ҳамма аҳолиси кириб ташланди.

* * *

1758 йили Жўнғор хонлиги тугатилди. Унинг ерлари Хитой империяси таркибига қўшиб олинди.

XXIV боб бўйича саволлар

1. Даян-хон вафотидан сўнг Мўғулистонда қандай сиёсий жараён бошланди?

2. Ламаизм динининг кириб келиши Мўғулистанда маданиятнинг ривожланишига қандай таъсир кўрсатди?
3. Жўнғор хонлигининг ташкил топиши ва инқизози асосий сабаблари нимада эди?

XXV БОБ. XVI–XVIII АСРЛАРДА ЖАНУБИ-ШАРҚИЙ ОСИЁ МАМЛАКАТЛАРИ

Жануби-Шарқий Осиё географик атама бўлиб, унга, одатда, Вьетнам, Камбоджа, Лаос, Мьянма (Бирма), Индонезия, Тайланд, Филиппин, Малайзия, Сингапур ва Бруней киради.

Бу мамлакатларнинг Янги даврдаги тарихи (Тайланндан ташқари) аниқ икки босқичга – мустамлакачиликкача ва мустамлака даврларига бўлинади. Баъзи бир хронологик ўзгаришларни айтмаганда, ижтимоий-иктисодий ва сиёсий жабҳалардаги жараёнлар характер жиҳатидан бир-бирига жуда яқин.

Жануби-Шарқий Осиё халқларининг тарихий тақдирида мустамлакачилик омили масаласи баҳсли ҳисобланади. Айрим тадқиқотчилар Farbning «цивилизация олиб келганлигига», бу ерда яшаётган халқларни Европа фани ва маданияти ютуқлари билан таништирганлигига ургу берсалар, бошқа бир тадқиқотчилар Farbliklarning хукмронлигига фақат салбий томонларнингина кўради ва асосан, мавжуд қолоқ иктисодий – ижтимоий тизимнинг сақланиб қолишида уларни айлашади.

Ушбу муаммо билан боғлик яна бир муҳим жиҳат диний омил ҳисобланади. Жануби-Шарқий Осиё минтақасида Янги даврда қуйидаги динлар кенг ёйилди: буддизм (Хиндихитой давлатлари, Бирма ва Тайландда), ислом (Индонезия, Малайзия, Бруней ва Филиппиннинг жанубида), христианликнинг католик мазҳаби (Филиппин ва Вьетнамнинг жанубий қисмида). Бундан ташқари тарихшунослиқдаги яна бир алоҳида, анчагина баҳсли муаммо католик черковининг миссионерлик фаолияти, унинг ўрганилаётган халқлар тарихий тақдиридаги зиддиятли роли муаммосидир. Ушбу масалада ҳам тарихчилар ўртасида ягона қараш мавжуд эмас.

Вьетнам. Ҳозирги Вьетнамнинг шимолий қисмида 1069 йили пайдо бўлган Дайвьет давлати Янги давр бошларида ўзининг энг юксалган даврини бошдан кечираётган эди. 1428 йилдан бери ҳокимиятда турган вуя (олий ҳукмдор) Ле сулоласи вакили Ле Тхань

Тонг даврида Вьетнамда абсолют монархия ўрнатилди. Қишлоқ хўжалигининг яхши ривожланганлиги сабабли XV асрда Дайвьетда юкори ҳосил олинган ва деярли очарчилик бўлмаган. Жамоа ерлари дехқонларга тегишли бўлиб, ҳар олти йилда бир марта қайта бўлинар, дехқонлар тўғридан-тўғри давлатга солиқ тўлар, бу эса ўз навбатида дехқонлар меҳнатини рағбатлантираш эди. Бундан ташқари хусусий ер эгалиги ҳам мавжуд бўлиб, улар ўз ерларини жамоа ерлари ҳисобига кенгайтириб бориш имкониятига эга эди. Бу ҳол Дайвьетнинг кейинги ижтимоий-иктисодий ривожида сезиларли роль ўйнади. Хунармандчилик ва қазилма бойликлардан фойдаланиш ривожланди. Унча катта бўлмаган хажмдаги ташки савдо марказий ҳокимият назоратида турарди. Ташки савдонинг суст ривожланганлиги Вьетнам ҳудудида зираворларнинг йўқлиги ва чет эл кемалари учун қулай портларнинг мавжуд эмаслигига эди. Шу даврда вуаларнинг олий ҳокимиятини эътироф этувчи қонунлар тўплами шаклланди.

1471 йили Дайвьетга хозирги Вьетнамнинг Марказий ва Жанубий қисмларида жойлашган Чампа (Тямпа) давлати қўшиб олинди. Жанубда шаҳарсозлик, қишлоқ хўжалиги ва савдо тез ривожланди, ерга давлат эгалиги мустаҳкамланди, ирригация иншоотлари кенгайди, ички ва ташки савдо ривожланди. Конфуцийлик расмий мафкура бўлиб қолди.

XVI–XVII асрларда Дайвьет. XVI аср бошларида қишлоқ хўжалигидаги давлат ва хусусий секторлар ўртасида зиддият сезила бошлади.

XVI–XVII аср ўрталарида вьетнамлик зодагонларнинг учта энг кучли уруглари – Мак, Чин ва Нгуенлар тўхтовсиз ўзаро уруш олиб бордилар. Улар ўртасидаги кураш 1510 йили бошланди. 1516 йили Дайвьетда будда руҳонийси Чан Као бошчилигига дехқонлар қўзғолони бўлиб ўтди. 1517 йили қўзғолончилар мамлакат пойтахтини эгаллаб, ўз раҳбарларини тахтга ўтқаздилар. Аммо у ўғли Чан Тханг фойдасига тахтдан воз кечди. Чан Тханг эса шимолий вьетнамлик саркарда Мак Данг Зунг томонидан мағлуб этилди. Мак Данг Зунг янги сулолага асос солди. Бу сулола 1592 йилгача хитойликларга тобе бўлиб, улар ёрдамида ҳокимиятда турди. 1592 йили ҳокимиятга яна Ле сулоласи вакиллари келади ва ўн йиллар давомида шимолий (Бакбо) ва жанубий (Намбо) қисмларга бўлинниб кетган давлатни яна бирлаштиради. Ле сулоласи вакиллари расман-

гина ҳокимият тепасида бўлиб, мамлакатни аслида Ле сулоласини таҳтга қайтарган Чинлар бошқараётган эди. Въетнамнинг жанубий қисмини Нгуенлар назорат қилаётган бўлиб, XVII аср бошларида улар ўзларининг давлатини туздилар. Лекин улар ҳам Ле сулоласининг ҳокимиятини тан олиб, ўзларини мустақил сулола деб эълон қилмадилар.

Нгуенлар ўз пул бирликларини жорий қилдилар ва қўшни давлатлар ҳамда Голландия, Португалия сингари мамлакатлар билан савдо алоқаларини йўлга қўйдилар. Дайвъетнинг жанубидаги Нгуенлар давлати Дангчаун деб, мамлакат шимолидаги Чинларга қарашли ерлар эса Дангнгоай деб атала бошлади.

XVI–XVII асрларда қишлоқда ўзгаришлар юз бериб, анъанавий қишлоқ жамоаси – са табақалана бошлайди. Дайвъет аграр мамлакат эди, ахолисининг асосий қисмини шоли етиштириш билан шуғулланувчи дехқонлар – въетлар ташкил қиласди. Шаҳарларда ҳам асосан въетлар яшарди, бошқа миллатлар вакиллари жуда камчиликни ташкил қиласди. Ҳиндихитойнинг бошқа мамлакатларидан фарқли ўлароқ Дайвъетда доимий равишда ҳайдаладиган ерларнинг етишмаслиги сезиларди. Дехқонлар шахсан озод ҳисобланиб, шоличиликдан ташқари балиқчилик, чорвачилик ва паррандачилик билан ҳам шуғулланишарди.

Янги даврнинг бошларида Дайвъетнинг ташқи алоқалари анча чекланган эди. 1535 йилдан португалияликлар ташқи савдо алоқаларини назорат қила бошладилар. Улар, хусусан, Нгуенлар ҳукмронлик қилаётган мамлакатнинг жанубий қисмига Кохинхина номини бердилар.

XVII аср 30-йилларидан Въетнамни ўзлаштиришга голландияликлар киришдилар ва бир неча факторияларни барпо қилдилар. Ўзаро урушларда голландияликлар Чинларни, португалияликлар эса Нгуенларни кўлладилар, уларга қуроллар сотдилар. 1643 йили голландияликларнинг кемалари Нгуенлар томонидан ўққа тутилди ва шундан кейин улар мамлакатда ўзларининг фаолиятини якунлашга мажбур бўлдилар.

XVII асрдан Въетнамнинг Япония ва Хитой билан савдо алоқалари ривожланади. Шу даврда инглизлар Въетнамга кириш учун биринчи уринишни амалга оширади. Аммо улар факат 1672 йили биринчи факториясига асос солдилар. Саккиз йилдан кейин французлар ҳам шунга эришдилар.

Дайвъет XVII аср иккинчи ярми ва XVIII асрда. Нгуенлар билан Чинлар ўртасида 1627 йили бошланган уруш 1672 йилгача давом этди ва кейин қарийб юз йил бузилмаган тинчлик ўрнатилиши билан якунланди.

XVII аср 60-йиллари XVIII аср 20-йиллари Дайвъетда нисбатан барқарорлик йиллари бўлди. Айни пайтда мамлакат шимолида жамоа ерларининг камайиб кетганлиги сабабли секин-аста иқтисодий инқироз кучга бошлади. XVIII аср ўрталаридан Даннингоада инқирознинг кескинлашуви сабабли олий ҳокимият бўш ерлар кўп бўлган ва инқироз кескинлашмаган жанубга таяна бошлади.

1774 йили тюа Нгуен Хитойнинг рухсатисиз ўзини вионг – мустақил хукмдор деб эълон қилди ва Камбоджа ерлари ҳисобига ўз ҳудудини кенгайтиришга, маҳаллий аҳоли ўртасида въетларнинг урф-одатлари ва маданиятини куч билан сингдиришга уриниб кўрди.

XVIII асрга келиб Вьетнамнинг ҳозирги чегараларида давлатнинг шаклланиши якунланди. Таракқиёт даражаси бўйича Вьетнам Жануби – Шарқий Осиёнинг энг бой ва ривожланган мамлакатлари қаторида турарди.

Ижтимоий-иқтисодий соҳада муҳим ўзгаришлар юз берди, давлат ерлари қисқариб, жамоа – са хусусий ер эгаларига қарам бўлиб қолди.

Хунармандчилик ва савдо ривожланди. Қизил дарёси соҳиллари хунармандчилик ишлаб чиқаришининг асосий ҳудудига айланди.

Жанубда ерларнинг хусусий кўлларда тўпланишига қарамасдан, Меконг дарёси соҳилларида ҳали ўзлаштирилмаган қўриқ ерлар анчагина эди. Шу сабабли бу ерда аграр муносабатлар шимолдагига нисбатан анча муваффақият билан ривожланди.

XVIII аср ўрталаридан бошлаб солиқ юки оширилди, дехконларнинг хонавайрон бўлиши бошланди, инфляция даражаси ва нарх-наво ошиб кетди, чайқовчилик авж олди. Ташқи савдо ҳам инқирозга юз тутди.

Чинларга қарашли ҳудудларда ҳам дехконларга қарашли ерларнинг катта ер эгаларига ўтиб кетиш жараёни авж олди. Натижада ер танқислиги вужудга келди. Солиқлар ва турли хил мажбуриятлар сони ошди. Давлат дехкончилик учун яроксиз ерлардан ҳам рента солиғи ола бошлади. Жамоалар аллақачон ўлиб кетган ёки иш излаб бошқа ерларга кўчиб кетган жамоадошлари учун ҳам солиқ

тўларди. Натижада Чинлар ерида очарчилик бошланиб, минглаб одамлар ўлди, ундан ҳам кўпроги қашшоқликка маҳкум қилинди.

Шундай қийинчиликлар натижасида дехқонларнинг ғалаёнлари авж олди. 1737 йили пойтахт яқинида будда руҳонийси Нгуен Зионг Хинг раҳбарлигида кўзголон бошланди. Бир йил кейин Тханъхоя провинциясида Ле Зуи Мат бошчилигида кўзғолон бўлиб, унинг иштироқчилари ҳокимиятни амалда Ле сулоласи вакилларига қайтариш учун кураш олиб бордилар. 1739 йили Намха ва Тхайбинь провинциярида, 1740 йили Шонтайда, 1741 йили эса Хайзионг-Киенъян районида ва бошқа жойларда ҳам кўзғолонлар бўлиб ўтди. Ҳукумат кўшинларининг кўзғолончиларга қарши кураши то 1770 йилгача давом этди. Чинлар ижтимоий кескинликни юмшатиш мақсадида солиқлар ва мажбуриятларни камайтириди, дехқонларнинг олдинги карзларидан кечди. Шунга қарамасдан Чинлар режими халокат ёқасига келиб қолди.

1771 йили Вьетнам худудида унинг тарихидаги энг йирик кўзғолонлардан бири – Тэйшенлар кўзғолони (1771–1801) бошланди. Кўзғолоннинг асосий кучлари мамлакатнинг тарқоқлиги ва марказий ҳокимиятнинг заифлигидан азият чекаётган дехқонлар ва шаҳар аҳолиси бўлди. Кўзғолонга учта ака-ука – Нгуен Нъяк, Нгуен Хюэ ва Нгуен Ли бошчилик килдилар.

Тэйшенлар ижтимоий муносабатларда тенглик ўрнатиш тарафдори бўлиб чиқдилар. Улар ердан фойдаланишни тенглаштириш, бой кишиларнинг мулкларини мусодара қилиш тадбирларини амалга оширди. Бироқ, ерга эгалик қилишнинг аввалги тизимини бартараф эта олмадилар. Дехқонлар бўш ерларга ишлов бериш, юқори солиқлар тўлаш ва давлат мажбуриятларини бажаришда давом этдилар.

Жанубда мустаҳкам жойлашган тэйшенлар 1783 йилдан шимолда ҳукмронлик қилаётган Чинларга қарши кураш бошладилар. Уларнинг шиори Ле сулоласининг «қонуний» ҳокимиятини тиклаш эди. Шунинг учун уларни фақат дехқонлар эмас, амалдорлар, савдогарлар ва ер эгаларининг бир қисми ҳам кўлладилар. 1784 йили Сиам армияси Нгуенларга ёрдамга келди, бироқ Нгуен Хюэ қўшинлари томонидан тор-мор қилинди. Нгуен Хюэ шу пайтдан бошлаб Вьетнамда миллий қаҳрамон санала бошланди.

1786 йили тэйшенлар Фу Суан шаҳрини эгаллашди. Расман Ли сулоласининг ҳокимияти тикланди, аммо реал ҳокимият тэйшенлар қўлида қолаверди.

Ле Хиен Тонг вафот этгандан сўнг тахтга Ле Тиуэ Тхонг келди ва тэйшенларнинг таъсиридан қутилишга ҳаракат қилди, аммо мағлубиятга учраб пойтахтдан кочди ва Хитойнинг Цин ҳукмдорлариға ёрдам сураб мурожаат қилди. Шу йилнинг декабрида Цинлар армияси Ле Тиуэ Тхонг ҳамроҳлигига пойтахтга кириб келди. Бунга жавобан Фу Суанда турган Нгуен Хюэ ўзини Вьетнам императори Куанг Чунг деб эълон қилди ва ўзига содик қўшинларни Тханлонг шаҳрига жўнатди. Нгуен Хюэ қўшинлари 200 минг кишилик хитойликлар қўшинини енгиб, 1789 йил январнинг охирида Тханлонгга кириб келди. Шундан сўнг Хитой маъмурлари унинг ҳокимиятини тан олдилар.

Куанг Чунг ўзига қарашли ерларда ислоҳот ўтказишни бошлаб юборди. Давлатга қарашли ерларни муҳтоҷ дехқонларга бўлиб беришни назарда тутувчи, дехқончиликни рағбатлантирувчи фармон эълон қилинди. Ирригация иншоатларини тиклаш ишлари бошланниб, ҳайдаладиган ерлар майдони кенгайди. Кўплаб соликлар бекор қилинди, ташқи савдога қўйилган чекловлар ҳам бекор қилинди ва ҳ.к.

1792 йили Куанг Чунг вафот этди, унинг ворислари эса мамлакатда у сингари катта таъсирга эга эмасди. Бир пайтлар ҳалқ қўзғолонига раҳбарлик қилиб ҳокимиятга келганлар энди вьетнамлик зодагонларнинг янги қатламига айландилар. Ҳалқ эса кечаги ҳалоскорларидан тезда юз ўғирди.

Тэйшенлар томонидан ағдарилган Нгуенлар сулоласининг вакили Нгуен Фук Ань французлар билан келишиб, уларнинг ёрдамига таяниб, ўз атрофига норозиларни йиғади. 1792–1802 йиллари Нгуен Фук Ань тэйшенларни аввал Марказий Вьетнамдан қувиб чиқарди, сўнгра бутун мамлакатни бирлаштиришга эришди. У 1802 йили ўзини Зя Лонг номи билан Вьетнам императори деб эълон қилди. Зя Лонг томонидан Тханлонг шаҳрида асос солинган янги Нгуенлар сулоласи 1945 йил августгача ҳокимиятда турди.

Камбоджа. XVI аср бошларида Камбоджа буддавийлик ҳукмрон дин хисобланган монархия тузумидаги давлат эди. Монарх (Камбоджада сдат деб аталган) барча ерларнинг олий мулкдори саналган, у ва унинг оила аъзолари илоҳийлаштирилган. Монархга мурожаат қилинганда «Преах» (Муқаддас) ибораси қўшиб айтилган. Мамлакатдаги ҳукмрон гуруҳ амалдорлар, қирол (сдат)нинг қариндошлари, буддавий монахлик жамоасининг раҳбарлари –

сангхилардан ташкил топган. Камбоджа маъмурий жиҳатдан про-винцияларга бўлинган. Шаҳарлар ўзини ўзи бошқариш тизимиға эга бўлмасдан, қирол томонидан тайинланган амалдор томонидан бошқарилган. Ҳунармандлар, амалдорлар, ҳарбий хизматчилар, савдогарлар ва хизматкорлар шаҳарлар аҳолисининг асосини ташкил қиласди. Пномпень – мамлакатнинг пойтахти, иқтисодий ва маданий маркази ҳисобланарди. Қишлоқларда дехқонлар асосан шоли етишириш, чорвачилик ва балиқчилик билан шуғулланардилар. Дехқонлар шахсан озод бўлиб, ишлов бериш шарти билан ерга эгалик қиласдилар.

XVI аср бошларида Камбоджа Осиё давлатлари ичидаги нисбатан ривожланган бўлиб, кучли армия ва флотга эга эди. Мамлакат четга олий навли гуруч, балиқ, фил суюги, олтин экспорт қиласди ва четдан матолар, шириналклар, симоб ва бошқа товарлар олиб киради.

XVI аср бошларидан кхмер зодагонларининг ўзаро кураши натижасида Камбоджа давлатининг инқирозга юз тутиш жараёни бошланади. Оқибатда дехқон Най Кан бошчилигига дехқонлар қўзғолони бошланади. Қўзғолончилар Пномпенни эгаллаб, 1502 йили қиролни таҳтдан тушириб, қатл қиласдилар. Бироқ қиролнинг укаси Анг Тян қўзғолончиларни енгиги, раҳбарларини қатл эттиради. Шундан сўнг таҳтга келган Анг Тян 1510 йилдан Аютияга (хозирги Тайланд худудидаги давлат) қарши уруш бошлайди. Бу уруш анча узоқ давом этди. Кхмерлар 1531 ва 1549 йиллари Аютия худудига бостириб кирдилар, Прачин вилоятини таладилар, аммо бу ерда муҳим ўрнашиб олишга эриша олмадилар. 1556 йили Аютия Камбоджага илгари олиб қўйилган Чантабун ерларини қайтариб беришга мажбур бўлди. Шундай қилиб Камбоджа худуди ўзининг XIV асрдаги чегаралари бўйича тикланди. Аютияга қарши юришлар Баром Реатеанинг вориси Сатхе I даврида ҳам давом эттирилди.

Дастлабки христиан миссионерлар Камбоджада XVI аср ўрталарида пайдо бўлдилар, уларга ўз динларини тарғиб қилишга рухсат берилди. Бироқ маҳаллий аҳолининг кўпчилиги бу динга қизиқиши билди. Миссионерлар тез орада қайтиб кетишиди.

XVI аср охирлари яна Камбоджанинг юксалиш даври бўлди. Мамлакатнинг янги пойтахти – Ловек шаҳри бунёд этилди, кўплаб монастирлар ва бошқа бинолар барпо этилди. Бироқ Аютия билан

давом этаётган уруш мамлакатга катта заар қелтириди. Пойтахт Ловек тай қўшинлари томонидан вайрон қилинди.

Мамлакатдаги ҳолатдан норози бўлган халқ қўзголон кўтариб, қиролни ўлдиради. Бироқ ҳукумат қўзголонни бостиришга эришиди. Мамлакат пойтахти Удонг шаҳрига кўчирилиб, маъмурий ислоҳотлар ўтказилди.

XVII аср бошларида Камбоджа билан Аютия кучайиб бораётган Дайвьетга қарши бирлашишга ҳаракат қилдилар. Аммо тез орада Камбоджа қироли Чей Четта II нинг режаси ўзгариб, у Нгуенларнинг қизларидан бирига уйланди. Шу тариқа Камбоджанинг минтақадаги мавқеини анчагина мустаҳкамлашга эришилди.

XVII аср ўрталарига келиб Камбоджада ислом ва буддавийлик динлари тарафдорлари ўртасида келишмовчилик пайдо бўлди. Гап шундаки, тахтда ўтирган қирол Чан ислом динини қабул килган бўлиб, бундан зодагонларнинг катта қисми норози эди. Натижада вьетнамликлар томонидан қўллаб-қувватланаётган Преах Батом Ратеа бошчилигидаги буддавийлик тарафдорлари ғалаба қилишди. Чан тахтдан ағдарилиб, Батом Ратеа ҳокимиятга келди.

XVII аср охирларига келиб Камбоджанинг Вьетнам билан муносабатлари ёмонлашди. Мамлакатнинг Жанубий Вьетнам билан чегарадош ерларида вьетларнинг қишлоқлари пайдо бўлди. Улар дехкончилик билан шуғулланиб, Камбоджа қиролига солик тўларди. Бироқ тез орада вьетлар жиддий сиёсий кучга ҳам айланиб, кхмер зодагонларига таъсири ўтказа бошлади. Уларнинг ҳарбий тузилмалари кхмерларнинг тахт талашувларида фаол иштирок этишар ва ўзларига маъқул талабгорни тахтга чиқариш учун курашардилар.

Камбоджа қироллари Вьетнамнинг таъсири кучайиб бораётганлигидан хавотирга тушишар ва мамлакат ичкарисида Дайвьет билан тил бириктираётган кучларга қарши курашишга ҳаракат қиласарди. Аммо XVIII аср иккинчи ярмидан бошлаб то француз мустамлакачилиги ўрнатилгунга қадар (Камбоджа расман 1863 йили Франция протекторатига айланди) Камбоджа Вьетнам ва Сиамнинг икки томонлама сюзеренитети¹ остида бўлди.

Лаос. Янги давр бошларида ҳозирги Лаос ҳудудида ҳали 1353 йили ташкил топган, ўзига хос конфедерациядан иборат бўлган Ланг Санг давлати фаолият кўрсатарди. Бу давлат ярим мустақил ҳудудлардан иборат бўлиб, уларнинг марказий ҳокимият билан

¹ Сюзеренитет – сюзеренларнинг ўз вассалларига нисбатан олий ҳукуки.

муносабати «сюзерен-вассал» тамойилига асосланган эди. Олий хукмдор – тяусивит маҳаллий хукмдорлар – тяумнангларнинг устидан назорат ўрнатган. Тяумнанг ҳокимиятга келиш пайтида тяусивитга содиклик ҳақида қасамёд қабул қилган.

XV аср охирларида вьетнамликларнинг Миянг Пуен князлигига бостириб кириши ва Ланг Сангнинг пойтахтини босиб олиши натижасида Лаос давлати кучсизланиб қолди. Факат қирол Потисарат (1530–1559) Сиамга қарши уруш олиб бориб ва Вьетнам билан тинчлик муносабатларини ўрнатиб, давлатни мустаҳкамлашга эришди. Потисират вафотидан сўнг ҳокимиятга келган Тхао Саи Сетхатират 1560 йили Аютия билан иттифоқчилик шартномасини имзолади. 1563 йили мамлакат пойтахти Луанг Прабанг (Олтин Будда шаҳри) шаҳридан Въентъянга кўчирилди. Шу даврда ҳозирги Бирма ҳудудида жойлашган Ава давлати билан уруш олиб борилди. Урушда лаосликлар муваффақиятсизликка учраб, XVI аср охирларигача бирмаликларга қарам бўлиб қолди.

1637 йили Сумин Вонгснинг ҳокимиятга келиши билан Ланг Санг яна кучли давлатга айланади. Унинг даврида бир қатор ислоҳотлар ўтказилиб, Ланг Санг минтақадаги бошқа давлатлар билан рақобатлаша оладиган марказлашган давлатга айланди. Сумин Вонгс ўз ҳукмронлиги йилларида Сиам ва Дайвьет билан дўстона муносабатлар ўрнатишга эришди.

Шу даврда Лаосга дастлабки европалик миссионерлар – голландларнинг келиши бошланади. Бироқ католик иезуитлар бўлган бу миссионерлар ҳеч қандай муваффақиятга эришмадилар.

1694 йили Суминг Вонгс вафот этди. У ўзидан ворис қолдирмади. Шу сабабли зодагон гуруҳларнинг вакиллари ўртасида тахт учун кураш бошланиб, Ланг Сангни ҳалокат ёқасига олиб келди. XVIII аср бошларида давлат бир неча қисмларга бўлинib кетди. Шимолда Луанг Прабанг, марказда Въентъян, жанубда Тямпатсак ва бошқалар. Буларнинг бир қисми Дайвьетнинг вассалига айланди.

1750 йили Луанг Прабанг ҳукмдори вьетнамликларга ўлпон тўлашдан бош тортади ва бундан норози бўлган вьетнамлик қўшинларнинг ҳужумини қайтаришга муваффақ бўлади.

XVIII аср ўрталарига келиб Лаос ерларига Бирма ўз қизиқишини намойиш қилди. Бирмаликлар Въентъяннинг ёрдами билан 1753 йили Луанг Прабанг ҳудудига бостириб киришди. 1768 йили

Аютиянинг аралашуви билангина Луанг Прабанг бирмаликлардан озод қилинди. 1774 йили Аютия билан Луанг Прабанг ўртасида Бирмага қарши иттифоқ тузилди. Бунинг натижасида Луанг Прабанг Аютиянинг вассалига айланди. Шунингдек, Въентъян ҳам 70-йилларнинг охиридан бошлаб Сиамга вассалликни тан олишга мажбур бўлди.

Мьянма (Бирма). XVI аср бошларида ҳозирги Мьянма (Бирма) худудида ягона марказлашган давлат мавжуд эмасди. Бирманинг марказий қисмидаги Ава давлати аҳолиси бирмаликлардан ташкил топган бўлиб, аҳолиси бирмалик бўлмаган халқлардан иборат шанлар, монлар ва каренлар давлатлари билан доимий уруш олиб бораётган эди. 1507 йили Ава ҳукмдори ерларининг бир қисмини шанларга беришга мажбур бўлди. Бироқ бу билан қаноатланмаган шанлар орадан йигирма йил ўтгандан сўнг Авани тор-мор қилиб, унинг монархини ўлдирдилар, аҳолининг анча қисми қул қилиб олиб кетилди, қолганлари эса тоғли худуддаги Таунга князлигига кочиб қутиди.

Бирманинг шимолий ва марказий қисмини шанлар, жанубни – монлар, гарбни – Аракон назорат қила бошлади. Бундай ҳолат бирмаликларни қаноатлантирунган эди. Шу сабабли Таунгу ҳукмдори Минжињо Шимолий Бирмада ўз назоратини ўрнатиш учун кураш олиб борди. Кураш натижасида шанлар ва монларнинг бир қанча ерларини эгаллаб олишга эришди. Аммо бирмаликларнинг 1548 йили Аютияга қарши бошлаган уруши муваффакиятсизликка учраганлиги мамлакатда монлар қўзғолонига олиб келди.

Янги даврда монлар тақдири фожиали яқунланди. Уларнинг бирмаликлар билан кураши навбатма-навбат устунлик билан олиб борилди. Бироқ, XVI асрда бошланган ва XVIII асргача давом этган бирма-сиам урушлари монларнинг иқтисодини издан чиқарди, кўплаб монлар асир тушдилар ёки қўшни Сиамга қочиб кетдилар. Янги давр охирларига келиб деярли барча мон шаҳарлари ўзларининг аввалги қудратини йўқотдилар.

Каренлар тоғли худудларда ва паст текисликларда яшардилар хамда асосан шоли етиштириш билан шуғулланар эдилар. XVIII асрда ягона Бирма давлати тузилгандан сўнг улар вассал сифатида караладиган бўлди.

Шанлар – Бирмадаги кичик миллатлар ичидаги каренлардан кейин иккинчи ўринда туради – мамлакатнинг шимолий қисмida

яшайди. Уларга тегишли ҳудудлар тоғли туманларда бўлсада, шанларнинг асосий машғулоти шоли етишириш бўлган.

Бирмада монлар, каренлар ва шанлардан ташқари чинлар, каченлар қабилалари ҳам яшарди. Улар ҳам ўз мустақилларни учун курараш олиб борганлар.

1555 йили монларнинг қўзғолони бостирилгандан сўнг бирмаликлар Авани эгаллашди, кейин эса шанлар князликлари билан лаосликларнинг Чиенгма князлиги жойлашган Юкори Бирма эгалланди. Шундай қилиб, Бирма Байниннаун хукмронлиги остида ягона давлатга бирлашди ва Аютияга қарши урушга тайёрлана бошлади. 1563, 1565-йиллардаги юришлар натижасида Аютия забт этилди ва Лаос ерларини эгаллаш учун уруш бошланди.

1580 йили Байниннаун вафот этгандан сўнг ўрнига келган ўғли Нанданбайин даврида мамлакат яна бўлиниб кетди. Португалиялик де Бриту Қуйи Бирманинг қироли деб эълон қилинди.

XVII аср бошларида Ава князлиги яна кучаяди, унинг хукмдори Анапхелун Пром, Таунгу князликларини ва 1613 йили Марказий Бирмани забт этди. 1615 йили Чиенгмай босиб олинди, Пегу шахри яна Бирманинг пойтахти бўлиб қолди. Бироқ фитна оқибатидан Анапхелун ўлдирилгандан сўнг таҳтга келган Талун пойтахтни яна Авага кўчирди. Талун изоляционизм сиёсатини олиб борди. Буддавийларнинг монастирларига бойликларни йиғиш, асиrlарни мулк қилиб сотиб олиш тақиқланди. Асиrlарга мамлакатнинг марказий қисмida ер берилди. Улар ерга ишлов беришдан ташқари ирригация иншоотларини қуришда иштирок этарди ва ҳарбий хизматни ҳам бажаардилар. Бундан ташқари аҳолини рўйхатга олиш, ерларнинг кадастрини тузиш каби муҳим тадбирлар амалга оширилди.

1648–1671 йиллари Бирма таҳтида Талуннинг ўғли Пиндале ўтиради. Унинг даврида сиамликлар билан ҳарбий тўқнашув бўлиб, бирмаликларнинг мағлубияти билан тугади. Элита бу мағлубиятда қиролни айблади ва уни ағдариб ташлади. Таҳтга Талуннинг бошқа ўғли Пье келди ва у ҳам мамлакатни ташки дунёдан изоляция қилиш сиёсатини олиб борди. Аммо европаликларнинг турли йўллар билан Бирмага кириб келиши давом этди.

XVIII аср 30-йилларига келиб марказий ҳокимиятнинг кучсизланиши ва айрмачилик кайфиятидаги, биринчи навбатда монлар яшайдиган тоғли ҳудудлардаги аҳолининг фаоллашуви жараёнлари бошланди. Монлар 1752 йили Авани эгаллаб, уни вайрон қилишди.

Оғир аҳволда қолган бирмаликлар ўзларига янги йўлбошчи танлашиди. Бу қобилиятли амалдор Алаунпая эди. У марказлашган давлатни ташкил қилиш ташаббуси билан чиқди. Шиддатли жанглардан кейин 1756 йили Бирма асосан марказлаштирилди, армия кучайтирилди. Бирма шанлар ва лаосликларнинг ерларини босиб олиш хисобига кенгайиб борди. Бу ҳол шанларни ўзларининг вассаллари хисоблаган Хитойни норози қилди. 1768 йили Хитой қўшинлари Ава атрофида Бирмага хужум бошлади. Бирмаликлар Хитойнинг икки марта қилинган ҳужумини қайтаргандан сўнг икки томонлама тинчлик сулхи имзоланди.

1767 йили Бирма Аютияни зabit этди ва сиамликларнинг бу давлатини йўқ қилиб ташлади. Бироқ Бирманинг ўз ерларида монларнинг қўзғолони бошланганлиги сабабли улар Сиамни ташлаб чиқдилар.

XVIII аср охирларида Бирма яна Англия ва Франциянинг эътиборини жалб қилди. 1795 йили инглизлар Ҳиндистондан маҳсус элчилар жўнатиб, икки томонлама инглиз-бирма муносабатларини кенгайтиришни таклиф қилди. Аммо музокаралар инглизлар кутган натижани бермади.

Индонезия. XVI асрда Индонезия архипелагидаги ороллар аҳолиси уч миллион кишига яқин бўлган. Архипелагдаги халқлар тараққиётнинг турли босқичида эди. Борнео, Целебес оролларида яшовчи аҳоли ҳали матриархат элементлари мавжуд бўлган ибтидоий даражада бўлса, Ява, Суматра каби бошқа оролларда давлат тузилмалари мавжуд эди.

XVI асрдан Индонезияни исломлаштириш бошланди. Ява оролида Маджапахит давлати тарқалиб кетгандан кейин унинг ўрнида бир нечта мусулмон князликлари пайдо бўлди. Бу даврда Португалия оролда асосий роль ўйнайди. Португаллар 1511 йили минтақадаги савдо алоқаларида асосий роль ўйнайдиган Малаккани зabit этишди. Бу ерда мустамлака бошқаруви жорий қилиниб, Португалия минтақадаги князликлар, инглизлар ва испанларга кучли рақобат пайдо қилди.

Аста-секин Зонд бўғози зонасида янги давлат бирикмалари пайдо бўлиб, 1568 йили улар Батнам сultonligiga бирлашдилар. XVI аср охирларида бу давлатнинг пойтахти Батнам шаҳри факат Жануби-Шарқий Осиёда эмас, балки бутун Осиё-Африка дунёсидаги энг йирик савдо марказларидан бирига айланди. Солиқлардан

тушадиган даромадлар эвазига Батнам ҳукмдорлари португалияликларга бас кела оладиган кучли армия ташкил қилдилар.

XVI асрда Индонезия худудида ташкил топган иккинчи йирик давлат Аче султонлиги эди. Бу султонлик Суматра оролининг шимолий қисмидаги ерларда жойлашган. Оролнинг жанубида Жохор султонлиги жойлашган бўлиб, унинг ҳукмдорлари оролда гегемонлик учун Аче султонлари билан рақобатлашар эдилар. Улар ўртасида бутун XVI асрда бўлиб ўтган тўқнашувлар иккала султонликни ҳам кучсизлантираш ва бу фақат португаллар учунгина фойдали эди.

1602 йили Голландиянинг Ост-Индия компанияси пайдо бўлиб, у Эзгу Умид бурнидан то Магеллан бўғозигача бўлган худудда денигиз қатнови ва савдо қилишнинг монопол ҳуқуқини қўлга киритди. Голландлар 1609 йили Молукк оролидан ўз рақиблари-португаллар ва испанларни сиқиб чиқарди. 1619 йили Ява оролидаги Жакарта шаҳрини босиб олишди ва уни кейинчалик ўзларининг Индонезия мустамлакаларида бош маъмурий марказига айлантирилар.

Англиянинг Ост-Индия компанияси Молукк, Сулавеси, Ява, Суматра ва Сиам оролларида факториялар қуриш билан чекланди.

1619 йили голландларнинг флоти Сиам ва Зонд бўғозларида инглизлар флоти устидан қатор ғалабаларни қўлга киритди, 20-йиллари эса инглизларни Молуккдан қувиб чиқди. Шундан сўнг инглизлар бутун эътиборини Ҳиндистонга қаратди.

XVII аср ўрталарида Ява оролидаги энг йирик ва кучли давлат Матарам султонлиги бўлиб, у оролнинг марказий ва шарқий қисмини эгаллаган эди. Матарамнинг давлат бошлиғи сусухунан деб аталиб («ҳамма бўйсунадиган шахс» дегани), у ўзининг таъсирини оролнинг гарбий қисмida жойлашган Бантам султонлигига ҳам ўтгазишга ҳаракат қиласди.

XVII аср ўрталарида Суматра оролининг шимолида Аче султонлиги, шарқида – европалик мустамлакачиларга қарам бўлиб қолган Тидор ва Тернате султонлеклари мавжуд эди. Целебес оролида Гова князлиги жойлашганди. Бу давлат бирикмалари ўртасидаги ўзаро қарама-қаршилиқдан голландлар жуда яхши фойдаланишди. Улар 1667 йили Говани бўйсундиришди, унинг султони Ҳасаниддин голландларга катта микдорда контрибуция тўлади.

1652 йили Голландиянинг Ост-Индия компанияси Матарам князлиги билан шартнома тузди. Унга кўра голландларнинг Ява оролидаги ерларга эгалик қилиш ҳуқуқи тан олинди. 1677 йили

Матарам ҳукмдори (сусухунан) мамлакатда бошланган қўзғолонни бостириш учун голландлардан ёрдам сўрайди ва эвазига Ост-Индия компанияси билан янги шартнома имзолайди. Унга кўра Матарам билан савдода голландларга чекланмаган ҳукуқлар берилиди; бир катор худудлар голландларнинг ихтиёрига берилиб, у ерларда дengiz портлари қурилишига руҳсат берилиди. Ушбу шартномадан кейин голланд қўшинлари Матарам худудига киритилди.

Голландлар эътиборини жалб қилган кейинги давлат Бантам бўлиб, у Ява оролида шу пайтгача инглизлар таъсири остида турган ягона давлат эди. Бантамнинг ўзида Голландия тарафдорлари билан Англия тарафдорлари ўртасида кураш бораётган бўлиб, бу курашда Голландия томони ғолиб чиқди ва 1683 йили Бантам билан голландларнинг Ост-Индия компанияси ўртасида шартнома имзоланди. Шартномага кўра Бантам худудида савдо қилиш учун голландларга катта имтиёзлар берилиди ва инглизлар Бантамни ташлаб чиқиб, Суматра оролининг ғарбида ўрнашишга мажбур бўлдилар. 1683 йили голландлар Тернате князлигини ҳам ўзларига бўйсундирди.

XVII аср охири – XVIII аср бошларида бутун Ява оролида голландлар зулмига қарши ҳалқ қўзғолони бўлиб ўтди. Айниқса Матарамда Сурапати бошчилигидаги қўзғолон қучли бўлди. Голландлар бу қўзғолонни фақат 1720 йилга келиб бостира олишди.

XVIII аср бошларига келиб Индонезияда голландларнинг мустамлака тизими умумий жиҳатдан шаклланиб, бу тизим Ост-Индия компаниясининг фаолияти тугагунча давом этди.

Англия билан Голландия ўртасидаги рақобат давом этиб, XVIII асрдан голландлар аста-секин ўз позицияларини йўқота бошлади. 1749 йили Матарам князлиги иккита мустақил князликка – Суракарта ва Жокъякарта князликларига бўлинниб кетди. Бу мустақил князликлар голландларнинг Ост-Индия компаниясига тобеликни тан олдилар.

1780–1784 йиллардаги тўртинчи англо-испан уруши даврида инглизлар Индонезиядаги голландларга қарашли оролларни забт эта бошлади. Улар Суматранинг ғарбидаги Паданг давлатини босиб олдилар. 1784 йили тинчлик сулҳи имзолангандан сўнг Нечапатам князлиги ерлари ҳам инглизларга ўтиб, уларнинг кемалари Индонезия архипелагидан эркин сузиб ўтиш ҳукуқини олдилар. Натижада голландларнинг Ост-Индия компанияси даромадлари кескин камайиб, 1799 йил охирида компания фаолиятининг якунланишига олиб келди.

Тайланд (Аютия, Сиам). Янги давр бошларида ҳозирги Тайланд худудидаги энг йирик давлат Аютия бўлиб, у 1350 йилдан 1767 йилгача мустакил давлат сифатида фаолият кўрсатган. Янги даврга ке-либ анъанавий тай жамияти шаклланиб бўлганди. Жамиятда будда-вийлик ҳукмрон дин бўлиб, барча урф-одат ва анъаналар шу диний дунёқарашга мослашган эди. Қирол шахси илохийлаштирилган, у диний, дунёвий ва ҳарбий ҳокимият бошлиғи ҳисобланарди. Буддевийлар жамоаси – сангха халқ билан ҳукмрон гурух ўртасидаги боғловчи эди.

Деҳқонлар билан амалдорлар ўртасидаги муносабат, биринчи на-вбатда, ахлоқий мажбурият тамойилига асосланган. Деҳқонлар шах-сан озод ҳисобланиб, давлат фойдасига солик тўлашни ўзларининг мажбуриятлари деб билишган.

Тай зодагонларини «най» деб аташган. Бунга ҳукмдорнинг оила-си, пойтахтнинг ҳурматли кишилари киради. Уларнинг даражаси, ҳукмдордан фарқли ўлароқ, мерос бўлиб ўтмас эди.

Буддевий монахлар алоҳида гурух бўлиб, улар жисмоний меҳнат билан шуғулланмас ва моддий таъминотда тўлик дунёвий ҳокимиятга боғлиқ эди.

XVII аср ўрталаридан бошлаб Сиам ҳаётида унинг ташки савдо-сини монополаштиришга уринаётган Голландиянинг Ост-Индия компанияси тобора муҳим роль ўйнай бошлади. Бунга қандайдир даражада қаршилик кўрсатишни истаган Сиам ҳукмдорлари компа-ниядан товарларни ўзлари сотиб олиб, кейин ички бозорда сота бошладилар. XVII аср 30–40 йилларида мамлакатдан товарларни голландларнинг рухсатисиз олиб чиқишига уринган Сиам кемала-рига қўйилган ҳақоратли тақиқлар туфайли Сиам билан компания муносабатлари ёмонлашди. Голландлар рухсатисиз савдо қилишга уринаётган Сиам кемаларини мол-мулки билан мусодара қилишни бошлади. Шунга қарамасдан Сиам ўз флотини шакллантиришда да-вом этди. Аммо кучлар teng эмасди. 1664 йилнинг августидаги Сиам ҳукумати ўз тарихида илк бор ҳукуқлари камситилган шартномани имзолашга мажбур бўлди. Шартномага кўра голландлар экстерри-ториаллик¹ ҳукуқини ва катта савдо имтиёзларини олдилар.

¹ Экстерриториаллик – чет эллардаги дипломат ёки компаниянинг факат ўз давлати конунларига бўйсуниши. Айни ҳолатда Ост-Индия компаниясининг Сиам конунларига бўйсунмаслиги назарда тутилган.

Бу пайтга келиб Англияning Ост-Индия компанияси ҳам Сиамга қизиқиши билдира бошлади. 60-йилларнинг бошига келиб инглизлар бу ерда ўз савдо факторияларини тикладилар, Сиам қиролига хизматга кириб, ҳатто саройда катта лавозимларни эгаллай бошладилар. 1685 йили Англия хукумати Сиамдан инглиз ҳарбий қалъасини қуриш учун қирғоқ бўйидан ер ажратишини талаб қилди. Рад жавобини олган инглизлар ҳарбий куч ишлатишга қарор қилди. Шунда тайликлар 1687 йили Бангкок ва Мергуида ҳарбий кучларни жойлаштирган француздар билан иттифоқ тузишди. Сиамликлар дастлаб кутилган ёрдамни олишди ва инглизларга бир неча зарбалар ҳам беришди. Кейин эса ўз иттифоқчилари француздар билан уришишга тўғри келди. 1688 йили қўзғолон қўтарилиб, монарх ағдарилиди ва қамоқда вафот этди. Қуршовда қолган француз гарнizonи мамлакатни тарқ этишга мажбур бўлди ва кейинги 150 йил мобайнида Сиамга бошка қизиқиши билдирамади.

Бу ғалаба Сиамга қимматга тушди. У ўз мустақиллигини сақлаб қолган бўлсада, Жануби-Шарқий Осиё мамлакатлари билан Хиндистон ўртасидаги савдода воситачилик ролини йўқотди, бу эса унинг иқтисодий аҳволи ёмонлашишига, дехқонлар ғалаёнларига, айрмачи кучларнинг фаоллашувига олиб келди. Ахвол қурғоқчилик туфайли янада оғирлашди.

Ушбу оғир ҳолатни қандайдир даражада енгиллаштириш учун XVIII аср биринчи ярмида қирол бир қатор фармонлар қабул қилди. Улар, биринчидан, дехқонлар ахволининг яхшиланишига қаратилган бўлса, иккинчидан, йирик ер эгаларининг қарам дехқонларни ўз қўлларида сақлаб қолишини таъминлашга қаратилган эди.

1733–1758 йиллари Сиамда қирол Боромокот хукмронлик қилди. Унинг даврида ички сиёсий ҳолат бир қадар барқарорлашди. Аммо XVIII аср ўрталарида Сиамга қўшни Бирма бостириб киради. Жанг ҳаракатлари, танаффуслар билан, 1759–1765 йиллари давом этди. Натижада бирмаликлар аввал Сиамнинг ғарбий ва шимолий қисмларини, кейин эса Бангкокни эгалладилар. 1767 йили бутун мамлакат бирмаликлар томонидан босиб олинди ва вайрон килинди, аҳолининг катта қисми Бирмага ҳайдаб кетилди.

Аммо тезда сиамликларнинг мустақиллик учун кураши бошлиниб, 1768 йили Марказий Сиамда пойтахти Тхонбури шаҳри бўлган янги давлат пайдо бўлди. Давлат тепасида турган Пъя Таксин сиёса-

тидан норози бўлган Прайя Чакри бошчилигидаги тай зодагонлари 1782 йили ҳокимиятни эгаллаб олишди. Прайя Чакри Рама I номи билан тахтга келиб, 1782–1809 йиллари хукмронлик килди.

1795 йили Сиамга яна бирмаликлар бостириб кирди. Ҳарбий ҳаракатлар XIX аср бошларигача давом этди. Оғир жангларда сиамликлар ўз мустақилликларини сақлаб қолди.

Филиппин. XV аср охири – XVI аср бошларida Жануби-Шарқий Осиёнинг дengиз савдо йўлларини назорат қилиш учун Португалия билан Испания ўртасида кескин кураш кетарди. 1493 йили Рим Папаси ўз булласи билан «нохристиан дунёни» таъсир доираларига бўлди. Унга биноан Жануби-Шарқий Осиё минтақаси Испанияга тегишли бўлди. Бир йилдан кейин бу ҳол икки томонлама испан-португал шартномасида ўз аксини топди. Бироқ бу шартнома ҳам икки давлатнинг минтақадаги рақобатини сусайтира олмади.

Филиппин ороллари 1521 йили Магеллан экспедицияси томонидан очилган бўлиб, шундан сўнг оролларни христианлаштириш ва испан тахтига бўйсундириш бошланган эди. Дастреб бу ороллар муқаддас Лазар номи билан аталган. Экспедиция аъзолари Себу оролида жойлашиб, маҳаллий хукмдор «қон билан шартнома» туздилар ва Себуга қўшни оролларни унга ўлпон тўлашга мажбур қилишди. Мактан оролининг хукмдори Лапулапу испанларга бўйсунишдан бош торти. Бу воқеа Филиппин тарихида биринчи марта чет эллик мустамлакачиларга очиқ қаршилик қўрсатилиши эди. 1521 йил 27 апрель куни Лапулапу қўшинлари жангда Магелланни ўлдиришди ва шундан сўнг Сабунинг ўзида ҳам испанлардан норозилик бошланиб кетди. Испанлар Филиппинни тарк этишга мажбур бўлдилар. XVI аср 20-йилларида испанларнинг Филиппинга қайтиш учун қилган ҳаракатлари португалларнинг қаттиқ қаршилигига учради. 1629 йили имзоланган Сарагоса шартномасига биноан ороллар Португалия назоратига ўтди.

XVI аср 60-йилларида испанлар Америка қитъасини забт этгандан сўнггина яна Филиппинни босиб олишга киришди. Оролларга Филиппин деган ном ҳам испан қироли Филипп II шарафига берилди.

1565 йили Мигель Лопес де Лагаспи бошчилигидаги испан экспедицияси Себу оролига тушиб, тез орада уни забт этди. Бир неча йилдан сўнг улар Висай ороллари ва Шимолий Минданаони ҳам забт этишди. Маҳаллий аҳолининг қаршилигини енгиш Висай оро-

лининг ҳарбий отрядлари ёрдамида амалга оширилди ва фақат XIX аср охирларига келиб якунланди. Бу пайтда испанлар назоратидан ташқаридаги тогли Лусон худудлари қолди холос. Филиппин архи-пелагининг жанубида яшайдиган мусулмон аҳоли испанларга улар мустамлакачилигининг охиригача қаршилик кўрсатиши.

1570 йилдан Лусон оролини забт этиш бошланди. Испанлар даст-лаб янги шаҳар – Манилани бунёд этишиди. Бу шаҳар кейинчалик Филиппиннинг пойтахтига айланди. Кейин испанлар Филиппин-нинг аҳоли энг зич жойлашган ва иқтисодий ривожланган қисми – Лусоннинг марказий қисмини босиб олдилар. XVI аср охирига келиб бутун орол забт этилди ва Лусондан ташқари Висай ороллари, Минданаонинг шимолий қисми ва Палаван ороллари испан-лар ихтиёрига ўтди. Филиппиннинг жанубий қисмига келсак, бу ердаги мусулмон аҳолиси мустамлакачиликнинг охиригача қаттиқ қаршилик кўрсатиб, испанларга қарши урушлар олиб борди. Бу урушлар «Моро урушлари» номи билан, диний байроқ остида олиб борилди. («Моро» атамаси испанча «мавр»нинг аналоги бўлиб, му-стамлакачилар уларнинг ҳокимиятига бўйсунмаган барча филиппинлик мусулмонларни шундай атаганлар).

Филиппинда испанлар ўзларининг мустамлака бошқарув тизи-мини яратдилар. Унинг тепасида испан губернатори тураг, жой-ларда унга бўйсинувчи кўплаб амалдорлар фаолият юритарди. Бу тизимда католик черковига алоҳида ўрин ажратилганди. XVII аср ўрталарига келиб, католик черковининг миссионерлик фаолияти на-тижасида забт этилган ерлар аҳолисининг деярли барчаси христи-анликни қабул қилди.

Испанлар маҳаллий аҳолини бошқариш, солиқлар йиғишда Жа-нубий Америкада синовдан ўтган усуллардан фойдаландилар. Ху-сусан, солиқ йиғишининг «экомендар» деб аталган тизими жорий қилиниб, унга кўра метрополиянинг «экомендеро» деб аталувчи вакили энг ашаддий усуллардан фойдаланиб, маҳаллий аҳолидан солиқлар йиғилишини ташкил қиласди. Кейинчалик, маҳаллий аҳоли норозилиги остида бу усул бир неча бор қайта кўриб чиқилди, лекин моҳияти ўзгармади. Шу сабабли испанларнинг мустамлакачилик сиёсатидан норози аҳолининг қўзғолонлари XVII аср ўрталаридан бошланиб, то XIX асрнинг охиригача давом этди.

1648 йилги Вестфаль шартномасига кўра Испания Филиппин-ни ўзида сақлаб қолди. 1762 йили Манилани инглизлар босиб олди,

аммо бир оз вакт ўтгандан сўнг Лотин Америкасидаги баъзи ерлар эвазига уни испанларга қайтариб берди. Шу даврда испанлар жа-нубдаги мусулмон аҳолини бўйсундириш учун муваффакиятсиз уруш олиб боришиди. XVIII аср 60–80-йилларида испанлар Филип-пиннинг ташки давлатлар билан савдо алоқаларини ривожланти-ришга қаратилган бир қатор ислохотларни амалга оширди.

Малайзия, Сингапур, Бруней. XVI аср бошларигача Малайзия тарихида савдонинг ривожланиши ва катта маданий ютуқлар билан боғлиқ юксалиш даври бўлди. Ислом хукмрон дин эди.

XVI аср бошларидан Малайзияга Европа давлатларининг му-стамлакачилик экспансияси бошланди. Индонезия архипелагидаги ороллар билан Ҳиндистон ўртасида савдо йўлларининг кесишган жойидаги муҳим порт ҳисобланган Малакка 1511 йили португал-лар томонидан босиб олинди. Малакка 40 мингдан зиёд аҳолига эга бўлган шаҳар-давлат эди. Даромадининг асосий қисми Ҳиндистон, Хитой, Сиам, Бирма ва бошқа давлатлар билан олиб бориладиган савдодан тушарди. Барча ерларнинг олий мулқдори сulton бўлиб, у деҳқонлардан ер солиги оларди. Куллар меҳнатидан асосан уй-хўжалик ишларида фойдаланиларди.

Шаҳар португаллар томонидан забт этилгандан сўнг ҳарбий қальяга айлантирилди ва мустамлакачиларнинг Жануби-Шарқий Осиёдаги асосий таянч пункти бўлиб қолди. Шаҳар бошқаруви командант қўлига ўтди ва у 1571 йили Португалия қироли томонидан тайинланадиган губернатор даражасини олди.

Малакканинг атрофида жойлашган майда князликлар ўз мустақилларини сақлаб қолди ва португалларга душманлик кай-фиятида бўлган баъзилари муваффакиятсиз бўлсада, уларга қарши уруш олиб боришга ҳам харакат қилишди.

Малакка забт этилгандан сўнг унинг сultonни жанубга қочди ва у ерда янги Жохор сultonлигини ташкил қилди. Ярим оролда-ги давлатларнинг кўпчилиги унга тобеликни тан олдилар. Жохор сultonлиги Малаккани, у билан бирга йўқотилган савдо йўлларини қайтариш мақсадида португалларга қарши узоқ вакт уруш олиб борди.

Малакка забт этилгандан сўнг ярим оролнинг шимолида жой-лашган Аче сultonлиги кучаяди ва Малакка бўғозида хукмронлик учун португаллар ҳамда Жохор сultonлиги билан рақобатлаша бошлайди. XVI аср охирларида Малакка худудига интилаётган

инглизлар ва голландлар бу ерда португаллар ва испанлар билан рақобатлаша бошлади. 1606 йил голландлар Жохор билан иттифоқ тузиб, Малаккани қамал қилишди ва бу ердаги Португалия флотини мағлубиятга учратди.

1637 йили Голландия билан Жохор ўртасида янги иттифоқ тузиб, унинг натижасида Малакка забт этилди. Энди у голландларнинг қайтадан мустаҳкамланган, доимий ҳарбий горнizonга эга бўлган қалъасига айлантирилди. Голландларнинг Малакка губернатори лавозими жорий қилинди.

XVIII аср бошларидан қайтадан кучайган Жохор сultonлиги голландларга қарши ҳарбий ҳаракатларни давом эттириди. Улар ўртасидаги сўнгги тўқнашув 1783 йили бўлиб, бундаги мағлубиятдан сўнг Жохор сultonлиги Голландиянинг Ост-Индия компаниясига тобеликни тан олди.

Ўрта асрларда ҳозирги Сингапур худудида малайларнинг Тумасик қишлоғи жойлашган бўлиб, у 1299 йилдан Сингапур («Шер шахри») деб атала бошлади. XIII асрдан Хитой ва Сиамга қарам эди. XIV аср 30-йилларида Сингапурга Мажапахит князлиги бостириб кирди ва шаҳарни вайрон қилди. Шундан то XIX аср бошларигача бу ерда доимий аҳоли пунктлари бўлмаган, жой эса 1823 йилгача расмангина Жохор сultonлигига қараган.

Бруней Калимантан оролининг шимолига кўчиб келган ва ўзларининг тарихий ватанларидан ўзига хос цивилизация олиб келган малайларнинг бу ерда ташкил қилган дастлабки князлиги эди. XV асрдан ислом ҳукмрон динга айланди ва ўшанда ҳокимият тепасида ҳозирги кунимизгача турган Бруней сultonларининг сулоласига асос солинди. Бруней ҳукмдори Малакка сultonининг вассали хисобланган.

XVI аср биринчи ярмидаёқ Бруней ривожланган худуд эди. Унда 100 мингга яқин аҳоли яшарди, сulton ҳокимиятини бутун Шимолий Калимантан ва Филиппин архипелагининг жануби тан оларди. Бруней португалияликлар билан савдо алоқалари олиб бораради.

Жануби-Шарқий Осиё мамлакатларининг европаликлар томонидан мустамлакага айлантирилиши Брунейнинг миңтақадаги йирик савдо маркази сифатидаги аҳамиятини пасайтириди ва даромадларининг кескин камайишига олиб келди. Бруней сultonлари қандайдир даражада йўқотилган даромадларни қоплаш мақсадида Калимантан

қирғоқлари яқинида фаолият олиб бораётган денгиз қароқчилариға ҳомийлик қила бошладилар.

Кейинги даврларда Бруней таркоқликни бошдан кечирди. Ҳар бир ҳудуднинг хукмдори бирон-бир қароқчилик флотига таянган ҳолда ўзи мустақил сиёсат олиб борди. Мамлакат ахолиси камайиб кетди.

XXV бўйича саволлар

1. Жануби-Шарқий Осиё мамлакатлари тарихшунослигидаги асосий муаммолар нималардан иборат?
2. XVII асрда европаликларнинг Вьетнамга кириш учун қилган ҳаралгатлари нима сабабга кўра муваффақият қозонмади?
3. XVIII асрда Вьетнам иқтисодий ва сиёсий ривожланишининг қайси жиҳатларини асосий деб кўрсатиш мумкин?
4. Янги даврда Камбоджанинг сиёсий ривожланишида Вьетнам ва Сиамнинг унга таъсири қандай роль ўйнади?
5. XVI–XVIII асрларда давом этган бирма-сиам урушлари монларнинг тақдирида қандай аҳамиятга эга бўлди?
6. Индонезияга европаликларнинг кириб келиши оролларнинг кейинги тараққиётига қандай таъсир кўрсатди?
7. Филиппинда олиб борилган «Моро урушлари»нинг асл моҳияти нимада эди?
8. Янги даврда Жануби-Шарқий Осиё мамлакатларига европаликларнинг кириб келиши натижасида Малайзия, Сингапур ва Бруней тараққиётида қандай ўзгаришлар юз берди?

XXVI БОБ. УСМОНИЙЛАР ИМПЕРИЯСИ

Ислом динининг тарихий тараққиётга таъсири. Ҳар қандай тарихий ҳодисага бўлгани сингари ислом динига ҳам ижтимоий ҳаётдаги ва маданиятдаги ҳодиса сифатида қараш керак. Пайдо бўлиш жараёнида ва ривожланишининг дастлабки йилларида исломнинг тарихий тараққиётга таъсири прогрессив бўлган. Биринчидан, у араб қабилаларининг илгариги мажусийлик динларини ягона монотеистик дин билан алмаштириди ва бу билан арабларнинг халқ бўлиб шаклланиши учун имконият яратди. Иккинчидан, арабларнинг, араб тили ва маданиятининг Арабистон ярим ороли чегараларидан чиқиб, кенг тарқалиши ҳамда ўрта асрларнинг йирик

давлати – Араб халифалигининг ташкил топиши учун жуда катта рағбатлантирувчи куч бўлди. Маданият ривожи нуқтаи назаридан ислом бир этник ва диний маконга – араб-ислом жамиятига турили мамлакатлар – Шимолий Африка ва Шарқий Ўрта Ер денгизи бўйидаги Византия провинциялари, Эрон, Ўрта Осиё давлатлари, Хиндистон, ҳатто Фарбий Европа давлатларида (масалан, Испания) ўша пайтда маълум бўлган барча маданий ва илмий ютуқларни мужассамлаштириди.

Дин ва сиёсатнинг яхлитлик принципи азалдан исломнинг ҳокимият тўғрисидаги концепциясига хос бўлган. Шу жиҳатдан ислом бошқа динлардан кескин фарқ қиласди. Масалан, христиан мамлакатларида давлат ҳокимияти ҳеч қачон черков ташкилотлари билан кўшилиб кетмаган. Рим империясида дастлаб янги динга қарши ҳатто қаттиқ кураш олиб борилди ва фақат IV асрдаги на христианлик расмий динга айланди. Аммо шунда ҳам давлат ва черков ўзларининг алоҳида ҳокимият тизимларига эга бўлган ҳамда улар тепасида император ва бош руҳоний турган. Кейинчалик ҳам масалан, Европада бу икки тизим фақат алоҳида-алоҳида мавжуд бўймасдан, баъзи ҳолларда бир-бирига мухолифатда ҳам бўлишган: Францияда кардиналлар ва кироллар, Россияда подшолар ва патриархлар. Умумий «христианча» қоидадан кичгинагина теократик католик давлати Ватикан истисно холос, бу ерда Рим папаси ҳам диний, ҳам дунёвий ҳокимиятнинг бошлиғи ҳисобланади.

Араб халифалигига, Усмонийлар империясида, бошқа мусулмон давлатларида бутунлай бошқача ҳолат эди. Ислом бу ерда фақат дин эмасди, у мусулмонларнинг ҳаётига тўлиқ кириб борган, инсон фаолиятининг мағкуравий, ҳуқукий-сиёсий, маъмурий, қидиружазо, ҳарбий, суд ва майший соҳаларини тўлиқ қамраб олган эди. Мусулмонларда фақат диний ташкилот ва одатларгина бир хил эмасди. Қонунчилик, суд ва жазо тизими, армия, мактаб буларнинг ҳаммаси ислом принциплари асосида фаолият юритарди. Чунки ислом бошқа динлардан фарқли ўлароқ, пайдо бўлган пайтдан бошлаб сиёсий ҳокимият учун кураш олиб борди. Бошқа динларда бўлгани сингари дин давлат динига айланмасдан (масалан, христианлик давлат динига айланиши учун пайдо бўлгандан кейин 400 йилга якин вақт керак бўлди), исломда халифалик кўринишидаги давлат тўлиқ диний тамойиллар асосида шакллантирилди. Шунинг учун ислом

дини жамият ва шахс ҳаётининг ҳамма жабҳаларини қамраб олган тоталитар¹ динга айланди.

Янги даврга келиб ислом оламида фан ўз имтиёзларини йўқотишдан қўрқадиган мусулмон руҳонийлари томонидан сиқиб қўйилган эди. Дунёвий таълим мавжуд эмасди. Мусулмон мактаблари XVIII асрда схоластика² ва обскурантизм³нинг ўчоғига айланган эди. Аҳолининг кўпчилиги кенг маънодаги дунёвий билим ва саводга эга эмасди.

1500 йили Европанинг 12 та мамлакатида йирик типографиялар мавжуд бўлиб, уларда 40 минг номдаги китоблар чоп қилинган бўлса, мусулмон халқларида, масалан, Усмонийлар империясида XVIII асрдагача буржуача тараққиётнинг ва индустрисал цивилизация шаклланишининг зарур воситаларидан бири бўлган китоб чоп этиш ҳали йўқ эди. (Ўзбекистонда биринчи литография (тош босма) 1874 йили Хивада Отажон Абдалов томонидан очилган). Аслида фаолият юритаётган типографиялар шундайгина империя бўсағасида туради. Масалан, Венгрияда биринчи типография 1473 йили, турклар босқинидан олдин, Черногорияда – 1493 йили очилган эди. Бундан ҳам ажабланарлиси шуки, империя худудининг ўзида ҳам биринчи типография 1494 йили яхудий-эспанъолларда пайдо бўлди. Улар инквизиция хавфидан қочиб Испаниядан бу ерга келишган эди. Истамбулдаги арманларда типография 1562 йили, грекларда эса 1627 йили пайдо бўлди. Фақат 1729 йили биринчи мусулмон китоб – арабча-туркча лугат чоп этилди. Иоганн Гутенберг (1399–1468) 1445 йили кашф этган китоб чоп қилишни мусулмонлар қарийб 300 йилдан кейин ўзлаштиришди!

Фақат XIX аср охири – XX аср бошларига келиб соғлом фикрловчи мусулмон уламолари исломнинг баъзи тақиқлари ижтимоий тараққиётга тўсиқ бўлаётганлигини тушуниб етдилар. Мисрда мамлакатнинг бош муфтийси Мұхаммад Абдо XIX аср охиридагина исломни янги, буржуача ҳаёт талабларига мослаштиришга харакат қилди. У 1899 йили ўз фатвосида фоизли кредитнинг мумкинлигини асослади ва банкларга пул қўйиш ва капиталдан фойда олиш-

¹ Тоталитар (латинча *totalitas* – яхлит, тўлиқ) – жамиятнинг ҳамма жабҳаларини тўлиқ қамраб олган хукмронғоя, мафкура ёки сиёсий тузумга нисбатан кўлланилади.

² Схоластика (грекча *scholasticos* – мактабга мансуб) – ўрта аср «мактаб фалсафаси». Уларнинг фаолиятида универсалийлар ҳакида баҳс асосий ўрин тутади.

³ Обскурантизм (латинча *obscurantis* – ёргулликни тўсувчи, қоронгу қулувчи) – маърифат ва фанга ўта душманлик муносабати, жаҳолат. Обскурант – маърифатга душман киши.

га рухсат берди. (Ўзбекистонда биринчи банк ташкилоти – Россия империяси давлат банкининг филиали – 1875 йил 10 майда Тошкентда очилган). Кўплаб тарихчиларнинг айтишларича, бу исломда ислоҳотларнинг бошланиши бўлиб, у асосан шариат соҳасидаги айрим жузъий ўзгартеришлар билан якунланди. Усмонийлар империясида шариат ислоҳотлари 1908–1909 йиллардаги «Ёш турклар» инқилобидан сўнг, Эронда эса 1905–1911 йиллардаги инқилобдан сўнг бошланди. (Ўзбекистонда 1917 йили ҳокимиятга большевиклар келгандан сўнг ислом динига қарши кураш партия ички сиёсатининг асосига айланди). XVI асрда христианликда бўлган Реформация сингари тўлиқ ислоҳот исломда амалга оширилмади. XX аср бошларида шариат қоидалари юридик амалиётдан тўлиқ олиб ташланган ягона ислом давлати Туркия эди. (Ўзбекистонда Россия босқинидан сўнг шариат қоидалари аста секинлик билан, босқичма-босқич юридик амалиётдан чиқарилиб борилди). Бу ерда 1918–1924 йиллардаги инқилобдан сўнг дин фақат давлат ишларидан узоклаштирилиб қолмасдан, гарбий европача хукуқ жорий қилинди. Турклар бу борада ўта оддий иш тутишди: Швейцариянинг фукаролик кодекси ва Италиянинг жиноят кодекси турк тилига таржима қилинди, ҳамда кичик ўзгаришлар билан ҳозирги замон турк қонунчилигининг асоси этиб қабул қилинди.

Ислом таълимоти яна бир сабабга кўра ижтимоий тараққиётга тўсиқ бўлаётган эди – у фатализм¹ руҳи билан суғорилган. Мусулмонлар қисмат, тақдир, таваккул каби тушунчаларга бошқа динлар вакилларига нисбатан кўпроқ ишонадилар. Ислом таълимотига кўра ҳар бир кишининг тақдирни Оллоҳ томонидан олдиндан белгилаб қўйилган, туғилгандан «пешонага ёзиб қўйилган» ва ундан қочиб қутилиб бўлмайди. Инсоннинг ҳаёт йўли, ўлим вақти, жойи ва сабаби белгилаб қўйилган. Тақдирни ўзгартеришга қанчалик уринмагин бари бир «пешонага ёзилгани бўлади». Шу сабали мусулмонлар ҳар бир гапга «иншоллоҳ» – «ҳаммаси Оллоҳнинг ихтиёрида», деб қўшиб қўйишади. Ахир «ислом» сўзининг ўзи ҳам «бўйсунмоқ» деган маънени англатади – худога, тақдирга бўйсунмоқ, Оллоҳ белгилаб берган йўлга бўйсуниб эргашмоқ. Оллоҳнинг ҳукмига тўлиқ ҳавола қилинган шахснинг итоаткорлиги ва тақдирга бўйсуниши –

¹ Фатализм (латинча *fatalis* – қисмат) – антидиалектик дунёкарош концепцияси бўлиб, унга кўра оламдаги ҳамма жараёнлар зарурият тақозосига бўйсунади, эркин танлаш ва ижодга ўрин қолдирмайди, ҳаммаси олдиндан белгилаб қўйилган.

булар фақат диний фатализм ва фидоийликнинг эмас, ўз даврида Гегель ёзганидек, ижтимоий тузумнинг принципига айланган «оммавий қулликнинг», бугунги кунда эса диний экстремизм ва терроризмнинг ҳам манбаидир.

Ислом ақидапарастлиги, унинг баҳслар ва шубҳалар учун ёпиқлиги ислом мамлакатларидағи ижтимоий ва сиёсий ҳаётга, бу ердаги халқларнинг менталитетига ўз таъсирини кўрсатди. Дунёнинг илғор қисмидағи интеллектуал интеграциялашув, шунингдек, янги иқтисодий, ижтимоий ва сиёсий жараёнлар, кишиларнинг янги, муносиб ҳаёт қуриш учун қилаётган инқолобий интилишлари ислом дунёсини четлаб ўтди. Ягона ақиданинг сўзсиз ҳукмронлиги остида, «оммавий қулликда» яшашга кўнинкан жамият кейинчалик мустамлакачиларнинг босқинини ва ҳатто маҳаллий аҳолини камситишга қаратилган мафкурасини ҳам, кейин эса партия ёки битта шахснинг чекланмаган ҳокимиятини ҳам катта қаршиликларсиз қабул қилди.

Янги даврда мусулмонлар орасида буржуача тадбиркорликнинг ривожланишига ҳам ташқи иқтисодий муносабатларнинг исломий концепцияси тўсиқ бўлди. XVI–XIX асрларда ислом давлатларида Фарбий Европа мамлакатларидағи иқтисодий сиёсатга бутунлай қарама-қарши сиёсат олиб борилди. Фарбий Европа давлатларида илк капиталистик муносабатлар ривожланиши даврида (1500–1750) давлат меркантилизм¹ сиёсатини олиб борди ва бу янги ишлаб чиқариш усуллари қарор топишида катта роль ўйнади. Бу сиёсатнинг асосини қуйидагилар ташкил қиласди: ташқи алоқаларда фаол савдо балансига эга бўлишга интилиш, яъни кўпроқ четта сотиш ва камроқ сотиб олиш; протекционизм², яъни импорт товарларига юкори бож тўловларини жорий қилиш орқали ўз саноатини химоя қилиш ҳамда маҳаллий ишлаб чиқарувчиларни ҳар томонлама кўллаб-қувватлаш; ва ниҳоят ўз савдогарларининг савдо экспансия-

¹ Меркантилистлар бойликнинг асосий манбаи ишлаб чиқариш эмас, айланма капиталнинг кўплиги деб хисоблаганлар ва бойликни пул капиталининг кўплигига деб билганлар. Шу сабабли четта товар чиқариб, мамлакатда пулни (олтин ва кумуш) кўпайтириш фаровонликка хизмат қиласди деган принципга асосланганлар.

² Протекционизм (французча *protectionnisme* латинча *protectio – панада сақлаши, ҳимоя қилиш*) – давлатнинг иқтисодий сиёсати бўлиб, мамлакатга киритиладиган чет эл товарларига юкори бож солиги ўрнатиш, айрим товарларни киритишни чеклаш ёки тўлиқ тақиқлаш йўли билан миллий ишлаб чиқаришни чет эл ракобатидан ҳимоя қилишга қаратилган.

сини, яъни улар томонидан янги бозорларнинг эгаллаб олинишини қўллаб-қувватлаш.

Ислом мамлакатларида шу даврда бутунлай бошқача бўлди. Масалан, Усмонийлар империясини оладиган бўлсақ, у бу борада шундай сиёсат олиб бордики, буни антимеркантилизм деб аташимиз мумкин. Замонавий терминлар билан атаганда, бу «очик эшиклар» сиёсати, эркин бозор сиёсати эди.

Исломнинг «савдо муқаддаслиги» тўғрисидаги концепциясидан келиб чиқиб, мусулмон уламолари мамлакат ободлиги ички бозорда истеъмол молларининг кўплиги билан белгиланади, деб хисобларди. Шу муносабат билан импорт рағбатлантирилиб, экспорт чекланарди. Ҳокимият мамлакатга ҳар қандай чет эл товарларининг киритилишига ҳеч қандай қаршилик қиласди. Бундан ҳам ажабланарлиси, чет эл савдогарларига, айниқса импорт билан шуғулланувчиларига турли хил имтиёзлар берилган эди. Ушбу сиёсат оқибатида табиийки маҳаллий саноат, мануфактура ишлаб чиқариши ва ҳунармандчилик оғир ахволга тушиб қолган, чет эл ишлаб чиқарувчилари билан рақобатда давлатнинг протекционистик ҳимоясидан маҳрум қилинган эди. Рақобат эса, айниқса европаликлар билан кучли эди. Уларнинг фабрика ва заводларда ишлаб чиқарилган маҳсулотлари мануфактуралар ва ҳунармандларнинг товарларига нисбатан сифатли ва арzon эди. Чет эл савдосига бундай муносабат чет эл савдогарлари учун жуда катта имтиёзлар тизими-нинг шаклланишига, чет эл ишлаб чиқарувчилари билан рақобатда эса таслимчилик кайфиятига олиб келди.

Шундай қилиб, ислом мусулмонлар ҳаёти ва фаолиятининг барча соҳаларига кириб борган, мусулмон жамиятининг барча институтларини қамраб олган эди. Янги даврда Фарбий Европа мамлакатларида шаклланган янгича дунёкараш, демократик ғоялар, инсоннинг тадбиркорлиги ва ташаббускорлигига очилган кенг имкониятларнинг ислом мамлакатларида қарор топиши узоқ ва оғир жараён бўлди. Баъзи мамлакатларда бу жараён ҳамон давом этмоқда.

XVI–XVII асрларда Усмонийлар империяси

Империянинг босқинчилик сиёсати. XVI аср биринчи ярмида усмоний ҳукмдорлар Европа, Осиё ва Африкада янги ҳудудларни босиб олиб, ўз ерларини анча кенгайтирдилар.

XVI аср бошида Туркияning¹ Шарқий чегарасида Сафавийлар ҳокимиияти (1502–1736 йилларда Эронда туркий қавмдан бўлган Сафавийлар сулоласи бошқарган давлат. Улар шиаларнинг 12 ўрам салласини ўраб юрганлиги учун қизилбошлар деб ҳам аташган) кучайди. 1510 йилга келиб Исмоилшоҳ I (1502–1524) илгари Оқкуюнли давлати таркибиға кирган деярли барча ерларни қўлга киритди. Ислом динининг шиалик оқимини давлат динига айлантирган Сафавийлар давлатининг кучайиши, нафақат Усмонийларнинг Шарқдаги экспансиясини чеклаб қўйди, балки унинг ички хотиржамлигига ҳам путур етказди.

1514 йили Ману шахри яқинидаги Чалдирон текислигига бўлиб ўтган жангда Усмонийлар кўшини қизилбошлиларга қаттиқ зарба берди. Усмонийлар Сафавийларнинг пойтахти Табризни эгаллади, лекин Эронда мустаҳкамланиб ололмасдан Онадўлига чекинишиди. Табризни ташлаб чиқаётib усмонийлар 700 дан зиёд ҳунармандлар оиласини ўзлари билан олиб кетишиди ва Истамбулга жойлаштириди. 1515 йили имзоланган сулҳга кўра Арманистоннинг бир қанча туманлари Эрзурум шахри ва Ирокнинг шимолий қисми Мосул шахри билан бирга Туркияга тасарруфи ўтди.

Эрон уруши тугагандан сўнг усмонийлар араб ерларига юриш бошлади. Бу пайтда Сурия ва Миср мамлуклар қўл остида бирлаштирилган бўлиб, бу давлатга Исмоилшоҳнинг иттифоқчиси Султон Кансух ал-Гури бошлилик қиларди. 1516 йил ёзида Усмонийлар армияси Султон Салим I (1512–1520) қўмондонлигига Шимолий Сурияга бостириб кирди. Халаб яқинидаги биринчи жангдаёқ (1516 йил 24 август) турклар тўлиқ ғалабани қўлга киритдилар. Жангда турк артиллерияси қўшиннинг устунлигини таъминлади. Мамлуклар султони Кансух ал-Гури халок бўлди.

Мисрда эса мамлуклар анча қаттиқ, аммо муваффақиятсиз қаршилик кўрсатдилар. 1517 йил бошларида Салим I армияси Қохирага кирди. Мамлуклар қўшинлари Юқори Мисрга чекинишиди. Лекин тез орада улар ҳам тор-мор қилинди. Уларнинг йўлбошчиси Туманбей Қохирада осиб ўлдирилди. Шундан сўнг мусулмонларнинг муқаддас юрти ҳисобланган Хижоз (Фарбий Арабистон) босиб олинди. Тез орада Салим I Каъбанинг калитини ҳам қўлга киритди.

¹ Дастрлаб «Туркия» атамаси 1190 йили салибчилар хроникасининг муаллифи томонидан турк қабилалари Кичик Осиёда забт этган ерларга нисбатан қўлланилган. Кейинчалик Фарбда Усмонийлар империясини Туркия, хукмрон халкни эса турклар деб аташган.

Сурия ва Миср устидан Туркия хукмронлиги ўрнатилганидан кейин ҳам бу мамлакатлардаги феодал тартиб ва феодал муносабатларда ҳеч қандай ўзгаришлар бўлмади. Уруш пайтида мамлукларни қувватлаган Сурия ва Ливан феодаллари ер-мулкларининг бир қисмидан ажралдилар, аммо Салим I томонига ўтган феодаллар эса, аксинча мамлуклардан тортиб олинган ерлар хисобига ер-мулкларини кенгайтириб олдилар. Факат Халаб округидагина турклар ҳарбий тизим жорий қилиб, ерларни турк сипохларига тақсимлаб бердилар. Халаб вилояти Сурия халқининг қўзғолонларини бостириш учун ҳарбий истехкомга айлантирилди.

Сулаймон I (1520–1566) даврида Усмонийлар империяси ўз ҳарбий ютуқларининг энг чўққисига кўтарилди. Миср эгаллаб олинганидан сўнг Усмоний сultonларнинг ҳокимияти бутун Шимолий Африка кирғоқларидан то Мароккогача бўлган ҳудудларда ўрнатилди.

1522 йили турк флоти Родосни эгаллади, бу эса усмонийларга Шарқий Ўрта Ер денгизида устунликка эришиш имконини берди. Орадан 30 йил ўтгач, турклар ҳатто Мальтани эгаллашга ҳаракат қилиб кўришди, бироқ бу экспедиция муваффакиятсизликка учради.

Европада эса Сулаймон I Габсбурглар империяси билан қаттиқ кураш олиб борди. Белграднинг босиб олиниши ва Мохич яқинида венгер-чех қўшинининг тор-мор келтирилиши (1526) туркларга Венецияни босиб олиш учун йўл очиб берди. 1520 йили усмонийлар Венани эгаллашга ҳаракат қилиб кўрди. Бироқ ҳаракат муваффакиятсиз якунланди. 1547 йилги шартномага кўра, Венгрия ҳудудлари Туркия ва Австрия ўртасида бўлиб олинди. Трансильвания Туркияning вассалига айланди, олдинроқ босиб олинган Молдавия ва Валахияning ички автономияси сезиларли даражада қисқартирилди.

Жанубда эса усмонийларнинг қўшинлари Қизил денгизнинг бутун қирғоқбўйи ерларини ва Жанубий Арабистонни босиб олди. 1537 йил турклар йирик флот тузиб, Қизил денгиз орқали савдоға катта зиён етказаётган португалларни Ҳинд океанидан қувишга ҳаракат қилишди, бироқ бу экспедиция муваффакият келтирмади.

Шарқда эса, турклар қатор жанглардан сўнг, 1555 йили Эрон шохи Таҳмаспни тинчлик шартномасини имзолашга мажбур қилди. Унга кўра, бутун Ғарбий Арманистон (Ван кўли ҳавзаси), Ғарбий Грузия ва Ироқ (Бағдод билан биргага) Туркияга ўтди.

Сулаймон Қонунчи (европаликлар уни Сулаймон Ажойиб деб аташади) ўзининг 46 йиллик хукмронлиги даврида 13 маротаба ҳарбий юришларда иштирок этди, шулардан 10 таси Европада олиб борилди. Венанинг қамал қилиниши, Ҳиндистон кирғоқларига экспедиция, Малътани босиб олишга уриниш – булар ҳаммаси усмонийларнинг босқинчилик режалари катта бўлганлигидан далолат беради. XVI аср биринчи ярмида турк армияси уюштирган йирик босқинчилик юришлари, унинг катта ҳарбий кучга эга бўлганлигини тасдиқлади. Маълумотларга кўра, Усмонийлар империясининг аҳолиси 25–30 млн кишини ташкил этган. Бу пайтга келиб турк сultonлари шарқдан ғарбгача 7 минг км, шимолдан жанубгача 5 минг км ва ҳаммаси бўлиб, тахминан 8 млн км² ерни эгаллаб туришар эди. (Турк манбаларида Қонунчи Султон Сулаймон I вафот этган 1566 йили Усмонийлар империясининг худуди 14 млн 893 минг км² ни ташкил этарди. Шундан 2 млн км² га яқини Европада, 4,5 млн км² га яқини Осиёда ва қолган қисми Африкада жойлашган).

Империянинг иқтисодий аҳволи. Усмонийлар империясидаги аҳолининг кўпчилиги қишлоқларда яшар, қишлоқ хўжалиги билан банд бўлиб, дехқонларнинг кўпчилиги давлатга ёки катта ер эгасига қарам эди. Дастрраб аҳолининг таркиби ҳар хил эди. Бироқ XVI аср давомида улар бир хил, хукуқсиз, шафқатсиз эксплуатация қилинадиган оломонга айланишиди.

XVI асрга тегишли солиқ рўйхатлари ва қонунчилик далолатномалари аҳолининг асосий қисми банд бўлган қишлоқ хўжалиги қандай ахволда бўлганлигини тасаввур қилишга ёрдам беради. Дехқон хўжаликлари асосан, дон экинлари – буғдой, арпа, тарик етиширишарди, кўпчилиги эса сабзавотчилик билан банд эди. Камроқ миқдорда пахта етишириларди. Жуда кўплаб туманларда узумчилик, боғдорчилик ва асаларичилик яхши ривожланган бўлсада, бироқ умумий олганда, қишлоқ хўжалик ишлаб чиқариши жуда қолоқ эди.

Хўжалик тараққиётидаги жонланиш асосан шаҳарларда сезиларли эди. Масалан, шу даврда Усмонийлар империясидаги 14 та йирик шаҳарнинг аҳолиси (Истамбулдан ташқари) ўртacha 41% га ўси. Шаҳарлар аҳолиси тез кўпайиб боришининг асосий сабабларидан бири, хунармандчилик маҳсулотларига бўлган талабнинг ошиб бориши эди. Йирик ер-мулк ва бойликларни қўлларида тўплаб олган турк феодаллари кенг қурилишлар олиб бориши, қимматбаҳо буюм-

лар сотиб олиш, кўплаб ҳунармандлар ва рассомлар меҳнатига ҳақ тўлай олиш каби катта имкониятларга эга эди. Шунинг учун ҳам шаҳарларда зодагонлар ва йирик феодалларнинг эҳтиёжлари учун маҳсулотлар ишлаб чиқарувчи ҳунармандларнинг сони тез ўсиб борди.

Ишлаб чиқаришда асосан тўқимачилик – жун ва ипак матолар тўқиши, терига, металлга ишлов бериш, ҳар хил турдаги қурол-яроғлар ишлаб чиқариш айниқса ўсади.

Бу пайтда ҳунармандчиликда майда ишлаб чиқариш ҳукмрон бўлиб, ёлланма ишчи кучидан фойдаланилмас эди. Ҳунармандчилик бутунлай кўл меҳнатига асосланган эди. Тор доирада ишлаб чиқариш ҳунармандларни ўз ишининг уста мутахассиси бўлиб етишувига имкон яратди. Империянинг ўзида ва Европада Бурсада ишлаб чиқарилган барқут, Ушак ва Конъеда тўқилган гиламлар, Анқарадан келтириладиган, эчки жунидан тўқилган матолар айниқса машхур эди. Болгариининг Сомоново шаҳрида кўплаб темир буюмлар, Ди-ёрбакир, Эрзурум, Кастомон шаҳарларида мисдан буюмлар ясаш, Изник шаҳрида эса кўпроқ кулолчилик яхши ривожланган эди.

Шаҳарларнинг ўсиб бориши ва ҳунармандчиликнинг кенгайиши билан савдо-сотиқ ҳам ривожланиб борди. Дехқонларнинг ҳарид қуввати чекланган бўлишига қарамасдан, улар шаҳардан айrim ҳунармандчилик маҳсулотларини, жумладан, туз, матолар, айrim меҳнат қуроллари ва кундалик хўжалик молларини сотиб олишга мажбур эдилар. Албатта, қишлоқдан шаҳарга дехқончилик ва чорвачилик маҳсулотлари ҳам келтирилар эди. Савдо операцияларининг асосий кисми бозорларда маълум белгиланган кунларда, кўпроқ жума кунлари бўлиб ўтар эди. Усмонийлар империясининг айrim худудларида, хусусан, Болконда ярмарка савдоси ҳам кенгайиб борди. Бироқ ярмаркалардаги савдонинг умумий ҳажми унчалик катта эмасди. Кўплаб савдогарлар ташки савдо билан ҳам шуғулланишар эди. Европа мамлакатларидан, Эрон ва Ҳиндистондан матолар, металл, безак буюмлари ва турли тақинchoқлар келтириларди.

Хукумат эса хазинага яхшигина даромад келтирадиган ички ривожланишдан кўпроқ манфаатдор эди. Султон ҳукумати йўллар ва кўприкларни тиклаш ва қўриқлаш бўйича бир қанча чора-тадбирлар кўрди. Асосий карvon йўлларида кўплаб карvonсаройлар қурилди. Бироқ оғир феодал муносабатлар шароитида савдо-сотиқ эркин ривожлана олмасди. Кўп сонли ички божлар, транспорт воситалари-

нинг ривожланмаганлиги, денгиз алоқаларининг оғирлиги – булар-нинг ҳаммаси савдонинг ривожланишига тўсқинлик қиласа эди.

Давлат тузуми. Армия. XV аср иккинчи ярмида Усмонийлар давлати империяга айланди (шунгача Усмонийлар сultonлиги деб аталган бўлса, энди Усмонийлар императорлиги деб юритила бошланди), унинг ҳукмдорлари эса ҳарбий кучга таянган ҳолда чекланмаган ҳокимиятга эга бўлдилар.

Марказий ҳокимиятнинг ва сultonнинг таъсири сезиларли даражада ўсади. Ислом қонуншунослари томонидан «Худонинг ерадиги сояси» деб эълон қилинган сulton чекланмаган ҳуқуқларга эга бўлди. Унинг шахси муқаддас ва даҳлсиз хисобланарди.

Империяда сultonдан кейинги асосий шахс буюк вазир бўлиб, у сиёсий-маъмурий ва ҳарбий масалалар билан шуғулланарди, бошка ҳамма вазирлар, давлат арбоблари, вилоят ҳокимлари эса унга бўйсунарди. Асосий масалалар давлат кенгаши – девонда муҳокама қилинарди. Дастребки сultonлар девоннинг ҳамма йиғилишларида иштирок этишар, лекин XV аср охиридан бошлаб камроқ қатнашадиган, кейинроқ эса умуман қатнашмайдиган бўлишиди. Девоннинг асосий таркиби буюк вазир, асосий давлат арбоблари, молия бошқармаси бошлифи, вазирлар, қонун ишлаб чиқарувчилар ва ташки алоқалар бўйича масъул кишилар, шунингдек, давлатнинг олий руҳонийси – пойтахт муфтийси ёки Шайх-ул-исломдан иборат бўлган.

XVI аср ўрталарида Усмонийлар империяси 21 та вилоятга бўлинган эди. Уларнинг ҳар бирига вилоятдаги ҳарбий ва маъмурий ҳокимиятни тўлиқ қўлида тутиб турувчи бекларбеги бошчилик қиласарди. Ҳар бир бекларбеги ўз саройи, девонхона ва девонига эга эди. Вилоятлар санжакларга бўлинган бўлиб, уларга санжакбейлар бошчилик қиласарди. Сулаймон I ҳукмронлиги даврида 250 та санжак бор эди.

Усмоний ҳукмдорлар бутун диққат-эътиборларини жанговар армия тузишга ва босиб олинган ҳудудларда ҳарбий тартиб-қоидани жорий қилишга қаратдилар. Усмонийларнинг ҳарбий кучлари куруқлиқдаги қўшинлар ва флотдан иборат эди. Турк флоти XV аср охиридан бошлаб, яъни, сulton ҳукумати империянинг порт шаҳарларида денгиз ва дарё кемаларини доимий кура бошлагандан кейингина жуда тез ўса бошлади. XVI асрнинг биринчи ярмида турк флоти испан, португал ва Венеция эскадралари устидан

ғалаба қозониб, Ўрта Ер денгизида ҳукмронга айланди. Бир қатор холларда, масалан, Малътани қамал қилишда 300 тагача ҳарбий кемалар иштирок этган.

Усмонийлар империясининг қуруқликдаги армияси ҳам жуда кучли эди. Бу армия «Сарой қуллари» деб аталувчи марказий қўшин ва вилоятлардаги кўнгиллилар қисмларидан иборат эди. Марказий қўшинда бутунлай давлат томонидан таъминланадиган яничарлар корпусига алоҳида эътибор қаратилар эди. Бундан ташқари, қўшинда артиллерия қисмлари ҳам алоҳида аҳамиятга эга бўлиб, турк султонлари унинг ҳолати яхши бўлиши учун кўпроқ қайгуар эдилар. Сулаймон армиясида 300 дан ортиқ турли хажмдаги тўплар бор эди. Яничарларнинг пиёдалар корпусидан ташқари султоннинг отлиқ гвардияси ҳам мавжуд бўлиб, у юришлар пайтида султон ва буюк вазирни қўриклар, жангларда яничарларга ёрдам берар эди.

Турк султонларининг марказий ҳокимиятни мустахкамлаш учун қилган харакати қўшин сонининг ошиб боришида ҳам ўз аксини топди. XV аср ўргаларида яничарлар корпуси ҳаммаси бўлиб 3–5 минг кишидан иборат бўлган бўлса, Сулаймон даврига келиб 12 минг кишини ташкил этди. Умуман мунтазам армияда шу даврда 50 минг киши хизмат қиласди.

Усмонийлар армиясининг асосий қисмини вилоятлардаги кўнгиллилар ташкил қиласди. Айрим маълумотларга кўра, сипоҳийлар армияси XVI аср ўргаларида 130 мингдан 200 минг кишигacha бўлган.

XVII аср биринчи ярмида Усмонийлар давлатининг ички ва ташқи аҳволи. Бу даврга келиб империянинг ички аҳволи анча ёмонлашди. Ҳатто XVII аср 40-йилларида ҳам хазинага келиб тушаётган солиқ йифимларининг миқдори XVI аср 90-йилларидаги миқдорни, яъни, 360 млн ақчани ташкил этарди.

Шаҳарлар ва шаҳар хунармандчилиги тараққиёти ҳам секинлашди. Ҳарбий мулк тизимининг бузилиши ва ерга хусусий мулкчиликнинг шаклланиши маълум даражада қишлоқ хўжалик маҳсулотлари ишлаб чиқаришнинг кўпайишига олиб келган, бироқ бу жараён бошқа оқибатларга – дехқонларнинг хонавайрон бўлиши ва улар харид қувватининг пасайишига ҳам олиб келди.

Усмонийлар империяси иқтисодиётидаги ўзгаришлар унинг бутун ижтимоий-сиёсий ҳаётида силжишларни келтириб чиқарди. Унинг таъсири асосан армияда кучли бўлди. Мунтазам қўшинлар

сонининг ошиши давлат бюджетига оғир таъсир қилди. Армия харжатларининг ошиб кетиши бюджет танқислигига ва ҳазинанинг бўшаб қолишига олиб келди. Натижада, жуда кўп маротаба яничарларнинг қуролли қўзголонлари бўлиб ўтди. Бу ҳолатдан бир-бирига қарама-қарши бўлган феодал гурухлар усталик билан фойдаланди. Фақат 1617–1623 йилларнинг ўзида яничарларнинг исёнлари натижасида тўрт маротаба султонлар алмашди.

XVI аср охириларида империянинг турли вилоятларида айирмачиларнинг чиқишилари кучайди. Марказий ҳокимиятнинг заифлашувидан фойдаланиб йирик феодаллар мустакил ҳукмдорларга айланиб ола бошладилар. Одатда, султон ҳокимияти фақат вилоятлардан келадиган солиқ тушумларидангина манфаатдор бўлганлиги учун, уларнинг ички бошқарувига аралашмас эди.

XVII аср биринчи ярмида Усмонийлар олиб борган урушлар натижаси унинг ҳарбий қуввати заифлашганлигини кўрсатди. Армияга йирик маблағлар ажратилаётган бўлишига қарамасдан, у иқтисодий жиҳатдан Усмонийлардан кўра тезроқ ривожланаётган давлатлардан ҳарбий-техник жиҳатдан тобора ортда қолмокда эди.

1606 йили Ситваторокеда узоқ давом этган австро-туркия урушига якун ясаган тинчлик шартномаси имзоланди. Бу шартномага кўра, Туркия Австрияни нафақат 1547 йилдан бери давом этиб келаётган 30 минг дукатлик йиллик хирождан озод қилди, балки биринчи маротаба уни тенг ҳукуқли христиан давлати сифатида тан олди. Орадан бир неча йил ўтгач, Австрия жаҳон савдосида ҳам бир қанча енгилликларга эга бўлди.

Турк феодаллари Эрон билан узоқ уруш олиб боришиди. XVII аср бошларида Эрон шохи Аббос турклардан Кавказ ортидаги кўпгина ҳудудларни ва Ироқни тортиб олди. Лекин тез орада турк султони Мурод IV ҳарбий ҳаракатларни бошлаб юборди. Тўрт йил давом этган урушдан сўнг 1639 йили Қасри Ширинда улар ўртасида тинчлик шартномаси имзоланди. Унга кўра, Ироқ, Бағдод билан бирга, яна Туркияга ўтди, бундан ташқари, Фарбий Грузия, Фарбий Арманистан ва Курдистоннинг бир қисми ҳам Туркияда қолди.

Туркия бир вақтнинг ўзида Польша шляхтасида қарши ҳам ҳарбий ҳаракатлар олиб борди. Улар ўртасида можаронинг асосий сабаби, украин ерлари масаласи эди. 1620 йили турклар поляк қўшинларини енгил, Украина га киришиди. 1621 йили Ха-

тинъ яқинида бўлиб ўтган жангда Запорожье казаклари кўрсатган қаҳрамонликлар туфайли турклар мағлубиятга учради. Бироқ турклар Польшага босимни сусайтирмадилар, Украина га қарши агрессијани ҳам кенгайтирдилар.

XVII аср биринчи ярмида рус ҳукумати Туркия билан тинч муносабатларни қўллади, чунки уларнинг умумий душмани бўлган Польшага қарши бирлашиш зарурати мавжуд эди. Турклар билан яхши қўшничилик муносабатларини сақлаб қолиш учун ҳаракат айниқса, Азов учун олиб борилган курашларда яққол кўринди. 1637 йили Дон казаклари Туркияning Эрон билан урушда банд эканлигидан фойдаланиб Азовни қуршаб олдилар ва икки ойлик қамалдан сўнг қалъани эгалладилар. 1641 йил ёзида турклар Эрон билан урушни тугатиб, Азовга ҳаракат қилишди. Қамал 4 ой давом этди, лекин 6 мингга якин казак қалъани қаттиқ туриб ҳимоя қилдилар. Анчагина зарар кўрган ва ҳеч қандай муваффақиятга эриша олмаган турклар қамални тўхтатиб, қайтиб кетишига мажбур бўлдилар. Лекин Туркия билан муносабатларнинг кескинлашувини истамаган рус ҳукумати Азовни тозалаш ва уни туркларга қайтариб бериш тўғрисида казакларга буйруқ берди.

XVII аср 50-йиллари бошида рус-турк муносабатлари янги босқичга кўтарилди. Шу даврда 1654 йили Россияга Украина ning қўшилиши билан якун топган украин халқининг Богдан Хмельницкий бошчилигидаги озодлик ҳаракатлари бошланиб кетди. Уларга қарши курашиш мақсадида поляк панлари Туркия ва Крим хони билан тил бириттирдилар. Украинани ўзининг босқинчилик объекти ҳисоблаган Туркия украин халқининг ҳаётига очиқ қуролли аралаша бошлади. Ҳатто айирмачи ўнг қирғоқ украин гетманларини қуроллантириди. Мана шу аралашув Россия ва Туркия ўртасидаги урушни келтириб чиқарди. Ҳарбий жиҳатдан сусайган Усмонийлар империясининг халқаро мавқеи ҳам заифлаша бошлади.

Кўпрулю ислоҳотлари. Янги босқинчилик юришлари учун маблағ топиш мақсадида буюк вазир Маҳмед Кўпрулю (1656–1661) сипохийлар қўшинининг илгариги имкониятларини қайта тиклашга асосий эътиборни қаратди, чунки бу иш ҳукуматнинг ҳарбий ҳаражатларини бир неча баробар қисқартириши мумкин эди. Маҳмед Кўпрулю ва унинг ворислари – Фозил Аҳмет Кўпрулю ва Қора Мустафо Кўпрулю томонидан кўрилган чора-тадбирлар феодал кўнгиллилар сафининг кўпайишига олиб келди. Кўпрулю турк

қўшинларининг жанговар қудратини оширишга, Кичик Осиё ва Суриядаги феодалларни бўйсундиришга ва марказий ҳокимиятни мустаҳкамлашга муваффак бўлди. Бироқ Кўпрулю ислоҳотлари олдинги ҳарбий-феодал тизимни тўла тиклай олмади. Кўпрулю ислоҳотларини характерига кўра, икки учли таёққа ўхшатиш мумкин эди. Бир томондан бу ислоҳотлар бир неча йиллар давомида ҳарбий муваффақиятларни таъминлади, иккинчи томондан эса – сипохийлик тизимининг сўнгги заҳираларини ҳам сафарбар қилиб бўлди. Туркларнинг янги ғалабалари феодал эксплуатациянинг кучайтирилиши, дехқонларнинг оммавий камбағаллашуви ҳисобига амалга ошган эди. Окибатда, Кўпрулю ислоҳотлари сипохийлик тизимининг тўла барбод бўлишига олиб келди. 1683 йили туркларнинг Вена остоналаридаги мағлубияти Усмонийлар империясининг ҳарбий ва сиёсий қудратини қайтариб бўлмаслигини аник-равшан кўрсатиб берди.

Усмонийлар империяси инқирозининг бошланиши

XVII аср охири – XVIII аср бошларига келиб империянинг турғунлик даври (таваккуф даври) тугаб инқироз даври бошланди. Бу даврни турк тарихчилари «Рижот даври» деб аташади. XVIII асрдан бошлаб Усмонийлар империяси бирин-кетин илгари эгаллаб олган худудларини йўқота бошлади. Бунинг сабаби, биринчидан, Европа мамлакатларидаги иқтисодий ривожланиш натижасида ҳарбий ва сиёсий салоҳиятнинг ўсиши бўлса, иккинчидан, Усмонийлар давлатида юз бераётган чукур иқтисодий инқироз эди. Давлатнинг иқтисодий инқирози унинг сиёсий ва ҳарбий тушқунлигини ҳам тезлаштириди. Иқтисодий қийинчилеклар туфайли турк армиясининг ҳарбий қудрати асосини ташкил этувчи сипохийлар (отлик қўшин) сони 200 минг кишидан 20 мингтагача камайиб кетди. Шу вақтдан бошлаб армияда асосий ролни яничарлар ўйнай бошлади. Яничарлар босиб олинган ерлардан зўрлик билан олиб келинган христиан болаларидан тарбияланган эди. Улар факат ҳарбий хизмат учун мўлжалланган бўлиб, оила қуриши, бошқа касб-хунар билан шуғулланиши қатъиян тақиқланган эди. Яничарлар давлат хазинасидан катта миқдорда маош оларди, яничарбоши сultonнинг энг ишонган кишиси ҳисобланарди. Лекин вақт ўтиши билан яничарлар корпусида ҳам жуда катта ўзгаришлар юз берди.

XVIII аср бошларига келиб яничарлар оила қуриш ва бошқа қасб билан шуғуланиш хукуқини олдилар. Улар орасидаги темир интизом йўқолди ва яничарлар ичдан жуда катта имтиёзларга эга бўлган ҳарбий аристократия шаклланди. Шу даврдан бошлаб яничарлар сарой тўнтаришларининг харакатлантирувчи кучи ва бош иштирокчисига айланди. Улар ҳарбий ислоҳотларга ва янгича армиянинг шаклланишига қарши эдилар. Бу ҳол усмонийлар ҳарбий қудратининг заифлашувига олиб келди.

1664 йили турклар Сентготхард шаҳри (Венгрия) яқинида австро-венгер қўшинлари билан бўлган жангда мағлубиятга учради. Бироқ ўзини ўнглаб олган турклар Австрияга қарши янгидан уруш бошлади ва 1683 йили Венани қамал қилди. Шу пайт австрияликларга ёрдамга келган Польша қироли Ян Собеский туркларга қақшатгич зарба берди ва мағлубиятга учратди. Бу мағлубиятлар тасодифий бўлмасдан, аслида Усмонийлар империясида бошланиб кетган ижтимоий-иктисодий инқирознинг натижаси эди.

1703 йили империя таҳтига ўтирган Аҳмад III (1703–1730) таҳдид солаётган инқирозни бартараф қилиш, ҳеч бўлмаса уни бир оз кечиктириш учун илк ислоҳотчилик харакатларини амалга оширди. Бу давр турк тарихида «Лола даври» деб ном олган. Ислоҳотчилик харакатларининг асосий ташаббускори Дамат Иброҳим Пошо эди. У 1718 йили бош вазир лавозимини эгаллагач, Усмонийлар давлатидаги ислоҳотларнинг нафақат ташаббускори, балки раҳбарига айланди. Иброҳим Пошо ислоҳотлари инқирозни тўхтатгандек эди. Кези келганда шуни айтиш лозимки, агар тарихда кўплаб империяларнинг инқирози унинг асосчиси вафот этгандан бошланиб жуда тез барҳам топган бўлса, Усмонийлар империясида XVII асрдаёқ бошланган инқироз XX асргacha маълум ўзгаришлар билан давом этиб, Туркия Республикаси ташкил топиши билан якунланди.

1711 йили турклар Азовни Россиядан қайтариб олди, 1714 йили Венециядан Моравияни тортиб олди. Лекин 1716 йили бошланиб кетган ҳарбий ҳаракатлар ва туркларнинг давомли мағлубиятлари вужудга келган муваффакиятли ҳолатнинг ўткинчи эканлигини, инқирознинг муқаррарлигини кўрсатиб берди. 1716–1718 йиллардаги Усмонийлар давлати билан Австрия ўртасидаги уруш Пожаревацк тинчлик шартномаси билан якунланди. Шартномага кўра усмонийлар Кичик Валахия, Босниянинг бир қисми ва Белграддан маҳрум бўлдилар.

Юзага келган умумий тушкунлик оқибатида мамлакат ичкарисида норозилик ҳаракатлари кучайди. Иброҳим Пошо аҳолини тинчлантириш мақсадида маданий ислоҳотларни амалга ошира бошлади. Лекин 1722 йили Эрон сафавийлари билан бошланиб кетган уруш бунга имкон бермади ва мамлакатнинг иқтисодий аҳволини янада оғирлаштириди. 1730 йили империя пойтахти Истамбулда собиқ матрос Патрона-Халил бошчилигига қўзғолон кўтарилди. Қўзғолончилар томонидан султон Аҳмад III таҳтдан ағдарилди, Иброҳим Пошо эса қатл қилинди. Аммо таҳтга келган усмонийлар хонадони вакили Махмуд I 1731 йили қўзғолонни шафқатсизлик билан бостириди, Патрона-Халил тарафдорлари қатл қилинди. Бош вазир лавозимиға Хўмбараби¹ Аҳмат Пошо келди. У армияни ислоҳ қилишни давом эттириди. Лекин Аҳмат Пошонинг бу ҳаракати яничарларнинг қаттиқ норозилиги ва қаршилигига учради.

1730 йили Эрон билан бошланган уруш 1736 йилгача давом этди. Туркияning аҳволини янада оғирлаштирган ҳолат шу бўлдики, ҳали Эрон билан уруш ҳаракатлари тугамасдан, 1735 йили Австрия ва Россия ҳам усмонийларга қарши уруш эълон қилди.

1736 йили усмонийлар Табриз ва Ҳамадоннинг Эронга ўтганлигини тан олди. Европадаги уруш ҳаракатлари натижасида Белград Усмонийлар империяси таркибига ўтган бўлсада, 1739 йилги Белград шартномасига мувофиқ Запорожье ва Азов Россия худудига қўшилди.

Туркларнинг Европадаги ҳукмронлигига энг катта зарбани 1768–1774 йиллардаги Россия-Туркия уруши берди. Уруш усмонийларнинг мағлубияти билан якунланди. 1774 йили имзоланган Кучукқайнаржой шартномасига мувофиқ фақат Болқон мамлакатларидагина турклар ўз ҳукмронлигини сақлаб колди. Усмонийлар ўз тарихида биринчи марта Россияга товон тўлаш мажбуриятини ва Крим хонлигининг мустақиллигини тан олдилар.

1774 йили таҳтга ўтирган Султон Абдулҳамид I (1774–1789) ҳукмронлик қилган йиллари ҳам Россия-Туркия муносабатларидаги асосий муаммо Қрим муаммоси бўлиб қолаверди. 1783 йили Россия Қримни расман ўз ҳудудига қўшиб олди. Бу Усмонийлар империясидан тортиб олинган ислом динига эътиқод қилувчи ва туркий тилда сўзлашувчи илк давлат эди. Қримнинг Россияга қўшиб оли-

¹ Ҳўмбараби – туркларда замбарақни ўқловчи киши шундай аталган. Бу ерда фамилия сифатида қўлланилган.

ниши ўзини ислом динининг халифаси деб эълон қилган султоннинг обрўсига путур етказди ва империянинг ички аҳволини янада оғирлаштириди. Империянинг турли ҳудудларида султонга қарши қайфият кучайди.

Султон Абдулҳамид I Англия ва Швециянинг гиж-гижлаши билан ва мавжуд оғир ахволдан чиқиши мақсадида 1787 йили Россияга уруш эълон қилди. Россиянинг иттифоқчиси бўлган Австрия дарҳол туркларга қарши урушга кирди. Натижада турклар иккита фронтда уруш олиб боришига мажбур бўлди. Бунинг устига урушнинг дастлабки кунлариданоқ Туркия армиясининг урушга тайёр эмаслиги кўриниб қолди. А.Суворов кўмондонлигидаги рус қўшинлари Факшан, Римник ва Исмоил қалъаси ёнидаги жангларда турк қўшинларини мағлубиятга учратди. Уруш ҳаракатлари шундай давом этётган бир пайтда султон Абдулҳамид I вафот этиб, тахтга унинг жияни султон Салим III келди.

Салим III ислоҳотлари. Салим III ақлли, вазиятни тўғри баҳолай оладиган кучли дипломат ва ислоҳотчи эди. Унинг даврида империянинг ташки сиёсати сифат жихатидан ўзгариб, янги босқичга кўтарилиди. У Пруссия билан иттифоқчилик шартномасини имзолади. Бу ҳол урушнинг якунига ўз таъсирини ўтказди. Бундан ташқари, Англия ва Франциянинг Яқин Шарқда Россия назорати ўрнатилишига карши эканлигидан ҳам ҳалқаро муносабатларда усталик билан фойдаланилди. Натижада 1791 йили Австрия билан Систова сепарат сулҳи имзоланди ва Россия ҳам урушни тўхтатишга мажбур бўлди. Бу Усмонийлар империясини тўла таслим бўлишдан сақлаб қолди. Шу йили Россия билан Яssi тинчлик шартномаси имзоланиб, икки давлат ўртасидаги чегара Днестр бўйлаб ўтказилиши белгиланди. Турклар ўзларининг Грузияга бўлган даъволаридан воз кечишиди, Россиянинг Молдавия ва Валахия устидан хукмронлигини тан олишиди.

Урушдан сўнг Салим III империяни ислоҳ қилишга киришиди. Шу мақсадда 1792 йилдан 1796 йилгача бир неча фармонлар чиқарди. Бу фармонларга кўра ҳарбий мажбуриятни ўташдан бош тортган мулқдорларнинг мол-мулклари мусодара қилинди, армия қайта тузилиб, янгича интизом жорий қилинди, ҳарбий муҳандислик ва денгиз флоти билим юртлари ташкил этилди. Европанинг илғор усуллари асосида тўп қуйиш ўзлаштирилди, хориждан мутахассислар таклиф этилиб, флот учун 23 та йирик ҳарбий кема қурилди ва флот қайта ташкил қилинди.

Салим III ислоҳотлари «Янги тузум» (Низом-и-жадид) деб ном олди. Ислоҳотлардан мақсад, марказий ҳокимиятни кучайтириш орқали империя яхлитлигини асраб қолиш эди. Ислоҳотчилар армияни давлатнинг таянчи деб қарашар ва шу сабабли асосий эътибор уни кучайтиришга қаратилган эди.

Ислоҳотлар сўзсиз прогрессив аҳамиятга эга ва агар тўлиқ амалга оширилганда Усмонийлар империясини тараққиётнинг янги босқичига олиб чиқиши мумкин эди. Аммо мамлакатдаги мулкдор қатламларнинг катта қисми ҳамда ҳар қандай ислоҳотларни давлат ва диннинг асосларига зарар етказади деб ҳисоблаган мусулмон руҳонийлари ислоҳотларга карши эди. Низом-и-жадидга айниқса яничарлар қаттиқ қаршилик кўрсатиши, чунки европача таълим олган ва интизомли армиянинг шаклланиши яничарлар корпусининг барҳам топишига олиб келишини улар яхши тушунишар эди. Бундан ташқари ислоҳотларни ўтказиш катта харажатлар талаб қилиб, аҳолига янги солиқлар солинишига олиб келди ва кенг ҳалқ оммасининг норозилигини келтириб чиқарди. Буларнинг ҳаммаси қўшилиб, оқибатда ўтказилаётган ислоҳотларнинг тўлиқ муваффақиятсизлигига олиб келди.

Болқон ва Кичик Осиёдаги ярим мустақил давлатларнинг бошлиқлари, Видин Пошоси Усмон Пазванд ўғли, Янин Пошоси Алимар ҳам жорий килинаётган янгиликларга очиқчасига қарши чиқишиди. Ҳукумат эса уларни охиригача бўйсундира олмади. Шундай қилиб, ислоҳотлар забт этилган халқлар орасида миллий-озодлик ҳаракатларининг пайдо бўлишига тўсиқ бўла олмади. Султон ҳукумати 1793–1796 йиллари Белград Пошолигига автономия ҳукукини беришга мажбур бўлди.

XVI–XVIII асрларда Усмоний турклар маданияти. Усмонийлар давлатида фалсафа диний ва дунёвий қарашлар ўртасидаги рақобат билан характерланади. Мамлакатда мавжуд бўлган мадрасаларда дунёвий фанларни ўқитиш жуда ёмон ахволда бўлиб, мадраса дарслари асосан диний, ижтимоий ва сиёсий ҳаётни ўз ичига олган шариат ва фиқҳ фанлари билан чекланган эди.

XVII асрдан Европанинг илғор ғоялари таъсири остида йирик шаҳарлар, асосан пойтахт Истамбулда дунёвий фанларни ривожлантиришга ҳаракат бошланади. Ўз даврининг илғор кишилари – сиваслик Абдулмажид Нури кабилар мадрасаларда дунёвий билимларни ҳам ўқитиш тарафдорлари эди. Шундай кишиларнинг ташаб-

буси ва таъсири туфайли мамлакатдаги мавжуд диний жаҳолатга қарамасдан дунёвий билимлар соҳасида ҳам олимлар етишиб чиқдилар.

Улардан бири XVII асрдаги Туркияning буюк олими Кошиб Чалабийдир (1609–1657). У ўзининг «Энг тўғрисини топиш учун ҳақ тарозиси» номли асарида дунёвий билимларнинг аҳамиятини ва диний мутаасибликтининг салбий томонларини очиб беришга харакат қиласи, тарих, география ва манбашуносликка бағишлиланган юзлаб асарлар яратди.

Математика ва астрономия соҳасида Хизир Халифа Табарий, Мулла Мехмет Челеби, Кошипзода Мустафо каби олимлар баракали фаолият кўрсатдилар.

Шу даврда турк адабиётида ҳам ўзига хос фаоллик кузатилади, йирик асарлар яратилади. Шулардан Авлиё Чалабийнинг (1682 йили вафот этган) «Саёҳатнома» асари тарихий-этнографик манба сифатида алоҳида аҳамиятга эга. Тарихий йўналишдаги шундай асарлардан яна бири сulton Иброҳим I нинг котиби Кочи Бекнинг «Рисола» номли асаридир. Асарда давлат хазинаси ва солиқлар тизими тўғрисида батафсил маълумот берилади.

Фан ва адабиётдаги бაъзи ютуқларга қарамасдан XVII асрдаги сиёсий ва иқтисодий инқироз барча соҳага салбий таъсири кўрсатди. Инқироз айниқса адабиёт ва меъморчиликда яққол кўзга ташланди. XVII аср охирига келиб форс ва араб тилининг таъсири туфайли адабиёт турк халқи учун тушунарсиз ҳолатга келди. Тилни «тозалаш» учун қилинган кўплаб харакатлардан сўнг «Усмонийча» деб номланган адабиёт яратилди.

Меъморчилиқда ҳам XVII аср охири XVIII аср бошларида тушунарсиз, миллийликдан анча йирок бўлган қоришиқ услублар яратилди. Ваҳоланки, XV–XVII асрларда турк меъморлари буюк тарихий обидаларни яратишган эди. Айниқса XVI асрнинг буюк меъмори Синон ўзининг бетакрор бинолари билан турк меъморчилиги ривожига катта ҳисса қўшди. Бобурийларнинг Дехли, Лахур ва Аградаги саройлари турк меъморлари томонидан бунёд этилган эди. Синон Осиёда биринчи бўлиб бинолар қурилишида «барокко» услубини қўллаган уста эди. Ундан сўнг меъморбоши лавозимида ишлаган Дағлич Аҳмад ва Садафкар Мехмет оғалар ҳам Синоннинг илғор ғояларини давом эттириди, унинг услубида бинолар курдирди. Улар Истамбулдаги Султон Аҳмад I жоме масжидини ва «Янги жоме»ни

бунёд этдилар. XVII аср турк меъморчилигининг ажойиб намуналари сифатида султоннинг Тўпқопи саройидаги Бағдод ва Равон кўшкларини ҳам айтиб ўтишимиз лозим. Бу биноларнинг устаси ўша даврдаги меъморбоши Ҳасан Оға эди.

XVI–XVII асрларда Усмонийлар империясида наққошлиқ ва миниатюра санъати ҳам яхши ривожланади. Наққошлиқда безак воситаси сифатида асосан миниатюра расмларидан ва ёзувлардан фойдаланилар эди. XVI аср охири – XVII аср бошларида яшаган машҳур наққош ва хаттот Накқош Усмон айниқса бу санъатнинг ривожига катта хисса қўшди. У ўзининг «Хунарнома» ва «Сурнома» каби асарларида бу санъат сирлари ҳақида батафсил фикр юритади. Унинг бу икки асарига 600 га яқин рисоласи бирлаштирилган.

Европа ва араб маданиятининг таъсирига қарамасдан XVI–XVIII асрлардаги турк маданияти асосан миллийлик ва ўзига хосликни сақлаб қола олди. Аммо юқорида айтганимиздек, империяда бошланган сиёсий ва иқтисодий инқироз маданият ривожига ҳам таъсир этмасдан қолмади.

* * *

Усмонийлар империяси янги давр бошларида ҳам минтақанинг энг кучли ҳарбий-феодал давлати бўлиб қолаётган эди. Аммо Европа давлатларининг жадал иқтисодий тараққиёти уларнинг ҳарбий-техник имкониятларини ҳам оширди ва бу ҳол Туркияning сиёсий мавқеига салбий таъсир кўрсатди. Натижада ислоҳотлар учун қилинган қатор уринишларга қармасдан XVII асрдаёқ бошланган инқироз ҳолатини енгib ўтишнинг иложи бўлмади. XVIII асрнинг охирига келиб инқироз империя ҳаётининг барча жабҳаларини қамраб олди.

XXVI боб бўйича саволлар

- 1. Янги даврда Усмонийлар империясининг ривожланишига ислом динининг таъсирини қандай баҳолаш мумкин?**
- 2. XVI асрда усмонийлар олиб борган босқинчилик урушлари натижасида қайси ҳудудлар империя таркибиға қўшиб олинди?**
- 3. Янги даврда Туркияда хунармандчилик ва савдонинг ўсишига, шаҳарларнинг ривожланишига қандай асосий факторлар сабаб бўлди?**
- 4. XVII асрда усмонийларда давлат тизимининг ўзига хос жиҳатлари нималардан иборат эди? Унда армиянинг роли қандай эди?**

5. XVII асрда Усмонийлар империяси иқтисодий ривожланишидаги секинлашув давлат сиёсати ва ҳарбий соҳада қандай ўзгаришларга олиб келди?
6. Маҳмед Кёпрулю ислохотлари қандай мақсадни кўзлаган эди?
7. XVII аср охири – XVIII аср бошларида Туркияда инқирозларнинг бошланганлиги нималарда намоён бўлади? Бу даврнинг асосий мазмуни нимада?
8. Салим III ислохотлари қандай мақсадга қаратилган эди ва қандай натижалар билан якунланди?

XXVII БОБ. XVI–XVIII АСРЛАРДА ЭРОН

Сафавийлар хокимиятининг ўрнатилиши. Ички ва ташқи сиёсат

XV аср охирида, феодал тарқоқлик давридаёқ Сафавийлар¹ сулоласининг таъсири ортиб боради. Сафавийларнинг асосий таяничи «қизилбошлилар» деб аталувчи кўчманчи турк қабилалари эди. 1499 йили Исмоил I Сафавий (1487–1524) қизилбошлилар ёрдамида Оқ-қуюнлилар давлатига қарши кураш бошлайди ва 1501 йили Эрон худудини деярли эгаллаб Сафавийлар давлатига (1502–1736) асос солади.

XVI асрнинг бошларида сафавийлар барча Эрон ерларини бирлаштириш ва янги худудларни эгаллаш учун жанглар олиб борди. Исмоилшоҳ давридаёқ Ғарбий Эрон ерлари бўйсундирилиб, Мушаъша давлати йўқ қилинди. Бундан ташқари, улар Ироқни Бағдод билан бирга, ҳамда муҳим савдо йўллари кесишадиган, шиаларнинг муқаддас шаҳарлари ҳисобланмиш Нажаф ва Карбалони ҳам эгаллашди.

1510 йили қизилбошлилар Эронга хужум бошлаган кўчманчи ўзбекларни енгиб Хурсонда мустаҳкамланиб олди. 1514 йили эса Сафавийлар ва Усмонийлар давлатлари ўртасида Кавказорти, Курдистон ва Месопотамия учун кирқ йил давом этган уруш бошланди.

¹ Сафавийларнинг келиб чиқиши аниқ маълум эмас. Кўпчилик олимлар уларни туркийлардан деб ҳисоблашади. Сулола асосчиси Исмоил I Ҳатоий тахаллуси билан туркий тилда (озарбайжонча) шеърлар ёзган, у озарбайжон поэзиясининг классикларидан ҳисобланади. Айрим олимлар, масалан, Руд Мэт, Рожер Сейвор сафавийларни келиб чиқиши бўйича эронлик курдлар дейишади, уларни араблар деб ҳисоблайдиган олимлар ҳам бор.

1514–1555 йилларда расмий равища исломдаги иккى йўналиш – суннийлик ва шиалик байроқлари остида олиб борилаётган бу уруш аслида Эрон шоҳлари ва усмоний сultonларнинг бой ерларни эгаллаш, ҳарбий ўлжаларга эга бўлишдан ва хазинани бойитишигда бўлган қизиқишилари туфайли содир бўлаётган эди. Турк ва Эрон хукмрон доиралари Буюк ипак йўлини назорат қилиш, Кавказорти ва Бағдод орқали ўтадиган Европа-Осиё савдо йўлларини кўлга киритиши учун ҳам харакат қилишаётган эди. 1514 йили сulton Салим I бошчилигидаги турк қўшинлари Кичик Осиёда 40 минг кишилилк шиалар қўшинидан енгилди, бироқ турк армияси Чалдинрон текислигига қизилбошлиларни енгиб, Табризни эгаллашди. Лекин яничарлар орасидаги нотинчлик ва маҳаллий озарбайжонларнинг норозилик харакатлари туфайли турклар бу худудни ташлаб чиқишига мажбур бўлдилар. Улар чекинаётиб, Табризнинг энг яхши ҳунармандларини ўзлари билан олиб кетдилар. Томонларнинг навбатма-навбат устунлигига узоқ давом этган бу уруш Амасида (Кичик Осиё) сулҳ шартномасининг имзоланиши билан якунланди. Унга биноан сафавийлар Ирок, Ғарбий Грузия ва Арманистоннинг бир кисмини туркларга беришга мажбур бўлди.

Сафавийлар давлати ислом динидаги шиалик мазҳаби ғоялари асосида тузилган бўлиб, бу ғоялар марказлашган давлат тузилиши учун ҳам катта хизмат қилди. Дастребаки сафавийлар даврида марказий ҳокимиятни мустаҳкамлаш мақсадида бир қатор тадбирлар амалга оширилди. Бунинг натижасида маҳаллий хукмдорларнинг қаршиликлари бостирилиб, сафавийлар ҳокимияти мустаҳкамланди.

XVI аср 60–70-йилларида солиқларнинг ошиб бориши, урушлар ва маҳаллий можаролар оқибатида ҳалқнинг аҳволи ёмонлашди. Мамлакат бўйлаб тез-тез вабо тарқалиб, очлик ва касалликдан минглаб одамлар қурбон бўларди. Бундай ҳолатда марказий ҳокимиятга қарши ҳалқ қўзғолонларининг бўлиши табиий ҳол эди.

Сафавийларга қарши ҳалқ қўзғолонларининг энг катталаридан бири 1569 йилги Ғilon қўзғолони бўлди. Сафавийлар бўйсундиранга қадар Ғilonда иккита хонлик мавжуд эди. Мустақилликни тиклаш учун кураш олиб бораётган ғilonликлар 18 минг кишилилк қўшин тузди. Аммо ғilonликларга қарши жўнатилган қизилбошлар бу армияни енгиб, қўзғолонни бостиришга муваффақ бўлди. Ғilon вилоятининг хукмдори этиб шоҳнинг ўғли тайинланди, ерлар эса

қизилбош амалдорларга бўлиб берилди. 1572 йилга келиб қўзғолон тўлиқ бостирилган эди.

Фilonниклар қўзғолони билан деярли бир вактда, 1571–1573 йилларда Табризда ҳам қўзғолон бўлиб ўтди. Шу пайт Табриз йирик савдо ва ҳунармандчилик шахри бўлиб, унда 300 мингдан зиёдрок аҳоли яшарди. Шаҳар аҳолиси туркларнинг уч карра босқинидан қаттиқ жабр кўрган эди.

Қўзғолоннинг бевосита бошланишига ҳалқ ҳаракати қатнашчи-ларидан қатл қилинганларнинг дафн маросимига маҳаллий ҳукмдорларнинг аралашуви сабаб бўлди. Камбағал шаҳарликлар қўзғолон кўтариб шаҳар ҳукмдорининг, бир қанча бой зодагон-ларнинг ва шиалар олий руҳонийсининг уйларини бузиб ташла-ди. Бу ҳақда «...ҳар бир кўчада оддий ҳалқ орасидан кимдир ўз хокимиятининг байроғини ўрнатган эди» – деб ёзган эди Эрон тарихчиси Ҳасан Румли.

Қўзғолонга раҳбарлик қилишда полвонлар (курашчилар) фаол-лик кўрсатиши. Яри исмли полвон қўзғолоннинг умумий раҳбарига айланди. Шоҳ Тахмасп I (1514–1576) Табризга янги ҳукмдор тай-инлашга мажбур бўлди. Бу янги ҳукмдор қўзғолончилар раҳбарлари билан музокаралар олиб бориб, уларни қўзғолонни тўхтатишига чакириди. Музокаралар натижага бермагач, шиа руҳонийлари қўз-ғолонни куч билан бостиришга фатво бердилар ва қўзғолон бостирилди. Қўзғолон раҳбарларидан Яри, Аваз, Кўкча, Шундти, Ҳасан ва Ҳусан полвонлар ҳамда яна 150 киши қатл қилинди. Аммо қўзғолон беҳуда кетмади. Янги қўзғолонларнинг олдини олиш мақсадида шоҳ ён беришга мажбур бўлди ва Табризни хазинага тўланаётган бар-ча солиқлардан озод қилди, бу эса шаҳарнинг кейинги тараққиёти учун муҳим аҳамиятга эга бўлди.

Сафавийлар даврида Эроннинг ижтимоий-иқтисодий ту-зилиши. Шоҳ Аббос I ислоҳотлари. XVI аср охири – XVII аср бошларига келиб Эроннинг иқтисодий аҳволи анча яхшиланди, Са-фавийлар давлати ҳам мустаҳкамланди. Давлатга қарашли ерлар-мулки девоний (амлок) шоҳнинг мулки – хос ерлар анча кенгайди. Шоҳ ерлари дастлабки сафавийлар даврида ҳам катта эди. Лекин энг кўп ерларни Аббос I (1571–1629) эгаллади. Француз саёҳатчиси Шадреннинг ёзишича, шоҳнинг мулкларига Эроннинг энг ҳосилдор ерлари ва иқтисодий ривожланган худудлари кириб, бу ерлар мам-лакат умумий ерларининг 2/3 қисмини ташкил қиласарди. Давлат ва

шоҳ ерларидан ташқари вақф ерлари ҳам мавжуд бўлиб, бу ерлардан қоладиган фойда шиа рухонийларига тегишли эди. Сафавийлар ўз хизматида бўлган зодагонларга ерларни суюргол шаклида эмас, асосан тиул шаклида, яъни бир умрга, лекин мерос бўлиб қолмаслик шарти билан тарқатишарди.

Сафавийлар давлати бир-бири билан иқтисодий жихатдан суст боғланган ҳудудларни бирлаштирган ҳарбий-сиёсий уюшма эди. Шунга қарамасдан XVII асрда Эрон иқтисодида, айниқса марказий, ғарбий ва шимолий ҳудудларда маълум ўсиш юз беради. Қишлоқ хўжалиги ривожланиб, йўллар, сунъий сугориш иншоотлари барпо қилинди, товар ишлаб чиқариши ўси, савдо, айниқса ташки савдо алоқалари кенгайди. Товар-пул муносабатларининг кенгайиши шаҳарларнинг ривожланишига, савдо ва ҳунармандчилик марказлалига айланишига олиб келди.

Мамлакатдаги нисбатан иқтисодий ва сиёсий барқарорлик бир қатор ислоҳотларни ўтказиш учун шароит яратди. Бу ислоҳотлар Шоҳ Аббос I даврида ўтказилиб, асосан марказий ҳокимиятни мустаҳкамлашга қаратилди.

Аббос I 1587 йили 17 ёшида қизилбошлилар қабилаларининг оқсоқоллари томонидан тахтга ўтқазилган бўлса-да, ўз ҳомийлари қўлида қўғирчоқ бўлиб қолмади, у қизилбошлиларни тез орада ҳокимиятдан узоқлаштириди. Шоҳ марказий ҳокимиятнинг мустаҳкамланишидан манфаатдор бўлган катта ер эгаларига таяниб иш кўрди.

Ташки сиёсат ҳам мамлакатда барқарорлик ўрнатишга хизмат қилди. Аббос I 1590 йили турклар билан Истамбул шартномасини имзолади. Унга кўра Шарқий Грузия, Шарқий Арманистон, Курдистон, бутун Озарбайжон ва Луристоннинг бир қисми усмонийларга ўтди. Аббос I эса турклар билан сулҳ имзолангандан сўнг бутун кучини ўзбошимча айирмачи феодалларни бўйсундиришга ва шимолдаги ўзбек хонларига қарши қаратди. Натижада 1597 йили Нишопур, Машҳад, Ҳирот ва Марв ўзбек хонларидан тортиб олинди.

Аббос I нинг давлатни марказлаштириш ва маъмурий тузумни такомиллаштириш сиёсати асосан феодал тарқоқликни тугатишга қаратилган эди. Аббосгacha армия ҳарбий феодал қизилбошларнинг алоҳида отлик гурухларидан, дехқонларнинг кўнгилли пиёда қўшинларидан ва шоҳнинг хавфсизлигини таъминловчи отлик гурухлардан иборат эди.

Ҳарбий ислоҳотлар ўтказиши натижасида Аббос I 12 минг кишидан иборат ўқчи-мушкетёрлар, 10 минг кишилий асосан кавказликлардан ташкил топган отлик ғуломлар, 12 минг киши ва 500 тўпдан иборат артиллерия корпусидан ташкил топган мунтазам армия тузди. Кўриқчилар корпуси (шоҳнинг хавфсизлигини таъминловчи отлик гурӯҳ) сақлаб қолинди.

Шоҳ қизилбошлиларнинг қўзголонларини шафқатсизлик билан бостиради. Масалан, 1596 йили шоҳнинг буйруғи билан қизилбошлиларнинг тақали қабиласи қириб ташланди. Шоҳнинг хизматига содик қолган қабилалар «шоҳсевар» (шоҳни севувчилар) номини олди.

Ҳарбий ислоҳотлар ўтказиб яхши тайёргарлик кўргандан сўнг, 1602 йили Аббос I Туркияга қарши уруш бошлади. Уруш давом этган ўн йил ичида у Озарбайжон, Луристон, Курдистоннинг бир кисми, Шарқий Арманистон ва Шарқий Грузияни усмонийлардан қайтариб олишга эришди. Бу уруш кавказ халқларига жуда катта кулфатлар келтирди. Сафавийлар ташки сиёsatдаги сингари ички сиёsatда ҳам жуда шафқатсиз эдилар. Масалан, Аббос I яхши жанг қилмаганлиги учун ўғилларидан биттасини ўлдиришни, иккитасини эса қўзларини кўр қилишни буюрган.

Аббос I даврида бутун давлатни бошқариш ишлари шоҳ саройида тўпланган эди. Саройда «улуглар мажлиси» деб аталувчи ўзига хос давлат кенгashi ҳам фаолият юритарди. Шоҳнинг ҳокимияти чекланмаган бўлса-да, муҳим масалаларни ҳал қилишда шоҳ ва «улуглар мажлиси» шариат қоидаларига амал қилишлари ва мусулмон руҳонийларнинг фикрлари билан ҳисоблашишлари лозим эди.

Аббос I давлат даромадларининг асосини ташкил қилувчи солиқлар йиғишда ҳам эҳтиёткор сиёsat олиб борди. У ўз ҳокимияти учун хавфли ҳисобланган худудлардан олинадиган қўшимча ва фавқулодда солиқларни қисқартирди, марказий туманларни эса бундай солиқлардан бутунлай озод қилди. Аммо қолган ерларнинг дехқонлари давлат ва армия учун жуда кўп сонли солиқлар тўлар эди, шунингдек, сугориш иншоотлари, кўприклар, саройлар қуриш каби мажбуриятларни бажарап эди. Вакти-вақти билан шоҳнинг маҳсус фармонига кўра аҳолидан ўсмирлар ва қизлар саралаб олинарди. Йигитлар кўпроқ Кавказортидаги христианлардан олиниб, мунтазам ғуломлар корпусига ёки сарой соқчилари сафига

кўшиларди. Қизлар эса шоҳ ҳарамига олинар ёки бошқа амалдорларга чўри қилиб бериларди.

Ички бозорнинг кенгайиши, ташки савдо алоқаларининг мустаҳкамланиши натижасида дехқон хўжаликларининг товар-пул муносабатларига тортилиши уларнинг судхўрларга қарамлигини ошириди ва қишлоқда мулкий тенгсизликнинг кучайишига олиб келди.

Шариат бўйича бир мусулмон иккинчисига тобе эмасди, шунинг учун барча дехқонлар расман озод ҳисбланаарди. Сафавийлар давлатида дехқонларнинг қарамлик даражасини ҳар бир вилоятнинг ижтимоий-иктисодий ахволидан келиб чиқиб баҳолаш мумкин эди.

Шаҳарлар. Ҳунармандчилик ва савдонинг ривожланниши. Аббос I даврида ўтказилган маъмурий ислоҳотлар жараёнида давлат пойтахти 1598 йили Қазвиндан Исфаҳонга кўчирилди. Шоҳ янги пойтахтни юксалтириш учун ҳамма имкониятларини ишга солди. Исфаҳон ажойиб саройлар мажмуидан иборат қилиб қайта қурилди. Шоҳ саройи ва шоҳ мачити айниқса маҳобатли ва серҳашам қилиб қурилган эди. Пойтахтда ҳунармандчилик ва савдони жонлантириш мақсадида шоҳ Жулфа шаҳридан машхур савдогар ва ҳунарманд арман оиласарини бу ерга кўчиришни буюради. Жулфадан кўчирилган 15 минг оиласдан Исфаҳонга фақат 3 минги етиб келади, холос, колганлари йўлда вафот этади. Шу тариқа Исфаҳоннинг ёнгинасида Янги Жулфа деб аталувчи савдо маркази пайдо бўлади. Умуман Исфаҳонда олтита йирик савдо-ҳунармандчилик марказлари вужудга келади. Шаҳар аҳолиси тез суратлар билан ўсиб, XVI аср бошларида 500–600 минг кишига етади. Шу пайтда Исфаҳонда 162 та мачит, 49 та мадраса, 1802 та карвонсаройлар, марказий ёпик бозор ва 273 та ҳаммом мавжуд эди. Ўз даврининг машхур устахунармандлари, моҳир рассомлари шу ерда тўпланишган эди.

Ҳунармандчиликнинг соҳалари орасида айниқса тўқимачилик кенг ривожланди. Исфаҳон атрофида бозор учун турли-туман мато ишлаб чиқарадиган 1460 та маҳалла маълум эди. Исфаҳондан ташқари Шероз, Табриз, Машҳад каби бошқа шаҳарларда ҳам шоҳи, баҳмал, парча каби матолар ички ва ташқи бозор учун кўплаб ишлаб чиқарилади. Эронда тўқилган зардўзлик маҳсулотлари айниқса Европа бозорларида юкори баҳоланганди.

Ипак ва зар иплардан дўппи ва белбоғлар тикиш, гилам тўқиши ҳам кенг тарқалган эди. Айниқса Эрон гиламлари машхур бўлиб,

ўша пайтдаги Европа монархларининг саройларини безаб турарди. XVI–XVIII асрларда Эронда ишлаб чиқарилган бадиий санъат буюмлари – гиламлар, сопол ва бронза буюмлари, қуроллар пишиқлиги ва безакларнинг нафислиги билан ҳозиргача одамларни ҳайратга солади. Эронлик усталар металлга ишлов беришда ҳам катта ютуқларга эришади. Улар тайёrlаган металл буюмлар – мушаклар, астрономия асбоблари, идишлар Гарбий Европа ва Россия бозорларида харидоргир эди. Ҳунармандлар ички бозор учун ўсимликлардан олинган бўёклар, тери буюмлари, ойна, совун ва бошқа ҳалқ истеъмол буюмларини ҳам ишлаб чиқаради.

Бироқ қазилма бойликлардан фойдаланиш даражаси ўта паст бўлиб, хазинага улардан келадиган даромад умумий даромаднинг бор-йўғи 0,18 фоизини ташкил қиласади, холос.

Эрон шаҳарлари ўз-ўзини бошқариш тизимига эга эмасди. Аммо савдогарларнинг уюшмалари ва ҳунармандларнинг эснаф (цех)лари ички автономияга эга эди. Эснафлар усталарнинг малакасини белгилар, ишлаб чиқаришнинг йўналиши ва микдорини ўрнатарди. Якка тартибдаги ҳунармандлар ҳам мавжуд бўлса-да, ҳунармандлар асосан корхоналарга бириккан бўлиб, уларда 70 тадан 80 тагача ишчи ишларди. Ҳунармандчиликнинг мутахассислашган 32 та тармоғи мавжуд эди.

Аббос I даврида жорий қилинган янги пул бирлиги «аббосий» бир мисқол (4,6 грамм) кумушдан тайёрланиб, иқтисоднинг ривожланишида ижобий роль ўйнади.

Ташқи савдо ва ташқи алоқалар. Ташқи савдода сезиларли ўсиш бевосита қишлоқ хўжалигидаги ўзгаришлар билан боғлиқ. Ипак савдоси ва бошқа айрим товарлар устидан шоҳ монополиясининг ўрнатилганлиги хазинага жуда катта фойда келтирди. Айниқса Эрон томонидан Кавказортидаги ипакчилик туманлари босиб олинганидан сўнг ташқи савдодан келадиган фойда давлат даромадининг асосий қисмини ташкил қила бошлади.

Савдо компаниялари орасида шоҳ номидан ташқи савдода иштирок этадиган арманларнинг «Янги Жулфа» компанияси алоҳида ажралиб турарди. Эрон савдогарлари Осиёдаги бошқа мамлакатларга ва Европага маҳсулот олиб боришарди. Айрим компаниялар ҳатто Швеция ва Хитойда ҳам ўз вакиллик идораларига эга эдилар. Савдогарлар катта ҳуқуқларга эга бўлиб, ҳукмдорлар томонидан ҳимоя қилинади, феодаллар қатлами билан қаттиқ боғланган эди. Сафавий-

лар чет эл савдо компанияларига турли енгилликлар бериб, улар билан савдони ривожлантиришдан ҳам жуда катта манфаат кўрарди.

Бу даврда Россия ва Европанинг бошқа давлатлари туркларга қарши иттифоқ тузишдан манфаатдор бўлганликлари учун ҳам бир неча маротаба Эронга ўз элчиларини жўнатдилар, шунингдек, Сафавийлар ҳам Европа давлатлари билан туркларга қарши биргаликда кураш олиб боришга ҳаракат қиласди. Аббос I Германия императори, Испания ва Португалия қироллари, Рим папаси ва Франция, Голландия, Россия ҳукуматлари билан ўзаро элчилар алмашди. Одатда, элчилар ўзлари билан жуда кўп қимматбаҳо совгалар келтиришарди, бу ҳам ўзига хос ташки савдонинг бир кўриниши эди.

Сафавийлар даврида Москва Руси билан доимий алоқалар ўрнатилди. Ўзаро элчилар алмашув XV асрдаёқ бошланган эди. XVI асрнинг 50-йилларида Повольже ва Каспий бўйларини эгаллаб олганидан сўнг Рус давлатининг Эрон ва бошқа Осиё давлатлари билан савдо алоқалари сезиларли равишда кенгайди. 1588 йилдан 1676 йилга қадар 20 та рус элчиси Эронга жўнатилган бўлса, Эрондан Россияга 15 та элчи жўнатилган. Эрон савдогарлари Астраханга келиб доимий савдо қиласидан бўлишди. Усмонийлар империяси қарши курашдаги умумий сиёсий манфаатдорлик иккала давлат ўртасида савдо-дипломатик алоқаларнинг ривожланишига олиб келди.

Эронни мустамлакага айлантиришининг бошланиши. Форс кўрфазини эгаллаб олиш учун дастлабки ҳаракатни XVI асрда португаллар бошлаб беришди. 1507 йили улар Ормуз оролини ва ундаги йирик савдо портини эгаллаб олишди, лекин аҳоли қўзғолон кўтариб уларни бу ердан хайдаб юборди. Орадан бир неча йил ўтгач, португаллар ўзларининг денгиздаги ҳарбий устунлигидан фойдаланиб яна Ормузни эгаллашди. Бу ерда гарнizon жойлаштирилиб, савдо факторияси ташкил этилди.

Португаллар Форс кўрфазида хукмрон бўлиб олганларидан сўнг инглиз савдогарлари Эрон ва Хиндистон билан савдони шимолий йўл, яъни Волга-Каспий йўли орқали ривожлантиришга ҳаракат қилиб кўришди. XVI аср 60-йилларида инглизларнинг Москва компанияси (Женкинсон миссияси ва бошқалар) жуда катта қийинчиликлар билан Ширвон чегараларида эркин савдо қилиш хукукини қўлга киритдилар ва Шемахада савдо факториясини очдилар. Сал кейинроқ улар бож ва йўл солиқларини тўлашдан озод

қилинди. Улар Эрон ҳудудида қўчмас мулк сотиб олишлари мумкин эди. Эрон ҳукумати эса уларнинг маҳсулотларини ортиши-туширишда ёрдам бериш ва қароқчилардан химоя қилиш мажбуриятини олди. Бу савдо шартномаси бир неча бор янгиланди. Инглизларнинг Ширвон билан савдо алоқаси туркларнинг босқини туфайли тўхтаб қолди. Россия ҳукумати ўз ҳудудидан инглиз товарларини ўтказишга рухсат бермаганлиги сабабли бу савдо йўли ривожланмади.

XVII аср бошларида Эронга инглизларнинг Ост-Индия компанияси ўз вакилларини жўнатди. 1616 йили шоҳ Аббос I инглиз савдо дагарлари билан яхши муомалада бўлиш, ўз портларида инглиз савдо кемаларини қабул қилиш тўғрисида буйруқ берди. Бир йилдан сўнг компания вакиллари жуда қўп товарлар билан келганида Аббос I Шероз ва Исфаҳонда инглиз факторияларини очишга рухсат берди. Инглизлар шоҳ саройида ўз вакилига эга бўлиш, бутун мамлакат бўйлаб эркин савдо қилиш, ўзи билан қурол олиб юриш ва зарур ҳолларда уни қўллаш ва диний эътиқод эркинлиги каби ҳукуқларга эга бўлишди. Шунингдек, уларни маҳаллий қонунлар билан суд қилиш мумкин эмасди.

Форс қўрфази орқали Эрон ипаги билан савдо қилиш фойдали бўлиб чиқди. Чунки Эрондан ипак сотиб олиш Туркиядаги марказий ипак бозори Ҳалаб (Алеппо)дагидан 50 фоиз арzonга тушарди. Инглизлар бутун Эрондаги ипак савдоси устидан тўла монополия ўрнатишга ҳаракат қилишди. Бунинг эвазига улар Аббос I га португалларга қарши урушда Ост-Индия компаниясининг ҳарбий қисмларидан фойдаланишни таклиф қилишди. 1623 йили Сафавийларнинг қўшини қўмагида Ормузни эгаллашга ва португалларни қувиб чиқаришга муваффақ бўлишди. Уларнинг қурилмалари бузуб ташланди, порт эса материкка (Гомброн)га кўчирилди ва Бендер-Аббос (Аббос бўғози) деб қайта номланди. Шу вақтдан бошлаб инглизлар Эронда янги ҳукуқларни олишди. Улардан асосийлари Бендер-Аббос портида тушадиган божларнинг ярмини олиш, бу ерда ўз факториясига эга бўлиш, ипак олиб чиқиш ва шу кабилар эди. Бу ҳукуқлар аввал инглизларга берилган бўлса, кейин голландларнинг Ост-Индия компаниясига ҳам берилди.

XVII аср ўрталарига келиб голландларнинг Ост-Индия компанияси инглизлар билан рақобатда муваффақиятга эришиб уларни ортда қолдирди. Чет эл компаниялари товар олиб чиқишдан кўра кўпроқ уни Эронга олиб киришни маъқул кўришарди. Эрон

иқтисодиёти учун хавфли бўлган ҳолатлардан бири, кумуш тангалининг, шунингдек, олтин ва кумуш буюмларнинг кўплаб олиб чиқиб кетилаётганлиги эди.

XVII асрда Эронга Ғарбий Европа товарларининг кўплаб келтирилиши маҳаллий хунармандчилик саноати билан кучли рақобатни келтириб чиқарди. Сафавийлар томонидан савдо соҳасида чет элликларга берилаётган енгилликлар нафакат ташқи савдони кенгайтириш учун, балки сиёсий манфаатларни ҳам кўзлаб қилинаётган эди. Бироқ бу енгилликлардан Европа савдо компанияларининг агентлари шу қадар жадал фойдаландики, натижада Эрон Европа давлатлари учун даромад манбаига айланаб қолди.

Натижада XVII аср иккинчи ярмидан Эрон иқтисодий ва сиёсий тушкунликни бошидан кечирди, халқнинг аҳволи оғирлашди. XVII аср охири – XVIII аср бошларида турли вилоятлар дехконларининг кўзғолонлари бўлиб ўтди. Сафавийлар томонидан забт этилган худудларда бундай кўзғолонлар миллий-озодлик кўринишини олди. Шундай кўзғолонлар: 1711 ва 1719 йиллари Кавказда лезгинлар қўзғолони, 1715 йили – курдлар, 1716, 1727–1722 йиллари афғонлар, 1743–1747 йиллари Кавказда Нодиршохга қарши бўлиб ўтди. Афғонларнинг кўзғолони ва уларнинг 1722 йили Эронга кириб келиши Сафавийлар ҳокимиятини ағдариб ташлади. 1726–1730 йиллари ҳокимиятда турган афғонларга қарши, 1730–1736 йиллари эса Эрон худудини турк босқинчиларидан тозалаш учун ҳаракатга бошлиқ қилган Нодирхон Ашраф 1736 йили шоҳлик таҳтини эгаллади. 1747 йили фитначилар томонидан Нодиршох ўлдирилгандан сўнг то XVIII аср охиригача мамлакатда бошбошдоқлик ва ўзаро урушлар ҳукм сурди. Орада 1760–1779 йиллари Каримхон Зенд ҳукмронлиги давридагина нисбатан осойишталик ўрнатилди. 1779 йили Каримхон вафот этгандан сўнг бошланган таҳт учун курашда Кожарлар сулоласидан бўлган Оға Муҳаммадхон ғолиб чиқди. У 15 йил Каримхон саройида гаровда ушланган бўлиб, шоҳ ўлимидан сал олдин Шероздан Астрободга қочади. У 1783 йили Мозандарон ва Фilonда, 1785 йили Техронда, Кум, Кашон ва Исфаҳонда, 1791 йили Озарбойжонда ўз ҳокимиятини ўрнатди. Оға Муҳаммадхон 1795 йили Кавказ ортига бостириб кирди, аввал Қорабоғни, кейин грузин қўшинларининг қаршилигини енгиб, Тбилисини эгаллади, шаҳарни вайрон қилиб, унга ўт қўйди. Кейин 22 минг тбилисиликни ўзи билан олиб қайтди. 1785 йили пойттаҳт деб эълон қилинган

Техрон шаҳрига келиб, 1796 йили расман таҳтга ўтириб, шоҳ бўлди. Бироқ 1797 йили Оға Муҳаммадхон сарой фитнаси натижасида ўлдирилди, таҳтга унинг жияни Фотих Али шоҳ (1797–1834) келди. Кожар хонлари сулоласи то 1925 йилгача Эронда хукмронлик қилди.

Тинимсиз ўзаро урушлар, қўзғолонлар натижасида мамлакат ҳам иқтисодий, ҳам сиёсий инқизозга юз тутди. Бу эса мамлакатга чет эл, биринчи навбатда Европа мустамлакачиларининг кириб келиши учун кенг йўл очди. Кучсизланиб қолган Эрон Европа давлатлари, биринчи ўринда Англия ва Франция ҳамда чор Россиyaсининг мустамлакачилик объектига айланди. Натижада Эрон юқоридаги давлатлар билан бир нечта тенг бўлмаган шартномаларни имзолаб, уларнинг иқтисодий ва сиёсий экспансиясига кенг йўл очиб берди.

Адабиёт, санъат ва меъморчилик. XVI–XVII асрларда Эроннинг қадимий маданий анъаналари давом эттирилди. Айниқса шаҳарсозлик, амалий санъат ва шеъриятда анъаналар давомийлиги сакланиб қолинди. Бу даврда шоирлар Ҳатоий (Шоҳ Исмоил), Содикбек Афшар, Соиб Табризий, курд мумтоз адабиётнинг ёрқин намояндаси Аҳмад Ҳасаний, курд шоири Мирза Шафиқ ва бошқалар унумли ижод қилдилар. 1596 йили Шарафхон Бидлисий машҳур «Шарафнома» асарини ёзиб тугатди. XVI аср иккинчи ярмида Аҳмад Розий «Етти иқлим» деб аталувчи географик шеърий асарга якун ясади. XVII асрда (1641 й.) Янги Жулфада арман алифбоси асосида босмахона ишга туширилиб, бу ёзма адабиётнинг кенг омма орасида тарқалишида катта роль ўйнади.

«Шарафнома»дан ташқари Шайх Ҳазиний, Муҳаммад Козим, Абдураззок Жумбулий каби тарихчиларнинг ҳам шеърий-тариҳий асарлари яратилди. Бироқ бу даврдаги Эрон шеърияти олдинги даврлардаги (Х–XV) юксалиш даражасига кўтарила олмади.

Фалсафада хурфикрлилик оқимининг вакили Садр Шерозий (1640 йилда вафот этган) қарашлари алоҳида эътиборга лойик. Кейинчалик, 1771 йили «Авесто» таржимасининг биринчи нашри амалга оширилиб, бу ҳам фалсафий ҳаётда катта воқеа бўлди.

Бу даврда сарой воқеанавислиги ва география анча юқори ривожланади. Бу йўналиш Искандарбек Мунши, Аракел Тавризский (арман тарихчиси), Аҳмад Розий кабиларнинг асарларида намоён бўлади.

Тасвирий санъат ва меъморчилик ўзининг юқори даражасига кўтарилиди. Ажойиб саройлар, мадраса ва мачитлар қурилди. Булар қаторида Исфаҳонда бунёд этилган Шоҳ мачити, Шайх Лутфулла мачити, Али Капа ва Чехел Сотун сарой ансамблари ўзининг нағислиги ва маҳобати билан ажралиб туради. Уларнинг деворлари ўймакорлик ва наққошлик санъати билан безатилган бўлиб, бу санъатнинг юқори даражасидан далолат беради.

XVI–XVII асрлардаги Эрон миниатюраси жаҳон мумтоз бадиий санъатининг энг юксак намуналаридан хисобланади. XVI аср охиридан бошлаб Исфаҳон бу санъат турининг марказига айланади. Машҳадлик ҳаттот Султон Али, ҳиротлик Мир Али ва табризлик Султон Маҳмудлар ўз даврининг машҳур миниатюра усталари хисобланган. Миниатюра санъатининг ривожланишига Ҳиротдаги Беҳзод мактаби катта таъсир кўрсатди. Шу даврда Табриз миниатюра мактаби ҳам юқори чўққига кўтарилади.

* * *

XVIII асрда ҳам маданий анъаналар давом эттирилди. Аммо мамлакатдаги иқтисодий тушкунлик ва сиёсий парокандалик адабиёт ва санъатда ҳам ўз аксини топди. Бундан ташқари европаликларнинг кириб кела бошлаши ҳам азалий анъаналарга таъсир этмасдан қолмади. Бозор талабидан келиб чиқиб, гилам ва бошқа амалий санъат буюмларини ишлаб чиқаришга эътибор кучайди. Бу эса Эрон иқтисодиёти ва маданиятининг кейинги асрлардаги тараққиёт йўналишини белгилаб берди.

XVII боб бўйича саволлар

1. XVI асрда сафавийларга қарши Ғilon ва Табриз қўзғолонлари қандай натижа билан якунланди?
2. Сафавийлар даврида Эроннинг ижтимоий-иқтисодий ривожланиши қандай ўзига хос жиҳатларга эга эди? Шоҳ Аббос I ислоҳотларидан қандай мақсад кўзланган эди?
3. Шоҳ Аббос I ислоҳотлари хунармандчилик ва савдоning ривожланишига қандай таъсир кўрсатди?
4. Эронда сафавийлар ҳокимиётининг ағдарилиб, кожарларнинг тахтга келишига ташқи ва ички сиёsatдаги қандай факторлар сабаб бўлди?
5. Иқтисодий инқирозга қарамасдан маданиятнинг ривожланишида қадимий анъаналарнинг сақланиб қолиши қандай роль ўйнади?

XXVIII Б О Б. XVI–XVIII АСРЛАРДА АФГОНИСТОН

Афғонларнинг жойлашуви, хўжалиги ва ижтимоий тузуми. Дастлаб афғонлар ҳозирги Афғонистон ҳудудининг унча катта бўлмаган қисмини эгаллаган эди. Афғонларнинг асл ватани Сулаймон тоғларининг этаги ҳисобланади. Бу шароити оғир ва камбағал мамлакат. «Афғонистон» географик-этник тушунчаси тарихий манбаларда биринчи марта XIII–XIV асрларда пайдо бўлди. Бу тушунча Сулаймон тоғларидан то Ҳинд дарёсигача бўлган ҳудудни ифодалар эди. Қадимда ва ўрта асрларда бу ерлардан Ҳиндистонни Эрон ва Ўрта Осиё билан ва улар орқали Фарб ва Шарқ мамлакатлари билан боғлайдиган карvon йўллар ўтган. Сулаймон тоғларининг ҳарбий-стратегик аҳамияти ҳам бундан кам эмасди. Бу ерда Ҳиндистонга душманлар бостириб кириши мумкин бўлган қуруқликда жойлашган ягона чегара ўтган. Учта тоғ давони – Болан, Гомал ва Хайбар орқали босқинчилар бир неча марта Ҳиндистонга ўтишган.

Секин-аста Сулаймон тоғларининг жануби-шаркий ён бағрига тарқалган афғонлар кўплаб ҳинд ҳалқлари ва қабилалари билан аралашиб кетади. Сулаймон тоғларининг шимоли-гарбий томонида ҳам шу жараён юз бериб, афғон қабилалари Кобул, Қандаҳор, Ҳирот каби қадимги деҳқончилик минтақаларида яшовчи форсийзабон ҳалклар билан аралашиб кетади. Афғонларнинг ўз ватанлари – Сулаймон тоғлари районидан четта тарқалиши тез ва тинч йўл билан амалга ошган жараён эмас. Кўчманчи афғон қабилалари атрофдаги ерларни қийинчилик билан босиб олдилар ва ўzlари ҳам аста-секин ўтроқлаша бошладилар.

XVI аср бошларидаги Афғонистон тарихи буюк саркарда ва давлат арбоби, тарихнавис олим ва шоир, темурийзода Захириддин Муҳаммад Бобур номи билан боғлиқ. Бобур 1503 йили Кобулни эгаллади ва афғон қабилаларининг бошлиқлари билан келишган ҳолда катта ҳудудни мустақил идора қила бошлади. Кўплаб афғон қабилалари билан тузилган иттифоқ Бобурнинг Ҳиндистонни эгаллаш жараёнини енгиллаштириди.

Афғон қабилалари, уларнинг турмуш тарзи ва хўжалик юритиш шакллари тўғрисида маълумот берувчи энг ноёб манба Бобурнинг «Бобурнома» асари ҳисобланади. Унда маълумот берилишича Пешавор водийсининг бир қисми ва Сватда юсуфзойлар, улардан жанубда эса муҳаммадзойлар (Хаштнагор атрофида), африидилар

(Хайбар давони районида), бангашилар (Ханга атрофида) ва бошқа қабилалар истиқомат қилишган. Мамандлар ва дилазаклар уларни Бобур учратган худуддан кейинчалик кўчиб, Қандахор ва Заминда-вар худудларида яшовчи абдали ва хаттаки деган катта қабилалар билан ёнма-ён яшашган.

Афғон қабилаларининг жойлашуви Бобур қолдирган маълумотлар ва афғон фольклор анъаналари асосида тикланганда маълум бўлдики, қабилалар XVI–XVIII асларда ҳам XIX аср охирларидағи каби жойлашган. Сўнгги асрларда айниқса ўтроқлашган аҳоли жойлашуvida кескин фарқ юзага келмаган.

Янги тарих бошларидағи афғонлар тарихида қабилалар хаётида кўчманчи чорвачилик ва дехқончиликнинг роли охиригача ўрганилмаган жараён бўлиб қолмоқда. Агар XX аср охирларида Афғонистондаги кўчманчи аҳолининг сони 2 млн га яқин бўлганлигини инобатга олсақ, демак, янги давр бошларида афғон қабилаларининг хаётида кўчманчи чорвачилик сўзсиз устивор аҳамиятга эга бўлган. Лекин ушбу даврда дехқончиликнинг кенг тарқалганлиги ҳақида ҳам кўп сонли маълумотлар мавжуд. Энг аввало бу Бобур қолдирган маълумотлар. Ўзининг ҳарбий юришларини ёритиш давомида афғонларнинг дехқончилик маданияти тўғрисида, хусусан, ҳаштнагарликларнинг буғдор ва арпа далалири, афридийларнинг шолиси тўғрисида тўлқинланиб ёzádi. Зумраднинг аҳолиси (афғоншили қабиласи) ҳақида дон экиб дехқончилик қиласди-ю, аммо боғлари йўқ деб ёzádi.

Афғон қабилалари ўртасида вассаллик ва вассал-иттифоқчилик муносабатлари мавжуд эди. Ҳарбий ҳаракатлар даврида вужудга келган қабилалар иттифоқида улардан бири етакчилик қилас эди. Кучсиз қабилалар кучлироқ қабилаларга қарам бўлиб, ҳарбий ҳаракатлар чоғида кучлилар билан бирга ҳаракат қилган ва доимий уларнинг ёрдамидан фойдаланган. Бундай қарам қабилалар ҳамсоя деб аталган. Афғонлар босиб олган жанубий ерлардаги хинд қабилари ва шимолдаги форсийзабон қабилалар ўз ерларидан ажralган ҳамда қарам аҳолига айлантирилган бўлиб, улар ҳам ҳамсоя деб аталган. Кейинчалик камбағаллашиб қолган ва бошқа уруғлар ёки алоҳида шахснинг ҳомийлигига ўтган афғон қабилалари ҳам ҳамсоялар қаторига қўшилган.

Афғонларда қарам аҳолидан (ҳамсоялар, раиятлар, юсуфзорильарда – факирлар) ташқари куллар ҳам бор эди. Янги давр бошлари-

да ҳам афғонларда қулликнинг сақланиб қолганлиги тўғрисида ўша даврнинг бир қатор мабалари маълумот беради. Ҳикоялардан бирида айтилишича, Шайх-Тапур ёнидаги жангда ғалаба козонган юсуфзойлар қабиласи мағлуб бўлган қабилалар аскарларини қулликка сотиб юборган.

Қандаҳор ва Ҳиротда биринчи давлатчилик ўчоқларининг пайдо бўлиши. Афғонистоннинг Нодир шоҳ томонидан босиб олинини. XVI асрда Эронда хукмронлик қилаётган сафавийлар ўзбеклардан Ҳиротни ва Қандаҳор вилоятидаги афғон қабилаларининг ерларини тортиб олди. Афғонистоннинг тогли вилоятлари (Ғазна, Кобул ва Пешавор) шу пайтда бобурийлар давлати таркибиға қўшилди. Қандаҳор эса узок вақт Бобурийлар ва Эрон давлатлари ўртасида талаш бўлди, кўп марта қўлдан қўлга ўтди ва қуруқлиқдаги хинд савдо йўлининг муҳим давони жойлашган бу ер 1649 йилдан 1709 йилгача Сафавийлар давлати таркибиға кирди.

Афғонларда давлатнинг вужудга келиши учун муҳим ички шартлардан бири қабилаларда феодал муносабатларнинг шаклланиши эди. Қабилаларнинг ягона давлатга бирлашиш жараёни Бобурийлар ва Сафавийлар давлатларига қарши мустақиллик учун узоқ кечган урушлар туфайли юз берди. XVIII аср бошларида ташкил сиёсий ҳолат ҳам афғонлар давлатининг ташкил топиши учун қулай шароит туғдирди. Эрон тарқоқликни бошидан кечираётган ва кучли рақиблар билан жангларда ўз мустақиллигини сақлаб қолишга уринаётган эди. Кучсизланиб қолган бобурийлар ҳам энди афғонларга хавф сололмасди. Аврангзебнинг ўлимидан сўнг (1707) Бобурийлар давлати ҳам тарқала бошлади.

Асосан ички сабабларга кўра (Хинд дарёси бўйидаги афғон қабилалари тарқоқлигича қолаётган эди) давлатнинг ташкил топиши афғон қабилалари жойлашган ғарбий вилоятларда юз берди. XVIII аср бошларида бу ерда гилзори ва абдали қабилалари кучяди. Мавжуд маълумотларга қараганда бу пайтда гилзорийлар 250 минг, абдалилар эса 300 минг кишини ташкил қилган.

Гилзорийлар Мир Вайсхон бошчилигига 1709 йил апрелда қўзғолон кўтариб, сафавийларнинг Қандаҳордаги ноиби Гурганхон қўшинларини тор-мор қилишди ва Қандаҳорни эгаллаб бу ерда ўзларининг мустақил давлатини туздилар. 1709 йили Исфаҳондан жўнатилган қўшинни ҳам енгиб, ўз мустақилликларини сақлаб қолдилар.

Гилзоийлардан кейин 1716 йили Ҳиротда қўзғолон кўтарган абдалийлар ҳам мустақилликка эришдилар. Қўзғолонга Абдуллахон ва Асадулла раҳбарлик қилдилар. Қўзғолончилар 1717 йилнинг охирида Ҳиротни эгаллашди ва бу шаҳар янги давлатнинг пойтахтига айланди.

Афғон халқи тарихида Мир Вайс қўзғолонининг аҳамияти жуда катта. Бу қўзғолон натижасида вужудга келган давлат ва Ҳиротда мустақил хонликнинг пайдо булишини мустақил Афғонистон давлати ташкил топишининг бошланиши деб аташ мумкин.

Гилзоийлар билан абдалийлар ўртасида бошланиб кетган ўзаро урушда гилзоийларнинг қўли баланд келди ва Қандахорда 1717 йили ҳокимиятга келган, Мир Вайснинг катта ўғли, ёш ва қобилиятли саркарда Маҳмуднинг таъсири кучайди.

Ички вазиятни хавфсизлантирган Маҳмуд Эроннинг чегара худудларига бир неча бор бостириб киргандан сўнг, 1721 йили Исфаҳонга қарши катта юриш бошлайди. Етти ойлик камалдан сўнг 1722 йил 22 октябрда Эрон пойтахти таслим бўлди ва шоҳ Ҳусайн Маҳмуд ҳузурига келиб шоҳлик тожини унга топширди. Шундан сўнг афғон босқинчилари Эроннинг катта қисмини бўйсундирдилар. Эронликлар афғонларга қарши душман кайфијатида бўлиб, дехқонлар ва шаҳарликлар уларга қарши озодлик ҳаракатига киришдилар.

1725 йили сарой тўнтариши натижасида шоҳлик таҳтини Маҳмуднинг амакиси Ашраф эгаллаб олади. У қонли террор орқали ҳокимиятни мустаҳкамлайди. Ташки хавфларни ҳам бартараф этишга эришади. Эрон чегараларига бостириб кирган турк қўшинларини енгиб, Туркия билан келишув имзолайди, кейин эса Россия билан ҳам шундай келишувга эришади.

Бироқ қатор ҳарбий ва сиёсий муваффақиятларга қарамасдан Ашрафнинг ҳокимияти омонатлигича қолаётган эди. Бунинг сабаби эронликларнинг қарши ҳаракатлари тўхтамаётганлигидан ташқари, қўшинни мустаҳкамлаш учун Қандахордан ёрдам келмай қўйганлигига ҳам эди. Қандахор ҳокими Ҳусайн Ашрафга рақиб бўлиб, унинг Эрон ишларида қатнашишдан бош тортади ва ўз ҳокимиятини мустаҳкамлашга киришди.

Афғонистоннинг Нодир шоҳ томонидан забт этилиши. Шундай шароитда Эроннинг бўлғуси шоҳи Нодир Ашрафнинг (1688–1747) юлдузи балқиди. У туркмандарнинг жангари Ашраф қабиласидан эди.

Қобилиятли саркарда сифатида танилган Нодир 1726 йили ўзининг икки минг кўшини билан Эрон шоҳи Ҳусайннинг ўғли шоҳ Тахмаспга кўшилади. Иродаси бўш шоҳни ўзига бўйсундириб, Нодир жанговар ва мустаҳкам тартибли армияни шакллантиради, бир неча жангларда абдалийларни енгади ва Ҳиротни эгаллайди, Ашраф бошлигидаги афғон кўшинларини мағлуб қилиб, Эронни босқинчилардан озод қиласи ва 1736 йили Нодир шоҳ бўлиб таҳтга ўтиради. Нодир шоҳ 1737 йили Афғонистон орқали Ҳиндистонга катта юриш уюштириди. Бир йиллик қамалдан сўнг эронлик кўшинлар Қандаҳорни эгалладилар ва шаҳарни вайрон қилдилар. Шундан сўнг Газна ва Кобул бўйсундирилди. Нодир шоҳ Қандаҳордан бошқа биронта шаҳарни вайрон қилмади, афғон зодагонлари билан муносабатни яхшилади, вилоятларни бошқаришни ҳам афғон хонларига топширди. Нодир шоҳ ўз армиясини мустаҳкамлашда ҳам афғонлардан фойдаланди, улардан 16 минг кишилик отряд тузиб уни ўз армияси таркибиغا киритди, шаҳарларда эронликлар гарнizonини жойлаштириди. Нодир шоҳнинг босқини даврида афғон зодагонларининг юқори қатлами, мамлакатнинг бўлғуси бошқарувчилари шаклланиши учун шароит туғилди. Воқеаларнинг кейинги ривожи абдалийларнинг юксалишига олиб келди.

«Дурронийлар» давлатининг ташкил топиши ва ижтимоий тузуми. 1747 йил 19 дан 20 июнга ўтар кечаси Хабушандаги ҳарбий лагерда ўз ўтовида ухлаб ётган Нодир шоҳ исёнчилар томонидан ўлдирилади. Турли ҳалқлар ва қабилалардан ташкил топган кўшинда саросималик бошланади ва бир неча бир-бирига ракиб томонларга бўлинib кетади. Асосан Нодир шоҳнинг шахсий обрўси ва ҳарбий куч бирлаштириб турган давлат ҳам у ўлгандан сўнг тарқалиб кетди. Афғон қабилалари амалда мустақил бўлиб қолдилар. Нодир шоҳ кўшинидаги афғонлар Садозайлар уруғидан бўлган Аҳмадхоннинг уддабуронлиги туфайли шоҳ хазинасининг бир қисми ва артиллеријасини олиб ажралиб чиқишига муваффақ бўлдилар. 1747 йил кузида жангларда тобланган бу кўшин Қандаҳорга кириб келди. Кейинчалик бу кўшин бўлғуси афғон армиясининг асосини ташкил қилди.

1747 йил кузида Қандаҳорда Афғонистоннинг шоҳини сайлаш учун жирга (қабила бошлиқларининг йиғини) чақирилди. Унда ўша пайтда Қандаҳорни эгаллаб турган абдалий қабилаларининг хонлари асосий роль ўйнади. Уларнинг кўпчилиги шоҳликка асосий даъвогарлардан бўлиб чиқдилар. Жирга саккиз марта йиғилганда

шоҳни сайлай олмади. Тарихий афғон анъаналарига кўра жирға тўққизинч бор йиғилганда обрўли сўғилардан бўлган Собирнинг таклифига кўра Аҳмадхон шоҳ қилиб сайланди. Аҳмадхоннинг шоҳ қилиб сайланишида Собир бошчилигидаги мусулмон рухонийлари асосий роль ўйнадилар. Абдалий хонларига келсак, улар Аҳмадхоннинг сайланишига у мансуб бўлган садозайлар уруғи унча катта бўлмаганлиги сабабли шоҳ абдалий хонлари билан ҳисоблашади, деган умидда розилик билдирилар.

Аҳмад шоҳ давлатида абдалий хонлари муқим имтиёзли ўрин эгалладилар. Шоҳ ҳокимияти аввал бошданоқ қабила бошлиқлари томонидан чекланган эди. Тез орада Аҳмад шоҳ томонидан «дурр-и-Дуррон» (марваридлар ичра марварид) унвонининг қабул қилиниши ва абдалийларнинг дурроний деб қайта номланиши ҳам сиёсий аҳамиятга эга эди. Бу европаликларнинг «тенглар ичиди биринчии» деган формуласига мос бўлиб, абдалий хонларининг давлатдаги юқори ўрнини яна бир бор таъкидламоқчи эди.

Сиёсий хаётда дурроний хонларнинг етакчилик роли ва дурроний қабиласининг имтиёзли ҳолати тарихчилар Аҳмад шоҳ давлатини Дурронийлар давлати деб номлашлари учун асос бўлди.

Аҳмад шоҳ ўз хукмронлигининг биринчи йилиёқ афғонлар яшайдиган кўплаб вилоятларни ўзига бўйсундирди. Нодир шоҳ томонидан Кобул, Газна ва Пешаворда қолдирилган ҳарбий гарнizonларни музокаралар орқали бу шаҳарларни Аҳмад шоҳга топширишга кўндирилар. Шундан сўнг Ҳинд дарёсининг ўнг қирғофидаги афғон қабилалари ҳам Аҳмадшоҳнинг ҳокимиятини тан олдилар. Факат абдалийлар билан азалдан душман бўлган гилзоийларни Аҳмад шоҳ қурол билан бўйсундирди.

Афғон давлатининг ташкил топиши фақат қулай халқаро шароитнинг натижасида бўлмасдан, афғон жамиятида юз бераётган ижтимоий-иқтисодий жараёнларнинг қонуний натижаси эди. Феодал муносабатлар жадал ривожланаётган афғон жамиятида биринчи ўринда зодагонлар давлатга, унинг мажбурловчи, тартибга солувчи ва жазоловчи органларига эҳтиёж сезаётган эди.

Аҳмад шоҳ давлатининг тузилиши ва ҳарбий ташкиллаштирилишида қабилачилик принципларига амал қилинди. Мамлакат вилоятларга, вилоятлар маҳаллаларга булинган бўлиб, вилоят бошлиқлари ҳокимлар, маҳалла бошлиқлари эса субадарлар деб аталади ва улар шоҳ томонидан тайинланади. Бундай бўлинишда қабилаларнинг

жойлашувига эътибор қаратилиб, ҳар бир қабила яшайдиган ҳудуд алохида маъмурий бирликка ажратилади. Одатда ушбу маъмурий бўлинманинг раҳбари этиб шу ерда яшайдиган қабиланинг бошлиғи тайинланади. Маҳаллий хон ўз ҳудудида деярли чекланмаган ҳокимиятга эга бўлган.

Афғон бўлмаган ҳалқлар яшайдиган ҳудудлар – Белужистон, Синд, Хурросон ва бошқалар бир оз бошқачароқ ҳолатда эди. Уларнинг ҳукмдорлари Афғонистон шоҳларининг ҳокимиятини тан олган бўлиб, марказий ҳокимият билан муносабатларини одатда ўзаро шартнома асосида шакллантирадилар.

Афғон шоҳларининг ҳокимияти расман чекланмаган, аммо амалда эса улар доимий равишда қабила бошликларининг фикрлари билан ҳисоблашишига мажбур эди. Ўта муҳим масалалар юзасидан жирға чақирилар, унга обрўли сардорлар аъзо бўлиб, шоҳ жирға қарорисиз бирон-бир муҳим қарор қабул қиласди.

Ҳокимият пиллапоясида шоҳдан кейинги шахс вазир ҳисобланади. Вазир мамлакатни бошқаришда шоҳнинг ёрдамчиси бўлиб, барча ташкилотлар ва амалдорлар устидан назорат ўрнатади, ички хавфсизликка жавоб беради.

Давлатнинг муҳим ташкилоти «улуғ девон» ҳисобланиб, у молия ишларини бошқаради, солик йиғимлари ва муҳим хўжалик ишларини бажаради. Бундан ташқари шоҳ фармонлари ва дипломатик ёзишмаларини расмийлаштиради ва бошқа шу каби фаолият билан шуғулланади.

Ҳарбий кучларни бошқаришни Аҳмадшоҳ бош қўмондон (сипоҳсолар) орқали амалга оширади. Қўшин мунтазам армия ва ҳалқ лашкарларидан ташкил топган. Ҳалқ лашкарлари қўшиннинг 70% гачасини ташкил қиласди. Қурол билан таъминлаш ва омборларга бошчилик қилиш билан қўрчи боши шуғулланади.

Аҳмад шоҳнинг юришлари. Афғонларда армиянинг юқори дарражада ташкил қилинганлиги уларнинг ҳарбий қудратини оширди. Аммо Аҳмад шоҳ юришларининг муваффакитида қўшни давлатларнинг феодал тарқоқликни бошдан кечираётганлиги ҳам алохида аҳамиятга эга.

Ғазна, Кобул ва Пешаворни бўйсундирган Аҳмад шоҳ 1748 йили ёқ Панжобга бостириб киради. У бир неча ўн минг кишилик қўшини билан Ҳинд дарёсидан ўтиб, Шикапур, кейин эса Лахорни эгаллади. Аммо 1748 йил 11 март куни Сирхиндда бобурийларнинг

асосий кучлари билан бўлган жангда қақшатгич мағлубиятга учради. Афғон тарихчиларининг ёзишича, бу мағлубиятнинг сабаби порох захираларининг портлаши натижасида мингга яқин кишининг ўлганлиги бўлган. Аммо бобурийлар бу тасодифдан фойдалана олмадилар, Аҳмад шоҳ эса қўшиллари билан эсон-омон ортга қайтди.

Аҳмад шоҳ 1750 йили иккинчи бор, 1756 йили – учинчи, 1757 йили тўртинчи бор Панжобга юриш қилди. Бу юришлар натижасида Кашмир бўйсундирилди; бобурийлар ҳукмдори Панжоб ва Мўлтондан афғон шоҳи фойдасига воз кечди.

1758 йилдан маратхлар билан бобурийлар империясини бўлиш учун узоқ чўзилган уруш бошланди. 1760 йили маратхлар Аҳмад шоҳга қарши жуда катта армия (200 минг қўшин) ни ташлади. Жанг узоқ давом этди ва 1761 йил 13 январь куни Аҳмадшоҳ маратхлар устидан ҳал қилувчи ғалабага эришди.

Хиндларнинг энг кучли давлати тор-мор қилинди, бу эса инглиз мустамлакачиларининг Ҳиндистонни босиб олиш жараёнини енгиллаштириди. Айни пайтда афғонларга ҳам ҳеч қандай худудий фойда келтирмади, чунки Аҳмад шоҳ Панипат жангидан сўнг катта ўлжани олиб ортга қайтиб кетди. У бобурийларнинг талон-торож қилинган пойтахти Дехлини ўзида ушлаб қолиш учун ҳаракат ҳам қилмади. Шимолий Ҳиндистондаги ерлар ҳам Аҳмад шоҳ вафотидан сўнг бой берилди. Панжоб эса 1764 йилданёқ сикхлар қўлига ўтиб кетган эди.

Феодал муносабатлар ривожланган сари Дурронийлар давлатида маҳаллий ҳукмдорлар кучайиб борди. 1773 йили Аҳмад шоҳ вафот этди, ўрнига ўғли Темур шоҳ тахтга ўтирди. 20 йил ҳукмронлик қилган Темур шоҳ пойтахтни Қандаҳордан Кобулга кўчириди. Бу Кобулнинг географик жойлашуви ва стратегик аҳамияти билан изоҳланади. Пойтахтнинг Кобулга кўчирилиши билан Темур шоҳ марказий ҳокимиятни мустаҳкамлашга қаратилган қатор тадбирларни амалга оширди. Марказий ҳокимиятни мустаҳкамлашда унинг асосий таянчи ҳали Нодир шоҳ замонидан бери бу ерда жойлашган қизилбошлар қўшини бўлди. Уларга таянган Темур шоҳ давлатни ўзи бошқаришга ҳаракат қилди. Маҳаллий хонларни камдан-кам ҳолатларда давлат ишларига аралаштириди. Унинг бу сиёсати албатта қаршиликларга сабаб бўлди. Унга қарши қўзғолонлар ҳам бўлиб, уларни Темур шоҳ қизилбошлар ёрдамида бостиради. Шоҳ ўз ажали билан ўлмаган, уни заҳарлаб ўлдиришган.

XVIII аср охирига келиб Аҳмад шоҳ ҳукмронлиги давридагига нисбатан ташқи сиёсий ҳолат ўзгарди. Дурронийлар давлатининг қўшнилари анча кучайди. Сикхлар дурронийларнинг Ҳиндистонга кириш йўлни тўсиб қўйган бўлса, Бухоро амирлиги нисбатан барқарор ҳокимиятга эга бўлиб, ривожланиш йўлига тушиб олди. Эронда сиёсий тарқоқлик ва ўзаро урушлар даври тугаб, мамлакат Муҳаммадхон Кожар ҳокимияти остида бирлаши.

Темур шоҳ ўлимидан сўнг таҳтга унинг бешинчи ўғли Замон шоҳ (1793–1801) келди. Унинг таҳт учун ўз ака-укалари билан қақшатгич кураш олиб боришига тўғри келди. У уддабуронлик билан отасининг марказий ҳокимиятни мустаҳкамлаш сиёсатини давом эттириди. Бироқ отасидан фарқли ўлароқ, у бу ишни ҳаддан ташқари қаттиққўллик билан олиб борди. Маҳаллий хонларнинг қаршилигини синдириш мақсадида у 14 нафар йирик амалдорлар ва сардорларни қатл қилдирди. Қатл қилинганлар орасида кучли Баракзойлар уруғининг бошлиги Пайиндахон ҳам бор эди. Унинг ўғли Фатҳ хон қочиб кетади ва ўз укалари билан қўшин тўплаб отасининг ўлими учун Замон шоҳдан ўч олишга қарор қиласди.

XXVIII боб бўйича саволлар

1. Янги давр бошларида афғонларнинг хўжалик юритиш шакли ва ижтимоий тузумида қандай ўзига хос жиҳатларни кўрсатиш мумкин?
2. Мир Вайс бошчилигидаги қўзғолон афғонларнинг давлатчилик тарихида қандай аҳамиятга эга бўлди?
3. XVII асрда афғонларнинг Дурронийлар давлати ташкил топиши қандай ички ва ташқи шароитларнинг маҳсули бўлди ва афғон давлатчилиги тарихида қандай аҳамиятга эга?
4. XVII асрнинг иккинчи ярмида олиб борилган урушлар Афғонистоннинг кейинги ривожида қандай роль ўйнади?

XXIX Б О Б. XVI–XVIII АСРЛАРДА АРАБ МАМЛАКАТЛАРИ

Сурия усмонийлар империяси таркибида.

Географик жойлашуви ва демографик ҳолати. Ҳозирги Сурия, Ливан, Иордания, Фаластин ва Исроил худудлари тарихан битта географик минтақани (ёки мамлакатни) ташкил қилиб, ўрта аср араб манбаларида Сурия (Сурийя, аш-Шом) номи билан машҳур бўлган. Сурияning табиий чегаралари шимолда – Тавр тоғларининг жану-

бий қисми, жанубда – Синай ярим ороли, ғарбда Ўрта Ер денгизининг қирғоқлари, шарқда – Буюк Сурия чўллари эди. Ушбу табиий чегаралар асрлар давомида ўзига хос иқтисодий ва ижтимоий укладнинг шаклланишига олиб келди. Сурия сиёсий жиҳатдан мустақил давлат бўлмасдан, турли даврларда ҳар хил давлатлар таркибиغا кирган. Янги давр арафасида бу ерлар Мисрдаги мамлук сultonларга қарашли эди. Сурияning аҳолиси 2 млн кишига яқин бўлиб, асосий қисми йирик шаҳарлар – Дамашқ (100 мингга яқин), Халеб (Алеппо) (150 мингга яқин) кабиларда яшаган. Бошқа араб давлатлари ичida Сурия азалдан ўзига хос этно-конфессионал ҳолати билан ажралиб туради. XVI асрга келиб бу ерда асосан араб тилида сўзлашувчи бир хил этник муҳит шаклланди. Қадимги оромийлар ва финикияликларнинг авлодлари билан Арабистон ярим оролидан келган арабларнинг авлодлари ўртасидаги фарқ деярли йўқ бўлиб кетди. Араб бўлмаган аҳоли (шимолда муқим яшовчи курдлар ва туркманлар, шунингдек, турклар, арманлар, яхудийлар, лўлилар) умумий аҳолининг жуда камчилигини ташкил қиласди.

Этник мансубликка қараганда диний мансублик аҳоли онгидага ўзликни эътироф этишнинг устивор принципи ҳисобланарди. Миллий онг фақат XIX аср иккинчи ярмидагина шаклана бошлиди. Инсон ўзини аввало бирон-бир диний жамоанинг аъзоси сифатида, кейин эса бирон-бир шаҳар ёки қишлоқнинг вакили сифатида қабул қиласди, этник келиб чиқиш эса катта аҳамиятга эга эмас. Масалан, то XIX аср охириларигача араб сўзи араб тилининг турли диалектларида сўзлашувчи аҳолиниг умумий этномими сифатида қўлланилмасди, фақат қўчманчи-бадавийларга нисбатан ишлатиларди. Сурия аҳолисининг диний таркиби ҳам анча хилмаяхил эди. Мусулмонлар кўпчиликни – аҳолининг 85% ини ташкил қилас, шундан 80% и суннийлар, қолган қисми шиалар (шу жумладан друзлар, алавийлар ва исмоилийлар) эди. Аҳолининг 15%га яқини христианлар бўлиб, уларнинг ичida православ ва маронит мазҳабига мансублар кўпчиликни ташкил қиласди. Бундан ташқари сиро-яковитлар (монофизит йўналиши), несторианлар, арман-грекорианлар ва бошқалар ҳам истиқомат қиласди. XIX аср охиригача яхудий динига мансублар Сурия умумий аҳолисининг 1% идан ош масди.

Турклар истилоси. XVI аср бошларида араб мамлакатлари усмоний турклар томонидан забт этила бошланди. Месопотамия бо-

сиб олингандан сўнг султон Салим I нинг қўшинлари Сурия, Ливан ва шу пайтгача Миср мамлуклари¹ хукмронлиги остида бўлган бошқа араб ерларини босиб ола бошлади.

Турклар ва мамлакатларнинг қўшинлари 1516 йили августда Халабдан шимолроқда тўқнашди. Қуроллар ва уруш тактикасида ги устунлик жангнинг тақдирини турклар фойдасига ҳал қилди. Мамлуклар, бадавийлар² ва суряликлардан ташкил топган армия тўлиқ мағлубиятга учради. Мамлуклар ҳукмдори Кансух ал-Гурий жангда ҳалок бўлди. Халебда турклар томонидан қўлга киритилган мамлуклар хазинаси миллион динор деб баҳоланади. Октябрнинг ўрталарида Дамашқ, кейин Қуддус забт этилди ва бутун Сурия турклар хукмронлиги остига ўтди.

Турклар истилосини енгиллаштирган ҳолат шу бўлдики, мамлуклар зулмидан озор чеккан кўплаб шаҳарларнинг ва вилоятларнинг ахолиси турк қўшинларини ўз ҳалоскорларида қабул қилишди. Ҳамма жойларда мамлукларга қарши қўзғолонлар бошланиб кетди. Қўчманчи-бадавийлар мамлукларнинг чекинаётган қўшинларига ҳужумлар уюштириб, уларга катта талафот етказдилар. Мамлуклар факат Мисрдагина тарқалаётган қўшинларни тўплаб, ягона қўмондонликка бўйсундириб, мамлакат ҳимоясини ташкил қилишга муваффақ бўлдилар. Аммо уларнинг қаттиқ қаршилигини енгиб, 1517 йилнинг бошларида турклар армияси Қохирани эгаллашди. Мамлукларнинг қолганлари Туман бей бошчилигига Мисрнинг шимолига чекинишибди, аммо тез орада турк қўшинлари бу ерда ҳам уларни тор-мор қилишди, Туман бей 1517 йили қатл қилинди. Шу билан Мамлуклар султонлиги барҳам топди, унинг ҳудудлари, жумладан Сурия ҳам Усмонийлар империяси таркибиغا қўшиб олинди. Салим I жума номозида икки муқаддас шаҳар (Макка ва Мадина) нинг ходими деб эълон қилинди ва бу билан маҳаллий мусулмон ахоли ҳамда уламоларнинг тўлиқ қўллаб-кувватлаши туфайли ҳали Салоҳиддин³ замонидан бери фақат мисрлик ҳукмдорларга тегишли бўлган унвонни қабул қилди. Шундай қилиб, мамлукларни тор-мор

¹ *Мамлук* – (арабчадан – оқ танли қул), насл-насаби туркий ва кавказ ҳалқларидан бўлган қул-жангчилар. 1250 йили мамлуклар Мисрда Айюбийлардан ҳокимиятни тортиб олиб, ўз хукмронлигини ўрнатади.

² *Бадавийлар* – қўчманчи араб кабилалар.

³ *Салоҳиддин* (*Салоҳиддин*) – (1137–1193) Миср султони, мусулмонларнинг салибчилага қарши ҳаракатига бошчилик килган ва 1187 йили Қуддусни озод килган. Айюбийлар сулоласининг асосчиси.

қилиш натижасида, усмоний турклар мусулмон оламининг диний ва дунёвий сардори бўлиб олдилар.

Усмонийлар босқини Сурия иқтисоди учун вайронгарчиликлар олиб келмади. Мамлукларнинг мағлубиятини истаган суряликлар усмонийларни ҳар томонлама қўллаб-қувватладилар, кўпчилик жойларда турклар етиб келишидан олдин қўзғолон кўтариб, мамлукларни ҳайдаб юбордилар. Мамлакатнинг араб тилида сўзлашувчи аҳолиси усмонийлар сultonини мамлукларнинг зулмига барҳам бера оладиган, давлатда тартиб ва шариат қоидаларини ўрнатишга қодир, ўзларининг янги қонуний ҳукмдори сифатида қабул қилдилар.

Суриядаги ижтимоий-иқтисодий муносабатлар. Ўрганилаётган даврда Усмонийлар империяси учун характерли бўлган феодал муносабатлар Суриядаги ҳам ҳукмрон эди. Давлат барча бойликларнинг олий мулкдори хисобланар эди. Усмонийлар империясининг бошка ерларидаги сингари Сурия иқтисодининг ҳам асосини қишлоқ хўжалиги ташкил қиласди. Илгари мамлукларга тегишли бўлган ерлар усмонийларнинг давлат мулки деб ёълон қилинди. Суриядаги бир қисм давлат ерлари феодал сипохийларга ҳарбий хизматлари учун маълум шартлар асосида тарқатилди. Ҳарбий-лен тизими жориј қилинмаган ерлардан солиқни давлат хизматчилари маҳаллий оқсоқоллар ёрдамида йиғар эдилар. Сурия вилоятларидан йиғилган сипохий лашкарлар шу ернинг ўзида ҳарбий хизматни ўташар, шунингдек усмонийларнинг босқинчилик урушларида иштирок этардилар. XVI асрда суряликлар 16 минг лашкар бериши лозим эди.

Ишлов бериладиган барча давлат ерлари солиқقا тортилган бўлиб, солиқ ҳажмини белгилашда фақат ернинг майдони эмас, унинг ҳосилдорлиги ҳам ҳисобга олинар эди. Усмонийлар империясининг ҳар бир вилояти учун алоҳида қонун ҳужжатлари қабул қилинган ва бу қонунлар маҳаллий хусусиятларни ҳисобга олиб, солиқлар тизимини белгилаган эди. Маълумки, Усмонийлар империясида крепостной ҳукуқ тизими мавжуд бўлмаган. Дехқонлар шахсан озод ҳисобланишган ва агар қарзи бўлмаса яшаш жойини хоҳлаганча ўзгартириши мумкин бўлган. Давлат ерларида ишлайдиган дехқонлар ер солиги тўлашарди. Дехқон давлат солигини тўлагандан сўнггина ҳосилнинг ўзига тегишли қисмига эгалик қилиши мумкин эди. Ҳайдаладиган майдонлардан ер солигидан ташқари мевали дараҳтлар учун ҳам алоҳида солиқ ўрнатилган. Кўчманчи қабилалар ҳам солиқقا тортилган бўлиб, мавжуд моллар

сони ва яйловлар майдонига қараб солик ўрнатилган эди. Мусулмон бўлмаган аҳоли барча солиқлардан ташқари аҳоли жон бошига тўланадиган солик-жизъя ҳам тўлаши лозим бўлган.

Вакф ерларидан олинадиган даромад хайрия ишларига, мусулмон диний муассасаларини (мачитлар, мактаблар ва х.к.) таъминлашга йўналтирилган. Вакф ерлари ҳайдаладиган ерларнинг қарийб 1/3 қисмини ташкил қиласиди.

Сурия иқтисодининг ривожланишида йирик савдо-хунармандчилик марказлари бўлган шаҳарлар – Дамашқ, Халаб, Куддус катта роль ўйнайди. Бу шаҳарлар Сурияни Месопотамия, Хижоз, Анатолия, Эрон ва бошқа мамлакатлар билан боғлайдиган йирик карвон йўллар устида жойлашган эди. Усмонийлар империясининг бошқа вилоятлари ва Европа давлатлари билан савдо қилишда Искандария, Латакия, Сайда, Тир, Байрут, Яффа шаҳарлари орқали ўтадиган денгиз йўллари ва денгиз савдоси ҳам яхшигина аҳамият касб этади. Дамашқ ва Халаб карвон ҳамда денгиз йўлларининг кесишган ерида жойлашган бўлиб, бу ҳол уларнинг гуллаб-яшнашига сабаб бўлди. Фақат Халабнинг ўзида 300 дан зиёд карвон саройлар мавжуд эди. Бу ерлик хунармандларнинг маҳсулотлари, хусусан, Сурия ипак матоси ва қуроллари (Дамашқ пўлати), зар-безак буюмлар фақат Суриянинг ўзида эмас Ғарбий Европа мамлакатларида ҳам машҳур бўлган. Барча араб-мусулмон мамлакатларида сингари бу ерда ҳам хунармандлар ўзларининг аниқ цех тизимиға эга бўлиб, улар эснаф деб аталарди. Ҳар бир шаҳарда кўплаб шундай эснафлар мавжуд эди. Усмонийлар барча хунармандларга солик ва савдо божлари ўрнатган, бу солиқларни йигиб олишда ҳамда шаҳарликларнинг усмонийларга нисбатан кайфиятини аниқлашда маҳаллий маъмурлар ва эснафларнинг бошликлари ёрдамига таянарди.

Вилоятларни бошқарни тизими. Султон Салим I Суриядаги турган пайтида вилоят ва шаҳарларнинг вакиллари иштироқида мажлис ўтказади. Унинг шахсан ўзи йигилганларнинг истаклари ни тинглади, шикоятларини текширди ва можароларини ҳал қилди. Султоннинг кўрсатмасига биноан солиқлар ва савдо божлари пасайтирилди, ерлар қайта рўйхатга олинди, мусулмон бўлмаган жамоалардан баъзи бир қатъи чеклашлар олиб ташланди. Усмоний хукмдорлар христиан ва яхудийларга эркин эътиқод қилиш имконини берди, ҳатто диний-юридик автономия ҳуқуқини инъом этди, христиан епископлари ва яхудий раввинларига ўз диндошларидан

солиқни ўzlари йиғишиңа ҳамда жамоа ичидаги муаммоларни ўз диний судларида кўриб чиқишиңа рухсат берилди.

Усмонийлар таркибиңа кирган дастлабки йилларда Сурия кенг ички автономиясини сақлаб қолган эди. Суриянинг империя ҳарбий-маъмурӣ тизимларига интеграциялашуви аста-секинлик билан амалга оширилди. 1518 йили Суриянинг ҳукмдори қилиб усмонийлар томонига ўтган мамлук саркардаларидан бири Жонберди ал-Ғазалий тайинланди. 1520 йили Салим I вафот этгандан сўнг ал-Ғазалий янги султон Сулаймон I (1520–1566) га қасамёд қилишдан бош тортди ва исён кўтарди. Дастлаб исёнчиларнинг қўли баланд келиб Дамашкни ва Суриянинг бошқа бир қатор шаҳарларини эгаллашди. Аммо Анатолиядан янги кучлар келиши билан исёнчилар тор-мор қилинди, ал-Ғазалий қатл этилди, Суриянинг автономияси эса бекор қилинди. Энди мамлакат учта вилоятга – Дамашқ, Халаб, Триполига ажратилди. Кейинчилик, XVII асрда Дамашқ ва Триполи вилоятларининг денгизбўйи худудларидан яна битта вилоят – Сайдада ташкил этилди. Умуман айтиш мумкинки, XVI асрдан усмонийларнинг вилоятларни бошқариш тизими Сурияда ҳам тўлиқ жорий қилинди.

Вилоятларни Порта¹ томонидан тайинланган губернатор – вали бошқарар эди. Вилоятлар кичикроқ бўлинма – санжакларга бўлинган.

Тоғли Ливан алоҳида мақомга эга эди. У ўзига хос вассал худудий бирлашма бўлиб, анча кенг автономия ҳуқуқларидан фойдаланар ва ўз ҳукмдорлари – амирлар томонидан бошқарилар эди. Қуддус худуди расман Дамашқ ва Сайдада вилоятларига қараса-да, бу ерда ҳам ўзига хос мақом шаклланди. Қуддус округи қўпинча вилоят валисига эмас, бевосита Портага бўйсинадиган мутассариф – пошо мақомидаги амалдор томонидан бошқарилар эди. Вилоят бошликлари (вали) одатда пошо унвонига эга бўлиб, султон ҳукуматининг вазири билан teng саналарди. Унинг ваколатлари жуда кенг бўлиб, солиқларни йиғишиңа султон хазинасига жўнатишдан бошлаб, ҳудуддаги қўшинлар бош қўмандони сифатида жамоат тар-

¹ Порта (французча Porte, итальянча Porta, сўзма-сўз таржимаси – эшик, дарвоза) Европа дипломатик ҳужжатлари ва адабиётида қўлланилган Усмонийлар ҳукумати (буюк вазир ва девон идораси) нинг расмий номи. Порта туркча пошо каписи (пошо эшиги), арабча баби-али (юкори ташкилот, баланд эшик) сўзларининг ноаники таржимаси. Порта атамасини Усмонийлар империясига нисбатан қўллаш нотўғри, уни факат империя ҳукуматига нисбатан қўллаш ўринли бўлади.

тибини ва чегаралар дахлсизлигини сақлашни ташкил қилишгача жавоб берарди. Дамашқ валиси буларнинг барчасидан ташқари мусулмонларнинг ҳаж сафарини ташкил этиш ва ўтказиш учун ҳам жавобгар саналарди.

Вилоят маъмуриятида валидан кейинги иккинчи шахс қози хисобланарди. Қози фуқаролик ва жиноий ишлари бўйича, уларнинг мусулмон хукуқига мос олиб борилиши учун масъул хисобланарди. Бундан ташқари у диний муассасалар ва мактаблар устидан назорат ҳам олиб борарди.

Вилоят маъмурий марказининг муфтиси қозидан кейинги шахс бўлиб, вилоят маъмурияти қарорларига расмий диний-хукукий ху-лоса берарди. Муфтилар кўпинча ўриндошлиқ асосида девонни – муваққат маслаҳат кенгашини ҳам бошқарар эди.

XVII–XVIII асрларда Сурия. Ерга эгалик қилишнинг ҳарбий-лен тизими Сурияning вилоятларида қисман тарқалган эди. Бироқ бутун Усмонийлар империясида XVI асрдаёқ бошланган ушбу ти-зимнинг инқирози Суря вилоятларида ҳам акс этди. Вали Портанинг расмий вакили сифатида империя марказининг зарурӣ моли-явий ва ҳарбий ёрдамидан фойдаланиши лозим эди.

Амалда эса сипоҳийларнинг таъсири пасайиши натижасида мар-казий ҳокимият солиқ йиғиш ва қўшин етказиб беришни валилар зиммасига юклашга мажбур бўлди. XVII–XVIII асрларда Усмоний-лар империясида молиявий инқироз ва коррупциянинг кучайиши натижасида усмоний маъмурлар ўз фаолиятларида борган сари ви-лоятлардаги анъанавий маҳаллий зодагонларга таянишга мажбур бўлдилар.

XVII–XVIII асрларда Усмонийлар империясида бошланган жа-раён – янги ижтимоий қатlam – аёнлар қатламишининг, яъни маҳаллий зодагонларнинг шаклланиш жараёни Суря учун ҳам характерли-дир. Аёнлар давлат ерларидан солиқ йиғиш хукуқини сотиб ола бошладилар. Ерлардан солиқ йиғиш хукуқини сотиб олиш – илти-замий – Усмонийлар империясининг бошқа вилоятларидаги синга-ри Сурияда ҳам кенг тарқалди. Бундай хукуқни сотиб оловчиларни мултазим деб аташган, улар ер ҳажмига қараб солиқ миқдорини дав-лат хазинасига олдиндан тўллаганлар ва кейин деҳқонлар ҳисобига бойиб кетишганлар. Мултазимларнинг деҳқонлардан олинадиган солиқ миқдорини кескин оширишларига давлат амалдорлари эъ-тибор қаратмас эдилар. Борган сари мултазимлар солиқ йиғиш

хукукини ўзларида сақлаб қолиш ва ҳатто мерос қолдириш учун ҳаракат қила бошладилар. Солиқ йиғиши хукуқи сотиладиган йиллик аукционлар шунчаки ясамачиликка айланиб қолди, чунки энди валилар ҳам ўзларига карашли ерларда мултазим бўла бошладилар. Суряядаги ерларнинг асосий қисми турли хил кўринишда эски, усмонийларнинг кириб келишига хайриҳоҳлик билан қараган, маҳаллий зодагонларнинг кўлида эди. Тоғли Ливанда ерларни бошқариш Маанидлар суполасидан, XVII аср охирида эса Шихаблар суполасидан бўлган шайхлар кўлида эди. Бошқа уруғдан бўлган шайх ва амирлар ўз ерларини Ливан амири бошчилигига ҳарбий хизматни ўташ шарти билан бошқариш ва мерос қолдириш хукуқига эга эдилар. Харфуш уруғидан бўлган шия мазҳабидаги амирларга Баалбек ва Бекаа водийсининг бир қисми тегишли бўлиб, бу ерларни улар мерос сифатида бошқариб келарди. Ансарийлар (алавийлар) яшайдиган ерлар бир неча қабила бошлиқлари – муқаддамунлар ўртасида бўлиб олинган эди. Фаластинда ҳам маҳаллий ер эгаларининг бир неча уруғлари ерларга эгалик килишарди. Давлат барча ерларнинг олий мулқори ҳисобланган Усмонийлар империясида юқоридаги жуда кўплаб ер эгалари аслида солиқ йиғиши хукукини сотиб олганлар ҳисобланган ва давлат бу хукуқни уларга вақтингча – илтизам ёки умрбод – маликиён асосда берган. XVII асрдан бошлаб ҳарбий бошлиқларнинг ерга эгалик қилиш ҳоллари кўпаяди. Қачонлардир маҳаллий аҳолидан ўзини алоҳида тутган, ёпиқ ҳисобланган яничарлар корпуси ҳам аста-секин маҳаллий аҳоли вакиллари билан тўлдирилиб, кўпчилиги даромадлари бўйича маҳаллий зодагонларга тенглашади. Маҳаллий аёнларнинг бошқа бир қисмини уламолар ташкил қиласди. Улар вақф ерларидан олинган фойда ҳисобига бойиб кетишади ва илтизам асосида давлат ерларини кўплаб харид қиласдилар. Натижада уламоларнинг бой оиласи катта фойда келтирадиган лавозимларни, масалан, йирик масжиднинг имоми лавозимини авлоддан-авлодга ўтказиб келиши оддий ҳол бўлиб қолади.

Вазифаларини аниқ бажарадиган давлат хизматчилари ва қонунийлик ўрнига аста-секин протекционизм, уруғ-аймоқчилик, шунингдек, найрангбозлик ва пораҳўрлик келади. Бу ҳол эса давлатни ич-ичидан емира бошлайди.

Ироқ Усмонийлар империяси таркибида

Ироқ турк-эрон истиличилик интилишларининг муҳим объектларидан саналарди. Форс қўлтиғига чиқишининг қулай йўлларида жойлашган, Фарб билан Шарқни бօғловчи жаҳон савдо йўлининг муҳим қисми ҳисобланган Ироқ азалдан босқинчиларни ўзига жалб қилиб келган.

1467 йилдан XVI аср бошларигача Ироқ Оқ қуёнлилар давлати таркибиға кирган. 1508 йили Сафавийлар Оқ қуёнлилар давлати таркибиға кирувчи ерларни забт этиб, улар хукмронлигига хотима ясади.

Сафавийлар Ироқдаги мусулмон суннийларга ва христианларга нисбатан ўта қаттиқўллик муносабатида бўлди, уларнинг муқаддас жойлари вайрон қилиниб, уламолар, сўфиylар ва христиан руҳонийлари қувғин қилинди.

Сафавийларнинг маҳаллий аҳолини диний ва этник камситиш сиёсати аҳоли ўргасида хаққоний норозиликка олиб келди. 1514 йили баъзи курд қабилалари Усмонийлар ҳомийлигига ўтдилар ва ўзларинининг автоном ҳуқуқларини сақлаб қолдилар. 1515 йили Шимолий Месопотамияда Сафавийларга қарши қўзғолон кўтарилиб, унда курдлар билан бир қаторда оссуриялик христианлар ҳам фаол иштирок этишди. Қўзғолончилар қизилбошлардан қатор шаҳарларни озод қилдилар, лекин кучлар teng эмаслиги сабабли султон Салим I га ёрдам ва ҳомийлик сўраб мурожаат қилдилар. 1516 йили Порта Юқори Месопотамияни ҳомийликка олганлигини эълон қилди. Қўзғолончилар ғалабасидан сўнг бутун Шимолий Месопотамия Усмонийлар қўл остига ўтди. 1529 йили қўзғолончилар Бағдодни эгаллашди.

1533 йили султон Сулаймон Қонунчи (1520–1566) Сафавийларга қарши юриш бошлаб, 140 минг кишилик қўшин жўнатди. Ироқда аҳоли Сулаймон армиясини халоскор сифатида қарши олди. 1534 йил ёзида турклар Сафавийлар пойтахти Табриз шаҳрини эгаллади. Мамлакатда диний бағрикенглик тикланди. Шу йили Бағдод ва Мосул эйалетлари¹ ташкил қилинди. Тез орада Ироқнинг қолган қисми

¹ Эйалет арабча иалат сўзининг туркча айтилиши. Эйалет Усмонийлар империясидаги ёнг йирик ҳарбий-маъмурӣ бирлик бўлиб, вазир ёки пошо унвонига эга бўлган бейларбей томонидан бошқарилган. Пошо унвонидан келиб чиқиб, кўпинча пошолик деб ҳам атаган. 1864 йили эйалетлар вилайетлар деб қайта номланди ва бошқарувчилар вали деб атала бошланди.

ҳам Усмонийларга тобеликни тан олди. 1546 йили Жанубий Ироқ пойтахти Басра бўлган Усмоний эйалетига айлантирилди. Бу билан Усмонийлар империяси португалияликлар экспансиясига қарши туриш ва Басра божхонасидан яхшигина фойда олиш имкониятига эга бўлдилар.

Порта ҳокимияти Арабистон ярим оролининг шарқий қисмига ҳам жорий қилиниб, бу ерда ал-Хос эйалети ташкил қилинди.

Сафавийлар Усмонийларга қарши курашда португалияликлар ёрдамига таянди, лекин 1548–1549 ва 1554–1555 йиллари бўлиб ўтган турк-форс урушлари Усмонийлар фойдасига ҳал бўлди. Сафавийлар ўзларининг даъволаридан воз кечиб, 1555 йил май ойида имзоланган Амасия сулҳига биноан Ироқнинг Усмонийлар империяси таркибиға кирганлигини тан олишга мажбур бўлдилар. Умуман Усмонийлар билан Сафавийлар ўртасида бир асрдан кўпроқ давом этган кураш 1638 йили Усмонийларнинг ғалабаси билан якунланди.

Ироқ Усмонийлар империяси таркибиға кириши билан унда куйидаги эйалетлар ташкил қилинди: Бағдод, Басра, Мосул, Шахризор. Эйалетларнинг хуқуқий ҳолати, уларни бошқариш тизими, ички тузилиши, хуқуқ ва мажбуриятлари маҳсус қонун билан ўрнатилди. Эйалетлар санжакларга бўлинди. Ироқ эйалетларининг маъмурий-хуқуқий даражаси турлича бўлиб, бу Усмонийлар томонидан ўрнатилган эди.

Басра ва Шарқий Арабистон эйалетлари маълум автономияга эга бўлса-да, уларда султон қўшинлари жойлаштирилган. Бу эйалетлардан олинадиган йиллик даромад тўғридан-тўғри султон хазинасига тушарди.

Усмонийларнинг бошқарув тизими тарихан бир-бирига яқин худудларнинг сиёсий бирлашувига йўл қўймасди ва айни пайтда ҳар бирининг алоҳида-алоҳида бўлиб марказий ҳокимиятга бўйсенишини таъминларди.

Турклар Ироқда ўз ҳокимиятини ўрнатар эканлар, аввало асрлар давомида шаклланган этно-конфессионал ҳолатни ҳисобга олганлар. Ироқ аҳолиси ҳам этник, ҳам диний нуқтаи-назардан жуда хилма-хил эди. Бу ерда араблар, курдлар, форслар, турклар, оссурияликлар, яхудийлар ва арманлар асрлар давомида қўшни яшашган, ҳамкорлик қилишган, дўстлашган, баъзан жанжал ҳам қилишган. Улар диний жиҳатдан мусулмон сунналарга, мусулмон шиаларга, христианларга, яхудийларга, иезидларга ва бошқа бир қанча дин ва

мазҳабларга бўлинишган. Аҳолининг қўпчилиги учта-тўртта тилда бемалол сўзлашишган ва бу оддий ҳол ҳисобланган.

Ироқ шиалар учун алоҳида ахамиятга эга эди, чунки бу ерда уларнинг муқаддас қадамжойлари, турли мамлакатлардан шиалар ҳаж зиёрати учун келадиган шаҳарлар – Нажаф ва Карбала жойлашган.

Аграп муносабатлар. Ироқда Усмонийлар ҳокимиятининг ўрнатилиши фақат маъмурий тизимни ўзгартириб қолмасдан, аграп муносабатлар ва солиқ тизимида ҳам жиддий ўзгаришларга олиб келди. Усмонийлар қишлоқдаги мулкий муносабатларни тартибга солишда эски кадастрдан фойдаланди, аммо солиқларни аниқ хисобга олиш учун ерларнинг янги рўйхатини ҳам туздилар.

Ироқда аввалги феодал институтларнинг баъзилари бекор қилинди, икта¹ ер эгалиги ноқонуний деб эълон қилинди ва бу билан мамлуклар тизимининг асослари йўқ қилинди, дехқонларнинг баъзи бир мажбуриятлари бекор қилинди, айрим солиқларнинг миқдори пасайтирилди. Ушбу ўзгаришларнинг барчаси қонунда ўз аксини топди. Масалан, 1574–1595 йиллари қабул қилинган қонунларда ер ўлчамларига аниқлик киритилган. Энг кичик ер ўлчами деб дёнюм² қабул қилинди. У энига ва бўйига 40 қадам қилиб белгиланди. Бир дехқонга тегишли ер – чифтлик³ юқори ҳосилдор ерларда 80 дёнюм, ўртача ҳосилдор ерларда 100 дёнюм, кам ҳосилли ерларда эса 150 дёнюмга тенг эди. Солиқ ҳам ернинг ҳосилдорлигига қараб, икки ёки уч дёнюмга бир ақча⁴ тўланган. Бўш ётган ерларга ишлов берриб, уни оборотга кўшган дехқонлардан солиқ олинмаган. Аксинча, узрли сабабларсиз ерга ишлов бермаган дехқон ернинг ўлчамига қараб 75 дан 300 ақчагача солиқ тўлаган. Дехқоннинг уйланмаган ўғиллари бўлса хар бирига 6 ақчадан 12 ақчагача солиқ тўлаш лозим бўлган.

Бундан ташқари натурал солиқлар ҳам мавжуд эди. Сугориладиган ерлардан олинадиган натурал солиқ – ушр одатда ҳосилнинг 1/4 қисмини, бехре⁵ эса 1/15 қисмини ташкил қиласди. Дехқончилик

¹ Икта – Яқин ва Ўрта Шарқ мамлакатларида хукмдор томонидан феодалга катта хизматлари эвазига инъом қилинган чек ер.

² Замонавий дёнюм 0,25 гектарга тенг.

³ Чифтлик (арабча чифт, форсча жуфт) – бир кунда иккита хўқиз билан ҳайдалиши мумкин бўлган ер.

⁴ Ақча – сulton Ўрхон (1326–1359) даврида зарб қилинган майда кумуш танга.

⁵ Бехре – сувдан ёки сув келадиган ариқдан фойдаланганлик учун тўланадиган солиқ.

ва чорвачилиқдан олинадиган солиқлар ҳам қонунларда аниқ қилиб белгиланган эди.

Усмонийлар даврида Иркода ерга эгалик қилиш ва мулкчилик-нинг қуйидаги турлари мавжуд эди:

1. Мири – давлат солигига тортиладиган ерлар. Улар ишлов бериладиган ерларнинг асосий қисмини ташкил қилиб, давлат хазинасига тушадиган асосий даромад ва натурал солиқлар шу ерлардан олинарди.

2. Хос – эгалик қилиш шарти билан юқори даражали давлат амалдорларига бериладиган ерлар.

3. Мулк – айрим феодалларнинг хусусий ерлари. Бу ерлар ишлов бериладиган ерларнинг жуда кам қисмини ташкил этган.

4. Тимар ва зеаметлар – бу ер эгалари сипохийлар ҳарбий хизматлари учун ерга эгалик қиласар ва оладиган даромадига қараб маълум сондаги аскарларни кўшинга берарди.

5. Жамоа ерлари.

6. Кичик ер эгалари бўлган дехқонларнинг ерлари.

7. Кўчманчи ва ярим кўчманчи қабилаларнинг ерлари.

8. Вакф – диний ташкилотга тақдим этилган ёки фойдаланиш учун маълум муддатга берилган ерлар.

Ички сиёсий ҳолат. Ироқдаги сиёсий ҳолатга жиддий таъсир кўрсатадиган омил Усмонийлар империяси ва Эрон ўртасида вақти-вақти билан чиқиб турадиган зиддият эди.

Эрон 1555 йили Ироқ устидан турклар хукмронлигини расман тан олган бўлса-да, XVII асрда ўз даъволарини янгидан бошладилар. Сафавийлар туркларга қарши ҳарбий юриш бошлаб, 1632 йили Бағдод, Мосул ва Шахризорни босиб олдилар, 1624, 1625 йиллари эса икки марта Басрани эгаллашга ҳаракат қилиб кўрдилар. Бу ҳаракатлар муваффакиясиз яқунлан.

Усмонийлар 1638 йили Бағдодни қайтариб олгандан сўнг 1639 йили Туркия билан Эрон ўртасида тинчлик сулхи имзоланди ва унда Ироқнинг Усмонийлар империяси таркибиға қайтганлиги яна бир марта таъкидланди.

Шундан сўнг Усмонийлар бутун эътиборини Ироқдаги ички барқарорликни таъминлашга қаратди. Чунки Сафавийлар билан зиддият кучайган йиллари Ироқда мустақиллик учун ҳаракатлар ҳам жонланиб қолган эди. Масалан, 1616 йил Басрада Сияблар сулоласи

кучайиб, 40 минг пиастрга¹ Басра эйалетининг бейларбейлигини сотиб олиб, шу сулола вакиллари 1661 йилгача Басрани бошқаришиди. Улар эрон-турк урушлари пайтида ўз хукмронликларини мустаҳкамлаш учун ҳатто португалларга ҳам мурожаат қилишган.

Жанубий Ироқда бадавий қабилаларининг кўзғолонлари доимий хол бўлиб қолди. Фақат 1699 йили Карловица тинчлик сулхи имзолангандан сўнг Усмонийлар Ироққа иккита экспедиция юбориб, 1701 йили Басрадаги кўзғолонни, кейинчалик эса Ироқ жанубидаги галаёнларни ҳам бостиришга муваффақ бўлдилар.

XVIII асрдан бошлаб Усмонийлар империясининг иқтисодий ва харбий жиҳатдан сусайланлиги, Европада бир қатор мағлубиятларга учраганлиги сабабли араб мамлакатларидағи ахвол ҳам тубдан ўзгарди. Энди туркларга қарши мухолифат кучайиб, баъзи холларда очик қаршилик кўрсатиш йўлига ўта бошлади. Усмонийлар бошқариш принциплари ва тизимининг асосларини қайта кўриб чиқишига мажбур бўлди.

1704 йили султон Аҳмад II (1703–1730) Бағдод пошоси қилиб албан қавмидан чиқкан, Истамбулда яхши таълим олган Аюб Ҳасан пошони тайинлади. Шу даврдан бошлаб Ироқни бошқариш сиёсий тизимининг характеристи ўзгарди. Бу ўзгариш шунда намоён бўлдики, маҳаллий пошоларни марказий ҳукумат томонидан тайинлашга барҳам берилди. Аюб Ҳасан пошонинг ўзи Бағдодни 20 йил бошқарди ва амалда ўз сулоласига асос солди. Бу хусусда Россиянинг Бағдоддаги консули А. Адамов шундай ёзади: «...Ҳасан пошонинг Бағдодда пайдо бўлиши билан Туркия таркибида бўлган Ироқ тарихининг иккинчи босқичи бошланди. Бағдод пошоси ўз қўй остига шимолий ва жанубий Ироқни, шунингдек, бутун Месопотамияни ва Жанубий Курдистонни бирлаштириб, Истамбулдан деярли мустақил равишда бу ерларнинг тақдирини ҳал қилувчига айланди»². Бундан ташқари Ҳасан пошо ва унинг вориси – ўғли Аҳмад пошо мамлуклар гвардиясини ташкил қилдилар ҳамда бу билан мамлуклар режимининг шаклланиши ва ривожланиши учун замин яратдилар. Кўпчилик ҳолларда мамлуклар сотиб олинган куллар эмас, Грузия ва Кавказ ортининг бошқа мамлакатларидан

¹ Пиастр – кумуш танга, 120 акчага тенг. Туркча кумуш танганинг европача номланиши.

² Новая история стран Азии и Африки: Учеб. для студ. высш. учеб. заведений / Под ред. А.М. Родригеса: В 3 ч. – М.: Гуманит. изд. центр ВЛАДОС, 2004. – Ч.3. С. 32.

қариндошларини кига келиб, ўз хоҳиши билан хизматга киргандар эди. Тез орада мамлуклар факат ҳарбий эмас, балки маъмурий элитанинг ҳам асосини ташкил қилди.

Аюб Ҳасан пошо ўзининг маъмурий аппаратини шакллантириди. Унинг буйруғи билан маҳсус мактаб очилиб, унда қул болалар ўқитилди. Мактабни битиргандан сўнг улар ҳарбий ва маъмурий лавозимларни эгаллайдилар.

1683–1699 йиллари «Муқаддас лига»га қарши урушда Усмонийлар мағлубиятга учраб, Европадаги бир қатор ерларидан ва улардан тушадиган солиқлардан ажралдилар, империянинг ички сиёсий ва иқтисодий ахволи ёмонлашди. Эроннинг бостириб кириш хавфи ҳам сакланиб қолаётган эди. Шундай қийин ҳолатда Аюб Ҳасан пошонинг Мосул, Басра ва Шахризор эйалетларини унга қўшиб бериш ҳақидаги таклифини Порта қабул қилишга мажбур бўлди. Бу жараён 1715 йили якунланди.

Энди Ироқдаги барча лавозимлар Бағдод хукмдори томонидан тайинланадиган бўлди. Бирлаштирилган эйалетлардан тушадиган солиқлар ҳам Истамбулга эмас, Бағдод хазинасига тушарди ва унинг бир қисми Истамбулга жўнатилиб, қолган қисми Бағдод пошоси ихтиёрига ўтарди.

Шундай қилиб, XVIII асрдан бошлаб Ироқ ўзининг яхши шаклланган бошқарув тизимиға, жанговар қуролли кучларига, катта худудга ва етарли автономияга эга бўлиб, расмангина Усмонийлар империяси таркибиға кираради. Аюб Ҳасан пошо вафот этгандан сўнг ўғли Аҳмад 1724–1734 ва 1736–1747 йиллари ҳокимиятни бошқарди.

1749 йили Бағдод пошоси қилиб тайинланган Сулаймон пошо Абу Лейла мамлук гвардияси таркибидан чиққан Бағдоднинг биринчи хукмдори эди. 1780 йили Бағдодда ҳокимиятга Буюк Сулаймон келади ва 1802 йилгача Ироқни бошқаради. Буюк Сулаймон даврида мамлукларнинг таъсири янада кучайди. Деярли барча асосий лавозимлар ва катта ерлар улар қўлида тўпланди. Буюк Сулаймон курдлар ва бадавийларнинг қўзғолонларини бостириб, мамлакатда нисбатан барқарорликни таъминлади. Унинг даврида шаҳарлар кенгайиб, янги ҳимоя иншоатлари, аслаҳа омборлари, кўприклар ва бозорлар қурилди, масжидлар ва саройларни тиклаш ишлари олиб борилди.

Арабистон ярим ороли

Бу ер араб дунёсининг энг қолоқ худудларидан бири эди. Ярим оролда феодал тартиблар билан бирга ибтидоий муносабатлар қолдиклари ва қулчилик ҳам кенг тарқалган. Кўчманчи-бадавийлар ва воҳанинг ўтрок аҳолиси кўплаб душман қабилаларга бўлиниб кетганди. Арабистон аҳолисининг хўжалик эҳтиёжлари ҳамда чет эл босқинчилари (Усмонийлар империяси, Эрон ва европалик мустамлакачилар) хавфи майда амирликларнинг бирлашиш тенденциясини туғдирди. Бирлашиш ўта мураккаб, зиддиятли, иқтисодий ва сиёсий колоқлик шароитида амалга оширилди. Чунки Мұхаммад давридан то вахҳобийлик пайдо бўлгунгача Арабистонда ягона ҳокимият ва барқарор тинчлик бўлмаган эди. Асрлар давомида у майда-майда давлатларга, кўчманчи қабилаларга ва уларнинг иттифоқига бўлиниб, тўхтовсиз ўзаро урушлар олиб бораради. Алоҳида воҳалар ва қабилаларнинг иқтисодий тарқоқлиги, мустақил хўжалик юритишга мослашганлиги, чўл ярим оролнинг бепоёнлиги, аҳоли яшаш жойларининг бир-биридан баъзан юзлаб километр узоқликда жойлашганлиги сиёсий тарқоқликнинг асосий сабабларидан эди. Араб аҳолисининг қабилачилик ва маҳаллийчилик одатлари, шевалардаги фарқ, диний тасаввурларнинг хилма-хиллиги ҳам бирлашишга тўсиқ бўлаётганди. Умумий душманга қарши кураш зарурати қабилаларни бирлашишга ундаётган асосий фактор эди.

Саудия Арабистони. Шундай қилиб, Арабистон ярим оролидаги бирлашиш жараёни бир қатор нисбатан майда давлатларнинг ташкил топиши билан яқунланди.

Анча қизғин бирлашиш ҳаракатлари Арабистон ярим оролининг шимоли-гарбий худудларида, Нажд амирликларида юз берди. Араб қабилаларининг бу ердаги ҳаракати вахҳобийларнинг диний таълимоти байроғи остида кечади.

Бу таълимотнинг асосчиси наждлик Мұхаммад ибн Абд ал-Вахҳоб (1703–1787) бўлиб, у XVIII аср 30-йилларидан эътиборан исломни «асл ҳолатига қайтариш» учун районятни даъват эта бошлиди.

Бу пайтда мусулмонларнинг бирлашиш жараёни ўз манфаатларига мос тушмаслигини сезган Фарб давлатлари бу жараённи тўхтатиш мақсадида мусулмонлар ўртасига нифоқ солиш учун ҳаракат қилдилар. Шу вазифа билан мусулмон давлатларига кўплаб

хуфиялар жўнатилди. Шулардан бири, турк, форс ва араб тиллари-ни, Куръонкаримни ва ҳадисларни мукаммал билган Хампер исмли шахс «Шайх Мухаммад» номи билан Арабистонга келади. У Басрада таълим олаётган Мухаммад ибн Абд ал-Вахҳоб билан танишиб, ундан ўз мақсадлари йўлида фойдаланади. Бу мақсаднинг асосини исломни ич-ичидан бузиш сиёсати ташкил қилиб, у қуидаги йўналишларда амалга оширилган: мусулмонларни христиан динига ўтказиш; айрим шахсларнинг пайғамбарман деган даъво билан чиқиб, одамларни ортидан эргаштиришини қўллаш ва мусулмонларни бўлиб ташлаш; «Ислом дунёвий янгиликларни қабул қила олмайди» деган шубҳаларни уйғотиш.

Ўзини «Нажддан чиқкан пайғамбар» деб даъво қилган Мухаммад ибн Абд ал-Вахҳоб ўз таълимоти билан шу сиёсатга хизмат қилди.

Нажддаги унча катта бўлмаган Дарьийя давлатининг амири Мухаммад ибн Сауд (1765 йили вафот этган) ва унинг ўғли Абдул Азиз (1765–1803) 1744 йили Мухаммад Абд-ал Вахҳоб билан иттифоққа киришиб, ваҳҳобийлик¹ таълимотини қабул қилади. Саудлар хонадони шу таълимот асосида Нажднинг бошқа амирликларини ҳам бўйсундириш учун кураш бошлаб юборди. Бу кураш 1786 йили Наждни ягона диний давлатга айлантириш билан якунланди. Шу тариқа XVIII асрда Арабистонда мусулмон ислоҳотчилари – ваҳҳобийларнинг Саудлар давлати пайдо бўлди. Бу давлат Арабистон ярим оролининг катта қисмини қамраб олди (марказий, шимолий ва шарқий вилоятлар, қадимда Нажд, Ҳижоз ва Ал-Хоса деб аталган).

Ҳижоз худудида ислом дунёсининг иккита муқаддас шаҳри – Макка ва Мадинанинг жойлашганлиги Арабистон тарихида жуда катта аҳамиятга эга бўлди. Мусулмон дунёсида ҳарбий ва иқтисодий салоҳияти кучайган ҳар бир давлат шу икки шаҳарни эгаллашга интилган. Бундан ташқари ҳар йили бутун дунёдан миллионлаб мусулмонлар бу ерга ҳаж сафарига келадилар.

Абд ал-Вахҳобнинг вафотидан сўнг Саудлар ваҳҳобийларнинг диний раҳбарига ҳам айланиб, ўз ғоялари ва ҳокимиятларини бошқа худудларга ҳам ёйиш учун кураш бошладилар. XVIII аср охири – XIX

¹ Абд-ал Вахҳоб тарафдорлари ўзларини ҳеч қачон ваҳҳобийлар деб атамайдилар, оддийгина килиб мусулмон деб атайдилар. Вахҳобий атамасини 1814–1815 йиллари Арабистонга келган машхур саёҳатчи И. Букхардт киритган. Вахҳобийларнинг таълимотида ахлоқ нормаларига жуда катта эътибор берилганлиги ва бу нормаларга катъи риоя этилганлиги сабабли дастлаб уларни «саҳро пуританлари» ҳам деб аташган.

аср бошларида улар Форс қўрфази ва Қизил денгиз қирғоқларидағи ерларни бўйсундирди, Ҳасу, Уммоннинг катта қисми, Баҳрайн, Қувайт, Хижоз (Макка шаҳри билан) ни ҳам бирлаштириб, шу тариқа деярли бутун Арабистон ярим оролини ўз ҳокимияти остига олдилар. Кейин Сурия ва Ироқ учун уруш бошланди. Ваҳҳобийлар турк пошоларининг кўшинларини тор-мор қилдилар, аммо Сурия ва Ироқда аҳоли уларни Арабистондагидек кўллаб-кувватламади.

Яман. XVII асрдаёқ Яманда турк босқинчиларига қарши қўзғолон бошланди. Бу қўзғолонга зейд мазҳаби раҳбарлари, хусусан, имом ал-Мансур Қосим бен Муҳаммад бошчилик қилиб, бу айни пайтда майда амирликларни бирлаштириш учун ҳам қилинган уриниш эди. Зейллар VIII асрда яшаган Зейд ибн Алининг издошлари бўлиб, улар суннийлар билан шиалар оралиғидаги оқим эди. Қўзғолончилар 1613 йили Ал-Куфла яқинида бўлган жангда турк кўшинларини мағлубиятга учратиб, мамлакатнинг шимолини тўлик озод қилдилар.

Зейллар туркларни қувиб чиқаргандан сўнг мустақил Яман имомлигини ташкил қилди. Уларнинг раҳбари – имом диний ва дунёвий ҳокимиятни ўз кўлида бирлаштирган эди. Бу давлатнинг барқарор чегаралари мавжуд эмасди.

1620 йили Қосим вафот этгандан сўнг имом қилиб унинг ўғли ал-Муайяд Муҳаммад сайланди. 1638 йили унинг кўшинлари Санани қамал қилиб, шаҳар остоналарида турк кўшинларини тор-мор келтирди ва Яман худудини Ҳижоздан Аденгача озод қилишди.

Маълум муддатга мамлакатда барқарорлик ўрнатилиб, хўжалик ва савдонинг ривожланиши учун имкониятлар пайдо бўлди. Бироқ дастлабки имомлар даврида вужудга келган нисбатан тинчлик ва барқарорлик узоққа чўзилмади. Имом ҳокимияти унинг шахсий обрўсига ва аскарларининг кучига таянган эди. Турклар қувиб чиқилиши билан аҳолини зейллар байроби остига бирлаштирган сабаб ҳам йўқ бўлди.

Турли вилоятлардаги феодаллар ўртасида айирмачилик харакатлари кучайди; имомнинг доимий содиклар тизимини йўлга қўйиш учун қилган ҳаракати қабилалар ўртасида норозилик келтириб чиқарди. Айrim худудларда сохта имомлар пайдо бўлди. Имом Муҳаммад ал-Маҳди хукмронлиги даврида (1687–1718) марказий ҳокимиятга қарши бени хушейш, ҳамдан, бени харис қабилаларининг қўзғолони бошланди. Қўзғолон кейинги имомлар даврида ҳам даъ-

вом этди. 1728 йили Лахеж ноиби имом ҳокимиятини тан олишдан бош тортди. Кейин Яфа, Аулак, Аудали, Дала ва бошқа бир қатор худудлар ҳам имом ҳокимиятини тан олмай кўйдилар.

XVIII аср охири – XIX аср бошларига келиб имомлар фақат Санада реал ҳокимиятга эга эди. Шунда ҳам давлат ишлари билан имомнинг қудратли вазирлари шуғланар, имомлар эса улар қўлида борган сари қўғирчоққа айланиб бораётган эди.

Уммон. Арабистон ярим оролининг жануби-шарқида жойлашган Уммон қадимдан Буюк Ипак савдо йўлининг муҳим тармоғи ҳисобланган. 1453 йили Константинополнинг турклар томонидан зabit этилиши натижасида европаликлар Осиё билан янги савдо йўлларини излашга мажбур бўлдилар. 1507 йили адмирал Альфонсо де Албукерка бошчилигидаги португал денгиз қўшини Уммоннинг кирғоқ бўйи шаҳарларини забт этди. Бир неча ой ичида қирғоқ бўйини талаб, Ормуз оролида ўрнашиб олдилар. XVII аср биринчи чорагида Эрон шоҳи Аббос I Англияning Ост-Индия компанияси ёрдамида потугалияликларни Ормуздан қувиб чиқарди. Эроннинг ғалабаси маҳаллий ахолига португалияликларнинг ночорлигини кўрсатиб берди. Бундан илҳомланган қабилалар бошлиқлари 1624 йили Уммон имоми қилиб Носир бин Муршид бин Султон ал-Ярибни сайладилар. У европаликларга қарши муваффакиятли кураш олиб борди. Бироқ мамлакат ичкарисида қабилалар ўртасида ҳокимият учун кураш тўхтамади. Натижада ўзаро урушлардан толиқкан Уммонга 1738 йили эронликлар бостириб кирдилар. Улар Маскат ва муҳим стратегик шаҳар Соҳарни эгаллаб олдилар. Шунингдек, ал-Хоса ва Бахрейн ҳам эронликлар қўлига ўтди. Эронликларга қаршилик ҳаракатига Соҳа ҳокими Аҳмад бин Сайд Ал Бу Сайд бошчилик қилди. У йўқотилган ерларнинг катта қисмини қайтариб, 1749 йили янги имом қилиб сайланди. Шу тариқа ал-Яриба сулоласи ўрнига Бу Сайд сулоласи келиб, то ҳозирги кунгача хукмронлик қилмоқда.

XVIII аср 40-йилларида эронликлар зулмидан озод бўлиб, ўз мустақиллигини тиклаган Уммон, қисқа вақт ичида нисбатан катта ва кучли имомликка айланди. Унинг ҳокимияти Уммондан ташқари Занзибар оролига (Шарқий Африка) ва Форс қўлтибининг шарқий худудларига ҳам жорий қилинди.

1783 йили Бахрайн оролларидан эронликлар қувилгандан сўнг бу ерда ҳам мустақил араб давлати юзага келди. Ҳокимиятга кел-

ган Аҳмад бен Муҳаммад ал-Халифа (1782–1790) Баҳрайндаги ал-Халифа шайхлар сулоласига асос солган бўлиб, бу сулола ҳозиргача хокимиятда турибди.

XVIII аср биринчи ярмида Арабистон ярим оролида турклар зулмидан озод бўлган яна бир мустақил давлат – Қувайт амирлиги пайдо бўлди. Унинг биринчи сайланган амири шайх Сабах ибн Жабар ас-Сабах (1756–1762) ҳозирги Қувайт худудидаги барча қабилаларни бирлаштириб, Қувайт амирлигини тузди. Ас-Сабахлар хонадони бугунги кунда ҳам амирликни бошқармоқда.

XXIX боб бўйича саволлар

1. Янги давр бошларида Суриянинг демографик ҳолати ва диний таркиби қандай ўзига хос жиҳатларга эга эди?
2. Сурияning усмонийлар томонидан забт этилиши иқтисодий ва ижтимоий муносабатларда қандай ўзгаришларга олиб келди?
3. Усмонийлар Сурия вилоятларини бошқариш тизимида қандай ўзгаришларни амалга оширди?
4. Ирок Усмонийлар империяси таркибига кирганидан сўнг уни бошқариш тизимида қандай ўзгаришлар юз берди?
5. Усмонийлар даврида Ирокда ерга эгалик қилиш ва солиқ тизимида қандай ташкил қилинган эди?
6. Арабистон ярим оролининг бирлашишида нега ваҳҳобийлик ғоявий асос бўлиб хизмат қилди?
7. Яман имомлигининг давлат тузилишида қандай ўзига хос жиҳатлар ва муаммолар мавжуд эди?

VI БЎЛИМ

XVI–XVIII АСРЛАРДА АФРИКА ХАЛҚЛАРИ.

XXX БОБ. АФРИКАДАГИ АРАБ МАМЛАКАТЛАРИ

Миср. XVI асрда кўпчилик араб мамлакатлари Усмонийлар томонидан босиб олинди. Мамлуклар хукмронлиги остида бўлган Миср ҳам биринчилардан бўлиб ўз мустақиллигини йўқотди. 1517 йилнинг бошида Қохирани эгаллаган Салим I армияси Миср пойтахтини талади ва вайрон қилди.

Турклар истилоси мамлакатдаги мавжуд ижтимоий-иктисодий муносабатларга катта ўзгариш киритмади. Фақат мамлукларнинг сиёсий ҳокимияти ағдарилиб, барча феодаллар ўз мулклари ва имтиёзларини сақлаб қолдилар. Миср алоҳида пошоликка ажратилган бўлиб, амалда ярим мустақил давлат эди. Олий хукмдор Истамбулдан тайинланадиган пошо ҳисобланарди. У мамлакатни ўз девони ёрдамида бошқарарди. Девон таркибига давлат аппаратининг йирик амалдорлари, мамлук амирлари, олий мансабдаги руҳонийлар, турк гарнizonининг қўймондонлари, шариат судининг раиси киради. Девоннинг энг ҳурматли аъзоси мамлук зодагонларининг раҳнамоси бўлган мамлакат шайхи ҳисобланарди.

Маҳаллий бошқарув ҳокимияти тўлиқ мамлук амирларининг қўлида сақланиб қолди. Турклар мамлукларнинг бошқарув маҳорати, маҳаллий шароитни, аҳолининг урф-одатларини яхши билишидан ўз манфаатларида фойдаландилар.

Барча ерларнинг олий мулқдори деб турк султони эълон қилинди. Бу ҳуқуқ барча ҳайдаладиган ерлардан солиқ йигишида ўз ифодасини топди. Баъзи ерлар ҳазина фондига киритилди ёки султон мулкига айлантирилиб, маҳсус вакиллар томонидан бошқараладиган бўлди. Бу ерлардан олинадиган барча даромад султон саройининг харажатлари учун сарфланарди. Ҳазина фондига киритилган ерлардан олинган даромад муқаддас шаҳарлар – Макка ва Мадинага ва бошка ҳайрия мақсадларига ҳам сарфланади.

Мисрда ер эгалиги ва олинадиган солиқлар миқдорини белгилайдиган хужжат – «Қонуннома-и Миср» 1525 йили қабул қилиниб, унда дехқонлар ва йирик ер эгалари бўлган мамлук амирлари, бейлари, мултазимлар ва мулғозимларнинг мақомлари, ҳуқуқ ва мажбуриятлари белгилаб берилди.

Мултазимлар дастлаб ерни тўрт йил муддатга сотиб олиш ҳуқуқини олган бўлсалар ҳам аслида ерларини ҳақиқий мулкка айлантириб олдилар. Улар хазинага маълум миқдорда пул тўлаб, эвазига дехқонлардан олинадиган барча йигимларни ўзлари олишарди. Айрим тарихчиларнинг ҳисоб-китобига қараганда мултазимлар хазинага тўладиган пул улар дехқонлардан йиғиб оладиган пулнинг 4 фоиздан 40 фоизгачасини ташкил қилган. Солиққа тортиш ва солиқларни йиғиб олиш тизими қишлоқ ҳўжалигининг ривожланганлик даражасига мослаштирилган эди. Экиш мавсуми, ернинг сифати, суғорилиш ва етиштириладиган экинлар ҳисобга олинар эди.

Асосий қишлоқ ҳўжалик экинлари буғдой, арпа ва бир қатор дуккакли экинлар ҳисобланарди. Турклар истилосидан сўнг Миср дехқонларининг (уларни фаллах деб аташган) асосий экини маккаждӯхори бўлиб қолди. Бу даврда Нил дарёсининг ҳавзасида шоли экиладиган майдонлар ҳам анча кенгайди, шакарқамиши майдонлари эса қисқартирилди. Миср қишлоқ ҳўжалигида пахтанинг ўрни ҳам катта эди. Дехқонлар қишлоқ ҳўжалик экинларидан ташқари мевали дараҳтлар, хурмо ва узумлардан ҳам солиқ тўлашарди.

Хунарманд ва савдогарлар ҳам солиққа тортилган. Хунарманлардан устахона оқсоқоллари солиқ йигишарди, давлат солиги умумий маҳсулотнинг 5% ни ташкил қиласарди. Савдогарлар савдо корхоналаридан, кемаларидан, карвонлар ва бозорлардан солиқ тўлашарди. Турклар ҳокимияти ва маҳаллий зодагонлар аҳоли фаoliyatinining ҳамма жабҳаларини ҳисобга олар ва барчасини солиққа тортишга ҳаракат қиласарди. Шоир ва ёзувчилар фаoliyati деярли даромад келтирмасада, 1568 йили улар ҳам солиққа тортилади.

Усмонийлар империясининг кучсизланиши аста-секин Мисрда мамлуклар сиёсий ҳокимиятининг тикланишига олиб келди.

XVII асрдан бошлаб Мисрнинг иқтисодий таракқиётида бир қатор янгиликлар кўзга ташланади. Саноатнинг баъзи, айникса экспортга ишлайдиган, тармоқларида мануфактура ишлаб чиқаришига ўтила бошлади. Айрим шаҳарларда тўқимачилик саноатида ману-

фактуралар ташкил қилинди. Маҳалла-Кубр шаҳридаги энг йирик мануфактураларда 800 тадан 1000 тагача ёлланма ишчилар ишларди. XVIII аср охирига келиб Қохирада 15 минг ёлланма ишчи ва 15 минг ҳунарманд фаолият кўрсатарди. Ёғ ва қанд ишлаб чиқарувчи заводларда ҳам ёлланма меҳнатдан фойдалана бошланди.

Ишлаб чиқариш техникиаси хали ўта оддий бўлсада, мануфактуралардаги ички меҳнат тақсимоти маҳсулотларнинг кўпайишига олиб келди. Натижада ички ва таши савдо тез ривожланди. Миср Европа ва қўшни Осиё давлатлари билан қизғин савдо муносабатларини олиб борди. XVIII аср охирига келиб фақат Қохирада чет эллар билан савдо қиласидиган 5 мингта савдогар фаолият юритарди.

1769 йили, рус-турк урушидан кейин вужудга келган муҳитдан фойдаланиб, мамлук ҳукмдори Али-бей Мисрнинг Усмонийлар империясидан мустакиллигини эълон қилди, ҳамда «Миср ва иккала денгизнинг султони» унвонини олди. Дастлаб Али-бейнинг ҳаракатлари муваффақиятли давом этди, аммо мамлук бейлари билан бўлган қуролли тўқнашув Алибейнинг мағлубиятига олиб келди. Натижада турклар ҳокимияти қисман тикланди.

Мамлук зодагонларининг ўзаро урушлари Мисрнинг иқтисодий аҳволига ёмон таъсир кўрсатди. Уларнинг ўзбошимчалиги, дехқон ва ҳунармандлар устидан қилган золимликлари мамлакатда норозиликни кескин кучайтирди. Айниқса дехқонларнинг аҳволи оғирлашди. XVIII аср охирида француз тадқиқотчиси Эстев Миср қишлоқларидан бирида 70 дан зиёд солиқ турини санаган. Турк ҳукмронлиги ва мамлукларга қарши мамлакатда бошланган ҳалқ ҳаракатига Қохирадаги ал-Азҳар масжидининг таниқли шайхлари бошчилик қилдилар. Уларнинг чақириғига биноан 1795 йил ёзида Қохиранинг ҳунармандлари ва савдогарлари ўз дўконларини ёпдилар. Мамлук ҳукмдорлари шайхлар билан музокара бошлашга, зўравонлик ва қонунсизликларга чек қўйилишига ваъда беришга мажбур бўлдилар.

Ал-Азҳар масжиди шу даврда бошланган француз босқинига қарши ҳалқ ҳаракатининг ҳам марказига айланди. 1798 йили Қохирани забт этган Наполеон Бонапарт «Оллоҳ, унинг пайғамбари ва Куръонни хурмат қилиши»ни айтиб, Мисрни мамлуклар зулмидан озод этувчи халоскор қилиб ўзини кўрсатишга ҳаракат қилган бўлсада, шаҳар ва қишлоқларга француслар солган солиқ мамлув-

кларнидан анча юқори эди. Шу сабабли 1798 йил 21–23 октябрь кунлари Қохирада Ал-Азҳар масжидининг шайхлари бошчилигига французларга қарши кўзголон кўтарилиди. Наполеон жуда қийинчилик билан бўлса-да қўзғолонни бостириди. Мисрда француз армиясининг келажагини тушунган ва мамлакатда сиёсий аҳволнинг тайнисизлигидан Наполеон бу ерни тарк этди. Унинг ўрнига келган генерал Клебер 1800 йили 24 январда Ал-Ариш деган жойда турклар билан сулҳ имзолади. Аммо Англия туркларни бу келишувдан воз кечишга мажбур қилди. Бунга жавобан генерал Клебер бошчилигига француз кўшинлари Гелиополис ёнидаги жангда туркларни тор-мор килди. Шу пайт Қохирада ҳалк кўзғолони кўтарилиб, шаҳардаги турклар ва мамлук бейлари томонидан қўллаб-кувватланди. Бир ой давом этган шиддатли жанглардан сўнг, Клебер кўзғолонни бостиришга муваффак бўлди. Шу даврда Ўрта Ер денгизида ҳаракат олиб бораётган адмирал Ушаков бошчилигидаги рус флотининг фаолияти туфайли Мисрдаги француз армиясининг ҳолати анча сусайди. Бунинг устига 1800 йил 14 май куни турклар томонидан жўнатилган қотил Клеберни ўлдирди. Унинг ўрнига келган генерал Ману Мисрга туширилган инглиз экспедицияси билан бўлган муваффакиятсиз жанглардан сўнг, 1801 йил баҳорида таслим бўлиш ҳақида актни имзолашга мажбур бўлди. Шу йили сентябрда француз армиясининг қолдиқлари Мисрни тарк этди.

Жазоир. XIII асрдан бери Ўрта Мағрибда хукмронлик қилиб келган Зайянийлар Сахрои Кабир атрофидаги кўчманчилар билан хамда кучлироқ бўлган қўшнилари – тунислик Ҳафсидлар ва марокашлик Меринидлар билан узоқ давом этган курашдан сўнг XV аср охирида ўз ҳокимиятларини йўқотдилар. Тўхтовсиз ўзаро урушлар оқибатида Жазоирда савдо, дәхқончилик, хунармандчилик ва шаҳарсозлик инқиrozга юз тутди.

Шунга қарамасдан Европа мамлакатларида Жазоир ҳали ҳам жанговар мамлакат сифатида донг таратган ва обрўга эга эди. Жазоир корсарлари (қароқчилари) Европа давлатларининг кемаларини кўлга олар ва ҳатто Испания ва Италиянинг портларига хужум уюштиради, бу эса христианларнинг савдосига ва хавфсизлигига катта путур етказаётган эди. Аслида каталониялик, генуялик ва сицилиялик корсарлар ҳам араблардан ортда қолишмаётганлиги туфайли бутун Ўрта Ер денгизининг Фарбий қисми тинимсиз денгиз жанглари майдонига айланган эди.

XVI аср бошларида Арагон ва Кастилияning қироли Фердинанд II «Африкага салиб юриши»ни ташкил қилди. Мусулмонларнинг Испаниядаги таянч пункти – Гранада амирлигининг тор-мор қилиниши (1492) бу юришга имконият яратиб берди. 1505 йили ёк испанлар Жазоирнинг кирғоқ шахри Мерс ал-Кабир портини, 1508 йили йирик Оран портини, 1510 йили қароқчиларнинг Беджай республикасини забт этдилар. Шу йиллари испанлар Жазоирнинг яна бир катор портларини ўлпон тўлашга мажбур қилди.

Испанлардан озод бўлишга харакат қилган Жазоирнинг қирғоқ бўйи ахолиси жиҳод («мұқаддас уруш») байроғини кўтарган мусулмон корсарларни қўлладилар. Улар ичида усмонийлардан чиққан гози (дин йўлида курашчи) Аруж катта обрўга эга эди. Асли Митилин (Лесбос) оролидаги славян-грек оиласидан чиққан бу шахс Фарбий Ўрта Ер денгизида қароқчилек билан шуғулланган, испан кемаларини талаган ва минглаб морискларни Мағрибга олиб кетган. Унинг гурухига юзлаб авантюристлар келиб қўшилади ва эскадраси 20 та кемадан ошиб кетади. 1516 йили Жазор шахрини эгаллаб, бутун ғарбий Жазоирни ўзига бўйсундирди. Аммо 1518 йили Телемсен қалъасини испанлардан ҳимоя қилиш чоғида ҳалок бўлди.

Аруж вафотидан сўнг Жазор корсарлари унинг укаси Хайриддин Барбароссани (Сарик сакол) ўзларига бош деб тан олишдилар. Хайриддин испанларга қарши курашда ёрдам сўраб Усмонийларга мурожаат қилди. Туркия султони Салим I Ёвуз Шимолий Африкада ўрнашиб олиш учун жиҳоддан фойдаланишга уринди ва Хайриддинга бейларбейи унвонини берди, Жазоирга йирик яничарлар корпусини, ҳарбий кемалар, артиллерия ва молиявий ёрдам жўнатди.

Туркларнинг ёрдамига таянган Хайриддин бирин-кетин Жазоир шаҳарларини испанлардан озод қилди, ҳукмронлик йилларида Испания қирғоқларига еттита экспедиция ўюштириб, у ердан мажбуран христианликка ўтказилган 70 минг андалусиялик мусулмонларни (морисклар) Жазоир ва Тунисга олиб келди.

Хайриддиндан кейин Жазоирни бошқарган Ҳасан пошо (1544–1552) ҳам отасининг сиёсатини давом эттириди. Жазоир Истамбулга расмангина бўйсунса-да, Ҳасан пошонинг ўзи деярли мустақил сиёсат олиб борди. Порт – қалъа Оран XVIII аср охиригача испанлар қўлида сақланиб қолди.

Хайриддин ва унинг ворислари даврида шаклланган Жазоирнинг ҳарбий-сиёсий тизими XIX аср бошларигача ўзгармасдан колди.

XVII аср инқиrozлар, корсарлар билан яничарлар ўртасида тинимсиз курашлар, ғалаёнлар, фитналар билан ўтди. Аср бошида бейларбейи лавозимининг қисқартирилиши яничарларга корсарлардан ўч олиш имконини яратди. Истамбулдан жўнатилган пошолар яничарлар қўлида қўғирчоқ эди, холос.

Бироқ яничарларнинг ҳокимияти қўпга чўзилмади. 1671 йили қароқчилар тоифаси ҳокимиятни қайтариб олишга эришди. Корсарлар раиси навбатдаги фитнани уюштириб, яничарлар оғасини ҳокимиятдан ағдарди ва корсарлар ўзларига янги раҳбар – дей¹ сайладилар. Ҳар икки ойда алмашган яничар оғадан фарқли равища дей бир умрга сайланди ва айнан шу ҳол Жазоирда ҳокимиятнинг барқарорлашувига олиб келди. 1689 йили яничарлар девони ва корсарлар раислари ўзаро келишувга эришиб, биринчи марта биргаликда дей сайлашдилар. 1711 йили дей Боба Али Шауш Порта жўнатган навбатдаги пошони Жазоирдан чиқариб юборди ва пошо унвонини унинг ўзига бериш лозимлигига Истамбулдагиларни ишонтирди. Айни пайтда Жазоир султонга доимий ўлпон тўлашни ҳам тўхтатди.

XVII аср 60-йиллари XVIII аср бошлари Жазоир минтакада гегемонлик учун Мароқаш сultonлари ва Тунис бейлари билан кураш олиб борди. Бу урушлар доимий бўлмасдан Шимолий Африканинг сиёсий харитасига деярли таъсир қилмади.

Жазоирнинг XVII асрдаги иқтисодий ривожланиши халқаро алоқалари деярли тўлиқ қароқчилик фаолияти билан боғлиқ эди. Бу давр Фарбий Ўрта Ер денгизи худудида денгиз қароқчилиги энг авжига чиқкан пайт эди. Биргина мисол, 1613 йилдан 1621 йилгacha, яъни 9 йил ичida жазоирлик корсарлар ўзларининг тунислик «ҳамкаслари» билан бирга голландларнинг 447 та, французларнинг 193 та, испанларнинг 120 та, инглизларнинг 60 та кемаларни қўлга олганлар. Бу ёқиб юборилган ва чўқтирилган кемаларни хисобга олмаганда. Албатта савдода асосий «товар» қўлга олинган европаликлар эди. Масалан, Жазоирда доимий ваколатхонасига эга бўлган тринитарийлар монахлик ордени XVII аср давомида 30

¹ Дей – Усмонийлар армиясида яничарлар корпуси – ожакларда қуйи погона командирлар таркиби шундай деб аталган.

минг европаликни сотиб олган. Мамлакат пойтахтининг 100 минг аҳолиси бўлиб, бундан ташқари 25–30 минг христиан асиirlар ҳам сақланарди. Қароқчилик ҳисобидан шаҳар жуда тез кенгайиб ва бойиб борарди.

XVIII асрда ҳам Жазоир Усмонийлар империясининг эйалети ҳисобланар, амалда суверен давлат эди. Бу аср нисбатан барқарор ҳокимият тизими билан характерланади. 1710 йилдан 1798 йилгача ҳокимиятда бўлган 10 та дейдан факат учтаси сарой тўнтишларида ўлдирилган. Аср охириларига келиб корсарлар яна фаоллашди. 1775 йили Испания томонидан амалга оширилган ҳужум европаликларга ҳеч қандай наф келтирмади. Испанлар бир неча муваффакиятларсиз уринишлардан сўнг 1786 йили Жазоир дейи Мухаммад бен Осман билан тинчлик сулҳи тузишга, 1792 йили эса Фарбий Жазоирнинг бош шаҳри Оранни жазорликларга топширишга мажбур бўлди.

Испания билан тузилган тинчлик шартномаси Жазоирда қароқчилик анъаналарининг жонланишига олиб келди. Жазоир корсарлари Италиян давлатлари, Прусия ва АҚШнинг кемаларига қатор ҳужумлар уюштирилдилар. Мустақиллик учун урушда ғалаба қозонганд АҚШ хукумати 1795 йили Жазоир билан тинчлик шартномасини имзолашни, корсарларга навигация¹ асбобларини етказиб бериш ва контрибуция тўлаш мажбуриятини олишни маъқул топди.

Ливия. «Ливия» тарихий географик атамаси ҳозирги маъносида XIX асрнинг охирида италиялик олимлар томонидан муомалага киритилган бўлиб, улар антик давр олимларидан олишган. Қадимги давларда бутун Шимолий Африка Ливия деб аталган.

Ливиянинг ижтимоий-иктисодий тараққиёт даражаси қўшни Миср ва Тунисга нисбатан паст эди.

XVI асрдан Ливияга европаликларнинг ҳарбий экспансияси бошланади. 1510 йили Триполи испан армияси томонидан забт этилди, яна 20 йилдан сўнг эса испанлар шаҳарни Мальта ордени рицарларига топширишди. Улар ўз худудларини тобора кенгайтириб боришли.

Арабларнинг маҳаллий бербер қабиласи доимий қаршилик кўрсатса-да, Триполини христианлардан озод қилишга қурблари етмасди. Шу сабабли улар 1519–1520 йиллари ёрдам сўраб Усмонийлар сultonни Салим I га мурожаат қилдилар. 1517 йили Мисрни забт этган турклар Шимолий Африкадаги позицияларини

¹ Навигация – кемалар юриши, қатнови, кема юргизиш санъати, фани.

мустаҳкамлашдан манфаатдор бўлганликлари учун Триполига Мурод оға бошчилигида унча катта бўлмаган қўшин жўнатишиди. Фақат XVI аср 30–40-йилларида Жазоир ва Тунисда муваффакиятли ўрнашгандан сўнггина турклар Триполи учун испанларга қарши кенг уруш бошлади. 1551 йили усмонийлар қўшини ва маҳаллий қабилалар шаҳардаги мальтиклар гарнizonини таслим бўлишга мажбур қилди. Кейин мусулмонларни озод қилиш шиори остида харакат килган турклар бутун Ливияни империяга қўшиб олдилар. Тарихий Ливия худуди Триполи эйалетига бирлаштирилди. Эйалет учта санжаклик – Триполи, Мисурат, Бенгози санжакликларига бўлинди.

Усмонийлар ўрнатган тартиб дастлаб хўжаликнинг ривожланишига олиб келди. Испанларга қарши узоқ йиллик урушлардан сўнг одамлар ўз яшаш жойларига қайтиш, вайрон қилинган хўжаликни, ирригация иншоотларини тиклаш, ерларга ишлов бериш имкониятига эга бўлдилар. XVI аср ўрталарига келиб Триполи Ўрта Ер денгизининг йирик порти, қул савдоси бозори ва Сахрои Кабирдан ўтадиган савдо йўлидаги чорраҳа мақомини қайтариб олди.

Аммо XVI аср 70-йилларидан Триполида бошқарув пошолардан яничарбошилар ва қароқчилар тўдабошиларига ўтгандан сўнг эйалетдаги ички ахвол кескин ёмонлашди. XVII аср биринчи чорагида Жазоир ва Тунисдаги сингари Триполида ҳам яничарлар томонидан сайланадиган дейлар ҳокимияти ўрнатилди. Бутун аср давомида Триполи дейлари билан Усмонийлар ўртасидаги муносабатлар зиддиятли ва нобарқарор бўлди. Дейларнинг 108 йиллик бошқаруви даврида 25 та ҳукмдор алмашди. Улардан баъзиларнинг ҳолатни барқарорлаштиришга қилган уринишлари яхши натижка бермади. XVIII аср бошларига келиб дейлар на мамлакат манфаатлари билан на Усмонийлар билан ҳисоблашмай қўйди. Улар асосан денгизда ва қуруқлиқда ҳарбий ҳаракатларни ташкил қилиш билан банд бўлди. Натижада мамлакат иқтисодий, ижтимоий ва маданий таназзулга юз тутди.

XVIII аср бошларida Усмонийлар ўрнатган тартиблар бекор бўлиши билан ижтимоий ва сиёсий ҳаётда маҳаллий анъаналарнинг тикланиши бошланди. Триполида бу анъаналарнинг давомчилари ўзига хос этник қатлам вакиллари – «қул ўғли»лар¹, отаси турк,

¹ Бу ерда қул одатдаги маъносида эмас, балки давлатнинг одами, давлат хизматчиси маъносида кўлланилган.

онаси араб бўлган, ўзлари ҳарбий мажбуриятни бажарадиган аҳоли эди.

XVIII аср бошларида яничарларнинг ўзбошимчалигига қарши тура оладиган куч бўлиб қулўғлилар отряди шаклланди. Уларнинг сардори Аҳмад Караманли бадавий қабилалари ёрдамида яничарларга қарши кураш бошлади. У дей Махмуд Абу Мувайсни ағдариб, 1711 йил 28 июль куни ҳарбий тўнтариш ташкил қилди ва 300 нафар яничарлар сардорлари қириб ташланди. 1713–1716 йиллари бутун мамлакат Аҳмад Караманли ҳокимияти остида бирлаштирилди. Порта мавжуд ҳолатни тан олиб, 1722 или Аҳмад Караманлини империянинг Триполидаги вакили қилиб тайинлади, унга бейларбейи ва пошо унвонларини берди.

XVIII аср бошидаги воқеалар натижасида Триполи эйалети мустақил давлатга айланиб, Истамбулга номинал бўйсунадиган бўлди, мустақил ички ва ташки сиёsat олиб борди. Янги сулоланинг биринчи вакили Аҳмад Караманли (1711–1745) даврида ёк эйалетнинг янги ижтимоий-сиёssий тузилиши шаклланди. Сулоланинг ижтимоий таянчи қулўғли жангчилари жамоаси бўлиб қолди. Яничарлар ожаки эса тарқатиб юборилди ва ҳарбий аҳамиятини ўқотди.

Қулўғлилар мамлакатда ҳарбий деспотия тузимини ўрнатдилар, маъмурий бошқарув ва солик тизимини мустаҳкамлади. Мустақил ташки сиёsat олиб бориб, Усмонийларнинг рухсатисиз 1729 или Франция билан, 1716 ва 1730 йиллари Англия билан, 1728 или Голландия билан ва 1726 или Австрия империяси билан тинчлик шартномаларини имзолади. Бироқ XVIII аср иккинчи ярми молиявий ва ижтимоий инқизорлар даври бўлди. Натижада 1793 или грек авантюристи Али Жазоирли 300 кишилик ёлланма қўшин билан хукмрон сулола вакили Али Караманлини ҳокимиятдан ағдариб, оиласи билан Тунисга қочишига мажбур қилди. Турклар томонидан ўрнатилган қатағон ва террор мухити аҳолини уларга қарши қўйди. Натижада Али Караманлининг кичик ўғли Юсуф Караманли (1795–1832) тунисликлар ёрдамида 1795 йил январда яна ҳокимиятни эгаллаб олди ва эйалетда олдинги тартибларни тиклади.

Тунис. XV аср охири – XVI аср бошларида Тунис чуқур инқизор даврига кирди. XIII асрдан бери Мағрибнинг ўрта ва шарқий қисмини бирлаштирган Ҳафсидлар давлати таназзулга тушди. 1488 или султон Усмон вафот этгандан сўнг олти йилда тўртта хукмдор

алмашди. Янги султон Абу Абдуллоҳ Мұхаммад V нинг бадавий қабилаларни бўйсундириш учун қилган ҳаракати Ҳафсидларнинг мағлубияти билан тугади.

XV аср охири – XVI аср бошларидағи шиддатли воқеалар сабабли Тунисда сиёсий тарқоқлик бошланди ва мамлакат Ўрта Ер денгизининг ўша пайтдаги кучли давлатлари – Испания ва Усмонийлар империясининг сиёсий манфаатлари тўқнашган жойга айланди. Бу икки давлат ўргасидаги кураш XVI аср 30-йилларида кескин тус олди. Усмонийлардан ёрдам олган Жазоир корсарлари Хайриддин Барбаросса бошчилигига Тунисга бостириб кирдилар. Тунис султони Мулай Ҳасан жанубга қочиб, Испания қироли Карл V га ёрдам сўраб мурожаат қилди. Бу ҳол шусиз ҳам обрўси тушиб кетган Ҳафсидлар сулоласини «ислом манфаатларига хоинликда» айблаш учун асос бўлди. Испанлар 400 та кемадан иборат жуда катта флот билан Тунис қирғокларига келди. Бироқ Карл V учун Тунисни эгаллаш катта таваккалчилик бўлиб туюлди ва у қирғок бўйида Ла Гулетт қалъасини қуришдан нарига ўтмади. Шу орада Усмонийлар султони Сулаймон I ва Мурод III Тунис тақдири билан жиддий қизиқишилар. Натижада 1574 йили 320 та кемада Тунис қирғокларига тушган 40 минг кишилик турк қўшинлари бу ерда испанлар хукмронлиги ва Ҳафсидлар сулоласи ҳокимиятига хотима ясади.

Туниснинг турклар томонидан забт этилиши бу ерда Усмонийлар сиёсий тартибининг ўрнатилишига олиб келди. Бироқ Африканинг бошқа жойларида бўлгани каби Тунисда ҳам Портанинг ҳокимияти расмий характерга эга эди ҳалос. Амалда мамлакатни дейлар ва яничарлар бошқаратган эди.

XVII асрдан Тунисда маҳаллий бейларнинг роли кучая бошлади. Ҳокимият бей Мурод Корсо (1612–1631) ва унинг ворислари Муродийлар кўлига ўтди.

Бироқ XVIII аср бошларида турк сипоҳийларининг сардорлари кучаяди. 1702 йили ҳарбий фитна оқибатидан Муродийлар ҳокимияти ағдарилади ва сипоҳийлар сардори Иброҳим аш Шариф янги ҳокимиятни ташкил қиласди. У 1704 йили дейлик унвонини ҳам олади. 1705 йили Жазоир ва Триполи билан бўлган урушда Иброҳим мағлубиятга учради аммо бу ҳол тунисликларни мусақиллик учун интилишдан қайтара олмади. Жазорликларга қарши зарбани муваффакиятли уюштирган сипоҳийларнинг янги сардори Ҳусайн

ибн Али Тунисда янги монархияга ва Ҳусайнйилар сулоласига асос солди. Бу сулола вакиллари Тунисни 1957 йилгача бошқардилар.

Судан. Ўрта асрларда хозирги Судан худудида бир неча христиан давлатлари мавжуд бўлиб, улардан энг каттаси Донгола давлати эди. 1317 йили мисрликлар Донголанинг охириги христиан шоҳини ағдариб, тахтга унинг исломни қабул қилган қариндошини ўтқаздилар. Шундан сўнг Нубиянинг (Суданнинг қадимги номи) тезликда «араблашиш» ва «мусулмонлашиш» жараёни юз берди.

Суданнинг чўл ва саванналарида истиқомат қиласидаган бадавий араблар ислом дини, араб маданияти ва араб халқ тилининг тарқалишига катта хисса кўшдилар. Суданнинг минг йиллар давомида шаклланган маданий қиёфаси бир неча аср ичидаги кескин ўзгарди. Бироқ бадавийлар янги сиёсий тузумнинг асосини ташкил қила олмадилар. Бу ролни иккита ҳосилдор дехқончилик вилоятлари – Фунг ва Дарфур уddyалади. Фунгнинг пойтахти Сеннар шаҳри эди. Шу сабабли 1504 йили ташкил топган давлат Сеннар султонлиги деб аталди.

Сеннар султонлигининг шаклланиш жараёни султон Дақин даврида якунланди. У ёш давлатнинг суд ва маъмурий тизимини ислоҳ қилди.

Сеннарнинг сиёсий тарихини унинг геосиёсий жойлашуви белгилаб берди. Сеннар Усмонийлар империясининг жанубий чегараларидан Эфиопия ва Борна империяларига элтувчи йўлда жойлашган эди. Сеннар ҳукмдорлари Усмонийлар билан ҳам, Эфиопия билан ҳам (1611–1641 йиллардаги уруш ҳаракатлари олиб борилди) асосан тинчлик алоқаларини сақлаб келди.

XVII аср охири – XVIII аср бошларида Сеннарда ҳам, Эфиопияда ҳам марказий ҳокимиятнинг инқирози бошланди. Иккала кучсизланаётган монархлар – султон Бадиг IV Абу-Шиллук (1723–1762) ва император Иясу II (1730–1755) ўзаро урушга киришдилар. Натижада Сеннарда султон ҳокимияти тўлиқ инқирозга юз тутиб, ҳокимият Хамаж вазирлар сулоласига ўтди. Бу сулоланинг асосчиси эфиоплар устидан ғалабанинг асосий ташкилотчиси Мұҳаммад Абул Кайлак Камтур (1710–1776) бўлди.

Бу даврда Суданнинг энг кучли ва бой давлати Дарфур султонлиги эди. Дарфур савдо айланмаси бўйича Сеннардан кўп марта олдинга ўтиб кетди. Энг катта фойда келтирадиган асосий товар қуллар бўлиб қолди.

Марокои. XVI аср бошида Марокаш жанубида шарифлар (ўзларини Мухаммад пайғамбар авлодлари деб хисобловчилар) юксала бошлайди. Уларнинг ичида саъдийлар уруги ўзининг жипслиги ва интилиши билан ажралиб туради. Португаллар ҳужуми пайтида саъдийлар йирик бербер қабилаларини бирлаштиришга эришди. Уларнинг йўлбошчиси Мухаммад ибн Абдураҳмон 1511 йили потугалларнинг Санта-Крус портини қамал қилди. Бу уриниш муваффакиятсиз чиқиб, Абдураҳмон ўлдирилгандан сўнг унинг ўғиллари бутун эътиборини жиҳодга эмас, мамлакат ичкарисида ўз мавқеларини мустаҳкамлашга қаратди.

Шарифлар империяси қатъи марказлашмаган, аникроғи шахарлар федерациясидан иборат эди. XVI асрда Марокашнинг юксалишига энг катта ҳисса қўшган султон Аҳмад ал-Мансур (1578–1603) бўлди. У савдони ривожлантириди, қўшни давлатлар билан дипломатик алокалар ўрнатди. Унинг ташқи сиёсати анча кенг қамровли эди. 1590–1591 йиллари Ғарбий Судан ҳудудида жойлашган Сонгай давлатини босиб олишни ташкил қилди. Марокашликлар узоқ йиллар Сонгайдаги олтин ва туз конларини эксплуатация қилдилар. Бу ердан минглаб қора танли қулларни сотдилар. Марокаш хазинаси жуда катта даромад кўрди.

Аҳмад ал-Мансур вафот этгандан сўнг унинг ўғиллари ўртасида бошланган таҳт учун кураш оқибатда сулоланинг тўлиқ инқирозига олиб келди.

XVII аср ўрталаридан бошлаб шарифлар авлодининг бошқа бир сулоласи Филалийлар Марокашда сиёсат майдонига чиқади. Сулоланинг асосчиси Мухаммад Али аш-Шариф (1631–1635) ва унинг учта ўғли Мулай Мухаммад (1635–1664), Мулай Рашид (1664–1672) ва Мулай Исмоил (1672–1727) мамлакат курдатининг юксалишига катта ҳисса қўшдилар. Айниқса, Мулай Исмоил 55 йил давлатни бошқарди, мусулмон ҳукмдорлари ичида жуда камлари Ғарбда унингдек шуҳрат топганди. У ярим асрдан кўпроқ вақт ичида бутун фаолиятини иккита мақсадга йўналтириди: турклар ва европаликлар таҳдидидан мамлакат мустақиллигини сақлаб қолиш; мамлакатнинг иқтисодий гуллаб-яшнашини таъминлаш. У қора танли қуллардан 150 минг кишилий мунтазам армия тузди. Ҳокимиятни марказлаштириб, қатъи давлат тартиби ўрнатди. Исмоил ўрнатган тартиблар Мағрибнинг анъаналарига зид эди. Шу сабабли бу тартиблар Исмоил ўлимидан сўнг дарҳол барҳам топди. Исмоилдан

кейин ўттиз йил ҳокимиятда барқарорлик бўлмади. Фақат унинг набираси Сиди Муҳаммад ибн Абдуллоҳ (1757–1790) мамлакатда тинчлик ва тартиб ўрната олди. У давлатнинг ташки салоҳиятини тиклаш йўлида ҳам катта ишлар қилди. 1751 ва 1765 йиллари Дания билан, 1763 йили Швеция, 1767 йили Франция ва Испания, 1773 йили Португалия, 1786 йили АҚШ ва бошқа бир қатор давлатлар билан савдо ва дўстлик ҳақида шартномалар имзолади. Ташки савдо ҳажми 7 млндан 17 млн ливргача ўсди. Мамлакатни ҳар томонлама мустаҳкамлаш борасидаги ишлар Сиди Муҳаммаднинг ўғли Мулай Слиман (1792–1822) томонидан муваффақиятли давом эттирилди.

* * *

Европа ва Шимолий Америка халқлари тарихига нисбатан кўлланилган «янги давр», «Маърифатчилик», «индустрислам цивилизация» каби тушунчаларни ва «янги давр»нинг даврий чегараларини бошқа халқлар, хусусан Африка халқарининг тарихига нисбатан шартли равишдагина қўллаш мумкин. Ўрганилаётган даврда бу халқлар тараққиётнинг бошқа босқичида бўлиб, илгор Европа давлатлари томонидан босиб олинди ва мустамлакаларга айлантирилди. Узок давом этган мустамлакачилик даврида бу халқлар тараққиётида ҳам муҳим ўзгаришлар юз берди: табиий бойликлар нинг европаликлар томонидан жадал ўзлаштирилиши натижасида саноат пайдо бўлди; пул-товар хўжалиги кенгайиб, бозор муносабатлари таркиб топди; кишиларнинг кундалик ҳаёти ва дунёқарашида янги тамоиллар шаклланди, Европа маданияти билан миллий маданиятларнинг уйғунлашуви бўлган маданият ривожланди.

Шу билан бирга ушбу асрлар Африка халқарининг ўз озодликлари учун тўхтовсиз кураш даври ҳам бўлди. Бу кураш давомида миллий онг ривожланди, кишиларда тенглик, озодлик, мустақиллик каби тушунчалар ривожланиб, улар курашининг мазмунига айланди.

XXX боб бўйича саволлар

1. Усмонийлар истилосидан сўнг Мисрни бошқаришда ва иқтисодий тизимида қандай ўзгаришлар юз берди?
2. Жазоирда шаклланган ҳарбий-сиёсий тизимнинг ўзига хос жиҳатлари нимада ва у Жазоирнинг риожланишида қандай роль ўйнади?

3. Ливиядаги қулўғлилар ҳокимияти билан Порта ўртасидаги муносабатларнинг ўзига хос томонлари нимада эди?
4. Янги даврда Тунисда барқарор ҳокимиятнинг бўлмаганлиги мамлакат ривожига қандай таъсир кўрсатди?
5. XVII аср охири – XVIII аср бошларида Сеннар сultonлигидаги бошланган инқизотнинг сабаби нимада эди?
6. Филиалилар сулоласининг қандай тадбирлари Марокашнинг юксалишида асосий роль ўйнади?

XXXI БОБ. XVI–XVIII АСРЛАРДА ФАРБИЙ АФРИКА МАМЛАКАТЛАРИ

Фарбий Африкада қул савдоси ва европаликларнинг кириб келиши

Европаликларнинг, асосан португалияликлар ва испанларнинг Фарбий Африка ҳудудларига кириб келиши XV аср иккинчи чорагида бошланди. 1434 йилдан 1482 йилгача португаллар ва испанлар Бахадур бурнидан Конго дарёсигача бўлган қирғоқ ҳудудларининг барчасини кезиб чиқишиди.

1460–1469 йиллари португаллар томонидан мустамлакага айлантирилган Яшил Бурун ороли Фарбий Африкада қул савдосининг дастлабки базасига айлантирилди. 1475 йили лиссабонлик савдогар Фернандо Гомеснинг экспедицияси Анкобра ва Вольта дарёларининг оралиғида кўп микдорда олтин қазиб оладиган ва Фарбий Суданнинг шимолий ҳудудлари билан савдо қиласиган мамлакатни кашф этганларидан сўнг португалияликларнинг бу ҳудудларга қизиқиши айниқса кучайди. Бу ҳудудда яшовчи фанти қабилалари Африка халқлари ичидан биринчилардан бўлиб португалиялик қул савдоси билан шугулланувчиларнинг қурбони бўлди.

Португалияликлар Олтин Қирғоқда тезлик билан ўз мавқеларини мустаҳкамлашга ҳаракат қилдилар ва 1482 йили бу ерда Сан Хорхе да Мина фортини (ҳозирги Элмина) бунёд этдилар. Қиска муддатга португалияликлар бу ердан олиб чиқиб кетадиган маҳсулот олтин бўлиб қолди. Қул савдоси дастлаб унчалик ривожланмади, чунки Европа бозорларида бу «товарга» эҳтиёж йўқ эди.

Америка қитъасини мунтазам равишда мустамлакага айлантиришнинг бошланиши ва бу ердаги маҳаллий аҳолининг турли сабаблар билан қирилиб кетиши натижасида ишчи кучига катта эҳтиёж

пайдо бўлди. Бу эҳтиёж айниқса плантацияли хўжалик пайдо бўлган худудларда жуда кучли эди. Бундай ишчи кучининг манбай Африка-нинг, айнан Ғарбий Африканинг маҳаллий аҳолиси бўлиб, кейинги бир неча юз йил мобайнида бу ерлар жуда катта қул бозорига айлантирилди.

XVI аср охиригача Ғарбий Африка қирғоқларида ўрнашиб олган ягона давлат Португалия эди. Қул савдоси билан шуғулланган биринчи европаликлар ҳам португалияликлар бўлди. Ғарбий Африка қирғоқларининг кўплаб жойларида португалияликларнинг фортлари бўлишига қарамасдан улар Сенегал ва Гамбия оралиғидаги ерлардан ташқари китъя ичига киромасдилар. Бу дарёлар португалияликларга қитъя ичига анча чуқур кириб бориш имкониятини берди: улар 1534 йили Мали, 1565 йили эса Томбукту ерларигача етиб бордилар. Сенегал ва Гамбия дарёлари орқали португалиялик савдогарлар Кантар ва Бамбукнинг ички бозорларига кириб бордилар. Маълумки, бу ерларда кенг худудли катта давлатлар мавжуд бўлиб, португалияликлар ўзларини истилочилардек тута олмасдилар. Шу сабабли португалияликлар асосий эътиборини Қуий Гвинеяга (Съерра-Леонедан Камерунгача бўлган қирғоқ бўйи ерларига) қаратди. Улар соҳил бўйларини тўртта зонага ажратиб, бу зоналарни улардан олинадиган асосий товарнинг номи билан атадилар. Ҳозирги Шимолий Либериянинг қирғоқлари Қалампирли қирғоқ, Фил Суяги Қирғоғи, Олтин Қирғоқ, Вольта ва Нигер дарёлари оралиғи Қул қирғоғи деб аталган.

Фил Суяги Қирғоғи ва Қалампирли қирғоқ худудларида табиий бухталар ва йирик дарёларнинг йўқлиги сабабли португалияликларнинг бу ерлар билан алоқаси ниҳоятда чекланган эди. Португалиялик савдогарлар асосан Олтин Қирғоқ ва Қул қирғоғида фаол ҳаракат қилишарди. Улар Элминадан ташқари Аксумда, Шамада ва бошқа қирғоқ худудларида бир қатор янги фортлар барпо қилдилар. Бу ерларда португалияликларнинг бутун савдоси тўпланган эди. Бу савдонинг ҳажми ҳам анча катта бўлиб, XVI аср бошларида бутун дунёда олинадиган олтиннинг 1/10 ни португалияликлар шу ерлардан олиб кетарди. Қирғоқбўйи халқлари португалияликлар билан тез савдо алоқаларига киришар, аммо бу савдо тенг эмасди, олтин деярли текинга сотиларди.

Жанубий Нигериянинг қирғоқлари (Қул қирғоғи) дастлаб португалияликларнинг эътиборини жалб қилмади. Йорубларнинг кучли

давлатлари португалияликларнинг ички ҳудудларга кириб бориши йўлида ишончли тўсик эди. Бенин давлати португалияликларнинг товарларига алмаштириш учун анчагина миқдорда қалампир таклиф қилиши мумкин эди (бу товарнинг Европа бозорларида нақадар қадрланишини олдинги бобларда айтиб ўтган эдик). Бу ҳол португалияликларни 1486 йили Гватода савдо нуқтасини барпо қилишга мажбур қилди. Бу савдо нуқтаси Бениннинг экспорт портига айланиб қолди. Аммо 1506 йили португалияликлар портни ташлаб кетдилар, чунки Африка қалампири (малагета) билан савдо қилиш ҳинд қалампири ва мурч билан савдо қилишга нисбатан анчагина кам даромад келтиради. Бундан ташқари португалияликлар таклиф қиласидаган одатдаги моллар (металл ва ойна буюмлари) хунармандчилик анча юқори бўлган бенинликлар орасида харидоргир эмасди.

Фернандо-По ва Сан-Томе оролларида мустаҳкам ўрнашиб олиб плантация хўжалигини йўлга кўйилиши (шакарқамиш етиштирилар эди) ишчи кучига бўлган талабни оширди ва бу ҳол қул савдосини авж олдирди. Бенин Нигер дарёсининг қирғоқларида ва Жанубий Нигериянинг бошқа ҳудудларида яшайдиган майда қабилалар билан бўладиган доимий урушларда асир олингандарни сотиш имкониятига эга эди. Португалиялик савдогарлар бу қулларни шакарқамиш плантацияларининг эгаларига ва Олтин Қирғокка олиб бориб олtinga алмаштираси эди. Португалияликларнинг қул савдоси XVI аср охирида Бразилиянинг мустамлакага айлантирилиши билан айникса кучайди.

Бу даврга келиб Американинг Испания, Англия ва Франциянинг мустамлакаларига айлантирилган бошқа ҳудудларида плантацияли хўжалик кенг ривожлантирилди. Натижада қуллар меҳнатига эҳтиёж ҳам ортиб борди. Африкадаги ишчи кучи бозорини эгаллаш учун Европа давлатлар ўртасида кучли кураш бошланди. Бу курашда Португалия анча кучлироқ Европа давлатлари билан тўқнаш келди. Аммо бу курашда энг катта жабр тортганлар африкаликлар бўлди. XVII асрдан Африка ерларида қулларни овлаш учун ҳеч қанақа қонунлар билан чекланмаган чинакам қароқчилик урушлари бошланди. 1530 йилдан 1600 йилгacha бўлган 70 йил ичida факат португалияликлар томонидан Америкага 1 млнга яқин қуллар олиб кетилди.

1610 йилга келиб, қул савдосидаги португалияликлар монополиясига голландияликларнинг рақобати туфайли путур етди.

Айниқса, Голландиянинг Вест-Индия компанияси тузилгандан сўнг Фарбий Африка қирғоқларидағи португалияликларга қарашли савдо нукталарини эгаллаб ола бошлади. 1642 йилга келиб Аргуин, Гори, Сан-Томас портлари энди голландияликларга қарашли эди. Олтин Қирғоқдаги барча Португалия портлари ҳам улар томонидан забт этилган эди. 1648 йили португалияликлар Сан-Томасни яна эгаллашга муваффақ бўлишди, аммо уларнинг Атлантик океани оша қул савдосига бўлган монополияси бир умрга йўқотилган эди. Португалиянинг ўрнини Голландия эгаллади ва XVII аср биринчи ярмида Америкадаги испан мустамлакаларига африкалик қулларни улар етказиб берди.

Куллар бозорида Голландиянинг ҳукмронлиги ҳам узокқа чўзилмади. XVII аср иккинчи ярмидан мустамлака бозорларини эгаллаш учун курашга Англия ва Франция қўшилди. Инглиз ва француз плантаторлари ўз хўжаликларининг кенгайиши туфайли қулларнинг меҳнат бозорини ўзлари эгаллашга, ўз товарларига олтин ва кумуш билан ҳақ оладиган португал ва голланд савдогарларининг хизматидан воз кечишига ҳаракат қилдилар. Қул савдосига Англия ва Франция билан бир қаторда Швеция, Дания, Бранденбург каби бошқа Европа давлатлари ҳам қўшилди. Қул савдосида монополия ўрнатиш учун кураш XVII аср иккинчи ярми ва бутун XVIII аср давомида йирик Европа давлатлари ўртасидаги кескин рақобатнинг асосий мақсадини ташкил қилди. Бу кураш майдони Африка қитъаси, айниқса Фарбий ва Марказий Африка бўлди.

Англия ва Франция йирик савдо компаниялари ташкил қилиб, уларга африкалик қуллар билан савдо қилишнинг монопол ҳуқукини берди. Булар 1664 йили ташкил қилинган француз компанияси ва 1672 йили ташкил қилинган Англиянинг «Қироллик Африка компанияси» эди.

Текин ишчи кучига бўлган юқори талааб, қул савдоси ҳажмини ниҳоятда кенгайтириб юборди. XVII асрда Америкага 2 млн 750 минг қул олиб кетилди. Бу қулларнинг учдан икки қисми Фарбий Африкадан олиб кетилди ва Африка халқларининг ривожланишига жуда катта, тўлдириб бўлмайдиган зарап етказди. Урушлар, қул савдоси, қулларни океан орқали Америкага етказиб бориш шароитининг ўта оғирлиги миллионлаб кишиларнинг ўлимига олиб келади. Замондошлар қолдирган кўплаб далиллар шуни исботлайдики, очлик, касаллик, савдогарларнинг ғайринсоний муомаласидан ҳар

олтинчи африкалил йўлда ўлиб кетган. Қул савдосининг даҳшатли оқибати ҳақида шоир Лонгфелло:

*Тубсиз денгиз қирғоқларида,
Ялтираган қумлар остида
Ётибди хўрланган ва унитилган
Занжирбанд қулларнинг жасади, –*

деб ёзган эди.

Кулчилик Африкада европаликлар келишидан олдин ҳам мавжуд бўлсада, унда патриархал, хонаки кўринишда эди. Европаликлар келиши билан одам савдоси мисли кўрилмаган даражада кенгай-иб, даҳшатли тус олди. Қул савдоси энг ривожланган XVII–XVIII асрларда Фарбий Европанинг деярли ҳамма давлатлари очик ёки яширин равишида бундай фойдали «хунар» билан шуғулланишган. Африка халқларининг миллионлаб одамларни йўқотиши ишлаб чиқарувчи кучлар ривожига салбий таъсир кўрсатди. Қул савдоси Африка халқларининг сиёсий таракқиётига ҳам ўта ёмон таъсир қилди. Мустамлакачиликдан олдин қуллар қаторини асосан харбий асиirlар ташкил қиласди. Қул савдосининг оммавий тус олиши ўзаро урушларнинг кескин кучайишига олиб келди. Бу урушлар ва улар оқибатида қуллар сонининг кўпайишидан асосан европалик мустамлакачилар манфаатдор эдилар. Энди қабила бошликлари одам овлаб қўшни қабилаларга тўсатдан юришлар уюштирар ёки ўз қабиладошларини сотар эди.

Фақат XIX аср бошларидагина ривожланган Европа мамлакатларининг қул савдосига қизиқиши сусайди. 1807 йили Британия парламенти ўз фуқароларига қул савдоси билан шуғулланишни тақиқловчи қонун қабул қилди. Аммо яна узоқ вақт қул савдоси тўхтамади. Илгариги очик савдо энди контрабандага айланди. Қуллар юкланган кемалар Британия ҳарбий флотининг патруль кемаси билан тўқнаш келганда, савдогарлар далилларни йўқотиш мақсадида бечора қулларни шафқатсизлик билан океангга улоқтиришар эди.

Эфиопия. Аҳолисининг асосий қисмини амхара ва галла қабилалари ташкил қиласдиган Эфиопия Шимолий Африканинг энг ривожланган (араблардан ташқари) ҳудудларидан эди. Давлат аслида мустақил бўлган бир нечта князликлардан ташкил топган бўлиб, бу князликлар негус (шоҳ)нинг ҳокимииятига номигагина бўйсунарди.

Ҳукмрон сулоланинг асосчиси Қуддус шоҳи Сулаймон ва малика Савскаяларнинг ўғли – Менемис I ҳисобланарди. Аслида худди Япониядаги сингари Эфиопияда ҳам ҳақиқий ҳокимият император таҳтига ўзига маъкул кишини ўтқаза олган феодаллар қўлида эди. Кўпинча бундай император «Сулаймонлар сулоласидан» бўлган ёш бола ёки жуда кекса киши бўларди. Япониядан фарқли ўлароқ бу ерда амалдаги ҳокимият авлоддан-авлодга мерос бўлиб ўтмаган.

Ерларнинг катта қисми император оиласига, черковга ва феодалларга тегишли эди. Дехқонлар уларнинг ерида ишлаб бериши ва ҳосилнинг бир қисмини ёки маълум бош молларни бериши лозим бўлган. Айни пайтда дехқонларнинг ердан фойдаланиши жамоа характеристида эди. Эфиопияда қулчилик ҳам сакланиб қолганди. Аҳолининг асосий қисми христиан динига (православ мазҳабига яқин) сифинишарди.

XVI аср бошларида Эфиопияга Усмоний турклар бостириб киради. Туркларни Эфиопияга вассал қарамлиқда бўлган ва мустақиллик олиш учун узоқ вақтдан бери кураш олиб бораётган Ифат ва Адал мусулмон сultonликлари ҳам кўллаб-кувватлади. Адал қўшинларининг кўмондони Аҳмад ибн Иброҳим ал-Ғозий билан бир вақтда жанубдан галла қабилалари ҳам Эфиопияга бостириб кирди. Эфиопия ҳукмдорлари ёрдам сўраб Португалияга мурожаат қилишга мажбур бўлдилар. Эфиопия ва Португалиянинг бирлашган қўшинларни мамлакатдан туркларни қувиб чиқаришга ва галл қабилаларининг бир қисмини бўйсундиришга муваффак бўлдилар. Турклар қувиб чиқарилгандан сўнг Эфиопияда мустаҳкамланиб олишга ва хўжайнлик қилишга ҳаракат қилган португалияликларнинг сиёсати қаршиликка учради, улар XVII аср ўрталарида Эфиопияни тарқ этишга мажбур бўлишди. Бироқ ташқи хавф бартараф этилгандан сўнг тўхтовсиз давом этган ички ўзаро урушлар XVIII аср охири – XIX аср бошларига келиб марказий ҳокимиятнинг сусайишига олиб келди. Бу даврда Эфиопия энди ўз қўшини ва мустақил бошқарув тизимиға эга бўлган бир қанча князликлардан иборат давлат эди. Бу князликларнинг (Шоа, Аҳмара, Тигре, Годжам ва бошқ.) мустақиллиги шу даражада эдики, уларни кўпинча «қироллик» ҳам деб аташарди. Эфиопия нгусэ нэгсэтининг (шоҳлар шоҳи) ҳокимияти рамзий бўлиб қолди, холос.

Ички аҳволнинг оғирлигидан фойдаланган европаликлар, биринчи навбатда Англия ва Франция, алоҳида князликларнинг

хукмдорлари билан «дўстлик тўғрисида шартнома» туза бошладилар ва бу князларга бошқа князларга қарши қурашда ёрдам ваъда килдилар. Бу хол Эфиопияда вужудга келаётган тарқоқлик ҳолатини янада кучайтириди.

Тропик ва Жанубий Африка. Европаликларнинг мустамлакачилик босқинлари ва қул савдоси Тропик ва Жанубий Африка халқлари ривожланишида маълум турғунликни вужудга келтирди. Олдинги даврлардан сақланиб келаётган турли халқлар ва худудлар тараққиётидаги нотекислик ҳам бу ҳолатга катта таъсир кўрсатди.

Қадимги ва ўрта асрлардаги давлатлар ва давлат бирикмалари Тропик ва Жанубий Африканинг ҳамма ҳудудини эгалламаган эди. Катта ҳудуддаги, асосан ўрмонларда, ҳозирги Нигерия ва Камерун давлатлари, Убанги дарёси ҳавзаси ва Конго дарёсининг ўрта оқими, Шарқий Экваториал Африканинг қатор вилоятлари, қитъанинг бутун жанубидаги аҳоли ибтидоий шароитда яшашни давом эттираётган эди. Калаҳари чўлларида яшайдиган айрим бушмен қабилалари ҳатто юқори палеолитга мос келадиган тараққиёт босқичида эдилар. Бир пайтлар кучли ва нисбатан тараққий этган давлатларнинг таркибига кирган ерлар (acosan Фарбий Судан) яна сиёсий тарқоқлик ҳолатига қайтдилар.

XVIII–XIX аср бошларида янги давлат ва сиёсий бирикмаларнинг вужудга келиши қийин ва мураккаб кечди. Шунга қарамасдан Тропик Африкада ва қисман Жанубий Африкада бир қатор давлат ва давлат бирикмалари мавжуд эди.

Кул савдоси камроқ етиб борган Конго дарёси ҳавзасининг ички ҳудудларида Луба, Лунда ва Куба (уларни баъзан яшайдиган халқларнинг номи билан Балуба ва Бақуба деб ҳам аташарди) давлатлари XVII–XVIII асрларда нисбатан қисқа бўлсада гуллаган даврни бошидан кечиришди. Бу даврда Тропик Африканинг ғарбий ва шарқий соҳилларини бир-бири билан боғловчи савдо йўли Луба ва Лунда орқали ўтади. Бу ерда, Конго ва Катангга дарёлари ҳавзасида, қадимдан ўзининг туз ва мис конлари билан машҳур бўлган, иқтисодий жиҳатдан нисбатан тараққий этган ҳудуд ҳам жойлашган эди.

XIV асрда Чад кўли атрофида вужудга келган Вадан давлати ҳам XVIII асрга келиб кучаяди. Гвинея кўлтиғи (ҳозирги Нигериянинг кирғоқ бўйи ҳудудлари) кирғоқларида жойлашган Йоруба давлатлар федерациянинг сиёсий маркази XVIII асрда ҳам Ойо бўлиб

қолаверди. Бу ерда Йорубанинг бошлиғи – алафиннинг қароргохи жойлашган эди. Алафин олий зодагонларнинг еттита вакилидан иборат кенгаш томонидан хукмрон сулола вакилидан сайланар эди. Озод аҳолининг кўплаб қулга айлантирилиши, кўшнилар билан доимий урушлар, шимолдан Фульбеларнинг бостириб келиши натижасида XVIII аср охири – XIX аср бошларида Ойонинг инқирози бошланади.

Ойонинг сусайишига қўшниси, XVIII асрда кичгина Абомей князлиги асосида шаклланган кучли Дагомей давлати билан бўлган урушлар ҳам қисман сабаб бўлди. Дагомей жанговар армияга эга бўлиб, унинг асосини доимий қўшинлар, шу жумладан жангчи – аёллар ташкил қиласади.

XVII аср охири – XVIII аср бошларида Олтин қирғоқдан шимол томонда Ашанти давлати ташкил топди. Бу кучли Кумаси князлиги атрофида бирлашган князликлар федерацияси эди. XIX аср биринчи ярмида Ашанти Гвинея қўлтигининг марказий ва ғарбий қисмидаги халқларни ўз таъсири остида бирлаштиришга харакат қиласади.

XVIII аср охирда Шарқий Африканинг (Эфиопиядан ташқари) энг йирик давлати Буганда эди. Унинг этник асосини баганда халқлари ташкил қиласади. Давлат тепасида «кабака» деб аталувчи монарх туради.

Тропик Африкада юқорида айтилганлардан ташқари қатор давлат ва давлат уюшмалари мавжуд эди.

Тропик Африкадаги давлат уюшмаларининг ижтимоий-сиёсий тузуми ҳали яхши ўрганилмаган. Уларнинг иқтисодий тизими ҳам турлича бўлиб, феодал муносабатлардан уруғ-қабила тузумигача мавжуд эди. Бунда феодал муносабатлар, одатда, барқарор ва кучли қулчилик муносабатлари билан бирга мавжуд бўлган, бу ҳол эса мустамлакачиларнинг қул савдосини авж олдириши учун ҳам қулай шароит яратган. Олимларнинг тахмин қилишларича, Гвинея қирғоқларидаги давлатлар – Ойо, Дагомея ва Ашантининг юксалиши, хукмрон доираларнинг бойиб кетиши ҳам европаликларнинг қул савдоси билан боғлиқ бўлган.

* * *

Тропик Африкадаги барча давлатларнинг, уларда феодаллашув жараёни қайси даражада бўлишидан қатъи назар, фарқли томони кўплаб уруғ-қабила институтларининг сакланиб қолишидир. Ҳамма

жойда феодал рента билан жамоа ер эгалиги ва ерга ишлов беришнинг жамоа усули бирга мавжуд бўлган. Уруғчилик қолдиқлари ижтимоий хаётни ташкил қилишга катта таъсир кўрсатган. Уруғчилик ўз-ўзини бошқариш органлари кўпинча давлат аппаратининг функциясини бажарган. XVIII аср охиридан қабилаларнинг давлатларга бирлашиш жараёни кучаяди (масалан, Жанубий Африкадаги зулус қабилалари). XIX аср бошларидан мустамлакачиларга қарши курашибиши эҳтиёжи бу жараённи кучайтириди.

XXI боб бўйича саволлар

- 1. Янги давр бошларида Африкадан қуллар нима учун асосан Америкага олиб кетилар эди?**
- 2. Португалияликлар билан африкаликлар ўртасидаги савдода асосий товарлар нималардан иборат эди?**
- 3. Қул савдосини монополия қилиш учун Европа давлатлари ўртасидаги бошланган рақобат қандай мудҳиш натижаларга олиб келди?**
- 4. XVII асрда Африкадан қанча қул олиб кетилди ва бунда қайси давлатлар асосий роль ўйнади?**
- 5. XVII–XVIII асрларда Эфиопиянинг ўз мустакиллигини сақлаб қолишида қандай факторлар асосий роль ўйнади?**
- 6. Янги даврда Тропик ва Жанубий Африканинг ижтимоий тузуми ва иқтисодий ривожланиш даражаси қандай эди?**

Х У Л О С А

Европа ва Шимолий Америка мамлакатларида ўрта асрчилик аста-секин янги давр билан, феодал тартиблар янги, буржуача хаёт тарзи билан алмашганлигини кўриб чиқдик.

Иктисадий, сиёсий, ижтимоий, маънавий ва маданий хаётда янги жиҳатлар пайдо бўлди.

Ўрта аср кашфиётларидан кенг фойдаланиш билан бирга янги давр руҳига мос кашфиётлар пайдо бўлди. Ишлаб чиқаришнинг бутун ўрта асрларда хукмонлик қилиб келган цех тизими ўрнига мануфактуралар келиб, улар ҳам тез орада фабрикаларга ўз ўрнини бўшатиб берди. Саноат тўнтариши илдам қадамлар билан олдинлаб борди. Савдонинг қизғин ривожланиши товар-пул хўжалигини мустаҳкамлади.

Жамият ҳаётида шаҳарларнинг роли ортиб борди. Янги даврда айнан шаҳарлар ишлаб чиқариш ва савдонинг, шаклланаётган янги маданиятнинг марказига айланди.

Тадбиркорлик ва ёлланма меҳнат ривожланиб, қишлоқ хўжалигига ҳам кириб борди. Дехқонлар шахсий эркинликни кўлга киритишди, қишлоқда бозор муносабатлари таркиб топди, янги типдаги, ёлланма меҳнат ва бозор муносабатларига асосланган корхоналар пайдо бўлди.

Сиёсий соҳада катта ўзгаришлар – абсолют монархия ва миллий давлатларнинг шаклланиши ва мустаҳкамланиш жараёни юз берди. Айни пайтда Фарбий Европа ва Шимолий Америка мамлакатларида хукуқий давлат ва фуқаролик жамиятининг дастлабки белгилари пайдо бўлди. Бу жараёнлар шиддатли кураш орқали ўзига йўл очиб борди. Абсолют монархиялар келишувга бориш, ислоҳотлар ўтказиш лозимлигини ҳис этмаган жойларда ҳалқ газабининг тўлқинлари абсолютизмни ва эски тартибларни ағдариб ташлади, буржуа инқилоблари юз берди.

Ўзгаришлар натижасида аҳолининг таркиби ўзгарди, буржуазия ва ёлланма ишчиларнинг овози тобора кучлироқ эшитилиб, ўз сиёсий хукуқларини талаб қила бошлади, интеллигенциянинг сони ва сифати ўсиб борди.

Буржуазиянинг бойлиги ошиши билан унда инсоний қадр-қиммат туйғуси ҳам ўсиб борди. Бу ҳол буржуазияни инсоннинг табиий хуқуқлари – Яшаш, Озодлик, Тенглик ва Мулк учун курашга чорлайди. Бу йўл оғир, аммо муваффакиятли, зафарли кураш йўли эди.

Инсоннинг маънавий дунёсида ҳам ўзгаришлар юз берди. Онгнинг «дунёвийлашув» жараёни бошланиб, кишилар аста-секин диннинг таъсиридан озод бўла бошлади. Диний онгнинг хукмронлиги сақланиб қолган жойларда ҳам энди кишилар уни ислоҳ қилиш тарафдорлари эдилар.

Фан ва маданиятнинг янги ютуқлари кишилар ҳаётига кириб борди. Университет ва мактабларнинг сони кўпайди, хонадонларда китоблар, газеталар пайдо бўлди.

Кишиларнинг дунёқарашида юз берган тўнтаришга дунёда адолат ўрнатишга интилган, Инсоннинг ҳаётини илохийлаштирган буюк гуманист-ёзувчилар улкан ҳисса кўшдилар.

XVII–XVIII асрларнинг дунёқараши сифатида Гуманизм, Реформация ва Маърифатчилик ғоялари бир-бирини алмаштириди. Ҳар бир кейинги таълимот ўзидан олдингисининг илғор ғояларини асрар қолди ва уларнинг ҳаммаси инсоннинг «яшашга, озодликка ва мулкка» бўлган хуқуқини ўрнатишга интилди.

XVI–XVIII асрлардаги янги давр тараққиёти XIX асрда юз берган индустрιал цивилизациянинг ғалабаси учун асос яратди.

Айни пайтда Лотин Америкаси мамлакатларида анъанавий цивилизациянинг кўплаб белгилари сақланиб қолаётган бўлса-да, у ерда ҳам капиталистик муносабатларнинг ривожланиши учун имкониятлар пайдо бўлаётган эди.

Осиё мамлакатларида, айниқса Ҳиндистон, Хитой ва Японияда анъанавий цивилизациянинг хукмронлиги тўлиқ сақланиб қолаётган эди. Бу ҳол мамлакатлар ва қитъалар ҳар хил суратлар билан ривожланганлигини, халқлар тараққиётнинг турли босқичини бошидан кечираётганлигини кўрсатади. Айниқса, Африка халқларининг ривожланиш даражаси инсоният тарихидаги энг шармандали ва аянчли ҳодиса – қулчиликнинг янги даврда ҳам сақланиб қолиши учун шароит яратди.

Аммо Лотин Америкаси, Осиё ва Африка халқларининг ҳам ўз озодликлари, қадр-қиммати ва мустақиллиги учун кураши, уларда ушбу демократик тушунчаларининг шаклланиши ҳам айнан янги даврда бошланди.

Шу маънода, Европа ва Шимолий Америка мамлакатларида XVI–XVIII асрларда шакллана бошлаган, XIX асрда ғалаба қозонган индустриал цивилизация ва унда мужассамлашган умуминсоний қадриятлар дунёдаги барча халқлар курашининг мазмунига айланди.

ХРОНОЛОГИЯ

- 1418–1460 – Географик кашфиётларнинг биринчи, португал босқичи.
- 1420–1430 – Мадейра, Канар ва Азор ороллари кашф этилди.
- 1434 – Гвинея ва Яшил бурун ороллари кашф этилди.
- 1462 – Съерра-Леоне кашф этилди.
- 1477 – Стокгольм университети ташкил этилди.
- 1479 – Копенгаген университети ташкил этилди.
- 1480 – Рус ерларини бирлаштириш бошланди.
- 1485–1603 – Англияда Тюдорлар даври.
- 1486 – Бартоломео Диаш томонидан Эзгу Умид бурни кашф этилди.
- 1492 йил 12 октябрь – Колумб экспедицияси Гуанахани оролига етиб келди. Америка кашф этилди.
- 1494 – Испания ва Португалия ўртасида Америка ва Жануби-Шарқий Осиёда таъсир доираларини белгилаш бўйича Тордесильяс шартномаси имзоланди.
- 1497–1498 – Васко да Гама экспедицияси Ҳиндистонга янги денгиз йўлини очди.
- 1497 – инглиз денгизчиси Жон Кабот Ньюфаундленга етиб келди.
- 1501 – Америго Веспуччи Бразилия қирғоқларини тадқиқ этди.
- 1501–1722 – Сафавийлар сулоласи Эронда ҳукмронлик қилди.
- 1509–1547 – Англияда Генрих VIII ҳукмронлиги йиллари.
- 1516 – Үсмонийлар султони Салим I ўзини халиф деб эълон қилди.
- 1517 – Мартин Лютернинг 95 тезислари, Германияда Реформациянинг бошланиши.
- 1519 йил 20 сентябрь – 1522 йил 6 сентябрь – Ф.Магеллан экспедицияси Ер шарини айланиб сузиб ўтди.
- 1519 – Америка қитъасидаги биринчи шаҳар – Панамага асос солинди.
- 1520–1566 – Туркияда Сулаймон I Қонунчи ҳукмронлиги даври.
- 1524–1525 – Германияда дехқонлар уруши.
- 1526 – Ҳиндистонда Бобурийлар империясига асос солинди.
- 1526–1858 – Бобурийлар (Буюк Мўғуллар) империяси мавжуд бўлган йиллар.
- 1526 – Моҳиҷ ёнида турклар томонидан венгерларнинг тор-мор қилиниши, Марказий ва Жанубий Венгриянинг Үсмонийлар империяси таркибиға кириши.
- 1529 – Турклар томонидан Венанинг қамал қилиниши.

- 1534 – Англияда дунёвий ҳокимиятнинг черковдан устунлиги тўғрисида қонун қабул килиниши, инглиз Реформациясининг бошланиши.
- 1543 – португалияликларнинг Японияга келиши.
- 1547 – Иван Грозний Русда расман шоҳ унвонини қабул килди.
- 1552–1594 – Европада диний урушлар даври.
- 1552 – Россия томонидан Қозон хонлиги босиб олинди.
- 1554 – Украина ва Шаркий Белорусия Россияга қўшиб олинди.
- 1556 – Россия Астрахан хонлигини босиб олди.
- 1556–1605 – Бобурийлар империясида Акбаршоҳ ҳукмронлиги даври.
- 1557 – Россия Бошқирдистонни босиб олишни яқунлади.
- 1557 – португалияликлар Макоа оролини – европаликларнинг Хитойдаги биринчи ер мулкини ижарага олдилар.
- 1558–1603 – Англияда Елизавета I ҳукмронлик қилди.
- 1558–1583 – Ливония уруши.
- 1559 – Като – Камбрезия сулҳи имзоланди.
- 1564 – Иван Фёдоров Русда китоб чоп этишга асос солди.
- 1566–1609 – Нидерландия буржуа инқилоби.
- 1566 – Нидерландияда испанлар ҳукмронлигига қарши оммавий халқ ҳаракатлари бошланди.
- 1567 – Соломон ороллари кашф этилди.
- 1568–1582 – Японияда Ода Набунага ҳукмронлик қилди.
- 1569 – Люблин унияси имзоланди. Унга кўра Польша қироллиги ва Литва князлиги битта давлат – Речь Посполитага бирлашди.
- 1572 йил 24 август – Муқаддас Варфоломей тунида гугенотлар қирғин қилинди.
- 1573 – усмонийлар томонидан Кипр ороли босиб олинди.
- 1579 – «Утрехт унияси» имзоланди.
- 1581 – Нидерландиянинг шимолий провинцияларида Бирлашган Провинциялар Республикаси ташкил қилинди.
- 1592 – Кореяда Хитойнинг Япония билан биринчи жиддий тўқнашуви.
- 1595 – Жанубий Полинезия кашф этилди.
- 1598 – Францияда Нант эдикти чоп қилинди.
- 1600 – Ост-Индия компанияси ташкил қилинди.
- 1600 – Лондонда дастлабки биржা фаолият кўрсата бошлади.
- 1603–1867 – Японияда Токугавалар сёгунати даври.
- 1605 – Торрес Австралияни кашф этди.
- 1605 – Меланезия кашф этилди.
- 1609 – Испания Голландияни тан олганлиги хақидаги шартномани имзолади.
- 1613 – Россияда Романовлар сулоласи таҳтга келди.
- 1618–1648 – Европада Ўттиз йиллик уруш.

- 1628 – Англияда «Хуқуқлар тўғрисида билль» эълон қилинди.
- 1636 – Гарвард университети ташкил қилинди.
- 1638 – Япония чет элликлар учун «ёпилди».
- 1640–1660 – Англияда буржуа инқилоби юз берди.
- 1640 – Португалия Испания таркибидан ажралиб чиқди.
- 1642 – А.Тасман Тасмания оролларини кашф этди.
- 1644–1911 – Маньчжурларнинг Цин сулоласи Хитойда хукмронлик қилди.
- 1648 – Вестфаль тинчлик сулҳи имзоланди.
- 1648 – Семён Дежнёв Осиё билан Шимолий Америка ўртасидаги бўғозни кашф этди.
- 1649 – Англия кироли Карл I Стюарт катл қилинди.
- 1649 йил 19 май – Англияда республика эълон қилинди.
- 1653 – Англияда харбий диктатура кўринишидаги Кромвель протекторати ўрнатилди.
- 1668 – Аахен сулҳи имзоланди.
- 1679 – Нимвеген сулҳи имзоланди.
- 1680 – Регенсбург келишуви имзоланди.
- 1689 – Нерчин рус-хитой шартномаси имзоланди
- 1690 – Инглизлар бобурийлардан олган ерларида Калкутта шаҳрига асос солди.
- 1697 – Рисвик сулҳи имзоланди.
- 1698 – Карловица тинчлик сулҳи имзоланди.
- 1701–1714 – Европада испан таҳти учун уруш бўлди.
- 1703–1721 – Россия ва Швеция ўртасида Шимолий уруш бўлди.
- 1703 – Россиянинг янги пойтаҳти Санкт Петербург шаҳрига асос солинди.
- 1713 – Утрехт сулҳи имзоланди.
- 1714 – Раштадт сулҳи имзоланди.
- 1720 – Потсдам келишуви имзоланди.
- 1721 – Ништадт сулҳи имзоланди.
- 1724 – Россия Фанлар академияси таъсис қилинди.
- 1731–1743 – Қозогистоннинг асосий қисми Россияяга кўшиб олинди.
- 1733 – Жон Кей тўқув дастгоҳини ихтиро қилди.
- 1742 – С.И. Челюскин Осиёнинг энг шимолий чеккаси-Челюскин бурнини кашф этди.
- 1750–1850 – Европада «Оқ нон инқилоби» рўй берди.
- 1755 – Москва Давлат университети ташкил қилинди.
- 1756–1763 – Европада Етти йиллик уруш даври.
- 1757 – Хитойда Кантондан бошқа барча портлар европаликлар учун ёпилди.
- 1758–1759 – Жўнғор ва Қашғар хонликлари тугатилиб, Хитойга кўшиб олинди.

- 1763 – Губертебург сулҳи имзоланди.
- 1763 – Эрон билан Англия ўртасида биринчи шартнома имзоланди.
- 1763–1766 – И.И. Ползунов унверсиал буғ машинасини яратди.
- 1764 – П.К. Креницин экспедицияси Аляска қирғоқларига етиб борди.
- 1765 – Жеймс Хоргривс «Женни» урчуғини ихтиро қилди.
- 1767 – Хейс тўкув машинасини яратди.
- 1769 – Мисрнинг Усмонийлар империясидан мустақиллиги эълон қилинди.
- 1771–1801 – Вьетнамда Тэйшенлар қўзғолони бўлди.
- 1772 – Европалик миссионерлар Хитойдан чиқариб юборилди.
- 1774–1792 – Францияда Людовик XVI хукмронлиги йиллари.
- 1774 – Жеймс Уатт буғ машинасини ихтиро қилди.
- 1775–1783 – АҚШ да мустақиллик учун уруш йиллари.
- 1776 йил 4 июль – АҚШ да Мустақиллик Декларацияси қабул қилинди.
- 1783 – Қрим Россияга қўшиб олинди.
- 1784 – Корб прокат станини ихтиро қилди, Т. Модсли токарлик дастгохини яратди.
- 1787 – АҚШ конституцияси қабул қилинди.
- 1788 – Жорж Вашингтон АҚШ нинг биринчи президенти этиб сайланди.
- 1788–1790 – Хитой Вьетнамга бостириб кирди, Вьетнам Хитойга тобеликни тан олди.
- 1789–1799 – Буюк Француз инқилоби йиллари.
- 1789 йил 14 июль – Бастилиянинг олиниши, Франциянинг миллий байрами.
- 1789 – Францияда «Инсон ва фуқаро ҳуқуқлари Декларацияси» қабул қилинди.
- 1792 – Францияда Биринчи республика ўрнатилди.
- 1791 – АҚШ да «Ҳуқуқлар тўғрисидаги Билль» қабул қилинди.
- 1793 – Людовик XVI қатл қилинди.
- 1793–1794 – Парижда якобинчилар диктатураси ўрнатилди.
- 1795 – Польшанинг учинчи бор тақсимланиши, Польша қироллиги ва Буюк Литва князлиги тутатилди.
- 1796–1797 – Наполеон Италияга юриш қилди.
- 1797 – Франция ва Австрия ўртасида Кампоформия тинчлик шартномаси имзоланди.
- 1798–1799 – Наполеоннинг Миср экспедицияси йиллари.
- 1799 йил 10 ноябрь – Францияда Директория қулади, Наполеон Биринчи консул бўлди, Буюк француз буржуа инқилоби яқунланди.

Глоссарий

Абсолютизм	Давлат бошқарув шакли бўлиб, унда монарх ҳокимияти чекланмаган, давлат марказлашуви-нинг, бироқратик аппарат бошқарувининг, доимий армия ва полициянинг юқори чўққисига эришила-ди.
Арендатор	Белгиланган аренда ҳакки эвазига маълум ер участ-касидан вақтингча фойдаланувчи киши, кўпинча дехқон.
Аскетизм	Туйғу, истакларни ўз хоҳиши билан чеклаш ёки бо-стириш, жисмоний азобларни ўз истаги билан тор-тиш, ҳаёт қувончларидан воз кечиш.
Барокко – (итальян. barocco – мўъжиза-вий, ажойиб)	XVI–XVIII асрнинг ўрталарида Европа мамлакат-ларидаги санъат, архитектура, адабиёт ва мусиқада кенг тарқалган йўналиш.
Бодихон	Маньчжурия, Монголия, Тува, Олтой ва Бурятияда олий диний унвон, 1911 йилгача Цинь сулоласидан бўлган Хитой императорлари ҳам шу унвонга эга бўлишган.
Бомбарда	XV–XVI асрларда тош ўқлар билан отадиган ар-тиллери қуроли.
Бусидо	Японияда самурайларнинг ахлоқ кодекси, дзен-буддизм ва синтоизмнинг тамоилиларига асослан-ган.
«Бред декларацияси» (1660 йил 14 май)	Унга биноан қирол Англия инқилоби пайтида янги зодагонлар ва буржуазия қўлга киритган барча им-тиёзларни тан олди.
Варшава шартномаси (1768)	Православларнинг сиёсий хуқуклари кенгайти-рилиб, католикларники билан тенглаштирилди, Польша устидан Россия протекторати ўрнатилди.
Виглар	Англиядаги сиёсий партия, буржуалашган зодагон аристократияси, йирик савдо ва молия буржуазияси манфаатларини ифода этади, XIX аср ўрталарида либерал партияга асос бўлди.

Вестфал тинчлик сулхи (1648)	Вестфалияning Мюнстер ва Оsnабрюк шаҳарларида имзоланган. Реформация кучлари билан уларнинг душманлари ўргасидаги қарама-қаршиликни якунлади.
Готика – (итал. Gotiko – готларга хос)	XII асрнинг иккинчи ярми – XV асрлар Ғарбий Европа санъатига хос услугб. Ўйғониш даври гуманистлари ўзларидан олдинги санъатнинг «ёввойи» характерини таъкидлаш учун шундай аташган.
Гугенотлар	XVI–XVIII асрларда Францияда протестант-кальвинистлар шундай деб аталган.
Гуманизм	Инсон шахсининг қадрини, унинг ҳуқуқ ва эркини, баҳтга интилиш ва ўз имкониятларини ривожлантириш ҳуқуқини тан оловчи, тарихан ўзгарувчан қарашлар тизими.
Диггерлар	Левеллерлар характеридан ажралиб чиқкан инқилобий демократиянинг ўта ўнг қаноти.
«Денгиз қатнови акти» (1651)	Унга кўра Англияга денгиз орти товарларини олиб кириш ҳуқуқига факат инглиз кемаларигина эга эди.
«Диний бағрикенглик ҳақида декларация» (1687 йили 2 апрель)	Яков II Англияда «Диний бағрикенглик ҳақида декларация»ни имзолади.
«Дўстлик ва Тижкорат Битими» (1778 йил 6 февраль)	АҚШ ва Франция ўргасида имзоланган бўлиб, унга кўра Франция АҚШни тан олди ҳамда савдо-сотик шартномаларини таклиф этди.
Инквизиция	Қидирув, суд ва жазо функцияларини бажарувчи католик черкови трибунали. 1229 йили Тулузда шаҳрида тузилган. 1233 йили Рим папаси Григорий IX нинг маҳсус булласи билан инквизициянинг карори барча католиклар учун мажбурий бўлди.
Индепендентлар	Буржуазия радикал қанотининг ва шакланаётган зодагонларнинг манфаатларини ифода этувчи Англиядаги сиёсий партия; 1649–1650 йиллар ҳокимиятда турган.
«Инсон ва фуқаро ҳуқуклари Декларацияси» (1789 йил 26 август)	Буюк Француз инқилоби даврида Тайсис мажлиси томонидан қабул килинган ҳужжат.

Истамбул шартномаси (1590)	Эрон билан Туркия ўртасида имзоланган. Унга кўра Шарқий Грузия, Шарқий Арманистон, Курдистон, Озарбайжон ва Луристоннинг бир қисми усмонийларга ўтди.
Иқта	Яқин ва Ўрта Шарқ мамлакатларида ҳукмдор томонидан феодалга катта хизматлари эвазига инъом қилинган чек ер.
Индустриал цивилизация	Саноатни ривожлантириш ва илмий-техник тарақкёйтга асосланган цивилизация.
Кальмар унияси	1397 иили Швециянинг Кальмар шахрида Дания, Швеция, Норвегия ўртасида абадий бирлик тўғрисида тузилган акт. Дания қироли Эрик Померанский уч давлатнинг қироли деб эълон қилинган.
Каравелла	XIII–XVII асрларда Ўрта Ер денгизида кенг тарқалган, баланд бортли, бир кема сахнили елканли кема.
Консуллар	Қадимги Римда бир йилга сайланувчи олий лавозимидағи иккита шахс, улар олий фуқаролик ва ҳарбий ҳокимиятга эга бўлган. Буюк француз инқилоби йиллари Францияда учта консуллик жоријий қилинган.
Картезианлик	XVII–XVIII асрларда фалсафа ва табиатшуносликдаги йўналиш, Р. Декарт ғояларига асосланган.
Классицизм	XVII–XIX аср бошларида санъатдаги услуб, антик давр меросига идеал образ, норма сифатида қараган.
Конкистадорлар	Испан босқинчи-авантюристлари.
Либерал	Эркин фикрловчи одам, хурфикр, шаккок киши.
Ливеллерлар	Англиядаги радикал сиёсий партия
Лютеранлар	Мартин Лютер таълимоти тарафдорлари, протестантлар.
Мангалур сулхи (1784)	Иккинчи инглиз-майсур уруши даврида Типу сultonи билан инглизлар ўртасида тузилган.
Масонлар	Инсониятни тинч йўл билан биродарлик иттифоқига бирлаштиришни мақсад қилган диний-этник яширин ҳаракат аъзолари.
Маърифатли Абсолютизм	Моҳияти мавжуд абсолют монархияли давлат шаклини ўзгартирасдан эскириб қолган феодал тартибларни янгилашга қаратилган иқтисодий, маданий ва сиёсий ислоҳотларни «юқоридан» ўtkазиш сиёсати.

Маърифатчилик	XVII–XVIII асрларда Европа мамлакатларида содир бўлган маорифнинг кенг ёйилиши, фаннинг ривожланиши даври; «табиий тартибни» англашда онг ва фаннинг ҳал қилувчи ролига ишончга асосланган, бу эса инсон ва табиатнинг асл моҳиятига мос келади, деб қаралган.
Меркантилизм (французча <i>mercantilisme</i> , лотинча <i>mercante</i> – сотувчи, савдогар)	Феодализмнинг инқирози ва капитализмнинг шаклланиши даврида савдо буржуазиясининг манфаатларини акс эттирувчи иқтисодий таълимот ва иқтисодий сиёsat.
Монополия	Ишлаб чиқариш, савдо қилиш, кондан фойдаланишнинг бир шахсга, шахслар гурухи, давлатга бериладиган имтиёзли хукуқ.
Мустақиллик Декларацияси	Америка Кўшма Штатларини демократик бошқаришнинг хукуқ ва принциплари асосланган биринчи хужжат.
«Мэйфлауэр аҳдлашуви» (1620)	101 нафар пуритан (ота-пилигримлар)дан иборат гурух «Мэйфлауэр» кемасида Виржинияга келди.
Нант эдикти (1598)	Унга биноан Францияда хукмон дин бўлиб католицизм қолди, аммо гугенотларга эркин ибодат қилиш хукуки берилди (Париждан бошқа шаҳарларда).
Нидерланд	Хозирги Бельгия ва Голландия худудларининг тарихий номи, таржимаси «паст ерлар» бўлиб, бу худудлар денгиз сатҳидан пастда жойлашганлиги учун шундай дейилган.
Ништадт сулҳи (1721)	Сулҳга кўра Лифландия, Эстландия, Нидруж ҳамда Эдель ва Даго ороллари Россияга ўтди. Швецияга Финляндия қайтарилди ва эгалланган ерлар учун Россия ҳақ тўлаш мажбуриятини олди.
Обскурантизм (лотинча <i>obscurantis</i> – ёруғликни тўсувчи, коронғу қилувчи)	Маърифат ва фанга ўта душманлик муносабати, жаҳолат.
Пожаревацк сулҳи	Австрия Босния ва Сербиянинг бир кисмини, Словения ва Валахиянинг катта қисмини, шунингдек, Банатни ўз таркибига қўшиб олди.
Прагматик санкция (1723)	Унга биноан таҳт ворислиги жинсидан қатъи назар Габсбурглар сулоланинг ёши катта вакилига ўтадиган бўлди.

Протекционизм (французча protectionnisme – лотинча protectio – панада саклаш, ҳимоя қилиш)	Давлатнинг иқтисодий сиёсати бўлиб, мамлакатга киритиладиган чет эл товарларига юкори бож солиги ўрнатиш, айrim товарларни киритишни чеклаш ёки тўлиқ тақиқлаш йўли билан миллий ишлаб чикаришни чет эл рақобатидан ҳимоя қилишга қаратилган.
Протестантизм	Черковни ислоҳ қилиш учун ҳаракат
Провинциялар интендантлари – (французча intendant – бошқарувчи)	XVII–XVIII асрларда Францияда мавжуд бўлган, провинцияларни бошқариш учун марказдан тайинланадиган маҳсус лавозимли шахс.
Пуританлик (инглизча «rigre» – «тоза»)	Христиан динидаги мазҳаблардан бири. XVI асрнинг иккинчи ярмида Англияда кальвинизм ва ана-баптизм асосида шаклланган, инглиз протестантизмiga муҳолифатда бўлган диний оқим. Пуританлар қатъи эътиқод ва оддий (тоза, номлари ҳам шундан келиб чиқкан) черков маросими тарафдорлари.
Реформация	XV асрда Германияда пайдо бўлган ва Европанинг кўплаб мамлакатларига ёйилган, католик черкови таълимотига ўзгариш киритиш ташаббуси остида ўтган, моҳияти феодализмга қарши қаратилган ижтимоий ҳаракат.
Реституцион эдикт (1629)	Бу хужжат 1552 йилдан бери протестантлар томонидан эгалланган (секуляризация қилинган) ерларга католик черковининг хукуқини тиклашни кўзда тутарди.
Саноат тўнтариши	Қўл меҳнатига асосланган мануфактура ишлаб чиқаришидан машиналар қўлланиладиган завод ва фабрика ишлаб чиқаришига ўтиш.
Сен-Жермен келишви (1570)	Франциянинг Сен-Жермен шаҳрида қирол томонидан имзоланган эдикт. Унга кўра гугенотлар ҳам давлат мансабларини эгаллаш хукуқига эга бўлдилар.
Секуляризация	Ижтимоий институтларни дин ва черковдан ажратиш.
Сёгун	Умумяпон ҳарбий бошлиғи, император номидан давлатни бошқарган.
Схоластика (грекча scholasticos – мактабга мансуб)	Ўрта аср «мактаб фалсафаси». Уларнинг фаолиятида универсалийлар ҳақида баҳс асосий ўрин тутади.

Талер	Кумуш танга, XII–XVIII асрларда Европада кумуш стандарти бўлиб ҳисобланган.
Тортесильяс шартномаси (1494)	Унга мувофиқ Азор оролларидан ғарбда жойлашган ерларга эгалик қилиш хукуки Испанияга, шарқда жойлашган ерларга эгалик қилиш хукуки Португалияга берилди.
Тоталитар (лотинча totalitas – яхлит, тўлиқ)	Жамиятнинг ҳамма жабхаларини тўлиқ қамраб олган ҳукмрон ғоя, мафкура ёки сиёсий тузимга нисбатан қўлланилади.
Устурлаб (астролябия)	Денгизда географик кентлик ва узунликни анилашда ёрдам берадиган бурчак ўлчайдиган асбоб.
Утрехт унияси (1579)	Нидерландиянинг еттига шимолий вилоятлари ўргасида «худди битта вилоят каби абадий бирлашиш» тўғрисида тузилган иттифоқ.
Фатализм (лотинча fatalis – қисмат)	Антидиалектик дунёқараш концепцияси бўлиб, унга кўра оламдаги ҳамма жараёнлар зарурият такозосига бўйсунади, эркин танлаш ва ижодга ўрин қолдирмайди, ҳаммаси олдиндан белгилаб қўйилган.
Фуқаролик жамияти	Озод, мустақил ва тенг хукуқли инсонлардан ташкил топган жамият.
«Фуқаролар ҳакида патент» (1781)	Чехия, Моравия, Силезия ва Галицияда крепостной хукуқ бекор қилинди.
Эпигенез назарияси – (юнонча genesis – келиб чиқиш)	Эмбриогенезда органлар, дастлаб структурасиз бўлган эмбрион массасидан аста-секин шаклланиди деб тушунирувчи назария.
Экстерриториаллик	Чет эллардаги дипломат ёки компаниянинг фақат ўз давлати қонунларига бўйсуниши.
«Эркинликнинг буюк хартияси»	1225 йили Англияда қабул қилинган қонун.
Ҳокимиятнинг бўлининиши	Ушбу принципга биноан давлатда ҳокимият учта мустақил қисмларга бўлинади (ижро, қонун чиқарувчи ва суд).
Хукукий давлат	Фуқароларнинг хукуқ ва эркинликлари ҳамда уларнинг ҳимояси амалда таъминланган давлат.

Тавсия этилган адабиётлар рўйхати:

1. Азархин В., Горский В. Научная истинна и судьба ученого: Коперник, Бруно, Галилей. М., 1984.
2. Альбедиль М.Ф. Индия: беспределльная мудрость. М., 2005.
3. Бассан Ф. Людовик XIV, король-артист. М., 2002.
4. Безотосный В.М. Наполеоновские войны. М.: Вече, 2010.
5. Борзова Е.П. История мировой культуры. – СПб.: Лань, 2002.
6. Бродель Ф. Материальная цивилизация, экономика и капитализм XV–XVIII вв. Т. 1. Гл. 1. М., 1986 (биологический «старый порядок»); Т. 2. Гл. 5. М., 1988. (общество и государство).
7. Бродель Ф. Что такое Франция? Кн. 1. «Пространство и история». М.: Изд-во им. Сабашниковых, 1994; кн. 2. «Люди и вещи». Ч. 1. М., 1995; Ч. 2. М., 1997.
8. Васильев Л.С. Всеобщая история: Учеб. пособие: В 6 т. Т. 3. От Средних веков к Новому времени (XVI–XVIII вв.). М.: Высшая школа, 2008.
9. Васильев Л.С. История Востока. М., 2003.
10. Вилар Пьер. История Испании. – М.: АСТ·Астрель, 2006.
11. Вебер М. Протестантская этика и дух капитализма // М. Вебер. Избранные произведения. М., 1990.
12. Всемирная история. Весь школьный курс в таблицах / сост. М.Ю. Дуда. – Минск: Современная школа: Кузьма, 2011.
13. Всемирная история: учебник для вузов / Под ред. Г.С. Поляка, А.Н. Марковой. – М.: ЮНИТИ, 2000.
14. Всеобщая история / С.В. Новиков, А.С. Маныкин, О.В. Дмитриев. – М.: АСТ: СЛОВО: Полиграфиздат, 2012.
15. Водарский Я.Е. Население России за 400 лет (XVI – начало XX в.). М., «Просвещение», 1973.
16. Гизо Ф.П. История цивилизации в Европе. М.: Территория будущего, 2007.
17. Графский В.Г. Всеобщая история государства и права. – М., 2000.
18. Данилевский Н.Я. Россия и Европа. М., 1995.
19. Дорогова Л.Н. Западноевропейская культура Нового времени. – М., 2001.
20. Душенко К.В. Всемирная история в изречениях и цитатах. – М.: Эксмо, ИИИОН РАН, 2008.
21. Дэвис Н. История Европы. М.: АСТ, 2006.

22. Елисеев В.ИД. Цивилизация классического Китая. М., 2007.
23. Загладин Н.В. Всемирная история: ХХ век: Учебник для 11 класса общеобразовательных учреждений. – 8-е изд. – М.: ООО «ТИД «Русское слово – РС», 2006.
24. Искусство нового времени. СПб., 2000.
25. История Австрии с древнейших времен до 1792 г.: П.П. Митрофанов – Санкт-Петербург, Краснодар, 2010.
26. История международных отношений: основные этапы с древности до наших дней: Учеб. пособие. М.: Логос, 2007.
27. Истрия мировых цивилизаций: учебное пособие / коллектив авторов; под науч. ред. Г.В. Драча, Т.С. Паниотовой. – М.: КНОРУС, 2012.
28. История России с древнейших времен до начала XXI века: учебное пособие для студентов вузов / М.М. Горинов, А.А. Горский, А.А. Данилов и др. – 6-е изд., пересмотр. – М.: Дрофа, 2005.
29. История России с древнейших времен до конца XVII века / Под ред. Л.В. Милова. М., 2006.
30. История России XVIII–XIX вв. / Под ред. Л.В. Милова. М., 2006.
31. История Средних веков: В 2 т. / Под ред. С.П. Карпова. Изд. 5-е. М.: МГУ, 2005.
32. История США. В 4-х томах. – М., 1983.
33. История Франции / Ин-т всеобщей истории АН СССР; отв. ред. А.З. Манфред. В 3 т. М.: Наука, 1972, 1973.
34. История южных и западных славян. Том 1. Средние века и новое время / Под ред. Г. Матвеева. Из-тво МГУ, 2001.
35. Кантемирова Р.И. Новая история стран Европы и Америки: Учебно-методические материалы для студентов 2–3 курсов по специальности «032600 – История». – Стерлитамак: Стерлитамакский гос. пед. ин-т., 2003.
36. Карл Вацелка. История Австрии. М., 2007.
37. Кастр P. de. Мирабо. М., 2008.
38. Кертман Л.Г. География и культура Англии. – М.: «Высшая школа», 1979.
39. Колесов В.П., Осьмова М.Н. Мировая экономика. Экономика зарубежных стран. М., 2000.
40. Контрольно-измерительные материалы. История Нового времени: 7 класс / Сост. К.В. Волкова. – М.: ВАКО, 2011.
41. Культурология: История мировой культуры. Учебное пособие / Под ред. А.Н. Марковой. – М., 1995.
42. Лампрехт К. История германского народа: пер. с нем. М., 1995.
43. Ларин Е.А. Латиноамериканская цивилизация. – М., 2007.
44. Ливи Баччи, Массимо. Демографическая история Европы / Серия «Становление Европы» / Пер. с итал. А. Миролюбовой. – СПб.: «Александрия», 2010.

- 45.
46. *Мак-Нил У.* Восхождение Запада. История человеческого сообщества. Киев; М., 2004.
47. *Маныкин А.С.* Новая и новейшая история стран Западной Европы и Америки. М.: Слово; Эксмо, 2004.
48. Национальная идея в Западной Европе в Новое время. М., 2005.
49. Новая история стран Азии и Африки. XVI–XIX вв. : Учебник для студ. высш. учеб. заведений / (A.M. Родригес и др.); под ред. A.M. Rodrigueza: в 3 ч. – М.: Гуманитар. изд. центр ВЛАДОС, 2008.
50. Новая история стран Европы и Америки / (Виноградов В.Н. и др.) – М.: Дрофа, 2005.
51. Новая история стран Европы и Америки: Учебник для вузов / Под ред. И.М. Кривогузова. – М.: Дрофа, 2003.
52. *Понамарев М.В., Смирнова С.Ю.* Новая и новейшая история стран Европы и Америки: Практическое пособие: Учебное пособие для студентов высш. учеб. заведений: В 3 ч. –М.: Владос, 2000.
53. *Садохин А.П., Грушевицкая Т.Г.* Мировая художественная культура. – М., 2000.
54. Сборник документов по истории нового времени стран Европы и Америки (1640–1870 гг.). – М.: «Высшая школа», 1990.
55. *Сенченко А.И.* Государство и право, история и культура Великобритании и США. – М., 2005.
56. *Сурдель Д. и Ж.* Цивилизация классического ислама. – Екатеринбург, 2006.
57. *Тарле Е.В.* Политика. – М., 2011.
58. *Тарле Е.В.* Очерки истории колониальной политики западноевропейских государств (конец XVI – начало XIX в.). – М.–Л., 1965.
59. *Теплянов С.* Век Наполеона. Реконструкция эпохи. – Барнаул: Изд-во «ИПП «Алтай». 2011.
60. *Тойнби А.Дж.* Постижение истории. М., 1999.
61. *Трещёткина И.Г.* Всемирная история в таблицах и схемах. – СПб.: ООО «Виктория плюс», 2011.
62. *Тюлар.Ж.* Наполеон, или Миф о «спасителе». – М.: Издательство АО «Молодая гвардия», 2012.
63. *Уэллс Г.Д.* Всеобщая история мировой цивилизации. 2-е изд. – М.: Эксмо, 2007.
64. *Фергюсон А.* Опыт истории гражданского общества. – М., 2002.
65. Философия истории: Учеб. пособие / Под ред. проф. А.С. Понарина. М.: Гардарики, 1999.
66. *Фильшинский И.М.* История арабов и Халифата (750–1517 гг.). Изд. 3-е. – М.: ACT: Восток-Запад, 2006.

67. *Фортунатов В.В.* История: Учебное пособие. Стандарт третьего поколения. Для бакалавров. – СПб.: Питер, 2012.
68. *Фортунатов В.В.* История мировых цивилизаций. СПб.: Питер, 2011.
69. *Хайдеггер М.* Бытие и время. М., 2007.
70. *Хантингтон С.* Становление цивилизаций. М., 2003.
71. *Хешнелл Н.* Миф абсолютизма. СПб., 2003.
72. Хрестоматия по новой истории. В 3-х томах. – М.: «Мысль», 1963–1965.
73. *Черкасов П.П.* Кардинал Ришельё. – М.: «Международные отношения», 1990.
74. *Чудинов А.В.* Французская революция. История и мифы. М., 2007.
75. *Шпенглер О.* Закат Европы. М., 1993.
76. *Штакмар В.В.* История Англии в средние века. – М.: Из-тво Алатея. 2005.
77. *Шоню П.* Цивилизация Просвещения. Екатеринбург, 2008.
78. *Шоню П.* Цивилизация классической Европы. Екатеринбург, 2005.
79. *Элиас Н.* О процессе цивилизации. Т.1, 2. М.; СПб., 2001.
80. *Якимович А.К.* Новое время. Искусство и культура XVII–XVIII веков. М., 2004.
81. *Ян Мелин А.Ю., Альф В. Юханссон, Сюзанна Хаденберг.* История Швеции. – М.: Из-тво «Весь Мир». 2007.
82. *Ясперс К.* Смысл и назначение истории. М., 1991.

МУНДАРИЖА

Кириш.....
I БЎЛИМ. ЕВРОПАДА ЯНГИ ДАВРНИНГ БОШЛАНИШИ
I Б О Б. Буюк географик кашфиётлар ва мустамлака тизимининг шаклланиши
II б о б. Янги давр бошларида Европанинг ижтимоий-иқтисодий қиёфаси
III б о б. Уйғониш даври Европа маданияти..... Уйғониш манбалари.....
XV аср охирлари – XVII асрнинг биринчи ярмida Ғарбий Европа санъати
XVI–XVIII асрларда фан тараққиёти
IV б о б. XVI–XVIII асрларда қироллик ҳокимииятининг кучайиши. Абсолютизм
V б о б. Реформация ва Европада абсолютизмнинг мустаҳкамланиши..... Германияда Реформациянинг бошланиши
Европада Реформациянинг тарқалиши. Католик черковнинг Реформацияга қарши кураши.....
Кироллик ҳокимияти ва Англияда Реформация. Денгизда хукмронлик учун кураш
Францияда диний урушлар ва абсолют монархиянинг мустаҳкамланиши
Нидерландиядаги инқилоб
II БЎЛИМ. ЕВРОПАДА ИНДУСТРИАЛ ЦИВИЛИЗАЦИЯНИНГ ШАКЛЛАНИШИ.....
VI б о б. XVI–XVIII асрларда Англия
Англия буржуа инқилоби
Инқилобнинг яқунланиши. Англиянинг конституцион монархияга айланниши
XVIII асрда Англия
VII б о б. Маърифатчилик асри
Ижтимоий-сиёсий ғоялар ривожи
Маърифатчилик асри бадиий адабиёти.....

VIII б о б.	XVII–XVIII асрларда Франция.....
Тараккиётнинг асосий йұналишлари	
Франция XVIII асрда. Буюк француз буржуа инқилобининг сабаблари ва бошланиши.....	
Буржуазия ҳокимият тепасида.....	
Яқобинчилар диктатурасининг туғилиши ва ҳалокати	
Инқилобнинг тугатилиши. Буюк француз буржуа инқилобининг тарихий аҳамияти.....	
III БҮЛІМ. ЯНГИ ДАВРДА ЕВРОПА МАМЛАКАТЛАРИ	
IX б о б.	XVI–XVIII асрларда Германия.....
X б о б.	XVII–XVIII асрларда Габсбурглар империяси
XI б о б.	XVI–XVIII асрларда Россия
Марказлашган давлатнинг ташкил топиши.....	
Пётр I нинг ислохотлари. Россия империясининг шаклланиши	
Ташки сиёсат.....	
Рус миллатининг шаклланиши. Маданият	
XII б о б.	XVI–XVIII асрларда Италия
XIII б о б.	XVI–XVIII асрларда Испания
XIV б о б.	XVI–XVIII асрларда Польша
XV б о б.	XVI–XVIII асрларда Болқон халқлари
XVI б о б.	XVI–XVIII асрларда Шимолий Европа мамлакатлари
IV БҮЛІМ. ЯНГИ ДАВРДА АМЕРИКА МАМЛАКАТЛАРИ	
XVII б о б.	XVII–XVIII асрларда Шимолий Америка
Америкадаги дастлабки мустамлакалар	
Америка инқилоби. Мустакиллик учун кураш. АҚШнинг ташкил топиши	
XVIII б о б.	XVI–XVIII асрларда Лотин Америкаси мамлакатлари
V БҮЛІМ. XVI–XVIII АСРЛАРДА ОСИЁ МАМЛАКАТЛАРИ	
XIX б о б.	Янги даврда анъанавий цивилизация мамлакатлари
XX б о б.	XVI–XVIII асрларда Хитой
Хитой Минлар сулоласи ҳукмронлиги остида	
XVII–XVIII асрларда Хитой.....	
XXI б о б.	XVI–XVIII асрларда Ҳиндистон
Ҳиндистонда Бобурийлар империяси	
XVIII асрда Ҳиндистон.....	
XXII б о б.	XVI–XVIII асрларда Япония.....
Япония тарқоқлик ва фуқаролар урушлари даврида	
Япония Токугавалар сёгүнати даврида	

XXIII б о б. XVI–XVIII асрларда Корея	
XXIV б о б. XVI–XVIII асрларда Мўгулистан	
XXV б о б. XVI–XVIII асрларда Жануби-Шарқий	
Осиё мамлакатлари	
XXVI б о б. Усмонийлар империяси.....	
Усмонийлар империяси инқирозининг бошланиши	
XXVII б о б. XVI–XVIII асрларда Эрон.....	
XXVIII б о б. XVI–XVIII асрларда Афғонистон	
XXIX б о б. XVI–XVIII асрларда Осиёдаги араб мамлакатлари.....	
Сурия Усмонийлар империяси таркибида	
Ироқ Усмонийлар империяси таркибида	
Арабистон ярим ороли.....	
VI БЎЛИМ. XVI–XVIII АСРЛАРДА АФРИКА ХАЛҚЛАРИ	
XXX б о б. Африкадаги араб мамлакатлари	
XXX б о б. XVI–XVIII асрларда Ғарбий Африка мамлакатлари	
Хулоса	
Хронология	
Глоссарий.....	
Адабиётлар рўйхати.....	

Ҳозирги замон цивилизациясининг шаклланиш жараёнига Буюк географик кашфиётлар, «нарх-наво инқилоби» ва улар оқибатида умумжаҳон бозори ва мустамлака тизимининг шаклланиши катта туртки бўлди. Натижада дунёвий фан ва маданият ривожланди, инсоннинг шаъни, қадр-қиммати тушунчалари кенг омма орасида қарор топди, шахснинг ташаббускорлиги ва тадбиркорлиги сингари хусусиятларига кенг йўл очилди, кишиларнинг дунёкараши ва ҳётида кескин ўзгаришлар юз берди. Бу давр жаҳон цивилизациясининг тезкор тараққиёт даври бўлиб, кейинчалик индустрисал цивилизация номини олди.

Ўқув қўлланмада жаҳон тарихининг янги даврини ҳозирги замон цивилизациясининг шаклланиш тарихи сифатида ёритишига ҳаракат қилинган.

Великие географические открытия, «революция цен» и, как следствие, формирование мирового рынка и колониальной системы оказали огромное влияние на становление современной цивилизации. В итоге произошло развитие науки и культуры, в массах сложилось представление о чести и достоинстве человека, открылись широкие возможности для проявления инициативы и предприимчивости, произошли коренные изменения в мировоззрении и жизни людей. Этот период в развитии человечества, впоследствии получивший название индустриальной цивилизации, явилось временем ускоренного развития мировой цивилизации.

В учебном пособии предпринята попытка освещения периода нового времени всемирной истории как истории формирования современной цивилизации.

Great geographical discoveries, price revolution and, as a result of this process, the world market and colonial system were formed and they greatly influenced on the development of Modern Civilization.

In consequence with it, the science and culture established, the concepts of the honor and self-respect around Common people arose, great opportunities for initiative and making business opened.

The essential changes in world outlook and human life appeared.

This period in development of humanity which was afterwards named as an industrial civilization was the time of accelerated progress world civilization.

The effort of highlighting of contemporary period of world history as key moments of forming modern civilization was made in the given textbook.

Адабий-бадиий нашр

ШУҲРАТ ЭРГАШЕВ

ЖАҲОН ТАРИХИ (Янги давр. 1-қисм. XVI–XVIII асрлар)

Мухаррир *I. Аҳмедов*

Бадиий мухаррир

Рассом

Техник мујаррир *T. Харитонова*

Мусаххих

Компьютерда тайёровчи *F. Тугушева*

Нашриёт лицензияси AI № 158, 14.08.09.

Босишига руҳсат этилди 00.00.2013. Офсет қоғози.

Бичими 00×00¹/₃₂.

«Times» гарнитурасида оғсет усулда босилди.

Шартли босма табоги .

Нашр табоги . Адади 0000 нұсха.

Буюртма № 000

Ўзбекистон Матбуот ва ахборот агентлигининг

«O'zbekiston» нашриёт-матбая ижодий уйи.

100129, Тошкент, Навоий кўчаси, 30.

Телефон: (371) 244-87-55, 244-87-20

Факс: (371) 244-37-81, 244-38-10.

e-mail: uzbekistan@iptd-uzbekistan.uz

www.iptd-uzbekistan.uz